

ابن حزم

رواية

هاني أبو طالب

اسم الكتاب : ابن عزيز  
اسم المؤلف : هاني أبو طالب

رقم الإيداع : ٢٠١٨ / ١٥٤٦٨

الترقيم الدولي : 978 - 977 - 835 - 050 - 0

صفحة الكاتب على الفيس بوك : (هاني أبوطالب ) باللغة العربية

<https://www.facebook.com/profile.php?id=100002373058686>

صادر عن مؤسسة زحمة كتاب للثقافة والنشر

١٥ ش السباق – مول المرييلاند – مصر الجديدة

[www.za7ma-kotab.com](http://www.za7ma-kotab.com)

[www.facebook.com/za7ma](http://www.facebook.com/za7ma)

[www.facebook.com/za7makotab](http://www.facebook.com/za7makotab)

[za7ma-kotab@hotmail.com](mailto:za7ma-kotab@hotmail.com)

جميع حقوق الطبع والنشر محفوظة

لمؤسسة زحمة كتاب للثقافة والنشر

المشهرة قانوناً بسجل تجاري رقم / ٨٤٤٨٦

(المال خادِمٌ جيدٌ ولكنه سيءٌ فاسدٌ)

(دائماً يكون المال وبائلاً على صاحبه)

(المال لا يجلب السعادة ولكنه يسمح لنا به أن نعيش تعاستا برفاهية)

(المال أرقام والأرقام أبدأ لا تنتهي فإننا كنت محتاج المال لتكون سعيداً فنجعلك عن السعادة أبداً لن ينتهي)

(إن وضعت المال فوق رأسك خفضك و إن وضعته تحت قدمك رفعك)

(لم يشنوا أحدٌ وفي جيبه مالٌ)

(النهايات نادرًا ما تكون سعيدة)

تأملوها جيداً

هاني أبو طالب

# الإهداء

إلى صديقي الغالي الذي قال لي ذات يوم (أنت موهوب وستصل إلى حلمك )

المخرج / أحمد لمنسي

إلى مديرة مدرستي التي كانت أول من آمن بموهبتي في الكتابة

السيدة الفاضلة / أمل شعبان

إلى أول من تقرأ ما أكتب وتنتقده نقداً بناءً

الأستاذة / فاطمة محمود رفعت

إلى رفاق الدرب وأصدقاء الكفاح

مصطفى فتحي - أحمد ممدوح - سيد عاشور

إلى ريحانتي حياتي وسندسها

ريثال وريماس

إلى من رزقني الله بها وأيقنت أنها أجمل أرزاق

زوجتي الغالية

هاني أبو طالب

أبو البنات



## أقارب عقارب

كان "عزيز الدمرداش" كعادته بعدما فرغ من جميع أعماله المكتبية يجلس أمام التلفاز يقلب في قنواته المملة علّه يجد ما يثلج صدره ولكن بلا فائدة حتى قطعت لحظات صمته طرقات على باب مكتبه وما هي إلا ثواني ودخلت "منى" السكرتيرة قائلة :

- في ناس عايزين يقابلوا حضرتك ، ومصممين أوي يا فندم  
اعتدل "عزيز" في جلسته مهتماً ثم قال متسائلاً :

- في ميعاد سابق!؟

أومأت "منى" بالرفض فقال لها بعدما نفخ دخان سيجارته بقرف :

- قوليلهم مش موجود ، مليش مزاج أقابل حد

خرجت السكرتيرة من فورها ثم عادت بعد دقيقتين قائلة :

- رافضين يمشوا يا فندم بيقولوا إنهم ...

ترددت قليلاً ثم قالت :

- قرايب حضرتك من البلد  
بتأفف ظهر جلياً على وجهه وقف " عزيز " وذهب إلى مكتبه وجلس عليه  
وبعد ثواني من التفكير قال محدثاً نفسه :
- مش هنخلص من أم الموضوع ده .... يا ساتر  
ثم قال لـ "منى" أمراً :
- خليهم يتنيلوا يدخلوا  
خرجت السكرتيرة وظل "عزيز" على مكتبه ممسكاً بقلم ويضرب به المكتب  
بشدة من التوتر ، حاول تهدئة أنفاسه المضطربة ، كان يعرف القادمون إليه ،  
يعرف ماذا يريدون منه ؟ ، لذلك لم يكن يحب مقابلتهم ، كان يعرف أيضاً  
الموضوع الذي أتوا ليتحدثوا فيه ، فالمشهد قد تكرر أكثر من مرة قبل ذلك .  
فُتح الباب ودخل الرجل الاول "محسن" الشقيق الأكبر له وهو رجل يرتدي  
جلباباً واسعاً ويحمل أعلى شفثيه شارباً كبيراً ، وخلفه شاب يرتدي قميصاً  
مقلماً وبنطالاً أسود من القماش ، حاول "عزيز" أن يتصنع ابتسامة انتزعها  
من نفسه بالكاد ووقف قائلاً :
- يا مرحب يا مرحب يا "محسن" يا أخويا .... نورت  
سَلِّم "محسن" على "عزيز" وجلس على الكرسي الذي أمامه وكذلك الشاب  
جلس في مواجهته ثم قال " محسن " بنبرة مصطنعة :
- إزيك يا أخويا عامل إيه ؟  
بتأفف فشل في إخفائه قال "عزيز" :
- بخير الحمد لله .... خير إيه سر الزيارة الغربية دي ؟  
بدت الكلمة عادية وكأن " محسن " تعود عليها من "عزيز" فقال :
- جاي أسلم عليك يا أخي ، هو مش انت برضه أخويا ، هو الدم عمره  
يبقى ميا يا أخويا ولا الضفر عمره يطلع من اللحم يا ولد أبوي  
أوماً "عزيز" برأسه مستنكراً ثم استند بظهره على كرسيه قائلاً :

- بقولكم إيه من غير لت وعجن انتوا عايزين إيه من الآخر  
 حاول "محسن" أن يحافظ على رباطة جأشه فقال باسترحام :

- ليه المقابلة الناشفة دي ، وبعدين انت ليه بتعاملنا على إننا شحاتين  
 دا احنا إخوانك يا أخي يعني سنك ، خايفين عليك ، نفسنا نحط  
 إيدنا في إيدك ونقوى بيك ونقويك وخصوصاً أنت وحداني لا ليك  
 عيل ولا تيل

يبدو أن الكلمة الأخيرة – المقصودة طبعاً – قد أشعلت النار التي في صدر  
 "عزيز" فأمسك بسيجارة من علبة كانت أمامه وأشعلها في غضب بعدما أطفأ  
 التي انتهت ثم قال :

- آه خايفين عليا ، متقلقوش أنا مش محتاج حد جنبي وعلى فكرة يوم  
 ما هحتاج حد فـ انتوا آخر ناس هفكر فيها  
 باستنكار وبرود قال "محسن" :

- آخر ناس ، ليه يعني ، يا أخويا

قاطع "عزيز" وهو يقف من على كرسيه ويعطيهم ظهره قائلاً :

- عايزين تعرفوا ليه يعني ، أنا هأقولكم ، عشان انتو طماعين ،  
 طمعانيين في الثروة بتاعتي اللي عملتها بعرقى وكفاحي ، عايزين  
 تورثوني بالحيا .... ده بعدكم ، طول ما أنا عايش وفيا الروح مش  
 هتنولوا جنيه واحد مني

خرج الشاب أخيراً عن سكوته ثم قال :

- انت ليه بتعاملنا كده ، احنا مش شحاتين جايبين نشحت منك ، احنا  
 لينا حق عليك ولا انت خلاص مبقتش تميز.... إيه ؟ هي الفلوس  
 عمت عنك عن الحقيقة ، انت إيه يا أخي ، مفيش ف قلبك رحمة ،  
 مش الخير والنعيم اللي انت فيه هي فلوس أبوك اللي خدتها زمان ،  
 الفلوس دي مش لينا فيها زي ما ليك بالظبط

صفق "عزيز" مبتسماً ثم جلس على كرسية وقال :

- وإيه كمان ، كمل أنا سامعك ، حلوين أوي البقين دول ، يسلم اللي حفظهم لك

أكمل الشاب كلامه غير مبالياً بسخرية "عزيز" قائلاً :

- أنا عمري ما شفت حد في قساوتك ، قلبك ده إيه ... حجر ، ازاي يبقى أخونا معاه أكبر شركات في مصر واحنا عايشين كده ، انت إيه يا جدع مبتحشش ، لكن لأ ... الفلوس دي زي ما انت ليك فيها احنا كمان لينا فيها حق زيك بالظبط

ضحك "عزيز" ضحكة مستفزة ثم قال :

- عال والله عال ، العيل أبو ريالة دلوقتي طلع ليه لسان وبقي بيقول حق ، ع العموم أنا عملت اللي عليا وزيادة ، وبيعتمكم كل شهر اللي يكفيكم وزيادة ، غير كده ... متعلموش

حينها قال " محسن " :

- يا ولد أبوي انت لوحديك لا عيل ولا تيل ، خرينا جملك

كان يقصد أن يكرر تلك الكلمة فوقف "عزيز" مقاطعاً :

- معلش ، أنا عايز أبقي لوحدي ، مضطر أنهى المقابلة دي عشان عندي شغل

نظر الأخوان إلى بعضهما ثم قال "محسن" :

- انت بتطردنا من مكتبك يا "عزيز" ، مكانش العشم يا ولد أبوي ، ربنا يسامحك ، تفتكر لو أبوك كان عايش كان هيسيبك تعمل فينا كده

محافظةً على نفس نبرة الغضب قال "عزيز" :

- لو أبوك كان عايش وكان طمعان في فلوسي وجاي يعايرني عشان أنا  
مبخلفش كنت طردته زي ما طردتكم ، ومع السلامة المقابلة انتهت  
أنا مش فاضي ورايا شغل  
خرج الأخوان دون أن يتفوها بأي شيء وجلس "عزيز" على كرسي مكتبه وهو  
يتأفف :

- اخوات قال ، دول عقارب مش اخوات  
وبينما هو كذلك طرق الباب شخص ما ، ثم دخل دون أن يسمع الإذن  
بالدخول يبدوا أنه كان معتاداً على ذلك ، كان ذلك الشخص "فهمي" الذراع  
الأيمن له ، ثم قال بعدما لاحظ التغيير الذي بدأ واضحاً على وجه "عزيز" :  
- من دول اللي لسه خارجين من عند حضرتك يا فندم وإيه اللي منرفك  
كده

بإشارة من يده أجلس "فهمي" الذي انتظر تعليقاً أو رداً على كلامه فقال  
"كامل" أخيراً بعد نفخة أخيرة في سيجارته قبل أن يدفنها في قبرها الأخير  
الذي دفن فيه مئات الوحيدات قبلها :

- دول اخواتي يا سيدي ، تصور يا "فهمي" عايزين يورثوني بالحيا ،  
وكمان بيعايروني عشان مبخلفش ، أنا لو هرمي فلوسي في الأرض  
والله ما هخليهم يطولوا منها جنيه  
أوماً "فهمي" متفهماً الأمر ، ثم قال مواسياً :

- بعد الشر على حضرتك يا فندم ، على فكرة صحيح بالنسبة لموضوع  
الخلفة ده ، إيه أخبار نتايح التحاليل اللي حضرتك سافرت تعملها في  
أوربا

سكين أخرى قد تلقاها "عزيز" في قلبه ، فقد تَدَكَّرَ سفره الأخير إلى أكبر  
مستشفيات أوربا وكلها أكدت أنه سليمٌ تماماً من أي عيب يجعله لا يُنجب



ابتسم "فهمي" ثم قال باستغراب وخبث :

- عمل إيه .. عمل الي الناس كلها بتعمله عشان تخلف

كانت مزحة "فهمي" في غير وقتها ولذلك لم ترق لـ "عزيز" الذي قال :

- لا مش قصدي يا بنى آدم إنت ، طب أقولك ... اندهولي بسرعة

باستغراب أذعن "فهمي" للأمر ورفع سماعة الهاتف الداخلي وبسرعة تحدث إلى السكرتيرة قائلاً :

- ابعتي لـ "سعد" بسرعة ، بلّغيه إن "عزيز" بيه عايزه ضروري

وضع "فهمي" سماعة الهاتف وعاد إلى كرسيه في حيرة ، كان يحاول أن يقرأ ما يدور في رأس "عزيز" ولكنه كالعادة فشل ، فظل يحدق النظر في وجهه الذي بدأ عليه التوتر والقلق .

أخرج "عزيز" سيجاراً من العلبة التي أمامه وأشعلها بسرعة وبدأ يستنشق دخانها ويبعثه إلى الهواء بسرعة جنونية ، لحظات قليلة حتى طُرق الباب ثم انفتحت ودخلت السكرتيرة قائلة :

- "سعد" بره يا فندم أخليه يدخل لحضرتك

بإشارة من يده أذن لها بأن تُدخِله ، فانصرفت وبعد ثواني دخل "سعد" على استحياء قائلاً :

- صباح الخير يا "عزيز" بيه

وقف "عزيز" واقترب من "سعد" وقال له بلين وهو يمد يده بورقة فئة خمسين جنياً :

- ازيك يا "سعد" وألف مبروك على المولود الجديد ، خد دي اشترتي

حاجه للبيبي خليه ينسبط يا سيدي

كان المبلغ كفيلاً بأن يجعل "سعد" يطير من الفرحة فقال :

- ربنا يخليك يا بيه ويفرح قلبك دنيا وآخرة ، دي كتيرة أوي

عاد "عزيز" إلى مكانه - في وسط نظرات "فهمي" المستفهمة والغير مصدقة  
ما يحدث - وجلس في مكانه قائلاً :

- يا راجل متقولش كده دي حاجة بسيطة ، بس قولي يا "سعد"  
بسرعة منقطة النظير قال "سعد" :

- تحت أمرك يا بيه

سكت "عزيز" قليلاً ليجمع شتات تفكيره ثم قال :

- أنا سمعت إنك كنت مبتخلفش وبعدين خلفت يا ترى إيه السبب  
ابتسم "سعد" فرحاً ثم قال :

- يا بيه كله بإرادة وتساهيل ربنا والبركة في الشيخ "حبظلم"  
باستغراب رد "عزيز" :

- الشيخ "حبظلم" وده بتاع إيه ده كمان

- يا بيه أنا ومراتي قعدنا سنين نلف ع الدكاترة ونبلع في أدوية لما  
اتهرينا وفقدنا الأمل خالص في الموضوع ده ، وف يوم كانت الجماعة  
بتاعتي قاعدة مع واحدة جارتنا وقالتها يمكن معمولكم عمل ودلّتها  
على الشيخ "حبظلم" عشان يفك العمل ده  
نظر "عزيز" إلى "فهمي" وكأنه يطلب منه رأيه في هذا الكلام ف وقف الأخير  
ثم قال :

- يا راجل حد برضه يصدق شغل الدجل والشعوذة ده ، وأنا شايف إن  
ده كله تخاريف ، أنا عمري ما صدقت في الكلام ده  
بسرعة رد "سعد" :

- أنا كنت زي حضرتك كده يا أستاذ "فهمي" لغاية لما رحنت و أتأكدت  
بنفسي

عصّ "عزيز" على شفّتيه وأعطى ورقة وقلم لـ "سعد" قائلاً :

- ماشي يا "سعد" اكتب عنوان الراجل ده هنا ، وألف مبروك تاني على البيبي ويتربى في عزك  
نفذ "سعد" الأمر بسرعة قائلاً :
- ربنا يبارك في جنابك يا بيه
- انصرف "سعد" ، وأمسك "عزيز" بالورقة وظل ينظر فيها سارحاً ، ويبدوا أن "فهيم" قد فهم ما يدور في رأسه فقال :
- إيه يا "عزيز" بيه حضرتك بتفكر في إيه  
أخرج "عزيز" نفساً ساخناً من داخل جوفه وقال :
- مش عارف يا "فهيم" حاسس ان العلاج حيكون على ايد الشيخ  
حظلم ده  
قال "فهيم" مصححاً :
- "حبظلم" يا فندم ، بس أنا شايف إن الراجل ده نصّاب ومفيش  
فايدة من أنك تروح الأماكن اللي زي دي  
وضع "عزيز" يديه على رأسه ودار بكرسيه حتى أعطى ظهره لـ "فهيم"  
قائلاً :
- اللي خلاني سافرت أوربا عشان الموضوع ده ، ومش هيخليني أروح  
للراجل ده
- يا فندم ده أكيد راجل نصّاب ومش هيعمل حاجة  
دار "عزيز" مرة أخرى بالكروسي ثم قال :
- مفهاش حاجة لو نجرب ، وبعدين مش عارف ليه أنا متفائل  
بالموضوع ده ، وإيه رأيك إنت حتيجي معايا  
ظهر الخوف جلياً على وجه "فهيم" ثم قال :
- مع إنني مبحبش أروح الأماكن اللي زي دي ، بس مقدرش أقول  
لحزرتك لأ ، ولا أقدر أسيبك في موقف زي ده

ضحك "عزيز" ثم قال :

- ماشي ، يا "فهمي" ، مكنتش أعرف إنك خوَّاف أوي كده

\*\*\*\*\*



٢

الشيخ  
حبظلم

في مكان أشبه بكهف مهجور كان "عزيز" يدخل وخلفه "فهمي" خائفاً مرعوباً يقدم قدم ويؤخر الأخرى ولكن لا مفر من الإذعان لأمر "عزيز".

أما "عزيز" فكان يسير بسرعة وكأنه حبيباً سيقابل حبيبته بعد غياب سنين ، كان يتوق إلى لقاء المخلص ، المنجي الشيخ "حبظلم" في وجهة نظره طبعاً .  
وصلا أخيراً إلى ردهة واسعة ، بها رسومات غريبة على جدرانها .

دارا بأعينهما في المكان حتى استقرت على امرأة تبدو في الثلاثين من عمرها جالسة على شيء أشبه بمكتب صغير ، وحين رأتهما ابتسمت ابتسامة بسيطة ثم قطبت جبينها مما أثارت الرعب في قلب "فهمي" الذي قال مخاطباً "عزيز" :

- يلاه بينا من المكان ده يا "عزيز" بيه  
نظر "عزيز" لـ "فهمي" مثبثاً إياه قائلاً :

- انت جبان ليه يا "فهمي" اصبر ، قلبك ضعيف ليه كده ، أنا متفءال  
جداً بالموضوع ده
- وبينما هما يتناجيان إذا بالمرأة تقف أمامها قائله بلهجة غريبة :
- أوامروا يا بهوات
- تأخر "فهمي" قليلاً خلف "عزيز" خوفاً من لهجة المرأة فرد الأخير قائلاً  
بثبات :
- احنا جايين نقابل الشيخ "حبظلم"
- تغيرت تعابير وجه السيدة مرة أخرى ، يبدو أن هذه التغيرات من طبيعة  
عملها ، ودون أن تنطق رجعت إلى مكانها الأساسي ثم قالت :
- وماله ... بس الشيخ لازم يأذن الأول
- ومدت يدها لـ "عزيز" إشارة على أنها تريد بعض النقود فأخرج عزيز ٥٠٠  
جنيهاً وأعطاهما لها ففرح وجهها العبوس ودخلت بسرعة إلى غرفة مجاورة  
حيث يجلس فيها الشيخ حبظلم وأمامه موقد به نار ، نظر بطرف عينه فرأى  
السيدة قادمة عليه فقال لها :
- هاللا ... إيه الاخبار ، شكلها أخبار حلوة
- اقتربت المرأة منه وقالت بفرح :
- إلا حلوة ، حلوة أوي كمان ، ناس بهوات شكلهم متريشين أوي و ...  
ادوني ٥٠٠ جنيه
- وأشارت إلى صدرها حيث المخبأ الرسمي لها ، فوضع يده لياخذ النقود فقالت  
برقة ودلع يتنافيا تماماً مع وجهها العبوس الذي كانت عليه قبل قليل :
- دول بتوعي أنا .... الله
- بطرف عينه نظر إليها الشيخ قائلاً :
- ومن امتا في فرق بيني وبينك ، هاتيهم وبعدين نتكلم في الموضوع ده  
وضعت المرأة كلتا يديها على صدرها وقالت :

- يا راجل سيبهم يتدفوا شويا في حضني ويدفوني  
تغيرت ملامح وجه الشيخ إلى الغضب وقال :
- بقولك هاتيهم أحسن ما انتي عارفة هعمل إيه  
كان تهديداً ما تعرفه المرأة جيداً لذلك تراجعت عن ما كانت تنتويه وأخرجت  
النقود من مخبأها وقالت :
- خد ....
- ثم وضعت كلتا يديها في منتصفها وقالت وهي تهز أحد قدميها :
- أعمل إيه أنا مع الناس اللي بره دي  
قال وهو يعد النقود بطريقة فكاوية تدل على فرحته بها :
- شويا كده ودخليهم  
نهضت المرأة ورجعت إلى حيث ينتظرها "عزيز" وصاحبه وجلست دون أن  
تتكلم فقال لها الأخير :
- هو احنا مش هندخل نقابل الشيخ دلوقتي  
قالت المرأة :
- شويا كده وهدخلكم ، أصل الشيخ عنده ضيوف دلوقتي  
نهض "عزيز" واقترب منها وقال هامساً :
- طب وهما الضيوف دول دافعين أكثر مننا  
بحركة فجائية مُتَقَنَة قالت المرة وهي تتصنع أنها تدافع عن "عزيز":
- معلش سامحوه ، ميعرفش حاجة ، ميقصدش ، السماح يا أهل  
السماح
- ثم اقتربت من "عزيز" وقالت هامسة :
- متعملش كده تاني أحسن يزعلوا منك  
قال "فهمي" مرعوباً :
- هم مين دول اللي يزعلوا

وبينما هم كذلك إذا بصوت من الداخل يقول :

- "عزيز" و"فهمي" يدخلوا

في وسط الذهول الذي اعترى الاثنين قال "عزيز" :

- هما عرفوا أسامينا منين

قالت المرأة بنبرة مهددة :

- متسألش ف الي ميخصكش ، اتفضلوا يا بهوات الشيخ مستنيكم

تقدم "عزيز" وخلفه "فهمي" إلى باب الحجرة ودخلا حتى جلسا أمام الشيخ.

كان الشيخ ينظر أسفل قدميه وكأنه اساساً لم يشعر بوجودهما فقال "عزيز" :

- مساء الخير يا مولانا

لم يتحدث الشيخ وأمسك بشيء ما ووضع في النار التي أمامه فارتفعت عالية إلى سقف الحجرة وهبطت مرة أخرى ، مما جعل قلبيهما يرتجفا خوفاً فقال "فهمي" :

- إيه يا راجل انت الرعب اللي انت عاملهولنا ده

وأخيراً نطق الشيخ بثقة وقال :

- ازيك يا "عزيز" بيه وازيك يا واد يا "فهمي"

قال "فهمي" في غضب :

- احترم نفسك يا راجل انت إيه يا واد يا "فهمي" دي

ثم عقب "عزيز" متسائلاً :

- إيه ده انت عرفت أسامينا ازاي

قال الشيخ وهو يُلقي شيئاً آخر في النار فتعلو وتهبط كساحر يقدم أحد فقراته في السرك :

- كل شيء متقدر ومكتوب ، والمكتوب مفيش عنه مهروب ، ومعروف  
من فاز ومين مغلوب ، ربك مطلع على سر القلوب ، وهو وحده ستار  
العيوب

وهو يشعر بالحيرة أراد أن يكتسب بعض الدقائق قال "عزيز" :

- أنا كنت جاي عشان .....

قاطعته الشيخ قائلاً بهدوء :

- عشان ما بتخلفش ونفسك تشوف ليك ابن يحمل اسمك ويحفظ  
ثروتك من اخواتك اللي طمعانين فيك

فرح "عزيز" وزاد تفاؤلاً عندما رأى ذلك الإبداع من الشيخ فقال بفرح:

- الله ينور عليك يا مولانا ، وليك الحلاوة الكبيرة

ثم إلتفت إلى "فهمي" الذي ظهر على وجهه الدهول وقال :

- مش قولتك أنا متفائل

وقف الشيخ فجأة وكأنه تذكر شيئاً ما ، ثم قال بطريقة غريبة :

- انت معمولك عمل خطير ، وعشان يتفك يحتاج مبلغ كبير ، يا ترى

هددفع ولا هتعيد التفكير ، وعلى فكرة المبلغ ده مش ليا لا سمح الله

..... ده عشانهم

مستغرباً ومستفهماً تسائل "فهمي" :

- هما مين دول

قال الشيخ بطريقة فكاهية :

- انت تاني ، يا ابني اهدا ومتسألش كثير ، ده لو عايز تروح بيتكم

سليم يا كبير

اذدراً "فهمي" ريقه بصعوبة وسكت ، ثم قال "عزيز" :

- هدفع ، هدفع ، هديك اللي انت تقول عليه

وقف "فهمي" غاضباً ثم قال بعد نسي خوفه :

- ليه يعني الي هو هيقول عليه ، انت يا راجل انت عايز كام  
نظر الشيخ إلى "فهمي" بطرف عينه نظرة جعلته يتسمر في مكانه ثم قال :
- يا واد يا "فهمي" انت متبطلش كلام ، اسكت ولا ألبسك جن يخليك  
تسهر ولا تنام ، ولا حتى تعرف تدخل الحمام ، تمام  
قال "فهمي" برعب :
- تمام تمام ، ادفعله يا "عزيز" بيه الي هو عايزه  
قال "عزيز" بمزحة :
- آه يا جبان  
بعد خطوتين للخلف قال "فهمي" بخوف :
- بيقولك جن يا عم ، أنا عاوز أمشي من هنا  
همم بالانصراف فأوقفه الشيخ قائلاً :
- استنى عندك ، هو دخول الحمام زي خروجه ، اقعد ، ومسمعش  
صوتك تاني  
دون أن ينطق بشيء جلس "فهمي" فقال "عزيز" :
- اسكت يا "فهمي" يا أخي ، خلاص يا مولانا أنا هديك الي انت عايزه  
بعد تفكير دام لعشرة ثوان قال الشيخ :
- أنا مش هاخذ كتير ، هما بس عشر تلاف جنيه ، ودول مش ليا زي  
ما أنا قولتلك ، أنا حيا الله خادم عنديهم  
بدون تفكير قال "عزيز" :
- موافق  
لكن "فهمي" قد غلبه خوفه الشديد على مصالح "عزيز" فقال بحنق :
- عشر تلاف جنيه ليه ، دا مرتبي في خمس شهور  
نظر إليه الشيخ نظرة ثم قال مهدداً :

- انت مش بتحرم يا "فهمي" ، ومش بتسمع الكلام وده مش حلو

عشانك

ثم غمز له بعينه قائلاً :

- انت فاهمني طبعاً

جلس "فهمي" وهو يقول :

- خلاص ، خلاص

أخرج الشيخ ورقة من جيبه وأخذ يخط بيده بعض الشخايبط في وجهة نظر من يراها ، ولكنها لا بد أن تكون لها مدلول ما في وجهة نظره أو ربما هي فعلاً بعض الشخايبط ، امتلأت الورقة فقلبها الشيخ وكتب على ظهرها مثل الذي كان يكتبه حتى لم يدع فيها موضوع نقطة إلا وبها بعض الطلاسم الغريبة ، ثم طوى الورقة بطريقة ما حتى جعلها على شكل مثلث متساوي الأضلاع بطريقة احترافية يبدو أنه قد تعود عليها ، ثم جاء بقطعة قماش صغيرة ولف بها الورقة وبإبرة وخيط خاطها ، وبعد ذلك أمسك بدورق من المياه وصب قليل منه في كأس زجاجي وأخذ يرتل عليه بعض التتمتات الغير مسموعة لجالسيه وبعد أن فرغ وقف ووزع الماء على أركان الحجرة الأربعة ، كان يسكب الماء وهو ما زال يقرأ ويرتل حتى فرغ الكأس ، ثم عاد إلى مكانه وأمسك بالدورق وملاً الكأس على آخره وأخذ يقرأ مرة أخرى وبعدما فرغ من قرائته أمسك بكيس شفاف وسكب به الماء وربطه ووضع جانبا ثم أمسك ورقة أخرى وكتب بها بعض الكلمات ولكنها مفهومة هذه المرة ثم اتجه إلى عزيز محدثاً :

- الحجاب ده تحطه تحت المخدة اللي بتنام عليها انت ومراتك ،

وميفارقش أوضة نومك أبداً ، ده أولاً ، .... ثانياً الميه دي تتخفف

وتتدوب في عشرة لتر ميه وتشربوا منه انت ومراتك لحد يوم ١٥ في

الشهر القمري ولازم في ليلة ١٥ تجماع مراتك ، وعائزك قبل الجماع  
تقول الكلام ده

أمسك "عزيز" ما أعطاه له الشيخ ونظر في الورقة فوجد كلمات لم يجد  
صعوبة في قراءتها ولكن الصعوبة في فهم معناها ، كانت مرتبة بترتيب غريب  
، كانت الجمل غير ذات معنى فنظر إلى الشيخ ففهم الشيخ سؤاله فقال له :  
- اقراها زي ما هي كده ، وخلي بالك مراتك لازم متعرفش حاجة عن  
كل ده ، ولا تعرف إنك جيت هنا من أساسه  
أوماً "عزيز" متفهماً ثم قال :

- ربنا يطرح فيك البركة يا مولانا

ثم وقف وانصرف بعدما أعطى للشيخ المبلغ المتفق عليه وخلفه "فهمي"  
يضرب كفاً بكف حتى وصلا إلى سيارته وركبها وأدار "عزيز" محرك  
السيارة وانصرف وبينما هما في طريقهما للعودة قال "فهمي" :

- والله يا "عزيز" بيه ما كان ليه لزوم كل المشوار ده ، أنا حاسس إن  
الراجل ده نصَّاب

- لا يا أخي ، انت مشفتش عرف أسامينا ازاى ، وعرف مشكلتي من  
قبل ما أحكي ، شكله صح راجل مبروووك ومكشوف عنه الحجاب ،  
هو النهارده كام في الشهر

رد "فهمي" بلا مبالاة :

- النهارده أول يوم

قال "عزيز" بحسرة :

- ياه لسه هستنا أسبوعين

نظر إليه "فهمي" ، غير مصدق ما يسمعه ، ما كان يصدق أن "عزيز" بجلالة  
قدره يمشي وراء هذه الخرافات ويزور تلك الأماكن ولكنه أقنع نفسه بأن  
الحالة التي بها "عزيز" ليست بهينة ، فحرمانه من الإنجاب أمراً ليس سهلاً

عليه ، ظلّ يفكر وهو يتابع السيارات الأخرى في الطريق المعاكس دون أن  
ينبس أحدهما ببنت شفة حتى وصل كلُّ منهما إلى مبتغاه

\*\*\*\*\*



٣

فرح قلبه  
بـ"واد"

بعد مرور ثلاثة عشر يوم

كان "عزيز" يجلس في مكتبه يللم بعض أوراقه ويضغط على زر استدعاء السكرتيرة التي ما لبثت أن حضرت في أقل من نصف دقيقة فقال لها وهو ما زال منهمكاً في جمع أوراقه :

- ابعثيلي "فهمي" بسرعة

- تحت أمرك يا فندم

وانصرفت السكرتيرة وفي أقل من دقيقة كان "فهمي" يطرق الباب ويدخل وهو يقول :

- على فين العزم يا "عزيز" بيه مش عادتك

- أنا عايزك تاخذ بالك من الشغل أنا هروح ، النهارده ميعاد تنفيذ

الخطة يا "فهمي" ، انت نسيت ولا إيه ، أنا هروح أستعد من دلوقتي

ثم أمسك "فهمي" من كتفيه بفرح ، فابتسم الأخير قائلاً :

- ولو أني مش مصدق ، بس طبعاً بدعيلك ربنا ينولك اللي ف بالك

وبينما هما كذلك إذا بجرس الهاتف يرن فيلتقط السماعه ويرد :

- أيوه

كان صوت السكرتيرة يقول له :

- المدام على التيلفون يا فندم

- طب حوليهالي بسرعة ..... خير يا "نسرين" فيه ... طب اهدي بس  
واحكي مالك

جاء صوت زوجته "نسرين" في الهاتف مختلطاً مع بكائها :

- أيوه يا "عزيز" ، أخويا اتصل بيا وقاللي إن بابا تعبان ، وأنا هروحله  
دلوقتي

قال بتأفف :

- طب هو لازم النهارده ، ما تخليها بكرة ونروحله سوا مش لازم  
النهارده

قالت بلهفة وتؤسل :

- بليز يا "عزيز" هروح وهرجع بالليل ، ربما بعد الشر يموت وما  
أشفهوش ، يبقى ذنبي في رقبتك وبعدين ....

قاطعها "عزيز" بفراغ صبر قائلاً :

- خلاص خلاص يا "نسرين" روحي وأمري لله ، بس قبل الليل ما يليل  
تكوني في البيت ، مفهوم!؟

- حاضر .. حاضر

أغلق "عزيز" الخط وخبط السماعة على مكتبه في غيظ فقال له "فهمي" :

- خير يا "عزيز" بيه مالها "نسرين" هانم

نفخ "عزيز" نفثاً من سيجارته ، وعاد مرة أخرى وجلس على مكتبه قائلاً :

- أنا عارف حظي الأسود ، يعني ابن المدايقة محبكتش يتعب غير  
النهارده ، في اليوم الي مستتية بقالي أسبوعين

قال "فهمي" مواسياً :

- معلش يا "عزيز" بيه ظروف ، إن شاء الله تتعدل  
- ماشي

ثم غادر "عزيز" المكتب في وسط الدعوات بأن تعود زوجته قبل المساء كما  
قالت .

قضى يومه في منزله ما بين مللٍ وسخطٍ وسبٍ وقذفٍ ولعنٍ في الظروف ، كان  
من الوقت لآخر يهاتف زوجته ويطلب منها العودة ، وهي تعده أنها ستكون  
عنده قبل آخر شعاع للشمس ، وها هو آخر شعاع يطلب الأذن بالرحيل  
و"نسرين" لم تعد للمنزل كما قالت ، وها هو "عزيز" يضرب الأخماس  
بالأسداس ويغلي من فرط الغيظ والحنق على زوجته وعلى والدها وعلى الدنيا  
بأسرها وبينما هو كذلك إذا بالهاتف يدق فيرد بسرعة فإذا بها زوجته وعندما  
سمع صوتها صرخ عالياً :

- انتي يا هانم مش قولتي هتيجي قبل الشمس ما تروح ، أتأخرتي ليه  
جاءه الرد المفجع أنها لن تأتي لأن والدها قد توفاه الله وستمكث في بيت والدها  
إلى حين انتهاء مراسم الدفن .

أغلق الهاتف بسرعة وأخرج سيجارة من جيبه وأشعلها في غيظ وهكذا  
السيجارة تلو الأخرى حتى فرغ من علبة كاملة ثم نادى بعلو صوته :  
- اعملي قهوة يا عم "حسين"

عم "حسين" رجل كبير يعمل في منزله منذ فترة كبيرة ، وما هي إلا لحظات  
حتى حضر عم "حسين" يحمل صينية عليها فنجان قهوة ويضعها أمامه  
وينصرف .

أمسك "عزيز" بالفنجان وأخذ منه رشفة فلم يستطعها في فمه فرمى  
بالفنجان على الأرض فتكسّر وعلى صوت تكسيره رجع عم "حسين" ملهوفاً  
يسأل :

- سلامتك يا "عزيز" بيه سيادتك تعبان أتصل بالدكتور ؟

أوماً "عزيز" برأسه رافضاً ثم قال :

- تخيّل يا عم "حسين" لو معاك الفلوس اللي معايا دي كلها هتكون سعيد ومبسوط  
ابتسم عم "حسين" وقال مازحاً :

- الله يسامحك يا "عزيز" بيه ، بس على فكرة الفلوس مش كل حاجة ، أنا وولادي طول عمرنا راضيين بحالنا وحامدين ربنا وشاكرينه  
وضع "عزيز" رأسه بين يديه ثم قال :

- عندك حق يا عم "حسين" إيه فايده الفلوس لو مش مريحة صاحبها ، أنا هو قدامك معايا فلوس وشركات ومصانع عشان أعدّها بس هحتاج شهر ، بس للأسف كل الفلوس دي مش قادرة تجيبلي حته ولد أفرح بيه

بحزن ظهر جلياً على وجهه قال مواسياً :

- خلي ثققتك في ربنا كبيرة يا "عزيز" بيه  
كان عم "حسين" فرحاً لأنه ولأول مرة "عزيز" يحدثه بهذه الطريقة اللينة ، فالأخير طالما سبه لأتفه الأسباب بسبب أو بدون ، طالما خصم من مرتبه لشيء لا ذنب له فيه ، ولكن اليوم مختلف يبدو أن سيده لديه الكثير من الكلام يود أن يقوله ولا يوجد أمامه إلى هو ، فأنصت له حين قال :

- ربنا اداني كل حاجة وحرمني من أهم حاجة وكأنه قاصد يعاندي  
- استغفر الله العظيم ، متقولش كده يا بيه ، ربنا لما بيمنع عنا حاجة بتبقى لحكمة هو عارفها وحده ، عمره ربنا ما بيكتب لنا حاجة وحشة ، مش يمكن كده أحسن ليك

ظهرت علامات الدهشة والاستغراب على وجه "عزيز" ثم قال :

- أحسن ليا ... أحسن ليا أبقى زي الشجرة المقطوعة اللي ملهاش مستقبل ، أحسن ليا أبقى مقطوع ميقاش ليا ظهر وسند أتسند

عليه لما أكبر وأعجز ، أحسن ليا إني فلوسي وشركاتي وثروتي اللي طفحت الكوتة عشان أجمعها تروح هدر ، ياخدوها اخواتي أكثر ناس كرهنتي في الدنيا دي كلها ، أحسن ليا إنهم يعايروني عشان مش بخلف ، أحسن إيه بس وبتاع إيه .

رأفة بحاله قال "حسين" :

- استهدا بالله كده يا بيه واطلع ريحك شويا ، حضرتك تعبان أوي وقف "عزيز" وأمسك مفاتيح سيارته وقال :

- لا أنا مش عايز أنام ، أنا هطلع أتمشى شويا بالعربية ، مخنوق وقف أمامه "حسين" ليعوق طريقه قائلاً :

- هتسوق ازاي يا بيه وحضرتك ف الحالة دي ، استنى طيب أتصل بالسواق أخليه يجي

أزاح "عزيز" "حسين" بيده وخرج وأدار محرك سيارته وظل يسير بها حتى انتصف الليل ، شعر بإرهاق شديد فأوقف السيارة جانب الطريق ثم أغلق زجاجها واتكأ برأسه للخلف وراح في سبات عميق .

لم يعرف كم من الوقت مرَّ عليه حين أيقظته أشعة الشمس الحارة عندما تسلطت عمودية على وجهه ، فتح عينيه ليرى نفسه في سيارته فتذكر ليلة أمس وما حدث بها ، أدار محرك سيارته متخذاً طريق العودة إلى منزله وبينما هو في طريقه وقع عينيه على منظر غريب ، رأى سيدة في مقتبل عمرها ، تحمل طفلين على كتفيها ويبدو عليهما الجوع والفقر ، وقف بالسيارة يتأمل ذلك المنظر ، كان يتساءل كيف لهذه السيدة الفقيرة التي لا تملك من حطام الدنيا شيئاً أن يكون لها طفلين؟ وهو بكل ما أوتي من مال لا يستطيع أن ينجب واحداً ، ظل يفكر كثيراً بحسرة في ذلك وبينما هو كذلك إذا لاحظت المرأة شروده فقدمت إليه قائلة :

- حاجة لله يا بيه ربنا يعمر بيتك أنا والعيلين اليتامى دول ما أكلناش  
من امبارح . .....

قالت المرأة كثيراً وثرثرت كثيراً ، لكن "عزيز" لم يسمع شيئاً من تلك الكلمات ، كان كل تفكيره منصب على قدر الله وحكمته في أن يعطي لهذه المرأة طفلين وهي لا تستطيع حتى أن تنفق عليهما ، لأنها لا تملك شيئاً تنفقه عليهما ، كان يتعجب كثيراً ، ويتساءل ما الذي تملكه تلك المرأة وهو لا يملكه ، ما الذي تزيده هذه المرأة عنه ، كاد أن يقتله التفكير إلى أن أخرجته المرأة من صمته حين قالت بعدما خبطت بيدها على زجاج السيارة :

- حاجة لله يا بيه

إلتفت حوله باحثاً عن شيئاً يعطيه لها ، بحث عن محفظته ، وجدها أخيراً في جيب معطفه الذي ألقاه في المقعد الخلفي ، فأخرج ما بها من نقود وأعطاه للمرأة ، كان المبلغ كبيراً ، كبيراً جداً ، يكفي المرأة لأيام بل لأسابيع فقالت بفرح :

- ربنا يخليك يا بيه ويخليك ولادك

سكين تالمة قد غرزتها السيدة في صدره ، فقال بأسى :

- ولادي؟!!

وأخذ يبكي وقد تكون هذه أول مرة في حياته يبكي ، رأفت السيدة لحاله وقالت بعطف :

- مالك يا بيه ، سعادتك كويس

مسح دمعته بيده ثم قال :

- تعرفني إنني البيه الي انتي شايفاه قدامك ده ، برغم فلوسه الي ملهاش عد ولا حد ، مش عارف يخلف حته عيل يورثه

كان لا يعرف لماذا أخذته تلك السيدة لعالمها ، "عزيز" الذي كان لا يصافح عمال شركته ، فجأة يتحدث مع سيدة شحاذة ويشكو لها حاله فقالت له :

- هدي نفسك يا بيه محدش عارف الخير فين ، مش يمكن قلة الخلفة  
تكون فيها الخير والصالح ليك ، ساعات ربنا بيقى حارمنا من حاجة  
بنحبها عشان لوحده هو اللي عارف إن فيها ضرر لينا  
قال باستغراب :

- ضرر ! ضرر ضرر بس أشوف ابن ليا قبل ما أموت ، وبعدين كل أما  
أكلم حد يقولي خير خير ، أنا عايز الشر عايز الشر عايز الشر  
رفعت كلتا يديها للسماء :

- يا رب زي ما الراجل ده وسَّع عليا أنا وأولادي فرح قلبه بواد  
سمع "عزيز" تلك الدعوة فأحس براحة لم يعرف مصدرها ، انطلق بسيارته  
بسرعة إلى منزل أهل زوجته حيث قام بواجب العزاء واصطحب زوجته إلى  
منزله .

\*\*\*\*\*



٤

خبر  
سعيد

في دكانه الصغير على ناصية الحارة الصغيرة كان "جابر" يقف وهو يرتب بعض بضاعته حين سمع صوتاً مألوفاً بالنسبة له يناديه من أعلى قائلاً :

- صباح الخير يا عم "جابر"، وحياتك كيلو سكر وكيس رز وورقتين شاي

ابتسم "جابر" وهو يجهز تلك الطلبات ويحملها ويضعها في سبت قد أنزلته له السيدة ويضعه فيه وهو يقول :

- صباح الخير والسعادة والرضا يا أم "محمد"، ازيك وازاي أبو "محمد" و"محمد"، كلكم عاملين إيه مش كويسين

ردت السيدة وهي تسحب الحبل :

- بخير نحمد ربنا يا عم "جابر" ، معلش بقى اصبر علينا شويًا في  
الفلوس عبال ما أبو "محمد" يقبض الماهيه  
نظر إلى الأعلى بامتنان :

- يا ستي هو أنا قولت حاجة ، براحتكم  
يكرم أصلك يا راجل يا طيب

وبينما هما كذلك إذا بصديق عمره "ربيع" يمر بجانبه وهو يقول :

- أيوه افضل كده انت بيع ع النوتة لحد ما تلاقي نفسك فلست ، يا  
راجل انت فاتحها جميعة خيرية

ابتسم "جابر" وهو يقول :

- يا راجل المركب اللي فيها لله مش بتغرق ، وبعدين أم "محمد" مش  
غريبة يعني ، دي زي أختي ، كفاية إنها من ريحتك

ولكن السيدة قد سمعت "ربيع" فقالت له موبخة :

- وانت مالك يا راجل انت ، ما تخليك في حالك ، حقه بطلوا ده واسمعوا  
ده .

شعر "ربيع" بالخرج فقال :

- صباح الخير يا أم "محمد" مش بقصدك انتي والله ، أنا قصدي على  
ناس تانية

تمصصت السيدة وقالت :

- لا يا راجل .... طيب برضه خليك في حالك ، أحسن وديني انت عارف  
أنا ممكن أعمل إيه

أحس "ربيع" بالتهديد في كلماتها فقال لها :

- يا ستي ولا تعملي ولا أعمل ، مكانتش كلمة قولتها ع الصبح دي ، يا  
ساتر

تَدَخَلَ "جابر" ليفض النزاع قائلاً :

- يا جماعة استشهدوا بالله كده ، انتوا دايماً كده ناقر ونقير ، ايش حال مكنتوش ولاد عم

قالت السيدة شاكية :

- أديك شايف يا عم " جابر " تلقحه بالكلام علينا ، هو احنا عمرنا كلنا عليك فلوس يا عم " جابر "

قال " جابر " مازحاً :

- الشهادة لله محصلش ، بس " ربيع " ميقصدش حاجة والله ، هو بيتكلم على الناس الثانية ، ميقصدكش انتي والله يا أم " محمد "

قال " ربيع " مؤكداً :

- أيوه صح ، الراجل ده من يوم ما فتح دكانته وهو فاتحها سبيل ، أي حد عايز حاجة بياخدها ومش بيحاسب الناس أول بأول ، والناس بتستعبط ، وهوا وبيته أولى بكل قرش

قالت السيدة بعدما عادت للنزلة الصارخة :

- وهو كان شكى لك ، انت مالك ، عيئت نفسك المحامي بتاعه ، يا راجل يا عايب .....

ضاق " ربيع " ذرعاً ببوابل القذائف الذي أمطرته به السيدة فقال مهدداً :

- اخرسي يا ولية ، ليكي راجل أتكلم معاه ، وخشي يلاه شوفي وراكي إيه ، صدق الي قال ناقصات عقل صحيح

ابتلعت السيدة كلمات " ربيع " ولم تعقب إلا بممصمة بفهما وهي تغلق شباكها بعنف.

تحرك " ربيع " ناحية الدكان ثم قال :

- داهية تاخذك ولية فقر ، والله لولا إنك قريبتني وجوزك كويس معايا كنت دفنتك بالحيا

ضحك " جابر " على كلمات " ربيع " وطريقته فقال له :

- يا راجل حد برضه يعمل عقله بعقل واحدة ست ، دول ناقصات عقل  
ودين زي ما انت بتقول ، مش ده رأيك فيهم برضه  
جلس "ربيع" على كرسي بجوار "جابر" ثم قال :
- مش كلهم يا "جابر" يا أخويا  
رجع "جابر" بظهره إلى الوراء وهو يصفف شعره بيده قائلاً :
- عندك حق والله أنا عندي واحدة بالدنيا كلها  
- سيدي يا سيدي ، ومن الحب ما قتل ، الا قولي يا "جابر" ، مفيش  
أخبار جديدة  
تنهد "جابر" دليل على عدم الارتياح ثم قال :
- ولا قديمة ، بس أنا عادي بطلت أهتم بالموضوع ده ، سيبتها على الله  
- ونعم بالله يا أخويا  
بينما هما يتحدثان فإذا بإبنة "ربيع" الصغيرة تأتي مهرولة وتقول وهي  
تلهثُ :
- إلحق يا عم "جابر" ، تنط "ثناء" تعبت فجأة وماما راحتها  
وبتقولك تعالى بسرعة عايزاك  
أغلق "جابر" دكانه بسرعة وانطلق إلى منزله وخلفه "ربيع" جاره وصديق  
عمره .  
وصلا بسرعة للمنزل فدخل "جابر" إلى حجرة نومه حيث ترقد زوجته  
وحبيبته "ثناء" وانتظر "ربيع" في الصالة.  
عندما دخل "جابر" كانت علامات القلق واضحة على وجهه فقال بلهفة :  
- خير يا "ثناء" مالك  
لم يلاحظ "جابر" وجود شخص آخر بالحجرة ، كان هذا الشخص هو  
"عفاف" زوجة "ربيع" الصديقة المقربة لزوجته وجارتها ، فالعائلتان  
جيران من نعومة أظفارهم .

اقترب " جابر " من زوجته وربت على يدها وهو يقول :

- أروح أجيب دكتور طيب

هزت " ثناء " رأسها نفياً ثم قالت :

- لا لال لال مش مستاهلة يا " جابر " أنا كويسة ، شوية دوخة وراحوا  
لحالهم

- مفيهاش حاجة لو روحنا نطمع عليك ، هو احنا عندنا كام " ثناء "

قبّلت " ثناء " يد زوجها قائلة :

- ربنا يخليك ليا ، يا راجلي وسندي وضهري

وهنا تدخلت " عفاف " قائلة :

- سيدي يا سيدي ، احم احم ، نحن هنا ، خاف بقى أحسن أحسدكم  
من كتر الرومانسية دي ، يا أخويا ما تعلم صاحبك شويا من الكلام  
الخلو ده ، ما انتو صاحب في كل حاجة ، وزى بعض في كل حاجة ،  
اشمعنا الحاجة دي مش زي بعض فيها

شعر " جابر " ببعض الإحراج حين لاحظ وجود " عفاف " فقال معتذراً :

- ازيك يا أم " علي " ، منورة البيت ، معلىش مخدتش بالي إنك هنا من  
كتر الخضة ، وبعدين أبو " علي " هو اللي معلمني الكلام ده ، انتي  
بس مش فاهماه ، والنبي بس تقنعي " ثناء " إننا نروح للدكتور  
نطمع عليها

قالت " عفاف " بابتسامة جميلة :

- متتخضش أوي كده ، انت لو تعرف الي فيها هتفرح

علت الدهشة على وجه " جابر " وكذلك " ثناء " التي قالت تحسها على السكوت:

- بس يا " عفاف " ، احنا اتفقنا على إيه

رد " جابر " بحيرة :

- انتوا مخبيين عني إيه ، فيه إيه يا جماعة

وقفت "عفاف" وبعد تفكير دام لثواني قالت :

- بص بقى أنا مش هقدر أفضل ساكتة أكثر من كده ، مبروك يا "جابر" مراتك حامل

لم يتمالك نفسه من الفرحة فقال غير مصداقاً :

- الكلام ده مفيهوش هزار يا أم "علي" ، أنا و"ثناء" طلعلنا الموضوع ده من دماغنا ، بقى بعد السنين دي كلها يحصل كده ، ما أظننش ، احنا خلاص رضينا بالامر الواقع ، ومبقاش يفرق معانا الموضوع ده

أطلقت "عفاف" زغرودة مدوية وقالت بفرح :

- بقلولك ألف مبروووووووك

- انتي متأكدة يا أم "على" من الموضوع ده

- يا "جابر" أنا خلفت ثلاث مرات قبل كده ومش صغيرة عشان أتلخبط في حاجة زي دي

اقترب "جابر" من زوجته وقال :

- معقولة يا "ثناء" بعد العمر ده كله يكون ربنا سمع دعواتنا ، معقولة يكون حس بينا وخلاص عايز يفرحنا ، معقولة نكون نجحنا في الاختبار وربنا بيكافئنا

وانحنى وقبّل يدها فقالت له بحب :

- وليه لأ يا "جابر" ، مفيش حاجة بعيدة على ربنا

أغمض "جابر" عينيه وقال :

- يعني أفرح ، ولا الفرحة هتسرقتني ويطلع وهم ونعيش فيه ونفوق على كابوس يَصْحِيّ المواجه القديمة

ثم وقف وقال :

- لأ ... مش ممكن ، احنا نروح للدكتور ولازم أتأكد بنفسي

\*\*\*\*\*



## مصادفة غريبة

في غرفة نوم كانت الأروع والأحلى من نوعها ، كانت "نسرين" زوجة "عزيز" ترقد وبجوارها والدتها في حالة من الزعر فقالت لها :

- مالك يا بنتي قلقتيني عليكي

قالت "نسرين" بصوت متقطع ومُجهد :

- بقالي يومين مليش نفس لأي أكل ونفسي غامة عليا وعلى طول بَرَجَّعْ

وحاسة بدوخة ، وساعات بحس إن الدنيا كلها بتلف بيا

بَرَقَّت عينا الأم وقالت بتساؤل :

- معقولة يكون حصل ؟

باندهاش ردت "نسرين" :

- إيه هو ده يا ماما

زغزغتها في بطنها وقالت بدلع ورقة :

- الحمل يا روح أمك... الحمل ، شكل صبرك جه بفايدة ، الي بتقولي عليه ده ملوش غير معنى واحد
- ضحكت "نسرين" بسخرية وعدم تصديق وهزت رأسها بشدة تتأكد من أنها مستيقظة ولا تحلم ثم قالت نافية :  
- لا . لا . لا . أنا ... لا . لا . لا ... مش ممكن ... لا لا
- اندهشت الأم وقالت :  
- هو إيه أصله ده
- قالت "نسرين" بعد تفكير :  
- أنا يا مامي شيلت الموضوع ده من دماغي خلاص ، أصله مفيش أمل هو يعني بعد ١٠ سنين حيحصل حمل ، لا لا لا يا ماما لا
- قالت الأم نافية :  
- وليه لأ يا بنتي ، رحمة ربنا واسعة وانتي صبرتي كثير ، وبعدين يا هبلة انتي المفروض تفرحي إنك خلاص هتجيبني الواد الي بيحلم بيه جوزك ، بدل ما كل شوي تلاقيه داخل عليكي بواحدة جديدة
- تأففت "نسرين" بقلة حيلة وقالت :  
- والنبي يا مامي متلعبيش بأعصابي أنا مش مستحلمة ، وبطلي الخرافات الي في دماغك دي
- فكرت الأم قليلاً ثم قالت :  
- طب إيه رأيك نقطع الشك باليقين ونروح لدكتور نتأكد
- استحسننت "نسرين" الفكرة ثم قالت :  
- حاضر يا ماما ، نروح لدكتور عشان تشيلي الوسواس دي من دماغك ، بس بشرط متقوليش لـ "عزيز" حاجة لحد ما نتأكد
- حاضر ، بس أي دكتور هنروحله هيقول لـ "عزيز" ما انتي عارفة كل الدكاترة عارفينه

- طب ما نشوف دكتور صغير ميكونش مشهور ، حتى لو عيادة صغيرة ، أهو على الأقل نتأكد الأول
  - فكرة حلوة أوي ، إيه رأيك لو نروح الحارة الي ساكن فيها خالك ، فيها دكتور هناك نكشف عنده ، وأهو بالمرّة نسلم على خالك ، ليا فترة مشفتهوش
  - لأ ، احنا نروح العيادة الأول ، وبعدين خالي لو عاوزه تروحيه رويحه لوحدك
  - براحتك يا بنتي
- كان القدر يلعب لعبته المعتادة فكان " جابر " يسند " ثناء " وهما خارجين من عند الطبيب وهو يطير من الفرحة لأن الطبيب قد أكد له حمل زوجته في الشهر الثاني ، أكد له أن المعجزة قد حدثت وأنه أخيراً سيصبح أب ، أخيراً سينجب الولد الذي يحمل اسمه .
- كان " جابر " يعتقد أنه في حلم جميل كان يدور حول نفسه كالطفل الصغير الذي للتو أحضر له والده لعبة كان قد ألح عليه في الطلب بها كثيراً ، وبينما هو في دورانه يصطدم بجسدٍ ما ، كان هذا الجسد لـ "نسرين" التي ما لبث أن وقعت أرضاً من فرط قوة اندفاع " جابر " فأوقفها الأخير بيده معتذراً :
- أنا آسف يا ست هانم ، أصلي فرحان أوي ، مراتي بعد عشر سنين بقت حامل
- كانت "نسرين" تنتوي أن تُوبله بمطرٍ من السباب ، ولكن حين سمعت كلمة عشر سنين ، أحست بأن هناك رسالة لها من ذلك الاصطدام فاكتفت بكلمة :
- حصل خير
- جلست "نسرين" على أحد مقاعد الانتظار في العيادة البسيطة ، بينما تولّت والدتها التحدث مع الممرضة ودفعت رسوم الكشف ثم عادت تجلس بجوار ابنتها تنتظرا دورهما في الكشف .

مرّ من الوقت ما مرّ على "نسرين" لم تكن تعرف ما بها ، قد تملّكت منها أحلام اليقظة ، تارة ترى نفسها وهي تبلغ "عزيز" بأنها حامل وتبتسم حين ترى مدى سعادته وفرحه ، وتارة تجد نفسها تتوحم وتطلب من "عزيز" أن يحضر لها رنجة بصوت الفنانة "شادية" في فيلم الزوجة الـ ١٣ ، وتبتسم وهي تسرح حين ترى ولدها وتلعب معه وتلاعبه وتقبّله وهي تضمه لحضنها ، لم تفق من حالتها تلك إلا على يد والدتها وهي تهزها برفق حين ندهت الممرضة على اسمها فقد جاء دورها لتدخل للطبيب ، كانت تقدم قدم وتؤخر الأخرى فهذه الدقائق فاصلة في حياتها ، حين قررت مع والدتها أن تذهب للطبيب لم تكن بتلك الحالة ، ولكن لا تعرف ماذا حدث لها حين دخلت تلك العيادة وبالتحديد حين سمعت كلمات "جابر" .

تممدت على السرير وأجرى الطبيب فحوصاته ثم نهض الطبيب وجلس على مكتبه وخلفه هي بعدما عدّلت من هندامها وجلست أمامه هي ووالدتها وكأن على رؤوسيهما الطير ، وكأن الطبيب أراد أن يلعب على أوتار صبرهما لم ينطق بكلمة لمدة تعدت الثلاثين ثانية ولكنها كانت بالنسبة لهما ثلاثين يوماً ثلاثين شهراً بل ثلاثين سنة وأخيراً نطق الطبيب فقال :

- والله ما عارف أبدأ الكلام منين

كانت كلمة بمثابة الشرارة التي وضعت بجانب البنزين فقالت الأم مستفهمة :

- إيه ؟ هو الموضوع خطير للدرجة دي؟

كان الطبيب يقرأ ما يدور في أعين الاثنين فأراد أن يلعب قليلاً بأعصابهما فقال :

- لا يعني مش أوي كده

خفضت "نسرين" رأسها أرضاً وكأنها أيقنت بالفشل ، أيقنت بأن ما كان بها منذ قليل كان مجرد حلم بعيد المنال ولن يحدث فقالت الأم :

- قلقتنا يا دكتور ما تقول فيه إيه واتخلصنا

قرر الطبيب أخيراً أن يرحم ضعفهما وعذابهما فابتسم ابتسامة بسيطة ثم قال :

- ألف مبروك المدام حامل في الشهر الثاني

كانت الفرحة كثيرة لدرجة عدم تصديقها فقالت "نسرين" صارخة :  
- مستحيل

اندهش الطبيب من ردة فعلها تلك فقال مستفهماً :

- ومستحيل ليه ، هو حضرتك مش متجوزة ولا إيه ؟!

أيقنت الأم أن الطبيب قد فهم شيئاً خاطئاً فقالت مصححة :

- لا طبعاً متجوزة ، دي حرم "عزيز بيه الدمرداش" ، حضرتك تعرفه  
أكد

زادت دهشة الطبيب ثم قال :

- ومين في مصر ميعرفش "عزيز بيه الدمرداش" بس مش غريبة دي  
إن حرم "عزيز بيه الدمرداش" جاية تكشف عندي هنا في العيادة ،  
أنا مش بقلل من قيمتي لا سمح الله ، أنا بس مستغرب

أرادت "نسرين" أن تبرر الموقف فقالت :

- أنا و"عزيز" متجوزين من ١٠ سنين ودوخنا ع الدكاترة وكلهم  
قالولنا مفيش أمل ، فلما شكيت في حاجة قولت أتأكد الأول قبل ما  
أعشمه بحاجة وفي الآخر يكون كل ده كلام ملوش أساس

أوماً الطبيب برأيه متفهماً فقالت "نسرين" :

- حضرتك متأكد يا دكتور إنني حامل

ضحك الطبيب كثيراً حتى بانث نواجذه ثم قال :

- حضرتك في عيادة دكتور نسا وتوليد مش في ورشة خراطة وأنا والله  
دكتور ، تحبي أوريكي الشهادة بتاعتي ، أهى متعلقة ع الحيطه  
هناك أهى

## ضحكت "نسرین" لمزحة الطبيب وقالت :

- يا دكتور بالله عليك اتأكد تاني ، عايزاك تراجع مناهج كلية الطب كلها قبل ما تقولي إني حامل  
ألقي الطبيب رأسه على مكتبه غير مسيطراً على نفسه من كثرة الضحك ثم قال :

- حاضر يا ستي ، في منهج سنة أولى يقول إنك حامل ، ومنهج سنة تانية يقول إنك حبله ، ومنهج سنة تالته يقول إن فيكي بيبي صغير عنده شهر وداخل في الشهر التاني ، ومنهج سنة رابعة يقول إنك لازم الفترة اللي جاية ترتاحي راحة تامة ، ومنهج سنة خامسة يقول متشيليش أي حاجة ثقيلة ، ومنهج سنة سابعة يقول إنك لو اتكلمتي نص كلمة تانية هرجع في كلامي ، أما منهج سنة سابعة يقول إن تيجي كل أسبوعين عشان تتابعي معايا ، ده لو مفيش مانع طبعاً ، شرف كبير لياً إني حرم "عزيز بيه الدمرداش" تتابع عندي في عيادتي البسيطة المتواضعة

ضحكت "نسرین" بفرح ، ثم نهضت وسلمت على الطبيب بامتنان وانصرفت ، وهي خارجه أعطت الممرضة مبلغ كبير بدون أن تركز في كميته ، ولكنه كان كبيراً بالنسبة للممرضة التي ظهر عليها الفرح الشديد، فدخلت الممرضة إلى الطبيب لتستأذنه أن تدخل الحالة الأخرى فوجدت أثار الفرحة على وجهه فتسائلت في دهشة :

- هو فيه إيه النهارده

قال لها :

- النهارده يوم عجيب ، حالتين ليهم عشر سنين مش بيخلفوا وفجأة هما الاتنين في نفس الشهر ونفس اليوم ونفس الظروف ونفس حالة الجنين برضه

### قالت المريضة بلا مبالاة :

- يا دكتور عادي ، هو احنا في فيلم هندي ، المهم فاضل آخر حالتين أدخلهم ولا لأ ؟

أشار لها الطبيب بالموافقة .

أما عن "نسرين" فقد ذهبت إلى منزلها وارتدت أحلى وأغلى ثيابها وحليها حتى بدت وكأنها عروس ليلة زفافها ثم اتجهت إلى الشركة حيث يوجد "عزيز" ، لم تصبر حتى يعود إليها ، قررت أن تذهب إليه لتخبره ذلك الخبر السعيد بنفسها ، دخلت الشركة فلم تجد إلا السكرتيرة "منى" التي لم تصدق أنها ترى زوجة "عزيز" بيه أمامها فهي لم تزور الشركة منذ فترة ، فنهضت مرحة :

- "نسرين" هانم مرة واحدة عندنا ، وأنا أقول الشركة منورة ليها

ابتسمت "نسرين" لمداعبة السكرتيرة لها ثم تساءلت :

- "عزيز" بيه جوه

### قالت السكرتيرة :

- لا هو "عزيز" بيه عنده اجتماع في قاعة الاجتماعات ، هروح أديله  
خبر إن حضرتك هنا

بإشارة من يدها أوقفها "نسرين" قائلة :

- لا أنا هدخل أستناه جوه لحد ما يخلص ، بس متقوليش إنني هنا  
أصلي عاملاله مفاجأة

تفهمت السكرتيرة ما تقصده "نسرين" ففتحت لها باب المكتب لتدخل وعادت لتواصل عملها .

دخلت "نسرين" مكتب "عزيز" وكأنها أول مرة ، كانت تتفقد أركانها لا تعلم لماذا ؟ ، ولكنها كانت تبحث عن أي شئ تضيع فيه وقت الانتظار الممل ،

وجدت ثلاجة صغيرة بجانب المكتب ، فتحتها وأخرجت منها زجاجة عصير  
وفتحتها بعد أن رجّتها جيداً وجلست تتناولها في صمتٍ ممل .  
بعد دقائق لم تدم كثيراً ، فُتح الباب ودخل "عزيز" فوجدها تجلس فدخل  
بلا مبالاة وجلس مكانه وهو يقول :

- ازيك يا "نسرين" ، إيه المفاجأة دي  
وقفت "نسریت" وقالت :

- حلوة ولا وحشة

أراد أن يصلح ما أفسدته لا مبالاته فقال :

- لا طبعاً حلوة ، بس أصلك مش متعوده تيجي هنا

دارت "نسرین" حول المكتب وهو يتابعها بعينه حتى استقرت خلفه وطوقته  
بذراعيها قائلة :

- أصلك وحشتني ، قولت أجي أشوفك وأسلم عليك

زادت تلك الكلمات من حيرته فقال :

- فيكي إيه يا "نسرین" ، مش مرتاحك

قالت برقةً مبالغاً فيها :

- فيها إيه دي ، جوزي وبتدلّع عليه ، فيها حاجة دي ؟

قال بنفاد صبر :

- انتي شاربة حاجة ع الصبح ، ما تتظبطي يا هانم

أيقنت "نسرین" بأن صبره قد استهلك آخر طاقته فتحرّكت ببطء ناحية  
كرسيها وهي تقول بتردد وخوف :

- أصلي ، أصلي حسيت بشوية تعب فرحت لدكتور أنا ومامي وقالي إني

.... إني .... إني ....

وقت "عزيز" غاضباً :

- فيه إيه النهارده ، ما تنطقي ، ليه شغل الألغاز ده

بدأ الرعب يتسلل إلى قلبها من طريقة كلماته الأخيرة فقالت :

- إني حامل في الشهر الثاني

هرش عزيز أذنيه غير مصدقا ما يسمعه ، لم يعرف ماذا يقول؟ فقط ظل لمدة دقيقتين يمعن النظر في وجه "نسرين" ولم يتحدث مما جعل الأخيرة تندهش فوقفت وتحركت ناحيته ثم حركت يدها أمام وجهه ، وهو في عالم آخر حتى نطق أخيراً وقال :

- انتي قولتي إيه ، حامل .. ازاي ، وامتي وفين؟؟؟

- والله الدكتور أكدلي إني حامل ، أنا بقالي فترة معدتي مش مضبوطة ، كنت بقول يمكن خدت برد في معدتي ، بس ماما قالتلي إني حامل والنهارده الدكتور أكد كلامها

نهض "عزيز" من مكانه وأمسك بها من كتفها قائلاً :

- "نسرين" ... الموضوع ده مفيهوش هزار ، انتي متأكدة

- أنا كنت زيك كده مش مصدقة وقولت للدكتور اتأكد أكثر من مرة ، وهو أكدلي والله

طرق الباب ودخلت السكرتيرة تحمل فنجاناً من القهوة وهي تقول :

- قهوة سيادتك يا فندم

رد "عزيز" بفرحة :

- قهوة إيه بقى هاتي شربات

باندھاش قالت "منى" :

- شربات !! ليه يا فندم

- أخيراً يا "منى" ، "نسرين" حامل ، خلاص هبقى أب ، خلاص

ذريتي مش هتقطع ، هيبقالي ابن يورثني

قالت "منى" بفرحة :

- ألف مبرووووك يا "عزيز" بيه ، ألف مبروك يا "نسرين" هانم ربنا يقومك بالسلامة يارب
- ردت "نسرين" :
- الله يبارك فيكي يا "منى"
- وقال "عزيز" :
- شهر مكافأة لكل الموظفين يا "منى"
- تحت أمرك يا فندم
- ثم انصرفت "منى" من فورها فقال "عزيز" لزوجته :
- من النهارده مفيش حركة ، هتنامي ع السرير ، هخليكي تتابعي مع أكبر دكاترة في البلد ، هروح المستشفى أجيب اتنين ممرضات معاكي في البيت ، اوعي تعملي أي مجهود .
- ثم أمسك بطن "نسرين" ووضع عليها أذنه قائلاً :
- ولد ، سامع بابا ياد
- ضحكت "نسرين" لطفولية "عزيز" التي ظهرت عليه فجأة وقالت :
- هو لسه إتخلق أصلا عشان يسمعك وكمان يرد عليك
- فقال "عزيز" :
- سيبيني أفرح يا بايخة ، أنا ما صدقت إن الأرض البور طرحت ، ياااااه أنا لحد دلوقتي مش مصدق ، مش مصدق
- وأخذها من يدها وأجلسها مكانه على المكتب قائلاً :
- من النهارده انتي ملكة ، كل طلباتك مجابة ، لو طلبتي لبن العصفور والله هجيبهولك
- شعرت "نسرين" بنشوة كبيرة ، لأول مرة ترى "عزيز" بهذه الصورة ، لأول مرة تراه يتدل لها ويدلها ، لأول مرة يكلمها بهذه الطريقة الناعمة ، شعرت بالفعل أنها الآن تُوَجِّت ملكة على عرش قلب زوجها ، العرش الذي شاركها فيه

قبل ذلك واحدة واثنان وكلهن لم يحققوا المراد ، شعرت بالانتصار فهي أقدم  
زوجاته وهي الوحيدة التي حققت له أمنيته ، هي الوحيدة التي ستنجب له  
الولد .

\*\*\*\*\*



فرحة

### بعد مرور ٧ شهور

سبعة أشهر مرت على الأسترتين ، مرت الأيام كالدهور فكل فرد في الأسترتين ينتظر مولود طال انتظاره ودام لسنوات .

نذهب أولاً إلى أفخر مستشفيات مصر لنرى "عزيز" واقفاً أمام غرفة العمليات والقلق يبداً جلياً عليه وهو يجوب الصالة أمام الحجرة ذهاباً وإياباً ويضرب كفيه ببعضها حتى انفتح باب الحجرة وخرجت ممرضة مهللة وهي تقول :

- مبروووك ما جالك ، المدام بتاعت حضرتك ولدت ، تقدر تدخل تشوفها



## (مصادفة أخرى)

في منزلها الصغير كانت "ثناء" تصرخ بشدة من ألم الولادة وبجوارها الداية وأيضاً جارتها وصديقتها الحميمة "عفاف" وهما يحثانها على التحمل .  
كان " جابر" في خارخ الحجرة على سجادة الصلاة يصلي ويبتهل ويدعو المولى أن تلد زوجته بالسلامة وبعد دقائق سمع " جابر" صوت طفل صغير يصرخ في الداخل فسجد لله شكراً ونهض من على سجادته ووقف أمام الحجرة ينتظر.

بعد دقائق من الصراخ من الداخل والدعاء والتوسل من الخارج خرجت "عفاف" وهي تحمل لفة من القماش وهي تطلق زغروته مدوية وتقول :

- بنوتة زي القمر شبه أمها

حمل الطفلة منها وقبّلها ثم قال :

- الحمد لله ، يا ما انت كريم يارب ، ألف حمد وشكر ليك يارب ، ألف

حمد وشكر على عظم العطية

ثم كشف عن أذن الطفلة اليمنى وتلا فيها صيغة الأذان وأيضاً كشف عن أذنها اليسرى وأقام فيها الصلاة تطبيقاً لسنة الحبيب المصطفى عليه الصلاة والسلام ثم أعطى الطفلة لـ "عفاف" قائلاً :

- ينفع أدخل أطمئن على "ثناء"

أوسعت له "عفاف" الطريق وهي تحمل منه الطفلة ، فدخل عليها فوجدها غارقة في عرقها فاقترب منها وقبّلها في جبينها قائلاً :

- حمد لله ع السلامة يا غالية يا بت الغالي ، يا أم الغالية

أمسكت يده بحب وقالت له :

- كان نفسي أجيبك واد يشيل اسمك ويبقى سندك وضهرك

ابتسم وقال لها :

- يا ستي اللي يجيبه ربنا كله كويس ، وبعدين مين قالك إني عايز ولد ،  
أنا بحب البنات وبعدين خلاص سهلة ، احنا عرفنا السكة دلوقتي ،  
المرة الجاية نجيب الولد  
**ضحكت "ثناء" وكذلك الداية التي قالت :**
- تتربى في عزك يا "جابر" ، حقا بت زي فلقة القمر تستاهلها ، انت  
طيب وابن حلال  
**رد "جابر" بامتنان :**
- كله من فضل ربنا يا حجة ، معلش تعبناكي معانا وجيبناكي في نص  
الليل
- متقولش كده يا راجل ده واجبي ، وبعدين انت خيرك سابق وجمايك  
كثير
- انصرفت الداية وبعدها أعطاهما "جابر" ما فيه النصيب وعاد وجلس بجوار  
زوجته وابنته وقال :
- أخيراً بقى لينا عيل صغير ، يملى علينا حياتنا ، صبرنا ونولنا يا  
"ثناء" ، رحمة ربنا واسعة أوي ، ومبينساش حد ، تتربى في عزك يا  
أم .....  
**ثم سكت قليلاً يفكر في اسم لابنته فسألها :**
- إيه رأيك نسميها إيه  
**فقال "ثناء" بحب :**
- مفيش رأي بعد رأيك يا "جابر"  
**فكر جابر قليلاً ثم قال :**
- خلاص هنسميها "فرحة" ، عشان هي فرحة ربنا لينا اللي جاتلنا بعد  
غياب  
**نظرت الأم إلى ابنتها وقالت :**

- ربنا يجعلك فرحة ليكي وولي حواليك يا بنتي يارب  
ثم قال الأب بعدما وضع يده على طفلته :
- اوعديني يا أم "فرحة" نربيها على طاعة ربنا ونعرفها الحلال  
والحرام ، ونطلعها صالحة عشان تشفعلنا يوم القيامة
- أوعديك يا أبو "فرحة"
- شعر " جابر " بنشوة غربية عندما سمع تلك الكلمة فقال :
- الله حلو أوي اسم أبو "فرحة" ، وطالعة منك حلوة أوي يا أم  
"فرحة"
- ثم اقترب منها واحتضنها برفق

\*\*\*\*\*



أصبح للأسرتين ما يملؤ عليهما حياتهما ، وبدأ كل منهما يربي وليده على مذهبه .

"عزيز" اكتفى القدر بمولوده الأول ولم يجد عليه بغيره فسماه "فادي" . كان "فادي" منذ نعومة أظفاره لا ينقصه شيئاً ، إن طلب لعبة حصل على عشرة ، وإن طلب جنيهاً حصل على مائة ، رباه والده على احتقار كل الناس ، وحتى حين دخل المدرسة كانت كل مدرساته يشكون منه ومن سلوكيات التي لا تليق بسلوك طفل في مثل عمره .

نذكر موقفاً واحداً فقط حدث معه عندما كانت إحدى معلماته في الفصل تشرح في درس ما وكان "فادي" في أحد المقاعد يحمل جهاز (أتاري صغير)

- كان ذلك الجهاز أعلى مظاهر الرفاهية آن ذاك - يلعب به وحين إلتفتت المعلمة إليه وضعه بسرعة في درج مقعده فقالت المعلمة بحزم :

- انت بتعمل إيه يا "فادي"

رد "فادي" بلا مبالاة :

- أنا مش بعمل حاجة

تحركت المعلمة ونظرت في الدرج فوجدت الجهاز فقالت له :

- وريني الي في ايدك ده ، إيه ده أتاري ! وبتلعب عليه جيمز ، انت

كداب يا "فادي" والكداب بيروح النار

ثم اتجهت إلى باقي زملاءه قائلة :

- الكداب بيروح فين يا أولاد

ردّ الجميع بصوت واحد :

- الكداب بيروح النار يا مس

ثم ذهبت ووضعت الجهاز على المنضدة بجوار حقيبة يدها وقالت له :

- الأتاري ده مش هتاخده تاني ، غير لما يجي ولي أمرك

رد "فادي" بنفس أسلوبه ولا مبالاته :

- مش عايزه ، هخلي بابي يجيبلي واحد تاني

أخرج الطفل لسانه لمعلمته مما جعلها تشتاط غضباً فأمسكته من يده بعنف

وهي تقول :

- تعالى هوديك للمدير

نزع الطفل يدها بعنف وشدة قائلاً :

- لا مش هروح معاكي ، اوعي كده

خرجت المعلمة من فورها واتجهت للمدير لتشكو إليه سوء صنيع ذلك الطفل

العنيد .

كان رد المدير بارداً للغاية ووبَّخها بكلمات لازعة ، أخبرها أن العيب منها والخطأ عندها هي لأنها لا بد أن تحتوي الأطفال وتحببهم فيها بدلاً من أن تتصرف هكذا وتترك حجرة الدراسة وتشكو إليه .

عادت المعلمة تجر أذيال خيبتها إلى الفصل ، وما أن دخلت حتى وجدت "فادي" يقطع بعض الأوراق ويقذف بها على زملاؤه فاتجهت إليه وقالت له :

- تعالي يا "فادي" عايزاك في موضوع سر

نظر إليها الطفل بطرف عينه بطريقة لا تليق أبداً بسنه ، من يرى نظرتة تلك يشعر بأنه رجل عجوز يحتقر تلك المعلمة ، فسحبته من يده برفق وخرجت به خارج الفصل وطلبت من إحدى زميلاتهما أن تقف مكانها في الفصل ، وأخذت الغلام إلى حجرة المدرسين وأجلسته بجوارها وقالت له :

- ينفع الي عملته ده يا حبيبي قدام أصدقائك في الفصل

بدون أن ينظر إليها قال لها :

- آه ينفع ، على فكرة أنا مش حبيبيك

كظمت غيظها بصعوبة وحاولت أن تتمالك أعصابها ثم قالت :

- ليه هو مش أنا المس بتاعتك ، اللي جاية عشان أعلمك وأفهمك ، مش لازم برضه تحترمني وتقدرني ، هو انت جاي المدرسة عشان تتعلم

ولا عشان تلعب

- عشان أَلعب طبعاً

شعرت المعلمة بفشلها الذريع فقررت أن تدير دفة الحوار إلى اتجاه آخر فقالت له :

- طب يا سيدي انت جاي تلعب ، مش برضه اللعب ليه وقت ولا ف كل وقت

- لا عادي أنا بلعب في كل وقت

بقلة حيلة قالت المعلمة :

- يا حبيبي ، انت لسه صغير لازم تفهم إن اللي بتعمله ده غلط و عيب ،  
بلاش دي ، ينفع تزعق في المس بتاعتك كده قدام الفصل كله ،  
محدث علمك إننا لازم نحترم اللي أكبر منا  
سكت "فادي" ولم يرد ، وكأنه ضاق ذرعاً بذلك اللقاء الذي يود أن ينتهي في  
أقرب وقت فأكملت المعلمة :

- ليه متبقاش زي باقي زمايك ، هما كده أحسن منك عشان مش  
بيكذبوا ومش بيزعقوا في المس بتاعتهم ، متعرفش ان اللي بيكذب  
بيروح النار ، انت عايز تروح النار  
وحاولت المعلمة برفق أن تمسك يده فأبعد يده بسرعة وقام وتركها وانصرف .  
وأكمل يومه بالكاد حتى رجع منزله فوجد والده منهمك في اتصالاً تليفوناً  
يبدو أنه مهماً وعندما لاحظ والده قدومه فتح له ذراعيه وقبله وأكمل مكالمته  
قائلاً :

- لا ... لازم الفلوس تيجيني في ميعادها وإلا هقدم الشيكات للنيابة ،  
وده آخر كلام عندي ، أنا مش فاتحها تكية ، ومن غير سلام  
ثم أنهى تلك المكالمة التي يبدو أنها عصبتة ، فحاول أن يهدأ قليلاً حتى لا  
يروع ابنه فشعر بأن "فادي" به شيئاً ما فتسائل :  
- إيه يا حبيبي مالك فيه إيه ، هات بوسة لبابا  
ببراءة لا تتناسب مع ذلك المجرم ذو السوابق الذي كان يتحدث مع معلمته منذ  
قليل قال :

- هو أنا هروح النار يا بابا ؟  
اندهش الأب ووقف مفزوعاً وقال :  
- ليه يا حبيبي ، إيه اللي خلاك تقول كده  
تظاهر الطفل بالبكاء ثم قال :

- الميس في المدرسة بتقول إني أنا كداب وإني هروح النار وخلت زمايلي كلهم يضحكوا عليا ، وقالتلي كمان أن كلهم أحسن مني عشان مش بيكدبوا
- أخفى "عزيز" زعره وضيقة أمام ابنه ، كان يغلي من داخله كيف لهذه التافهة الحقيرة أن تسب ابنه ، ابن "عزيز بيه الدمرداش" ، كان هذا ما قاله لنفسه ، ثم قال لابنه مطمئناً :
- يا حبيبي انت مفيش حد أحسن منك عايزك تعرف كده من دلوقتي ، وأنا بكرة هروح المدرسة وأهزلك الميس دي ، خلاص يا حبيبي ، بس انت اوعى تدايق نفسك
- طبع "فادي" قبلة على خد أبيه وانصرف إلى حجرته ، وبالفعل كان "عزيز" في اليوم التالي في حجرة مدير المدرسة فقال مدير المدرسة مرحباً :
- "عزيز" بيه مرة واحدة عندنا ، يادي النور يادي الهنا قال "عزيز" وقد رسمت علامات الضجر على وجهه :
- لا أهلاً ولا سهلاً ، أنا عايز أعرف حاجة واحدة بس ، احنا بنجيب ولادنا في المدارس الخاصة وندفع لهم فلوس قد كده عشان يتعلموا ولا يتعقدوا
- تظاهر المدير بأنه لا يعلم شيئاً ثم قال :
- اهدى بس يا "عزيز" بيه واشرب قهوتك وفهمني إيه اللي حصل واحدة واحدة
- رشف "عزيز" رشفة من فنجان القهوة الذي وضع للتو أمامه ثم قال :
- لما مس متخلفة توقف الولد وتشتمه قدام صحابه وتضحكهم عليه ، وكمان إيه بتقوله إنه هيروح النار ده معناه إيه ، هي الهانم عيّنت نفسها خادم النار وأنا مش واخد بالي
- حصل امتا الكلام ده يا فندم

- امبارح الواد راجع معيط ، ونفسيته صفر عشان خاطر الهانم اللي انتوا مشغلينها عندكم ، مش عارف انتوا بتجيبيوا البلاوي دي منين ، مش تبقوا تنقوا الناس اللي بتشتغل معاكم
- تحرك مدير المدرسة من مكانه وجلس مقابلاً لـ "عزيز" ثم قال :
- اهدى بس يا "عزيز" بيه ، وأنا دلوقتي هبعث للمس دي ونفهم منها إيه اللي حصل
- وقف "عزيز" غاضباً ثم قال :
- لسه هتبعتلها وهتفهم ، المس دي لازم تمشي من المدرسة حالاً
- قال المدير محاولاً امتصاص غضب "عزيز" :
- يا "عزيز" بيه بلاش قطع الأرزاق ، البنت دي والله شاطرة وغلبانة وبنت ناس ، أنا هجيبيها هنا و هفهمها غلطها وهاخذ منها وعد إنها مش هتعمل كده تاني
- كان "عزيز" على وشك التنازل عن ما يطلبه حتى حدث شيئاً غير مجرى الأحداث فقد طرق الباب ودخلت المعلمة صاحبة المشكلة مع "فادي" وقالت بجرأة منقطعة النظير :
- عرفت إن حضرتك هنا قولت أجيك بنفسي ، ومن غير ما تتعصب ممكن نتكلم بهدوء
- بدهشة رد "عزيز" بعدما نظر إليها من أسفل لأعلى :
- مين انتي
- قالت بنفس نبرة الجراءة :
- أنا مس "نهى" اللي حضرتك جاي مخصوص عشانها
- سمع "عزيز" اسمها كأن أحد ما سكب صفيحة من البنزين على النار فوقف صارخاً :

- انت ليكي عين كمان ، وجاية بنفسك ، يومك مش فايت النهارده ،  
ازاي يا بني أدمة انتي تشتمي الواد وتضحكي عليه زمايله  
قفز منها قلبها فجأة ، لم تكن تتوقع ردة الفعل هذه من "عزيز" ولكنها  
حافظت على هدوءها وقالت :
- اهدا بس حضرتك وأنا هحكيك الموقف من بدايته وحضرتك اللي  
هتحكم مين صح ومين غلط  
بنفس نبرة الغيظ والصوت الجهوري الذي يبعث الرعب في قلب كل من  
يسمعه قال "عزيز" :
- أنا فاضي أصلي ، أسيب شغلي وأجي أسمع منك حواديت ألف ليلة  
وليلة ، هي كلمة ورد غطاها ، ملكيش دعوة بالولد تاني ، وديني لو  
الولد اشتكى منك تاني هيبقى حسابك عسير  
اندهشت "نهى" من طريقة تهديده المباشرة والواضحة فنظرت إلى المدير  
تنتظر منه أن يتدخل في هذا الموقف ولكنها كانت تنتظر العون من عاجز ،  
فوجدت المدير ما زال جالساً مكانه يتابع الموقف في صمت غريب ، فقالت وقد  
بدأ صوتها يأخذ طبعاً حاداً غير الذي أتى به فقالت :
- حضرتك بتهددني ولا إيه ، هو انت جايب ابنك هنا ليه مش عشان  
نعلمه ونربيه ، وواجب علينا لما نشوف سلوك غلط إننا نصلحه  
جلس "عزيز" وهو يخرج سيجارة ويشعلها :
- نصلحه ، هو حضرتك سمكري سيارات ، اسمعي يا بت انتي  
قاطعته المعلمة :
- بت !! إيه اللي بتقوله ده ، إيه بت دي  
أوما برأسه وأكمل :

- أيوه بت ... واحمدي ربنا إني مقولتش حاجة تانية ، الكلام خلص أنا مش فاضي ، أنا ابني متربي أحسن من عشرة زيك ، ومش واحدة زيك هي اللي هتربيلي ابني كانت الصدمة كبيرة والكلمات مُلجمة ، لم تجد "نهى" أي كلمات في قاموس لغتها يناسب ذلك الموقف فقالت :

- هو اللي متربي يشتم اللي أكبر منه ، وميسمعش الكلام ، هو اللي متربي يتصرف تصرفات زي دي ، الولد مستواه العلمي زي الزفت ، ولا بيعمل واجباته ولا بيهتم بدروسه ولا أي نيلة واحنا بعنالكم أكثر من مرة لكن ولا انتوا هنا ، وفي الآخر جاي تحاسبني على تصرفاته وقف "عزيز" هنا وتحرك خطوتين ناحية المدرسة حتى ظنت أنه سيضربها فأمسكها من ذراعها بقوة وقال لها ناهراً :

- لآخر مرة هقولك احفظي أدبك وانتي بتتكلمي ، وإلا ... قاطعته وهي تنزع يدها من يده بشدة :

- انت هتهددني تاني ، ما تقول حاجة يا سيادة المدير وأخيراً وقف المدير ليووقف ذلك النزاع الحاد قائلاً :

- يا جماعة استهدوا بالله ، روعي انتي يا مس "نهى" دلوقتي ولكن "عزيز" كان له رأي آخر فقال بثقة :

- تروح فين ، البنيت دي لازم تمشي من المدرسة حالياً زادت دهشة المعلمة ثم قالت :

- أمشي كمان ، وانت مالك انت أمشي ولا ممشيش ، ما تقول حاجة يا فندم

كانت كلمتها الأخيرة موجهة إلى مدير المدرسة الذي قال :

- قولتلك روعي انتي من هنا دلوقتي ، وحسابي معاكي بعدين ، امشي يالاه

قالت " نهى " وهي تغادر :

- اوووف

وخرجت وأغلقت الباب خلفها بشدة لا تعلم من أين أتت بها .  
قال "عزيز" بعدما جلس مكانه وكذلك المدير :

- بقى برضه دي أشكال تشغلوها معاكم في مدرسة زي دي ، أنا قولت  
كلمة ومش هرجع فيها ، البني آدمة دي لازم تمشي من هنا وإلا أنا  
هاخذ ابني أوديه مدرسة تانية بتقدر الناس

وصنع بيده حركة عد النقود تلميحاً إلى المدير بأنه سيدفع له مبلغ من المال  
وكعادته ضعف المدير أمام الحركة السحرية - حركة عد النقود بالإبهام  
والسبابة - وقال مراضياً :

- اعتبرها مشيت يا "عزيز" بيه ، انت بس متزعلش نفسك ومتحرقش  
دمك ، انت تؤمر يا فندم

أحس "عزيز" بالانتصار ثم أخرج من جيبه دفتر الشيكات وكتب به مبلغاً من  
المال وقدمه للمدير الذي تهلل وجهه فرحاً وهم بالتقاط الشيك ولكن "عزيز"  
خطفه بسرعة وقال :

- "فادي"

رد المدير بسرعة :

- فوق رأسي يا "عزيز" بيه ، ولو مشالتهوش الأرض أشيله ف عنيا

قدم "عزيز" الشيك مرة أخرى وقبل أن يمسه به المدير سحبه "عزيز" مرة  
أخرى وقال :

- "فادي" غير أي ولد تاني في المدرسة ، لو في يوم جالي تاني وهو  
زعلان هزعل كل اللي في المدرسة

رد المدير بسرعة :

- ولا عمره حد هيدوسله على طرف طول ما أنا عايش

وأمسك المدير بالشيخ ولكن "عزيز" ما زال ممسكاً بطرفه الآخر بحركة يقصد بها أن يؤكد المدير كلامه فقال المدير بسرعة :

- يا "عزيز" بيه ، ابنك ف عيني ولو مشالتهوش الارض هشيله فوق راسي

ترك "عزيز" الشيخ وأخذ المدير وعندما رأى المبلغ فرح أكثر ، يبدو أن الرقم كان كبيراً ، فأراد "عزيز" أن يطرق على الحديد وهو ساخن فقال :

- كل شهر ليك واحد زيه بس بشرط

رد المدير :

- موافق ، كل اللي حضرتك عايزه هيحصل ، ربنا ما يحرمننا منك يا "عزيز" بيه

- انت عارفه طبعاً

أوماً المدير بالموافقة ثم غادر "عزيز" المكتب تاركاً المدير في سعادته الغير منتهية .

قضى "فادي" دراسته في التعليم الأساسي كأنه صاحب المدرسة ، كان الكل يتقرب منه طلبة ومدرسين وحتى المديرين ، الكل يرجو عطفه ورحمته ، الكل يرجو أن يمن عليهم "فادي" ولو بابتسامة .

كان "فادي" برغم صغر سنه قد شرب من أبيه مبدأً واحداً وهو أنه لا أحد مثله ، هو سيد الكل ، كان والده يغرر فيه هذه القيمة وكان هو يطبقها باحترافية ، كان جميع زملائه يحبونه ، لا لأجله ولكن لأنه يغدق عليهم بالطعام وأحياناً بالمال وأحياناً بألعابه القديمة ، وكان مدرسينه يحبونه إما خوفاً من والده ومن تهديد المدير لمن يقترب منه وإما طمعاً في هدايا والده التي لا تنقطع عنهم طوال فترة دراسته .

كان فادي يتنفس كبرياء ، ويشرب عزة نفس ، كان يعامل كل البشر وكأنهم عبيد إحسان والده ، حتى في المرات القليلة التي يذهب فيها الشركة مع والده كان يعامل الموظفين بنفس المبدأ ونفس الطريقة .  
كان " فادي " يكبر يوماً بعد يوم وتكبر معه تلك الصفات وتتعمق من شخصيته ، حتى أصبح إيماناً عنده أن يذل أصدقاؤه أن يراهم وهم يطلبون منه شيئاً ما وهو يعطيهم كأنه يعطف عليهم .

\*\*\*\*\*



نبوغ  
مبكر

في الجانب الآخر ، منزل العم " جابر " الرجل الطيب الذي رزقه الله بعد " فرحة " ببنتين " سارة " و " ياسمين " فرحتين أخرتين حمد الله عليهما بالرغم من طلبه من الله أن يرزقه بولد ولكن إرادة الله فوق كل شيء ، وكان يؤمن بذلك أيما إيمان لم يجزع ولم يضجر وسلم لأمر الله ومراده ، كان دائماً يشعر بأن بناته الثلاثة يغنيهن عن أي شيء لما وجد فيهن من النباهة والذكاء ، كان يقول دائماً لزوجته :

- عارفة يا " ثناء " سيدنا " محمد " صلى الله عليه وسلم بيقول ( من رزقه الله بثلاثة بنات فصبر عليهن وأطعمهن وسقاهن وكساهن من جدته كن له حجاباً من النار يوم القيامة )

كان فرحاً بهذا الحديث الشريف كثيراً ، كان يشعر بأن النبي صلى الله عليه وسلم يقصده هو بذلك ، كان يعمل جاهداً حتى لا يجعلهن بحاجة لشيء ، وكانت " ثناء " تفرح لفرحه ولكن كان هناك شيء بداخلها يقول لها أنه

بحاجة إلى ولد ، فالبنت كما يقولون مصيرها بيت زوجها ، الولد هو السند ، كانت دائماً ما تتكلم مع " جابر " في هذا الموضوع ولكن " جابر " يقنعها بلباقته أنه الآن لا فرق بين ولد وبنت وأن بناته لا مثيل لهم في نبوغهم وذكائهم وحتى تفوقهم الدراسي .

كانت " فرحة " في الصف السادس الابتدائي في ذلك الحين وكان جميع معلميها يشهدوا لها بأنه سيكون لها شأن كبيراً عندما تكبر ، كان الكل يشهد بنبوغها المبكر .

في ذلك اليوم كانت " ثناء " كعادتها تضع أطباق الطعام على السفرة حين نادت على " جابر " قائلة :

- يلاه يا أبو " فرحة " عشان تتغدى

خرج " جابر " من حجرته وهو يتسائل :

- لسه " فرحة " مجاتش من المدرسة برضه ، ده العصر قرب يأذن

قالت " ثناء " مطمئنة :

- لا متقلقش هتيجي دلوقتي إن شاء الله ، هي قالتلي إنها هتتأخر شويأ بعد المدرسة

ولم تكمل كلمتها حتى سمعت خبطاً على الباب فقالت :

- أهى جات أهى

اتجهت " ثناء " إلى الباب وفتحته ، وبالفعل كانت " فرحة " من يطرق الباب ، فقبّلت يد والدتها كعادتها وقالت :

- السلام عليكم

رد الأب بسرعة :

- وعليكم السلام يا بنتي ، ليه اتأخرتي كده يا حبيبتى

بسرعة تحركت " فرحة " إلى أبيها وقبّلت يده قائلة :

- أصل الأبله اليومين دول بتدينا حصة زيادة عشان الامتحانات قربت ،  
ادعيلي يا بابا  
رفع " جابر " يديه داعياً :
- ربنا معاكي يا " فرحة " ويفرحك يارب ، يلاه عشان نتغدى  
قالت " فرحة " بأدب :
- حاضر يا بابا هروح أغسل ايديا الأول  
جلس " جابر " على المائدة وفوجئ عندما وجد الطعام فقال :
- إيه دا كله ، فراخ ، وملوخية ورز ، دا احنا بقينا ولا الأغنيا ولاد الذوات  
ابتسمت " ثناء " وقالت :
- كله من فضلة خيرك يا أبو " فرحة " ، حسك بالدنيا  
قال " جابر " :
- عايزين نوفر في المصاريف شوية احنا عندنا ٣ بنات عايزين نربيهم  
ونجوزهم  
ضحكت " ثناء " وقالت :
- ياااه يا أبو " فرحة " ، ربنا يطول في عمرنا لحد ما نشوفهم في بيوتهم  
متهنين مع أجوازهم ، ونشيل بايدنا أولادهم
- حيلك ، حيلك لسه بدري على الكلام ده ، مش لما يخلصوا تعليم الأول  
، أنا ناوي أخليهم يكملوا تعليم لحد الجامعة عشان يبقوا بنات  
" جابر " أول مين ياخدوا الشهادة الجامعية في الحته كلها  
قالت " ثناء " :
- يا راجل بلا تعليم ولا وجعة دماغ ، البت ملهاش غير بيتها وجوزها  
رد " جابر " بسرعة :
- يا ولية الأفكار دي بطلت من زمان ، البنات لازم تتعلم وتاخذ فرصتها  
زيها زي الولد بالضبط

وهنا دخلت "فرحة" وقالت :

- انتوا لسه برضه بتتكلموا في الموضوع ده تاني

أنهت "ثناء" الحوار قائلة :

- اندهي اخواتك من جوه يا "فرحة" عشان يتغدوا

أذعنت "فرحة" للأمر بسرعة ودخلت وبعد ثواني كانت "ياسمين" و"سارة"  
خلفها ويجلسون على المائدة لتناول الغداء .

\*\*\*\*\*



# ٩

## ريعان شاه

مرت سنوات آخر

قد تمر على المرء سنوات وهو لا يشعر بها ، في الغالب يعيش فيها حالة من السلام ، تكون حياته خالية من الأحداث الجديدة ، حياة بلا جديد بلا شيء مما يجعلها بطيئة الرتم ، فقد يصحو من نومه ليعاني من يوم طويل ممل لا جديد به حتى يذهب إلى فراشه في المساء ، وهكذا كما الثور في الساقية لا يستطيع أن يقف بالرغم من أنه يشعر بالتعب ولكنه يعلم أنه إذا وقف سيأتي صاحبه بكرباجه ليلسهه على ظهره ولذلك فهو يقرر أن يكمل مسيرته في دورانه الممل حول ساقيته .

هكذا مرّت العشر سنوات الأخرى على الأسرتين ، فكل منهما يفعل نفس الشيء نفس الروتين .

كان "فادي" في الفرقة الثالثة لكلية التجارة التي قرر والده أن يلحقه بها حتى يساعده بعدما يتخرج في شركاته وأعماله .

أما "فرحة" فقد قررت بعدما أقنعت والدها أن تدخل كلية التربية لأنها تريد أن تعمل في مجال التدريس لاقتناعها بسامية المهنة وأنها مهنة الأنبياء وأن ثوابها عند الله كبير.

"فادي" أصبح شاباً في ريعان شبابه، رزقه الله الكثير والكثير، كان لديه كل شيء يحلم به أي شاب في سنه، يقود سيارة لا يقودها رئيس الجامعة ويرتدي ثياباً من الخارج ثمنها كفيلاً بأن يجهز عروساً من كافة كل شيء، كان له الكثير والكثير من الأصدقاء الذي يلتفون حوله وطبعاً ليس لجمال عيونه ولكن لنقوده الكثيرة الذي يصرّفها عليهم ببزخ، كان الكل يحبه ويهابه، لا يجرؤ حتى أحد من أصدقائه أن يثني له كلمة أو يعارضه في شيء وكان والده فرحاً بذلك، كان يشعر بأن ذلك هو عين العقل حتى يكبر الولد وهو يعرف قدره ومن يكون، أما عن أمه فكان لا يعجبها حال ابنها، كانت كثيراً ما تؤنبه على أفعاله تلك ولكنه لا يلقي بالاً لكلماتها، بل وأحياناً يتركها تتحدث ويغادر المكان، فكان ذلك يحرق قلبها أكثر وأكثر.

أصبح "فادي" لا يهتم أحد، حتى والده نفسه أصبح علاقته به كعلاقة عميل ببنك يذهب إليه عندما يريد المال فقط.

حاولت "نسرین" كثيراً أن تُوصل وجهة نظرها لـ "عزيز" ولكن الأخير أيضاً كان لا يبالي بكلامها فقالت له ذات ليلة بعدما أرّقتها التفكير في حال ابنها :

- يا "عزيز" .... "عزيز" .... انت صاحي

رد بنعاس ظهر من كلماته المتقطعة :

- أيوه في حاجة ولا إيه

- أبداً عايزه أكلمك في موضوع مهم جداً

- والموضوع ده مينفعش يتأجل للصبح

اعتدلت "نسرین" في جلستها وقالت :

- هو أنا بقعد معاك امتى عشان أكلمك فيه

اعتدل "عزيز" بنفاز صبر وقال :

- طب خلاص ، أهو يا ستي اتفضلي احكي
- أغمضت "نسرین" عينها تحاول جمع شتات تفكيرها وقالت :
- أحوال "فادي" مش عاجباني
- باهتمام رد "عزيز" قائلاً :

- ليه ماله ، هو بيشتكى من حاجة ، فيه حاجة تاعباه

أنكرت "نسرین" بسرعة لتهدئ من روعه وقالت :

- لا لا لا ، بس كل يوم سهر لوش الصبح واحنا منعرفش بيسهر مع مين وبيعملوا إيه ، أنا خايفة عليه

ابتسم "عزيز" بعدما فهم ما تقصده بكلامها ثم قال :

- يا ستي ، خليه يعيشله يومين ، يتمتع بشبابه ، هو أنا بتعب وبعمل الفلوس دي كلها ليه مش عشانه ، مش عايز أحرمه من حاجة ، ده برضه ابني الوحيد ومش عايز أحنقه

قالت الأم :

- بس أنا خايفة عليه ، هو طول الوقت مش تحت عيننا ومش عارفينه فين ولا بيعمل إيه ؟

عصّ "عزيز" إبهامه يفكر في كلام زوجته ثم قال :

- عندك حق فعلاً ، أنا عندي فكرة حلوة ، بدل ما يروح يسهر مع صحابه يجيب صحابه يسهروا معاه هنا

يبدو أن "نسرین" استحسنت الفكرة جداً فقالت :

- والله فكرة عشان حتى يبقى تحت عيننا

قال "عزيز" وهو يهم بالنوم مرة ثانية :

- ماشي بكرة أعرض عليه الفكرة دي ، يلاه تصبحى على خير

نظرت "نسرین" له نظرة دهشة وقالت :

- يا راجل انت هتنام كده على طول  
إلتفت إليها ونظر إليها بطرف عينه بخبث وقال :  
- قصدك إيه يعني  
قالت بخبث :

- يعني انت مش فاهم ، ولا عامل نفسك مش فاهم  
ثم وضعت يدها على رأسه وأخذت تعبت في شعره الأبيض فقال لها :  
- يا شيخة احنا كبرنا على الحاجات دي  
قالت "نسرين" بغرور فتاة للتو أكملت عامها العشرين :  
- كبرنا .... اتكلم على نفسك ، انت بس الي كبرت ، أما أنا لسه في عز  
شبابي ، مش زيك عجزت  
كانت الكلمة بمثابة فتيل الإشعال الذي أشعل النار في البنزين فنهض "عزيز"  
قائلا :

- أنا عجزت . طيب دلوقتي هوريكي إذا كنت عجزت ولا لأ

\*\*\*\*

في صبيحة ذلك اليوم كان "عزيز" يجلس على مائدة الطعام وأمامه "نسرين"  
فقال لها :

- فين "فادي" هو مش هيفطر معانا كالعادة برضه  
قالت "نسرية" بسخرية :

- يفطر !! هو بيصحي غير العصر

بدأ "عزيز" في تناول قهوته وقال :

- خلاص لما يصحي بلغيه إني عايزه على الغدا ، يعني ميخرجش قبل  
ما أشوفه

وتناول "عزيز" قهوته وانصرف إلى عمله .

في وقت الغذاء كان "فادي" ينتظره لا لأنه طلب منه ذلك ولكن لأن نقوده قد صُرفت كلها فأراد أن يأخذ غيرها وعندما رأى والده على مائدة الطعام جلس بجواره قائلاً :

- مساء الخير يا بابا

رد "عزيز" قائلاً :

- مساء الخير يا "فادي" ، إيه يا عم ، كده نشوفك بالصدفة ده أنا حتى في مقام باباك

لم يدرك مزحة والده أو ربما لم ترق له فرد "فادي" معتذراً :

- سوري بابا ، بس انت بتروح الشغل بدري ومش بتيجي غير متأخر ، كنت عايز حضرتك في موضوع كده

- خير يا حبيبي فيه إيه ؟

- أنا محتاج فلوس

وعلى تلك الكلمة كانت "نسرين" قادمة فقالت مقاطعة بحدة :

- فلوس تاني يا "فادي" ، انت يا بابا الفلوس دي كلها بتوديها فين

سكت "فادي" يبحث عن جواب وأخيراً وجده قال :

- أصلي نزلت أنا وصحابي امبارح وضاعوا كلهم

قال "عزيز" مهدئاً :

- بالراحة على الولد يا "نسرين" ، اصرف براحتك يا حبيبي وضيع

براحتك ، هو أنا عندي كام "فادي" ، في درج المكتب اللي جوه في

فلوس خد اللي انت عايزه

قال "فادي" ممتناً :

- ميرسي داد

وهمَّ "فادي" بالإنصراف فأوقفه "عزيز" قائلاً :

- "فادي" ..... هو انت وصحابك بتسهروا فين

تلعثم "فادي" قليلاً ثم قال :

- ساعات بنقعد في كافيه ، ساعات عند حد من صحابي وكده يعني  
وهنا وجد "عزيز" ما تمنأه فقال له :

- طب ما تخلي صحابك يجوا يسهروا معاك هنا في البيت  
قال "فادي" بدهشة :

- اشمعنا يا بابا يعني ، وبعدين من امتا وانت مش بتثق فيا

شعر "عزيز" بأنه ابنه سيغضب وكان ذلك يعزُّ عليه ، فقال :

- مش قصدي والله يا حبيبي ، بس أنا خايف عليك وقلقان عليك

- من إيه يا بابا أنا مش صغير عشان تقول كده

- خلاص يا حبيبي عادي براحتك ، بس خلي بالك من نفسك

- حاضر يا بابا

ثم انصرف الابن حتى لا يدخل في نقاش آخر من والده

\*\*\*\*\*



في الجانب الآخر كانت "فرحة" الطالبة المجتهدة التي استطاعت أن تصل للفرقة الثالثة من كلية التربية التي طالما حلمت بها منذ نعومة أظفارها. كانت "فرحة" مثال للطالبة المثالية المجتهدة ، التي تؤمن بهدفها وتسعى لتحقيقه ، كان أبواها يريان فيها الدنيا وما فيها ، كانت تهون عليهما صعوبات الحياة ، وجدا فيها العوض عن خلفه البنين التي يحلم بها كل إنسان .

كانت "فرحة" معروفة بين زميلاتها بلقب النكد لأنها دائماً تكلمهم عن المذاكرة وتؤنبهم على استهتارهم وخصوصاً صديقتها المقربتين لها "أسماء" و"سها" وكانا دائماً في خلاف معها بسبب نصائحها لهما التي لا تكف عنها ، وحتى وهي تعلم أنهما يضيقان ذرعاً بتلك النصائح . كانت "أسماء" تجلس مع صديقتها "سها" يضحكان حتى لحما شبح "فرحة" قادماً من بعيد فعدلت "أسماء" من جلستها وقالت :

- بس بس عشان النكد وصلت  
 قالت "سها" بإبتسامة :

- ليه بتقولي عليها ليه كده بس حرام عليكي ، دي طيبة أوى  
 نهضت وقالت :

- عارفة والله إنها طيبة ، وده اللي مصبرني عليها لحد دلوقتي ، بس أنا  
 زهقت من كتر نصايحها اللي مش بتخلص ، عاملة فيها ولية أمرنا ،  
 أول مرة أشوف واحدة ملهاش في الضحك ولا الهزار ولا في أي حاجة  
 خالص

وهنا كانت "فرحة" قد وصلت إليهما فقالت لهما :

- صباح الخير يا ضائعات

امتعضت "أسماء" بأسنانها وعضت عليها بشدة محاولة ألا يظهر ذلك لأحد  
 فقالت ل "سها" بصوت هادي :

- شايفة

ثم اتجهت إلى "فرحة" وقالت :

- ازيك يا عُقد

نظرت إليها "فرحة" بدهشة وقالت :

- أنا عُقد ، ليه بتقولي كده ، متشكرة يا ستي

تدخّلت "سها" لتتقذ ما يمكن إنقاذه فقالت :

- سيبك منها تعالي نقعد على الكافتريا شويا

رفضت "فرحة" بشدة وقالت :

- لا لا لا .. أنا هروح المكتبة أذاكر شويا

قالت "أسماء" بغضب :

- هو انتي مفيش في دماغك غير المذاكرة ، ده انتي كئيبة ومملة

قالت "فرحة" مصححة :

- هو المفروض يكون فيه إيه ثاني غير المذاكرة

قالت "أسماء" بخبث :

- فيه كتير ، مفيش مز ملك القلب وجوه الروح والعين شايفاه ومش  
طايله ، مفيش حته حنينة معاكي ، قلبك مبيعرفش يحب ولا إيه ،  
مفيش لول كده ولا كده

تفهمت "فرحة" ما تقصده "أسماء" فقالت :

- لا خالص ، أنا الموضوع ده شايله من دماغي خالص لحد ما أخلص  
جامعة ، واشتغل كمان

قالت "أسماء" لـ "سها" :

- مش قولتلك إن دي عقد

قالت "سها" بخبث :

- هو برضه فيه بنت ملهاش في كده برضه

ثم أكملت "أسماء" :

- يعني مفيش حد بيقابلك في الشارع مثلا بيقولك ادلع يا جميل ، جن  
علينا يا غزال

قالت "فرحة" بخجل :

- فيه كتير ، بس أنا مش بعبرهم ، كلاب الشوارع دول

قالت "أسماء" بغضب :

- هتجيبيلي السكر ، أنا نفسي أفهم تركيبتك دي معمولة من إيه ؟

نفذ صبر "فرحة" لأنها لا تحب أن تخوض في تلك المواضيع فقالت :

- أنا مش فاضيالكم ، أنا رايحة المكتبة هتيجوا معايا ولا لأ

قالت "سها" :

- لا أنا مش هروح

غنت "أسماء" بدلع :

- مش هرووووح
- نظرت "فرحة" لـ "أسماء" بأشمئزاز ثم قالت :
- دمك تقيل برضه ، هاه هتيجي معايا ولا هتروحي معاها
- رجعت مرة أخرى للغناء ولكن هذه المرة هما الاثنتين :
- مش هرووووح ، وبعض ما عندي بقول وبصوت مبجوح
- ذهبت "فرحة" كعادتها إلى المكتبة لتقضي بعض السويعات بين الكتب والمراجع .
- حين أنتهت من محاضراتها وفي طريقها للمنزل قررت أن تمر على بقالة أبيها تسأله عن حاله ففوجئت أن المحل مغلق ولم تجد في المكان إلا "ربيع" صديق والدها فهولت إليه مستفهمة :
- ازيك يا عم "ربيع"
- رد "ربيع" ممتناً :
- أهلا ازيك يا "فرحة" يا بنتي عاملة إيه ؟
- الحمد لله يا عم "ربيع" ، متعرفش بابا راح فين وليه قفل دكانه بدري كده
- تردد "ربيع" قليلاً قبل أن يقول :
- متقلقيش يا بتي ، هو حس إنه تعبان شويأ فأنا قولتله اقفل الدكان وروح ارتاح شويأ ، متقلقيش
- هزت "فرحة" رأسها متفهمة وقالت :
- شكراً يا عم "ربيع" ، بعد اذنك
- اتفضلي يا بنتي ، ابقني طمنونا على أبوكي
- حاضر يا عم "ربيع"

وهرولت إلى المنزل لتطمئن على والدها ، كانت تشعر في قرارة نفسها أن الحقيقة غير ما قاله "ربيع" ، كانت تشعر أن هناك شيئاً ما ليس جيداً قد حدث لأبيها .

عندما دخلت المنزل وجدت صوتاً ما قادم من حجرة نوم أبيها فدخلت إليها فوجدت والدتها وأخوتها مجتمعون عنده وهو يظهر عليه علامات التعب فأسرعت إليه وأمسكت يده وتبدو على وجهها علامات الحزن قائلة :

- سلامتك يا بابا مالك

بصوت واهن رد " جابر " :

- متقلقيش يا بنتي شوية تعب وهيروحو لحالهم

- خلاص قوم يلاه نروح للدكتور ، ولا أقولك أنا هقوم أتصل بأي

دكتور يجي هنا

هممت بالنهوض فأمسك الأب يدها قائلاً:

- صدقيني مش مستاهلة ، أنا عارف تعبني و دوايا

ثم إلتفت إلى "ثناء" قائلاً :

- خدي البنات يا "ثناء" وسيني مع "فرحة" شوية

بدهشة نظرت "ثناء" إلى " جابر " وأذعنت لأمره ، وبعد أن خرجت "ثناء" قال

جابر لـ "فرحة" :

- اقفلي الباب كويس يا "فرحة" واتأكدي إن محدش بيسمعنا

اتجهت "فرحة" لتوها إلى الباب وأوصدته جيداً وعادت وهي تضرب الأخماس

في الأسداس وجلست بجوار والدها الذي ظل صامتاً لمدة زادت عن دقيقتين ،

يبدو أن " جابر " أراد أن يجمع شتات تفكيره وأخيراً انتزع "فرحة" من

حيرتها قائلاً :

- كان في سر أنا خبيته عليكي كثير ودلوقتي انتي كبرتني وآن الأوان إنك

تعرفيه

إلتهبت نار الحيرة في صدر "فرحة" بعد تلك الجملة وقالت :

- سر !!!! إيه ؟!!

بالكاد اعتدل "جابر" بعد أن ساعدته "فرحة" وهو يقول :

- أنا مريض بالفشل الكلوي من فترة وخبيت عليك انتي واخواتك ،  
بس أنا حاسس إن نهايتي قربت فكان لازم أكتب وصيتي ، عشان  
خلاص أنا حاسس إن أيامي في الدنيا معدودة ، بصي يا بنتي ....

بفزع قاطعته "فرحة" :

- بعد الشر عليك يا بابا ، إيه اللي بتقوله ده ، ربنا يدك طولة العمر

قاطعها "جابر" بحدة :

- اسمعي يا بنتي اللي هقولهوك ده وحطيه حلقة في ودنك ، أنا ربنا  
مدانيش ولاد بس أنا متأكد إنه اداني بنت بميت راجل ، عايزك تخلي  
بالك من اخواتك ، وتحافظي عليهم ، انتي هتبقني أبوهم بعدي ،  
وأخوهم الكبير ، وسندهم في الدنيا ، انتي هتبقني مكاني

لم تستطع "فرحة" أن تمنع دموعها أكثر من ذلك فهطلت حتى أغرقت خديها  
وقالت :

- يا بابا بلاش الكلام ده ربنا يدك طولة العمر ، إن شاء الله هتخف  
وتبقى كويس

- يا بنتي اسمعي كلامي كويس ، أنا عارف أنا بقول إيه ، عشان كده  
عايزك توعديني إنك تخلي بالك من اخواتك

دخل "جابر" في نوبة سعال شديدة ، ثم قال :

- كان نفسي يا بنتي أسبيلكم حاجة تعينكم على الدنيا وشقاها ، بس  
العين بصيرة والإيد قصيرة ، سامحوني غصب عني

- يا بابا انت ربيتنا وعلمتنا ومخلتناش محتاجين أي حاجة ، وإن كان  
كل أب المفروض يسبب ورث لأولاده فحضرتك سايلنا أفضل ورث

في الدنيا أخلاقنا الحلوة ومبادئنا الي اتعملناها على إيدك ، واحنا  
هنفضل طول عمرنا تحت رجلك وطوع أمرك وبليز متقولش الكلام  
ده تاني

ثم تمسح "فرحة" دمعة فرّت من عينها بسرعة وقالت بإبتسامة خالطتها  
الدموع :

- إنت مش دايمًا كنت بتقولي نفسك تشوفني عروسة ، إيه غيرت رأيك  
ليه ، هو مين هيطلّع عين العرسان لحد ما يلاقيلي عريس كويس ، هو  
مين الي كان حالف إنه يرقص في فرحي ، هو مين الي هيجهزني يا  
سي بابا ، انت عاوز تخلف وعدك ليا ليه  
ابتسم "جابر" وأشار إليها فاقتربت منه وقبّل جبينها قائلاً :

- عارفة يا "فرحة" ، انتي لما اتولدتني كنتي فرحتنا بعد ما عشنا سنين  
محرومين من الخلفة ، ولما عرفت إنك بنت قولت إنك بنت بميت  
راجل ، ومن يومها ربيتك على الأساس ده ، ربيتك على إنك راجل  
البيت بعدي ، كنت حاسس إنني مش هقدر أكمل مشواري للآخر ،  
والي حسبته فعلا حصل ، يا بنتي أنا مطمئن على أمك واخواتك عشان  
انتي موجودة .

قبّلت "فرحة" رأس والدها قائلة :

- يا بابا كفاية ، أرجوك كفاية ، ربنا يديك طولة العمر  
- طولة العمر ليكي يا بنتي ، أنا كنت عايز أقولك الكلمتين دول ،  
سامحيني يا بنتي أنا هشيلك فوق طاقتك ، منصب صعب عليك بس  
انتي قدها

ثم قال "جابر" كلمته ونظر إلى الأعلى ثم قال بصعوبة :

- أشهد ألا إله الله وأن محمد رسول الله

وكانت هذه الجملة آخر ما قاله "جابر" ، فما كان من "فرحة" إلا أن صرخت صرخة سمعها أهل المشرق والمغرب ، لم تكن تصدق أن والدها أمامها الآن جثة هامدة لا روح فيها ، تكلمه ولا يسمعها ، ترفع يده فتسقط دون أي مقاومة ، كل الجمل لا تكفي الآن لوصف شعورها .

ثلاثة أيام مرت على الأسرة وهي في نحيب وصراخ لفقيد ربها وعائلها الوحيد ، كانت "فرحة" أكثرهم توجعاً وألماً لأنها أكثرهم تعلقاً بأبيها ، ولكنها حافظت على رباطة جأشها ، حتى لا تظهر ضعيفة أمام أخوتها فقد أصبحت الآن بمثابة الأب لهم ، كانت تتحايل عليهم أن يضعن ولو لقيمات من الطعام في أفواههن ، وبالكاد كن يسمعن كلامها ، حتى والدتها ضعفت وخارت قواها وكأنها انكسرت لفراق حبيبها وزوجها ورفيق دربها .

كانت "فرحة" تقوم بدور الأم لوالدتها ، تنصحها دائماً وكأنها الأقوى والأكثر خبرة ، والحقيقة أنها غير ذلك ، هي فقط تتظاهر بالقوة حتى تمنح تلك القوة لوالدتها وأخواتها .

قالت لوالدتها في محاولة للتماسك لرأب الصدع الذي حدث في المنزل بعد رحيل والدها :

- وبعدين يا ماما ، بقالك ٣ أيام ما أكلتيش ، ذنبهم إيه اخواتي دول تعذبهم معاكي ، لما انتي عملي كده امال الصغيرين دول يعملوا إيه ، بابا مات وده أمر واقع ولازم نسلم بيه

كانت "فرحة" بتلك الكلمات تضع حفنة من الملح في جرح أمها الغائر فما كانت من والدتها إلا أن انهمرت دموعها أمطاراً ، فأكملت "فرحة" موسية :

- وحدي الله يا ماما ، انتي ست مؤمنة وعارفة إن ده نصيب ومحدش يقدر يغيره ، و الأعمار كلها بإيد ربنا

قالت الأم بوهن :

- ونعم بالله ، بس أنا خلاص ضهري اتحني بعد أبوكي ، أنا مليش حد غيره انتي عارفة ، أنا مش عارفة ازاي نفسي مطاوعاني أعيش بعد منه ، يارب خدني بقى وريحني من العذاب ده
- قبّلتها "فرحة" في جبينها مهدئة وقالت :**
- بعد الشر عليكي يا ماما ، وأنا واخواتي هتسيبينا لمن
- ثم قالت مازحة :**
- انتي عارفة بابا كان موصيني أجيبك عريس ، عشان تعيشي حياتك وتشوفي مستقبلك
- ابتسمت "ثناء" بالكاد فأردفت "فرحة" :**
- أيوه كده ، خلي الدنيا تنور يا ست الكل ، إيه نفسك فيها ولا إيه ، والنبي شكلك نفسك فيها ، انتي شاوري كده وتلاقي العرسان مرميين تحت رجليكي
- وَحَدَّت "ثناء" ابنتها في يدها قائلة :**
- إيه اللي بتقوليه ده ، هو فيه راجل في الدنيا يملئ عيني بعد أبوكي الله يرحمه ، أنا من بكرة هنزل الدكان وهقف فيه مكان أبوكي
- وأنا كمان من بكرة هدور على شغل بالليل عشان أساعدك في مصاريف البيت ومصاريف اخواتي
- وقفت "ثناء" منزعة :**
- إيه اللي بتقوليه ده ، انسي الفكرة دي خالص
- يا ماما ...
- قاطعتها :**
- انسي ، يعني انسي ، قال تدوري على شغل قال ، شيلي الموضوع ده من دماغك
- وضعت "فرحة" يدها على كتف "ثناء" قائلة :**

- حتى لو قلتك إن دي وصية المرحوم بابا  
اندهشت الأم فأردفت "فرحة" :

- أه ، هو وصاني قاللي خلي بالك من اخواتك ، ومن مامتك  
- بقولك انسي ، لما أموت إن شاء الله ابقني دوري على شغل واصرفني على  
اخواتك زي ما انتي عايزة ، لكن طول ما أنا عايشة على وش الدنيا  
وفيا النفس أنا هكمل اللي كان عايزة أبوكي ، أبوكي كان نفسه تكبروا  
وتاخدوا الشهادة الجامعية ... مفهووم  
حضنتها "فرحة" بشدة وقالت :

- بعد الشر عليكي يا ماما ، احنا ملناش غيرك دلوقتي بس ممكن  
تسمعيني وتفهمي وجهة نظري  
بفراغ صبر قالت "ثناء" :

- افهم إيه وأنيل إيه ، عايزة تضيعي مستقبلك ، لو عايزة تفرّجي  
أبوكي في تربته يبقى تنجحي وتعملي اللي كان نفسه فيه  
ردت "فرحة" قائلة :

- تعالي نحسبها صح ، أنا مش هسيب الكلية ولا حاجة ، أنا هدور على  
شغل بعد الكلية ، وبعدين تفتكري الدكان هيلحق على مصاريفي أنا  
واخواتي ، ده على أيام بابا كان يدوب يكفيننا أكل وشرب  
ولم تجد "ثناء" بُدأ من الرضوخ عند رغبة ابنتها العنيدة كالعادة ، وكانت  
بداخلها تشعر بالفخر بها ، فهي نعم البنت ، فقد صدّقت قول أبيها حين قال  
عنها أنها بنت بألف ولد ، وبعد لحظات من الصمت قالت "فرحة" :  
- تعالي يلاه ناكل لقمة مع بعض

ردت "ثناء" قائلة :

- مش هاين عليا أقعد ع السفره من غير أبوكي  
- على فكرة لو ما أكلتيش معنا أنا مش هاكل لا أنا ولا اخواتي

ردت "ثناء" قائلة :

- أرجوكي يا بنتي متضغطيش عليا أنا مش قادرة

وقفت "فرحة" وقالت :

- واضح كده إن الذوق مش هينفع ، يبقى بالعافية بقى ، يالاه ست

هانم قومي كلي ، وهتاكلي يعني هتاكلي ، أنا دلوقتي راجل البيت

ولازم تسمعي كلامي ، مفهوم ولا مش مفهوم

ابتسمت "ثناء" لا إرادياً ، ولكن ما لبست أن تذكرت زوجها فلم تستطع أن

تمنع دمعتين من عينيتها فاحتضنت ابنتها بحب فقالت "فرحة" :

- كفاية بقى يا ماما بلاش متعذبيناش ، أبوس إيدك كفاية

ثم مدت يديها ومسحت دمعتي والدتها بحب وسحبته من يديها للخارج .

كانت "فرحة" بارعة في التمثيل و الإداء ، كانت تدعي الصبر والجمود والقوة

ولكنها كانت إذا خلت بنفسها ولو لدقيقة تترك العناء لدموعها الغزيرة كي

تهطل حتى تزيح كم الهموم من على صدرها ، كانت كعادتها دائماً إذا أرادت

أن تبكي فلا تدع أحد يرى دموعها ، حتى لا تظهر ضعيفة ، كانت دائماً تدعو

وتبتهل إلى الله أن يعينها على تنفيذ وصية أبيها .

كان العثور على عمل بالمواصفات التي تريدها "فرحة" أشبه بالبحث عن إبرة

في كومة من القش ، ما هو العمل الذي يجعلها تذهب إلى جامعتها وتذاكر

دروسها ؟ كانت المعادلة صعبة الحل ، كلما دخلت مكان تطلب فيه عملاً إما

أن تُطرَد وإما أن تُرفض ، حتى أنها عرضت على أصحاب أحد المطاعم أن

تغسل الأطباق وأن تنظف وتمسح المطعم حتى رق لحالها قائلاً :

- بصي انت شكلك بنت حلال ، أنا محتاج جرسونة الفترة المسائية من

الساعة ستة لحد الساعة اتناعشر

ردت ممتنة :

- ربنا يبارك في حضرتك ، وأنا أوعدك إنني هشتغل بإيدي وسناني

- جاهزة تستلمي الشغل من بكرة ، وهديكى ٥٠٠ جنيه فى الشهر مبدئياً ، وممكن بشطارتك تخلىنى أزودلك مرتبك
  - إن شاء الله هكون عند حسن ظن حضرتك يا فندم
- كان العمل إلى حد ما غير متعب وخاصة أن الفترة المسائية لا يوجد بها ضغطاً من الزبائن على المطعم .
- حمدت الله على ذلك العمل الذي رأيت فيه أنه سيساعدها كثيراً بجانب دكان أبيها الذي كانت تقف فيه والدتها فى بعض الأيام وهي فى الأيام التي ليس لديها محاضرات فى الجامعة فيها .
- وهكذا نصبت فرحة نفسها مسئولاً عن هذه الأسرة البائسة تنفيذاً لوصية والدها ، المنصب الذي اضطرت أن تقبله غصباً عنها ، كانت تعلم أنه منصباً صعباً ولكن لا بد منه .

\*\*\*\*\*



## لقاء وحيرة

"فادي" الشاب الغني الثري الذي يلتف حوله عشرات الأصدقاء ليس حياً فيه ولكن عملاً بالمقولة التي تقول (من جاور السعيد يسعد) .  
كان يرى في ذلك الفخر لأن أصدقاءه دائماً في حاجة إليه ، كانوا دائماً يسهرون معه في شقته التي استأجرها ليلسهر فيها مع زملائه مع بعض المومسات اللاتي يلتقطنهن من الشارع ليلاً ، كانت شلته الأقرب لقلبه هم "علاء" ابن رجل أعمال كبير وأيضاً "تامر" شاب بسيط ميسور الحال نوعاً ما ولكنه انجرف لتيابه .  
كان "فادي" الممول لهذه الشلة بالرغم من أن بعضهم أبناء أغنياء أيضاً ، ولكنه كان يحس بالفخر في أن يصرف نقوده عليهم ، كانوا يحبونه عندما يقول :

- النهارده محضرلكو سهرة إنما إيه آخر دلع
- فرح الجميع بذلك وأثنوا عليها ما عدا "علاء" الذي قال :
- لا مينفعش يا برنس بابا موجود النهارده مش مسافر ، ولازم أبات معاه ، مش هينفع أروح الشقة
- رد "تامر" قائلاً بسخرية :
- مش لازم تروح انت ، خليك جمب باباك وهات المفتاح نروح احنا
- رد "علاء" قائلاً :
- إيه الندالة اللي انتوا فيها ؟ ، عايزين تروحوا من غيري
- قال "فادي" :
- هو حد كان منعك ، تعالى معانا ..... ولا انت صحيح النهارده يا عيني هتشرّب اللبن وتنام بدري عشان عندك مدرسة الصبح
- المزحة لا تستحق ولكنها من فم "فادي" لها طعم آخر ، سيضحك الجميع
- مجاملة أكيد وذلك ما حدث بالفعل ، فقد ضحك الجميع فقال "تامر" قاطعاً
- ضحكته :
- غيروا الموضوع عشان البنات جاينين
- كان من بقية الشلة "هنا" و"علا" كانا يسهران معهم في الملاهي الليلة ولكن كانا يرفضن أن يذهبا معهما إلى شقتهم المشبوهة معللين ذلك بأن آخرهم أن يرقصن أو أن يشربن لكن أن يذهبا أعمق من ذلك فلا ، وكان "فادي" يحترم ذلك المبدأ فيهن ، كانت "علا" أول من تحدثت قائلة :
- صباحوا أبيض
- رد "فادي" بعدما غمزها في جمبها
- صباحوا عثل ، فين الواد الملزق بتاعك اللي دايمًا لازلك
- ردت "علا" بضحكة :

- واد خنيق كده ، بس الحمد لله ارتحت منه ، فهمته إنه مش على بالي أصلا
- فرح "تامر" بعدما ضربها في كتفها ضربة خفيفة :
- أيوه كده بقا ، ياما قلتك شوفي مين بيحبك ومين لأ ، بصي قدامك هتلاقي اللي يتمناك الرضا ترضي
- قالت "علا" وهي تنظر إلى "فادي" بغمزة :
- أنا ممكن أرضى بواحد بس وهو عارف نفسه كويس ، بس هو يقول آآآه
- فهم "فادي" ما تقصده "علا" من كلماتها تلك فقال :
- لا انسي الحوار ده خالص أنا مش بتاع الحاجات دي
- قال "علاء" بعدما اقترب من "علا" بشدة :
- أنا بتاع الحاجات دي أوي ، وأعجبك بس قولي انتي آه ، حتى شوفي الصدف اسمك زي اسمي فرق الهمزة
- ضحكت "علا" قائلة :
- بس يا بتاع انت ، بقى أنا أصوم أصوم وأفطر على بتاع زيك
- ضحك الجميع فقال "تامر" :
- قصف جبهة محترم ، طارت الجبهة ، محدش لقي جبهة طيارة هنا
- يا جدعان
- فقال "علاء" :
- ملكش دعوة انت
- ثم اتجه برأسه إلى "علا" قائلاً :
- متعرفيش البتاع انتي ممكن يعمل عشانك إيه ، بس جربيه
- قالت "علا" بدهشة :
- تكونشي بتحبني يا واد

قال "علاء" :

- بعد الشر عليا

ضحك الجميع مرة واحدة فقال "علاء" بعدما اقترب منها قليلاً :

- واحدة بواحدة كده خالصين ، والبادي أظلم

زُمت "علاء" شفتيها غاضبة وقالت :

- ماشي يا عم ، بس خليك فاكر انت اللي بدأت ، بس اللي ميزعلش في

النهاية ، المهم هتعملوا إيه النهارده

قال "فادي" وهو يخرج هاتفه المحمول ويقلب فيه :

- نفس المكان ، هو احنا لبنا غيره

أخيراً نطقت "هنا" وقالت :

- ما تيجوا نغير المكان ده ، أنا زهقت منه ، بصراحة بقى مكان

فكسان وممل

- لا بالعكس ، احنا اتعودنا عليه وعلى الناس فيه ، والناس بيعملولنا

ألف حساب ، لسه هنروح مكان جديد وكده

اقتنعت "هنا" قائلة :

- براحتك ، بس أنا نفسي نغير ، نعمل حاجة جديدة ، أنا مليت

اقترب منها "فادي" وأمسك ذقنها بإبهامه وسبابته ثم مرر أصبعه على

شفتيها قائلاً :

- مليتي ، يا نهار أبيض ، حد يبقى مصاحب "فادي عزيز" ويميل ، يا

فضحتي بين الناس يا لهوي ، الناس هتاكل وشي كده ، واحدة من

شلتي ملانة ، تعالي كملي السهرة معانا بعد الديسكو وانتي مش

هتحي بملل خالص

وهنا أبعدت "علاء" يد "فادي" عن "هنا" وقالت :

- اهدى بس يا عم الأمور ، احنا متفقين على الموضوع ده من الأول ، ولا انت نسيت
- لا مانستش أنا بقترح بس ، مش هي اللي عايزة تغيير
- "علا" هي الوحيدة التي كان يحسب لها "فادي" ألف حساب قد يكون لأن أبيها يعرف أبيه وهناك شراكة كبيرة بينهما، فكان يخاف أن يغضبها فتشتكيه لوالدها أو تقص له ما يفعله فيخبر والده ، أو ربما لسبب آخر هو لا يفهمه .
- قالت "علا" :
- أنا رايحة الكافتريا ، حد جاي معايا
- رد "فادي" وهو يُشِيح بنظره ناحية المدرج قائلاً :
- لا روحي انتي أنا رايح المدرج
- نظر الجميل بذهول إلى "فادي" ثم قالت "هنا" :
- لا متقولش ، رايح تحضر محاضرة ولا إيه
- ثم قال "علاء" :
- لا محاضرة إيه ، شكله معاه معاد جديد
- ثم أردف "تامر" :
- مين ها ... ميين ، نمرة جديدة دي ولا إيه ، الله يسهلك
- ظهرت على "فادي" علامات الغضب فقال :
- فيه إيه يا بني آدمين ، انتوا هتحفلوا عليا ولا إيه ، امشي ياد انت وهو مش فايقلكم
- قال "تامر" معذراً :
- خلاص يا كبير ، احنا رايعين ولما تخلص تعالانا

وانصرف الجميع ، فاتجه "فادي" إلى المدرجات ليقابل أحد معارفه وبينما هو في طريقه كان يفتش في جواله عن رقم صاحبه إذ اصطدم بفتاة جعلت الدم يتدفق في عروقه ، خطفته كما يخطف البرق أعين البشر .

كانت الفتاة هي "فرحة" وكان أول يوم تنزل فيه الجامعة بعد وفاة والدها ، كانت تبحث عن صديقاتها لتأخذ منهن ما قد فاتها من المحاضرات والسكاشن وحين اصطدمت بـ "فادي" قالت معذرة بصوت مكسور :

- أنا آسفة مخدتش بالي

ظل "فادي" ينظر في عينيها لفترة طويلة ولم يتكلم فأحست بالكسوف وغادرت المكان فوجد "فادي" نفسه يسير خلفها بعينيه دون أن يشعر بنفسه ، أما عن "فرحة" بعدما سارت بضع خطوات نظرت إلى الخلف فوجدت "فادي" ما زال ينظر إليها فأسرعت في السير لا تدري أين تذهب حتى اهتدت إلى المكان الذي يجلسن فيه صديقاتها فأسرعن إليها تُعزينا فقالت "أسماء"

:

- "فرحة"..... وحشتينا أوي

ثم ضمته إلى صدرها وأكملت :

- البقية في حياتك ، ربنا يصبرك يا حبيبتي

وكذلك فعلت "سها" ولكنها أضافت :

- إيه يا بنتي الغيبة دي كلها ، احنا قولنا إنك مش هتيجي تاني ، اختفيتي كده وقفلتي تليفونك ولا عارفين عنوان ليكي عشان نزورك فيه

ردت "فرحة" معذرة :

- معلش ، أصلي من يوم ما مات المرحوم بابا وأنا حياتي متلخبطة ، والدنيا عمالة تقلب فيا شمال ويمين ، مش عارفة ألقاها منين ولا منين ، سامحوني

### قالت "أسماء" بتأثر :

- لو محتاجة فلوس ، قولي واحنا نتصرف ونجيبك
  - ربنا يخليكم ليا يارب ، أنا الحمد لله لقيت شغلانة كده وهصرف منها على نفسي وعلى اخواتي
- ردت الاثنتين بدهشة :

- شغلانة

### وأردفت "أسماء" :

- شغل إيه يا بنتي ، طب ودراستك ومستقبلك ، انتي مستواكي حلو وكله متوقع إنك هتبقي معيدة إن شاء الله
- وتابعت "سها" ما بدأتها "أسماء" وقالت :

- اوعي تكوني ناوية تسيبي الجامعة

- لا .. لا أنا اتفقت مع صاحب الشغل إني هشتغل بالليل بس ، عشان أعرف أجي الجامعة الصبح ، هحاول أوفق ما بين الشغل والجامعة هعمل إيه يعني ؟

### قالت "سها" :

- يا بنتي طب ما ساعات بيبقى في محاضرات آخر النهار هتعملي إيه فيها ؟

### ابتسمت "فرحة" بحزن ثم قالت :

- البركة فيكم انتوا بقى ، أبقي أخذ المحاضرات اللي هتفوتني منكم ، معلىش يا بنات هتقل عليكم شويا
- ثم اقتربت "أسماء" منها قائلة :

- المحاضرات مقدور عليها ، المشكلة انتي هتلاحقي ازاي على الجامعة والشغل والبيت والذاكرة والامتحانات

قاومت "فرحة" دمعتين كانتا على وشك النزول وقالت بأسى :

- ربنا بيعين ... وأنا هعمل إيه يعني ؟ الدنيا رمت حمولها عليا بدري قوي ، ولا بيا أفكر في نفسي ولا بيا أفكر في اخواتي ولا أمي ، مش عارفة أعمل إيه ، بس أنا مؤمنة إن ده قدر ربنا ومش هقول غير الحمد لله على كل حال  
 ربتت "سها" على كتفها مواسية :

- ع العموم متقلقيش ، ربنا مش بيسيب حد ومش بينسى حد ، وما ضاقت إلى وفرجت ، وأنا متأكدة إن ربنا كاتبلك كل خير ومش هسيبك أبداً  
 تنهدت "فرحة" ثم قالت :

- ونعم بالله ، يلاه بينا عشان نلحق المحاضرة قربت تبتدي  
 ثم تحركن في اتجاه المدرج فقالت "سها" :

- مقولتلناش يا "فرحة" ، شغل إيه ده اللي لقتيه  
 قالت "فرحة" وهي تنتظر أسفل قدمها بخرج :

- جرسونة في مطعم

أحست "سها" بأنها أخرجت صديقتها فقالت مصححة :

- معلش يا "فرحة" مقصدش حاجة والله ، بس مش لايقة عليكى الشغلانة دي ، انتي طالبة جامعية  
 غمزت "أسماء" لـ "سها" لتسكت ثم قالت :

- معلش بكرة تتعدل بإذن الله

قالت "فرحة" :

- إن شاء الله ، أهو الشغل اللي لقيته ، وبعدين الشغل الوحيد اللي هيخليني أقدر أجي الجامعة

وهنا كن قد وصلن إلى باب المدرج وبالصدفة كان "فادي" ما زال يجلس أما المدرج وعندما اقتربت منه "فرحة" وجدته ينظر إليها بشدة ، فتعمدت أن

تجاهله وتدخل المدرج ، ولكن "سها" و"أسماء" لاحظتا ذلك فابتسمتا  
وقالت "سها" بهمس :

- مش ده الواد "فادي" ، اللي بيقله عليه  
أومأت "أسماء" بالموافقة فأكملت "سها" :

- وماله ببص ليه لـ "فرحة" كده

- مش عارفة

- يكونشي اللي ف بالي يا بت

- لا ... لا ... ده ميعرفش الحاجات دي ، يا بنتي ده كل يوم مع واحدة

- يا بنتي مشفتهوش بيبصلها ازاي ، والله الواد ده عينه منها

- والنبي تسكتي يا زفتة

بعدهما وصلت "فرحة" إلى باب المدرج فوجئت بأن صديقتها تأخرتا عنهما  
فرجعت إليهما قائلة :

- بتتودودا ف إيه انتوا الاتنين

بصوت واحد قالتا :

- لا أبداً مفيش ، يلاه بينا

دخل الثلاثة إلى المدرج وجلسوا بالجوار في مقعد في آخر صف ثم قالت "سها"  
وهي تغمز لـ "فرحة" :

- الله يسهله يا عم ، في ناس هنا بيكراش عليهم وهما مش حاسين

ردت "فرحة" بعدم استيعاب :

- تقصدي مين ؟

ضحكت "سها" حتى إلتفت إليها بعض الطلبة فشعرت بالحرص قليلاً ثم  
قالت بهمس :

- النظرات اللي رايحة جاية دي

ثم رقصت كتفيها برومانسية وقالت :

- قُلْ لِمَن لَّامَ فِي الْهَوَىٰ هَكَذَا الْحُبُّ قَدْ أَمَرَ ، إِن عَشَقْنَا فَعَذْرُنَا أَنْ فِي وَجْهِنَا نَظْرٌ
- زادت دهشة "فرحة" وهي تحاول أن تتصنع ذلك فهي لم تكن تدري أن صديقتها قد لاحظت نظرات ذلك الشاب الوسيم لها ثم قالت :
- انتي اتجننتي ولا إيه ، تقصدي إيه بكلامك ده
- أرادت "أسماء" أن تفض مظاهره الحيرة التي اشتعلت في عقل صديقتها فقالت :
- "سها" بتتكلم عن "فادي" يا فالحة
- سرحت "فرحة" قليلاً في اسمه وقالت دون ما تدري :
- "فادي" ..... هو اسمه "فادي"
- ثم تداركت ذلة لسانها وقالت مصححة متلعثمة :
- "فادي" مين ؟ أنا مش فاهمة حاجة ، بتتكلموا ليه بالألغاز
- قرصتها "سها" في يمينها بشدة وقالت :
- آه منك انتي يا سُهنة آه ، "فادي عزيز" مرة واحدة
- وهنا دخل الدكتور وألقى التحية وبدأ في سرد محاضراته التي بلا شك لم تصل كلمة منها إلى أذن "فرحة" ، كانت في عالم آخر بسبب تلك النظرتين المتتاليتين من ذلك الذي يدعوه الناس "فادي" ، ماذا فعل بها ذلك الشخص الذي نظر إليها مرتين فقط ، كانت من بين الحين والحين تطرد تلك الأفكار من رأسها وتحاول أن تركز في المحاضرة ولكن بلا جدوى ، سرعان ما يأتيها طيفه ينتزعها من تركيزها نزاعاً ، ليذهب بها إلى عالم جميل ، عالم لم تكن تتوقع يوماً أنها تكون من رُواده .
- كانت "فرحة" لا تؤمن البتة بـ "الحب من أول نظرة" ولكنها لا تدري ماذا دهاها ؟ لم تكن تعرف معنى هذا الشعور الذي انتابها فجأة دون مقدمات وفي غير موعده ، لماذا كانت تشعر في قرارة نفسها بالغبطة لهذه النظرة وإن

كانت أظهرت عكس ذلك ، لم تفق من سرحانها إلا على صوت "أسماء" تهزها برفق :

- "فرحة" ، "فرحة" ، يا بنتي سراحانة ف إيه ؟؟؟!

ردت "فرحة" بلا مبالاة :

- هي المحاضرة خلصت امتا

غمزت "سها" بعينها وقالت :

- إيه الشبكة وقعت عندك ولا إيه ، اللي واخذ عقلك

لم ترد "فرحة" على "سها" بل نظرت إلى سقف القاعة فأدركت "أسماء" الموقف قائلة :

- مالك يا بنتي ، فيكي إيه

ردت "فرحة" بسرعة :

- مفيش أنا بس عايزة أروح

حملت حقيبة يدها واتجهت نحو الباب وغادرت دون حتى أن تسلم على صديقتها ، مما دعا إلى دهشتها فقالت "أسماء" :

- مالها البت دي

ابتسمت "سها" بخبث جلي ثم قالت :

- مش قولتك وإن عشقنا فعذرنا أن في وجهنا نظر

\*\*\*\*\*

قررت "فرحة" أن تطرد تلك الوسواس من عقلها فذهبت إلى والدتها التي تجلس في المحل وطلبت منها أن تذهب لتستريح وهي ستجلس مكانها حتى ميعاد عملها في المطعم فردت والدتها بحب :

- أنا مش تعبانة يا بنتي ، روعي انتي ارتاحي شويا ، عشان لما تطلعي

الشغل تبقي فايقة وكويسة

وبعد الكثير من المناقشات والمباحثات ، انتصرت فيها "فرحة" كعادتها ،  
ذهبت الأم إلى منزلها بعدما قالت لها :

- هروح أحضرك لقمة وأجيبها لك في العمود ، عشان تتغدي
  - ملوش لزوم يا ماما أنا مش جعانة ، متتعبيش نفسك يا ست الكل
- ثم انصرفت الأم بائسة ، فكل محاولاتها لم تفلح ، كانت تعلم أن ابنتها عنيدة ، ولن تستطيع إجبارها على شيء لا تريده .

جلست "فرحة" في مكان والدتها وأطلقت العنان لخيالها ليفكر في ذلك الشاب الوسيم ، تريد أن تجد حلاً لتلك المشكلة التي وقعت بها ، نعم أطلقت عليها مشكلة ، وهي حقا مشكلة ، كانت تارة تقول لنفسها أن الفرق كبير بينها وبين ذلك الشاب ، هو يبدو عليه الثراء الفاحش وهي مَنْ هي ؟ ، يتيمة الأب تعمل في أحد المطاعم ، تفرح عندما يخرج لها أحدهم "بقشيش" أيما فرحة ، الفرق شاسع ، ولكن تارة تقول أن امرأة الحب عمياء ، يجوز أنه عشقها منذ رآها ، ولكن تعود وتقول لنفسها أن هذه تفاهات ، هل ترى سيسمح له أهله أن يرتبط ببنت فقيرة مثلها ، وتفوق من سرحانها على صوت أم "محمد" تقول لها :

- فرحة ... يا بتي

انتبهت "فرحة" أخيراً فقالت :

- أهلا تنط أم "محمد" ، معلش مخدمتش بالي ، حضرتك عايزة إيه
- أمال أمك فين يا بتي ، هي تعبانة ولا حاجة ، مش عادتها تروح بدري كده
- لا لا ... أنا بس رجعت من الكلية بدري ، فقولت أقف مكانها شويا أريحها ، هي كويسة مفيهاش حاجة ، ميرسي يا تنط
- طب الحمد لله ، هاتيلي بقى علبة سمنة أم تمنناشر جنيه وعشر بيضات

بسرعة أحضرت "فرحة" ما طلبته السيدة وقالت :

- اتفضلي ، بس معلى السمنة مكتوب تحتيها ١٩ ونص ، شكلها غليت  
يا تنط

باستنكار ردت السيدة :

- ليه يا بتي ما لسه واخداها الشهر اللي فات بـ ١٨ جنيه لحقوا يغلوها  
ولاد الكلب

- وإيه في البلد مغليش يا حجة ، الحاجة الوحيدة اللي رخصت هي  
البنى آدم

- عندك حق يا بتي ، والله ربنا يكون في عون أمك ، أكيد تعبت معاكم  
بعد المرحوم أبوكم ما مات

ثم تناولت السيدة الطلبات وأعطت "فرحة" ثمنها وغادرت وتركتها لسرحانها  
مرة أخرى ولكن هذه المرة عادت "فرحة" إلى واقعها المرير ، هل يجدر بها  
أن تفكر في حب وارتباط وهي في تلك الظروف ، هنا قررت أخيراً أن تنسى هذا  
الموضوع أساساً ، وقالت بصوت عالي يلاحظه من يمر من أمام المحل :

- كده أحسن

بالصدفة كان "ربيع" صديق والدها يمر وقد سمعها تقول ذلك ، فانداهش  
واقترب منها قائلاً :

- فرحة !!! ازيك يا بنتي ، خير أمال فين أمك مش بعاتتها يعني

انتفضت "فرحة" حرجاً حينما فوجئت بـ "ربيع" أمامها فقالت بتعلمم :

- خير يا انكل "ربيع" ، أنا قاعدة مكانها شويآ ... متقلقش

أوماً "ربيع" متفهماً وقال بمزاح :


- هو إيه اللي أحسن ، كنتي بتقولي عليه من شويآ

ازداد اضطراب وجه "فرحة" ، لا تدري ماذا تقول ولكنها قالت :

- مفيش حاجة يا انكل ، أنا بس كنت متخانقة مع ماما عشان مش عايزة تريح نفسها شويا
- والله يا بتي ، أمك دي المفروض يعملولها تمثال ، أنا لو منهم أديها لقب الأم المثالية
- ضحكت "فرحة" ثم قالت :**
- لا ما خلاص سبقتها "فيفي عبده" وخذتها
- ضحك أيضاً "ربيع" ثم تغيرت ملامح وجهه للجدية وقال :**
- معلش والله يا بنتي مقصر معاكم شويا ، بس والله الدنيا تلاهي وانتي عارفة
- متقولش كده يا انكل ، احنا ملناش غيرك في الدنيا بعد ربنا وبعد وفاة المرحوم بابا الله يرحمه
- رد "ربيع" بأسى :**
- الله يرحمه ، بقولك إيه يا بتي ، مش محتاجين حاجة كده ولا كده ، متتكسفيش قولي
- تسلم يا انكل ربنا يخليك ، خير ربنا كثير ، مستورة الحمد لله ، أهو القرشين اللي بيطلعولنا من الدكان زائد مرتبي في المطعم ممشين الحال الحمد لله ، ربنا ميينساش عبيده
- ونعم بالله يا بتي ، عقبال ما أفرح بيكي يارب وأشوفك في بيت العدل
- عدل إيه بس يا انكل ، عدل مين اللي هيبص على واحدة يتيمة بتجري على اخواتها اليتامى ، عدل مين بس ، العدل معانا احنا عمره ما هيتعدل
- متقوليش كده يا بتي ، انتي بسم الله زي فلقة القمر وأي حد يتمناكي
- لسه بدري ع الكلام ده يا انكل ، لما أخلص دراستي ، وأطمئن على اخواتي الأول ، وبعد كده ربنا يحلها من عنده

- ونعم بالله يا بتي ، يالاه هسيبك أنا عشان ألحق صلاة العصر قبل ما يصلوها
  - ربنا يتقبل يا انكل ، ادعيلنا بالله عليك وانت بتصلي
  - حاضر يا بتي
- ثم انصرف " ربيع " وتركها بعدما أعادها لحيرتها مرة أخرى ، كلما أرادت أن تكف عن التفكير في هذا الموضوع كانت تجد ما يذكرها بها فقالت :
- برضه كده أحسن
- ثم إلتفتت حولها بسرعة خشية أن يسمعها أحد فيأتي ليسألها ما بها مرة أخرى ، تمنّت أن لو حضرت والدتها الآن ، شعرت بأنها أخطأت حين فكرت أن جلوسها في المحل سوف ينسيها ما حدث لها بالجامعة صباحاً

\*\*\*\*\*



## ليست صدفة

في الملهى الليلي كان "فادي" يجلس مع شلته كعادته ولكن ينقصهم "علاء" الذي ما لبث أن دخل عليهم مسرعاً ونزع الكأس من يد "فادي" وإلتقم كل ما فيه بشراهة وهو يلتقط أنفاسه فقالت "علاء" :

- اهدأ يا عم ، إنت كنت في مارثون ولا إيه ، بتنهج ليه كده

نظر إليها "علاء" دون أن ينطق ثم اتجه إلى "فادي" الذي قال لتوه :

- سبع ولا ضبع !!؟

رد "علاء" بغمزة :

- عيب عليك تسأل سؤال زي ده ، انت عارفني لما أكون عايز أعمل

حاجة بعملها مهما كانت

- لخص يا عم الأمور ، قولي عملت إيه

قالت "هنا" بعدما رشفت آخر شفقة من كأسها :

- متفهمونا بتتكلّموا عن إيه ، بدل ما احنا قاعدين كده  
رد "فادي" بسرعة :

- لا ده موضوع هحكيلكم عليه بعدين  
ثم وقف "فادي" وانصرف وأشار إلى "علاء" أن يتبعه ، فنفذ فوراً ، وتركنا  
الشلة وانصرفا فقالت "هنا" مستفهمة :

- حد فاهم حاجة  
رفعت "علا" كتفها إلى منتصف رأسها وبسطت كفيها وزمّت شفيتها وقالت  
:

- علمي علمك  
تدخل "تامر" في الحوار قائلاً :

- هو فيه إيه ، والعيال راحت فين  
ابتسمت "هنا" وقالت :

- هي فعلا راحت ، بس راحت منك انت ، إيه يا ابني انت مش هتفوق  
من اللي انت فيه

ثم اقتربت "علا" منه وكان في حالة سكر وحكّت كتفها بكتفه وقالت :

- انت حبيبي يا "تامر" ، مش بتخبي عليا حاجة ، "فادي" و"علاء"  
مالهم؟؟ ومخبين عننا إيه ؟ وإيه الموضوع الي بيتكلّموا عليه ؟  
ابتسم "تامر" وقال :

- حبيبي ، أخيراً اعترفتي بيها ، أخيراً حسيتي بيا ، من زمان ونفسي  
تقولها

أدركت "علا" الغلطة التي وقعت بها ، فطالما اعترف لها "تامر" بحبه ولكنها  
كانت تعتبره صديقها فحاولت أن تصلح ما أفسدته فقالت :

- قصدي بحبك زي أخويا يعني ، المهم أكيد انت عارف اللي بين "علاء"  
و"فادي" ، هاااا ، مخبين عننا إيه ؟

همَّ "تامر" بالحديث ولكنه على آخر لحظة أمسك لسانه قائلاً :

- لا ..... هما بيزعلوا مني لما بقولكم أسرارهم

- ومين بس اللي هيعرفهم إنك قولتلنا

ثم تمايلت بدلع وقالت :

- "تامر" حبيبي يلاه قول ، هتخبي عليا

لمست يده بيدها فأحس "تامر" برعشة غريبة ثم نهض وقال :

- الموضوع عن بنت بس معرفش التفاصيل بالظبط ، ومش هقول أكثر

من كده ، أنا هروح أشوفهم فين

غادر "تامر" المكان تاركاً الفتيات تخمن باقي الحوار ، فلاحظت "هنا"

الوجوم الذي اكتسى به وجه "علا" فقالت :

- مالك يا "علا"

ردت "علا" بياس :

- مفيش حاجة ، هيكون مالي يعني

فهمت "هنا" ما يدور بداخل صديقتها من مشاعر ، كانت "علا" قد أفصحت

إليها كثيراً ببعض مشاعرها تجاه "فادي" وأنها تحبه ، ولكنه يصر على أن

العلاقة بينهما لن تتعدى الصداقة قالت "هنا" مواسية :

- فهمت ... فهمت ، ربنا يكون في عونك

- فهمتي إيه بالظبط ، مفيش حاجة

ابتسمت "هنا" ابتسامة ساخرة وقالت :

- وشك مفضوح على فكرة وبابن عليه أوي ، انتي ملكيش ذنب ، هو

مش حاسس بيكي ومش هيحس بيكي

- ليه ، ناقصة إيد أو رجل ، ولا البنات الزبالة اللي بيعرفهم أحسن مني

في إيه

- لاً ناقصة حاجات أهم من كده بكتير ، وبعدين عشان انتي مش زبالة فهو مخليكي بعيد عشان انتي غيرهم ، هما حاجة كده ديلفري ، يقضي معاهم ليلة والسلام ، انتي المفروض تفرحي إنك مش زيهم ، بس لو عايزاه يحس بيكي أنا عندي الطريقة
- نظرت إليها "علا" باهتمام مشجعة إياها أن تكمل حديثها فأردفت "هنا" :
- هو كل يوم بيشوفك ، وقت ما بيكلمك بتخرجيله ، ناقصك إنك تحرميه منك عشان توحشيه ، طول ما انتي قدامه ليل نهار كده ولا هيعبرك
- بس انتي عارفة اني مبقدرش أعدي يوم من غير ما أشوفه
- ما هو ده الي بتكلم فيه ، هو عشان عارف إنك واقعة فيه وبتجري وراه فعامل أهبل ومطنش ، لكن لو قدرتي تفهميه إنه مش فارق معاكي وإنه زيه زي غيره بالنسباك ، يمكن يحس بيكي
- عايزاني أعمل إيه يعني ؟
- اصبري بس ، وأنا هعملك خطة متخرش الميه ، هنخلي "فادي" ده زي الخاتم في صباك
- ثم احتضنا بعضهما بحب .
- في الجانب الآخر كان "فادي" يجلس مع "علاء" ليخبره بتفاصيل ونتائج المهمة التي أرسله لإنجازها فقال "علاء" مفتخراً :
- بص يا معلم ، اسمها "فرحة" ، أبوها مات من شهر ونص كده ، وهي دلوقتي شغالة في كافيه "ستار" الي أول شارع الجامعة
- أوماً "فادي" برأسه علامة الرضا على ما عرفه من معلومات فأردف "علاء" قائلاً :
- مقولتليش انت عايز تعرف المعلومات دي ليه ؟
- عادي ، أنا شفتها الصبح ، عجبتني بصراحة

- حبيت ولا إيه يا "فادي" ، شكك وقعت يا معلم
- لا حب إيه وبتاع إيه ، أنا بتاع كده برضه ، بس فرس زي ده بظروفه المنيلة دي ، سهل يدخل الموسوعة بتاعتنا
- نظر إليه باستغراب قائلاً :
- لا انسى ، اللي زي دول أصحاب شعارات ومبادئ والكلام الفاضي ده ، مش هتوافق طبعاً ، تقعد تقولك حرام وعيب والحاجات دي ، أنا من منطلق خبرتي في البنات أقولك إنسى
- يا ابني انت بتقول أبوها مات ومحدث بيصرف عليهم ، يعني محتاجة ، والحاجة أم الإيه...؟
- الأختراع
- غشيم ، الحاجة أم التنازلات ، يعني مهما كانت المبادئ اللي انت بتقول عليها دي ، ملهاش قيمة قدام الفلوس ، لو زغللنا عينها بقرشين يبقى هتوافق غصب عنها
- أشك
- تتحداني
- أراهنك
- على إيه ؟
- على أي حاجة تطلبها
- طب سيب الرهان ده على جمب عشان أن متأكد إنك هتخسره
- متكبرهاش في دماغي ، ديتهأ أسبوع وتكون "فرحة" عروسة الشقة
- صدقني مش هتعرف تعمل معاها حاجة ، وأتحداك
- ماشي يا كبير ، قبلت التحدي
- كان الله في عونك يا "فرحة" ، ماذا اقترفته يداكي حتى تقعي فريسة لهاذان الحقيران ، أين عدالة الله في ذلك ؟

كانت "فرحة" في عملها تحمل أحد الطلبات لتضعها أمام من سيأكلها فاعترضت طريقها "مايسة" زميلتها في المطعم قائلة :

- هاتي الأورد ده ، وروحي شوفي طرابيزة ١٢ عايزة إيه نظرت إليها "فرحة" بدهشة وقالت :

- طب ما تروحي انتي هتفرق إيه

- هو يا ستي عايزك انتي

وخطفت الصينية منها وأعطت لها قائمة طلبات المطعم وانصرفت ، ذهبت "فرحة" إليه تقدم قدم وتؤخر الأخرى ، لا تعلم من هذا الذي يطلبها بالإسم وماذا يريد ؟

وصلت فرحة أخيراً إليه وقالت من خلفه :

- أوامر حضرتك يا فندم

إنفتت إليها الشخص الجالس ، وإذا بالصاعقة تنزل من السماء جعلت "فرحة" تود لو أن الأرض تنشق وتبتلعها ، كان الجالس "فادي" ذلك الشاب الذي قابلته صدفة منذ يومين في الجامعة .

لم تكن تدري ماذا تفعل ؟

هل تتركه وتنصرف وترسل له إحدى زميلاتهما ؟

هل تتعامل معه وكأنها لا تعرفه ولا تتذكره ؟

ملايين الأسئلة جالت بخلدتها .

هل "فادي" قصد أن يأتي إلي هنا كي يراها أم أنها مجرد مصادفة من مصادفات القدر التي تأتي على غير مواعيدها ؟

استجمعت "فرحة" قواها الخائرة وقالت مرة أخرى لذلك الشاب الذي ظل ناظراً إليها دون أن ينطق :

- أوامر حضرتك يا فندم

ابتسم "فادي" وقال :

- إيه يا "فرحة" انت مش فاكراي ولا إيه ؟ !!  
 دُهِشْت من أنه يعلم اسمها ولكنها قالت ربما قرأه من على الـ "I.D" الذي  
 تعلقه على صدرها ، لكن "فادي" أراد أن يطرق على الحديد وهو ساخن فقال  
 :

- مالك يا بنتي ، شفتي عفريت ولا إيه ؟!!  
 تدرأكت "فرحة" الموقف ووضعت القائمة أمامه وقالت :  
 - تطلب إيه فنندم  
 وضعت "فرحة" القائمة أمامه فأمسك بيدها فنزعتها بشدة وغاردت من  
 أمامه بسرعة وذهبت إلى زميلتها "مايسة" وقالت لها :  
 - معلش ممكن تروحي تشوفي الزبون اللي هناك ده ولو سأل عليا  
 قوليله إني مش فاضية  
 بدون أن تنطق ظلت "مايسة" تنظر إلى "فرحة" باستغراب فأكملت "فرحة"  
 كلماتها قائلة :

- هفهمك بعدين ، معلش على خاطري  
 مر من الوقت ما مرّ ظلت فيه "فرحة" في المطبخ لم تخرج حتى اطمأنت أن  
 "فادي" قد غادر المطعم ، ثم تنفست الصعداء وخرجت وهي تحمد الله على  
 مرور هذا الموقف بسلام ، ولكن "مايسة" لم تعطها الفرصة فانهاالت عليها  
 بوابل من الأسئلة المستفهمة وكان رد "فرحة" :

- ده زميلي في الجامعة ، شفته من يومين مرة واحدة ، لا مرتين ياربي ،  
 وبس ، فاتكسفت لما شفته هنا  
 - بس ده أول مرة أشوفه هنا ، شكله جاي مخصوص عشانك انتي على  
 فكرة  
 - علشاني أنا

وكانت الكلمة كفيّلة بأن تضع "فرحة" في عالم آخر ولكنها طردت ذلك العالم بسرعة قائلة :

- لا يا ستي ، مش للدرجة دي ، بقولك هو ميعرفنيش ، وبعدين شافني مرة واحدة بس ، لحق يعرف إنني بشتغل هنا امتا وازاي ومن مين ؟ ، لا هي صدفة ويارب ما تتكرر تاني

زمت "مايسة" شفيتها وقالت :

- طب ليه أول ما دخل سأل عليكي انتي بالذات

كانت "فرحة" تبحث عن أي مبرر تثبت لـ "مايسة" ولنفسها أنه لم يأتي هنا لأجلها ، ولكن مدير المطعم رحمها من ذلك حينما قدم عليهما وأمرهما ألا تتحدثان سوياً وتتركان الصالة بمفردها كي لا يحتاجهن الزبائن ولا يجدنهن ، وبالفعل ذهبتا الاثنتين لتباشرا عملهما ولم تتاح لهما الفرصة ثانية للحديث في تلك الليلة ، وحمدت "فرحة" ربها على أنها لم تتحدث مع "مايسة" الثرثرة مرة أخرى .

دخلت "فرحة" المنزل في ميعادها وألقت تحية المساء على والدتها التي قامت للفور تعد لها الطعام كعادتها فأوقفتها بيدها قائلة :

- متعمليش أكل يا ماما أنا مش جعانة

ودخلت حجرتها قبل حتى أن تسمع رد والدتها فما كان من والدتها إلا أن دخلت خلفها الحجرة بسرعة قائلة :

- مالك يا بنتي انتي تعبانة

- لا أبداً يا ماما ، بس أن مرهقة شوي ، يدوب هغير هدومي وأنام.

كعادتها لم تجد "ثناء" فائدة من الجدل مع ابنتها فهي تعرف عنادها فتركته وخرجت .

بدلت "فرحة" ثيابها بسرعة وألقت بجسدها المنهك على سريرها متأوهة من شدة الإرهاق والتعب ، وأطلقت العنان لعقلها ليفكر في ما يحدث لها تلك الأيام

، وكأى فتاة في سنّها المفترض أنّها تفرح ولكنها كانت تجد في صدرها قبضة لا تعلم مصدرها ، شيء ما يدعوها إلى التريث وعدم العجلة ، وفجأة وجدت "فادي" قد رُسم على سقف غرفتها وهو يشير إليها ويبتسم لها .  
هزّت رأسها بشدة تطرد تلك الأفكار الغريبة ، وذهبت في سبات عميق من شدة التعب ، ولكنها استيقظت على كابوس مفزع فجراً ، فوجدت والدتها بجوارها تتلوا بعض آيات القرآن الكريم وتمسح على شعرها .  
كان الكابوس مفزعاً ولكن "فرحة" لم تقصه على والدتها فقد رأت أنّها تقع في حفرة عميقة و"فادي" على شفة الحفرة ولكنه يضحك وهي تستغيث به وهو يضحك أكثر ، وبعدها تركها وانصرف .

كان تفسير الكابوس واضحاً بالنسبة لها ، فمعناه أنّ "فادي" لا يصلح أن تفكر به مرة ثانية ، وقررت حينها للمرة العاشرة أن تنسى ذلك الموضوع وتلقي به خلف ظهرها ، نهضت وتوضأت وصلت الصبح ودعت الله في سجودها أن يلهمها الصواب في أمرها هذا ، وحين فرغت من صلاتها شعرت براحة غريبة ، فارتمت على السرير علّها تحظى بساعة أو ساعتين قبل أن تذهب إلى الجامعة .

في الصباح الباكر استيقظت فرحة نشيطة جداً ، وتناولت إفطارها الذي في الغالب لا تتناوله ، ونزلت إلى الجامعة ، كان أول من رآته كالعادة صديقتها "أسماء" و"سها" سلما عليها بحرارة فسألت "سها" بخبث :

- مفيش أخبار عن .... اللي بالي بالك

تظاهرت "فرحة" بعدم الفهم ، ولكن عيناها قالت ما لم تستطع كتمانها فقصت لهما ما حدث معها بالأمس فقالت "أسماء" :

- الله يسهله

وأعقبت "سها" بطريقتها المستفزة :

- كل ده يطلع منك يا سُهْنَة انتي ، وَقَعْتِي الواد في حبك كده من نظرة واحدة
  - أنا لا وَقَعْتُ ولا نَيْلْتُ حاجة ، أنا أصلاً خايفة ومرتبكة ومش عايزة أشوف وشه تاني ، أنا ظروفي متسمحش إنني أفكر في حاجة زي دي
- ردت "سها" باستنكار :

- يا غبية حد يرفض النعمة برجله
  - خايفة ، قلقانة ، معرفش ، إيه اللي يخلي واحد زي "فادي" ده يعمل معايا كده ، اشمعنا أنا
  - القلب وما يريد يا هبلة
  - والنبي تتنيلي تسكتي ، بلا قلب بلا زفت ، أنا مش حمل وجع ، أنا خايفة أعيش نفسي في حلم أنا مش قده ، عشان كده أنا هقطع عرق وأسحِّح دمه
- ردت "أسماء" باستغراب قائلة :

- هتعملي إيه يعني
  - مش عارفة بس كل اللي أعرفه ، إنني هعرف أخلص نفسي من المشكلة دي ، ومش هسمحها إنها تأثر على حياتي ومستقبلي
- مرَّ اليوم على "فرحة" بسلام من وجهة نظرها لأنها لم تلتقي به .
- ذهبت إلى عملها في المساء ، وفي قرارة نفسها تعزم أنه لو حدث مواجهة أخرى فإنها حتماً لا تكون في مصلحتها ولا مصلحته .
- كانت "فرحة" في المطبخ تجهز إحدى الطلبات فإذا بـ"مايسة" قادمة إليها ضاحكة وتقول :

- في حد عايزك يا قمر
- خُطف قلب "فرحة" فتظاهرت بعدم الفهم قائلة :
- حد ... حد مين !؟

### بخبث قالت "مايسة" :

- هو مين غيره ... العاشق الولهان
- "فادي"
- أيون
- طب روحيله انتي شوفيه
- حصل يا فندم ... بس هو عايز جناب حضرتك ، والله مش عارفة عاجبه فيكي إيه ، ما أنا قدامه أهو
- **تصبَّبَ جبين "فرحة" عرقاً وأحست برعشة في جسدها كله وقالت :**
- عشان خاطري يا "مايسة" روعي قوليله أنا ما جيتش النهارده
- بس أنا قولتله إنك جيتي
- **تشجعت "فرحة" وفركت يديها في بعضهما وقالت :**
- طيب ... جه لقضاه
- **ثم خرجت إلى حيث يجلس "فادي" ووقفت أمامه فابتسم لها فقالت بحزم :**
- نعم
- **نظر إليها نظرة مستفهمة وقال :**
- نعم الله عليكي ، إيه يا بنتي الثقاله الي انتي فيها دي ، ما تفكي التكشيرة دي شويا
- **ابتسمت "فرحة" ابتسامة صفراء وقالت :**
- أوامر حضرتك
- **ما زال "فادي" ينظر إليها ثم قال :**
- ما هو بطريقتك وبوشك ده ما اسمهاش أوامر ، اسمها امشي اسمها غور ف داهية ، أنا زبون هنا ولازم تحترميني وإلا هعمل معاكي مشكلة

كانت "فرحة" على وشك أن تنفجر في وجهه بقذائف من السباب ولكن تذكرت جملة مديرها "الزبون دايمًا على حق" فقررت أن تعالج الموقف فقالت ببرود:

- تطلب إليه حضرتك

بفراغ صبر قال "فادي"

- نتكلم شويًا ممكن

- سوري يا فندم ، ده مكان شغل ، الناس بتيجي هنا عشان تاكل أو تشرب مش تتكلم

- خلاص أستناكي بعد ما تخلصي شغل

دهشتها من جرأته أوقفت لسانها عن الكلام ، فأردف :

- أنا عارف إن الموضوع غامض ومش مفهوم ، بس لما نتكلم هتعرفني كل حاجة

- سوري يا "فادي" بيه ، مش بكلم حد ، ها يا فندم قررت تطلب إليه ولا اللي حاضرتك طالبه مش موجود في المنيو

انصرفت حتى قبل أن ترى رد فعله على كلماتها ، فخبط المنضدة بكلتا يديه من شدة غيظه .

كانت "مايسة" تراقب الموقف فأرادت أن تستغله لصالحها فذهبت له وقالت :

- هدي نفسك يا أستاذ "فادي" ، أجيبك لمون

- مش عايز زفت

- إيه بس مالك ، قولي بس ، وصدقني هتستفيد

نظر إليها بطرف عينه ولم ينطق فأكملت :

- قولي بس هي قصرت في إيه وأنا أعمله

قالت كلمتها تلك وقد مالت علي المنضدة أمامه قاصدة أن تبرز له أحد مظاهر أنوثتها التي تتمثل في نهديها الكبيران اللذان يغريا أي رجل يمتلك ذرة من الشهوة .

نظر "فادي" إلى ذلك الصدر المغربي بإعجاب وفهم ما تقصده "مايسة" فهز رأسه راضياً وأمسك منها قلمها ودفترها الذي تسجل فيه طلبات الزبائن وكتب لها شيئاً ووضع الدفتر في يده ثم غمز لها وانصرف .  
 أمسكت بالورقة وقرأت ما كتبه وعندما وجدت أنه عنواناً ورقم هاتفه انفرجت أساريرها ووضعت القلم في فمها وعضت عليه برفق .  
 كانت "فرحة" في المطبخ تجلس ترتعد أطرافها ، لا تدري ماذا تفعل ؟ ، كانت تفكر في أن تترك هذا المطعم وتبحث لها عن عمل آخر ، ولكن أين تجده وقد وجدت ذلك العمل بالكاد ، تذكرت أخوتها ووالدتها وتذكرت أنه مرتبها من المطعم بالكاد يكفي مصاريف منزلها ومدارس أخوتها .  
 كانت تتنفس بصعوبة ، وصدرها يعلو ويهبط من فرط الإعصار الذي يجتاح قلبها وعقلها .

بالله عليك يا من يدعونه "فادي" أن تتركها لحالها ، كانت حياتها أوشكت على الاستقرار حتى ظهرت أنت بها ، قلبتها رأساً على عقب .  
 كان الشيء المحير أنها لا تعلم ماذا يريد منها ؟ ولما هي بالتحديد ؟ ، يقولون عنه أنه "مقطع السمكة وديها" فلما يطمع في تلك البيساريا الصغيرة التي لا تسمن ولا تغني من جوع ، هي قطعاً لا تساوي شيئاً فيمن يعرفهن "فادي" فلما يركز معها بهذه الطريقة المخيفة .

دخلت "مايسة" عليها فوجدتها بحالتها تلك فقالت لها مطمئنة :

- مشي خلاص على فكرة

وقفت "فرحة" ووضعت يدها على صدرها علماً تهديئاً أنفاسها المضطربة  
 وقالت :

- الحمد لله

- يااااااااه ، ليه يعني ، ده حتى شاب ظريف ولطيف ، وموووز ، مش عارفة مالك انتي ، هو كان عايز منك إيه

- بيقول عايز يتكلم معايا
- طب وفيها إيه دي ، ما تتكلمي معاها وتشوفيه عايز إيه ، وبعدين ده
- قاللك نتكلم شويآ ، مش تعالي نروح شقة مفروشة ، يا بنتي هو انتي تطولي
- أنا مش عايزة أطول ، أنا عايزاه يسينيني في حالي ، أنا حياتي اتخلبطت بعد ما قابلته أكثر ما هي متخلبطة
- ثم جلست "فرحة" مرة أخرى ولم تستطع أن تمسك دموعها عن النزول هذه المرة فاقتربت منها "مايسة" وربتت على كتفها قائلة :
- اهدي بس مفيش حاجة حصلت لكل ده
- احتضنتها "مايسة" بشدة أسفةً على حالها ثم قالت :
- قومي بس اغسلي وشك ، المدير لو جه وشافك كده ، مش هتبقى حلوة نهضت "فرحة" وذهبت إلى الحمام لتفعل ما قالتة صديقتها التي للتو بعد ما انصرفت أخرجت هاتفها وطلبت الرقم المكتوب في الدفتر وبسرعة أتاها الرد من "فادي"
- ألو
- يا أهلاً وسهلاً
- بالسرعة دي ، اتصلتي
- أمال ، هو احنا عندنا كام "فادي"
- أعجب "فادي" بجرأتها فقال لها :
- تعجبنيني يا ....
- ولم تدعه يفكر فأخبرته باسمها قائلة :
- مايسة ... لحقت تنسى اسمي
- لا طبعاً هو أنا أقدر ، عايز أقعد معاكي ضروري
- من عنيا ، بكرة يوم أجازتي من المطعم وهقابلك

- أوك

- أوك ، مع السلامة

وإلتفتت "مايسة" فوجدت "فرحة" واقفة أمامها فسألتها :

- أجازة إيه الي بكرة دي

شكّيت "مايسة" أن "فرحة" سمعت المكالمة فلم تدرِ ما تقوله ولكن "فرحة" أنقذتها قائلة :

- يا بنتي أنا اللي أجازتي بكرة مش انتي

اطمأن قلب "مايسة" لأنها تأكّدت أن "فرحة" لم تسمع باقي المكالمة فقالت :

- ما أنا لسه كنت هكلمك في الموضوع ده

تسألت "فرحة" دهشة :

- موضوع إيه ده !؟

- أنا كنت عايز أبادل معاكي أجازتك بكرة ، عشان رايحة مشوار

بدون تفكير ردت "فرحة"

- معنديش مانع ، بس مشوار إيه ده ؟

- لما أرجع هبقى أقولك

ثم قبّلتها في خدها وقالت :

- ربنا يخليكي ليا يا عمري ، انتي أجدع صاحبة شفتها في حياتي

وقبّلتها مرة أخرى وانصرفت مسرعة من فرط فرحتها

كان ما ب "فرحة" يكفيها ويلهيهها عن أن تركز في تصرفات زميلتها الطائشة

كما كانت تدعوها دائماً

\*\*\*\*\*



ا ب

التغيير  
مطلوب

في مقرهم اليومي كان "فادي" وبصحبه "تامر" يجلسان في انتظار بقية الشلة .

كان "فادي" سارحاً على غير عادته ، كان يفكر في تلك الفتاة التي تُبهره في كل مرة يراها فيها ، وكان غضبه عليها أشد بسبب معاملتها الجافة معه . كان غريباً عليه أن هناك من يقول له لا ، لأول مرة في حياته يريد شيئاً ولا يناله ، مما زاد من تصميمه على أن ينالها ، كانت تستحوذ على كل تفكيره في الصباح والمساء ، لدرجة أنه كان أحياناً يحلم بها .  
انتزعه "تامر" من سرحانه قائلاً :

- إيه يا نجم ، مش عوايدك يعني
- لا أبداً يا معلم ، موضوع كده
- موضوع ! جديدة دي ، انت عمرك ما كان عندك مواضيع ، إلحقوا يا جدعان "فيديو" شاغل باله موضوع

أحس "فادي" بالسخرية في كلام "تامر" فنظر إليه نظرة جعلته يتسمر في مكانه قائلاً :

- أنا بتكلم جد ، مش وقت هزار خالص  
رد "تامر" باهتمام :

- موضوع إيه ده ، احكي لي  
- لا مش دلوقتي ، بعدين بعدين  
- بعدين ليه ، احنا فيها أهو ، وبعدين من امنا انت بتغلب في حاجة ومحيرك كده ، تكونشي موضوع البت إيها اللي شفتها في الجامعة  
أوماً "فادي" بصحة ما قاله "تامر" فأضاف الأخير :

- مالها يعني ؟  
- شغالة في الكافتريا اللي على أول الشارع ، أنا كنت عندها امبارح ، البت فرصة ياد ومستخسرها  
- وإيه يعني يا معلم ، احنا ياما قابلنا فرسان ، هو انت أول واحدة تشوفها ، ولا انت لسه معرفتش بنات قبل كده ، إيه اللي شاغلك أوي كده

وضع "فادي" رأسه بين يديه قائلاً :

- اللي مضايقني إن دي أول مرة حد يعاملني بطريقة زفت كده ، كل البنات اللي قابلتهم قبل كده كانوا بيتمنوا بس أبصلهم وأضحك في وشهم ، أول مرة فعلاً ألقى واحدة تكرهني أول ما تشوفني ، معرفش حاسس إنها غير كل البنات اللي عرفتهم قبل كده  
- إيه ده يا معلم ، انت حبيبتها ولا إيه

ضحك "فادي" بطريقة جعلت كل من في المكان ينظر إليه قائلاً :

- لا ... حب إيه يا معفن انت ، هو أنا لما أحب أبص لواحدة زي دي  
- طب المشكلة فين دلوقتي ، ومدايق نفسك ليه كده

- خلاص ، خلاص عشان الواد "علاء" جاي ، متقولش حاجة عن الموضوع ده قدامه
- كان "فادي" اتفق مع "علاء" أن الرهان الذي بينهما سيظل سراً ولن يعلم به أحدٌ من الشلة ، ولا يريد أن يعرف "علاء" أنه حكى لـ "تامر" .
- وصل "علاء" إليهما وجلس على كرسي وهو بالكاد يلتقط أنفاسه وقال لهما :
- عشان يتَمَر فيكم بس ، طلع عيني عبال ما جيبت المصلحة
- كان "علاء" في مهمة سرية ليحضر بعض متطلبات الشقة من الحشيش والخمر .
- ربت "فادي" على فخذة قائلاً :
- قدها وقدود يا "لول"
- قال "علاء" بنفان صبر :
- طب إيه مش يلاه بينا على هناك
- رد "تامر" قائلاً :
- هنروح بس لما "هايدي" تيجي ، محضرلكم سهرة النهارده ، محصلتش قبل كده ، حته فرتيكة اسمها "هايدي" ، مقولكمش حاجة آخر قرف
- بدهشة رد "علاء" :
- آخر قرف ازاي ، انت سكرت ولا إيه
- لا أبداً ، بس حاجة لملاحظة كده ، بتبظ من كل ناحية ، دي طلبات "فيدو" ، معرفش ليه ، بس بيني وبينك لما فكرت لقيتها فكرة حلوة ، التغيير مطلوب برضه
- ضحك "فادي" قائلاً :
- أنا قولت طول عمرنا بنجيب بنات حلوة وإتكييت ومززز ، فقولت نجرب الحريم البيئة شويا

قال "علاء" غاضباً :

- بتهزروا صح  
رد "تامر" ضاحكاً :

- لا مش بنهزر ، استنى أوريك صورتها

أخرج "تامر" هاتفه وفتح الاستديو وحدد صورة بعينها وأعطى الموبايل لـ "علاء" .

نظر "علاء" إلى الصورة بِتَمَعْن فوجد كيان ضخم في الصورة وقال مازحاً :

- ودي هنقدر عليها احنا الثلاثة ، دي تبلعنا يا عم ، انتوا مش شايقتها  
عاملة ازاي

رد "تامر" محافظاً على صوت ضحكاته العالي :

- اتكلم على نفسك يلاه ، أنا بعون الله لوحدي كفيل بيها

زادت ضحكات "علاء" الذي قال :

- ما بلاش انت أحسن أقول ، فاكر البت "نورا" والي حصل معاها

وضع "تامر" يده على فم "علاء"

- بلاش أبوس ايدك متفكرنيش

واستمر الثلاثة في ضحكهم فقال "تامر" :

- أهى بترن أهى ، هروح قدامكم أجيبها وانتوا اسبقوني على الشقة

وانطلق من توه وتركهما في مكانها فقال "علاء" هامساً غامزاً :

- عملت إيه في الموضوع اللي بينا يسطا

تلعثم "فادي" فهو لا يريد أن يخبر "علاء" أنه خسر الجولة الأولى معها فقال :

- هانت ، قربت أوي

ابتسم "علاء" لأنه توقع الفشل الذريع الذي حدث لصاحبه فقال :

- مطنش ، أنا من رأيي إنك تنسى الموضوع ده ، وبعدين لا دي من مستواك ولا دي لايقة عليك
- ضحك "فادي" وقال :
- انت عبيط يلاه ، أنا مينفعش أحط حاجة في دماغى ومعملهاش ، وبعدين مستوى إيه اللي بتتكلم عليه هو أنا هتجوزها ، ثم يعني البنات الي بنام معاهم دولا مستوانا ولا أصلاً لايقين علينا
- شكلها صعبة عليك
- مفيش حاجة تصعب على "فيدو"
- قال "علاء" همامساً :
- فعلاً مفيش حاجة تصعب ع الكافر
- ثم ارتفع صوته وقال :
- يلاه بينا عشان منتأخرش

\*\*\*\*\*



٤١

صدفة

مترتبة

أنهت "فرحة" عملها ، وكانت تتعمد أن تُنْهَكَ نفسها في العمل حتى أنها ساعدت زميلاتها في كنس ومسح المطعم مع أن ذلك ليس من اختصاصاتها ، لكنها أرادت أن تذهب إلى المنزل فتنام من فرط الإجهاد والتعب ولا تفكر في شيء .

فتحت "فرحة" بابا شقتها فوجدت والدتها كعادتها تنتظرها لتعد لها طعام العشاء ، فقالت "فرحة" مؤنبة :

- إيه اللي مصحكي لحد دلوقتي يا ست الكل

ردت الأم بعدما وقفت ودخلت المطبخ وخلفها "فرحة" :

- هنرجع تاني لموال كل يوم ، يا بنتي يا حبيبتي أنا مش هعرف أنام غير لما أطمئن إنك جيتي واتعشيتي

احتضنتها "فرحة" من الخلف وقبّلتها على رأسها قائلة :

- يا ماما يا حبيبتي ، احنا مش اتكلمنا في الموضوع ده قبل كده ، أنا باجي متأخر بالليل مفيش داعي تستنيني ، وبعدين يا ستي ابعي اعلمي الأكل وحطيه في الثلاجة وأنا هاجي أسخنه وأكله فتحت الأم باب الثلاجة وأخرجت منها شيئاً ووضعته على البوتاجاز وأشعلت النار وهي تقول :

- يعني انتي من الجامعة للشغل للمذاكرة ، ومش عايزاني أعملك حتى لقمة تاكلها والله حرام اللي بتعمله في نفسك كانت "فرحة" قد أفرغت زجاجة مياه صغيرة في جوفها خلال كلام والدتها فردت عليها قائلة :

- يا ماما يا نور عيني ، انتي بتصحي بدري عشان تفتحتي الدكان ، فلازم تنامي وتريحي جسمك رفعت الأم الطاسة من على النار وأخرجت بعض الأربعة لتضعهم على النار وقالت :

- أنام ازاي وانتي بره البيت ولا عارفة عنك حاجة ، مبعرفش أنام غير وانتي جنبي ومطمنة عليكي يا حبيبتي تناولت "فرحة" الأربعة ووضعتها على المنضدة وقالت :

- أنا كويسة أهو ، زي العفريتة ، يعني هيجرالي إيه - ربنا يعلم رجوعك البيت متأخر ده قلقني قد إيه ، مش جايز يطلع عليك حرامي يسرقك ولا يخطفك ضحكت "فرحة" بشدة وقالت :

- يسرقني !! هيسرق إيه يا حسرة ! ، ولا يخطفني !!! هو أنا صغيرة يا ماما ، وبعدين خلاص كلها سنة وأخلص الجامعة وبعدين أدورلي على شغل بالنهار .. قومي بأه عشان تاكلي معايا ياللا جلست الأم أمام ابنتها سارحة وقالت :

- وبعدين يا بتي من الشغل ده للشغل ده ، مش هتفكري في نفسك  
أبدأ
- أحست "فرحة" ما تقصده والدتها فقالت بحزن يغلب عليه الرضا :
- يا ماما الدنيا ساعات بتفرض علينا ظروف ، لازم نقبلها سواء كنا  
راضيين عنها أو مش راضيين ، وأنا اخترت إنني أكون راضية عشان  
متعبش نفسياً
- معناه إيه الكلام ده
- معناه إن الدنيا مسابتلش اختيار تاني ، مسابتلش فرصة أفرح  
فيها ، شيلتني الهم بدري بدري ، اتحرمت من أبويا في أكثر فترة  
البنات محتاجة فيها لأبوها ، واتحرمت من شبابي واتحرمت من كل  
حاجة حلوة بدري بدري ، شيلت مسئولية أسرة وأنا عندي ٢٠ سنة
- بس يا بنتي لازم تفكري في نفسك شوي ، حلم أي بنت في سنك  
عريس ابن حلال يحبك ويخاف عليك ولا انتي مش عايزاني أشوف  
عيالك قبل ما أموت ، لازم تفكري ف كده من دلوقتي
- ابتسمت "فرحة" ابتسامة حزينة وقالت :
- مين العريس ده اللي هيرضى بيا بس ، وتفتكري واحدة في ظروف دي  
، تقدر تفكر في اللي بتقولي عليه ده يا ماما
- ومتفكريش ليه ، ناقصة إيد ولا ناقصة رجل
- يا ماما ، أفكر في ايه بس ، واخواتي اللي لسه صغيرين دول مين  
يراعيهم ويصرف عليهم ويجهزهم ، أنا مش هرتاح غير لما أشوف كل  
واحدة فيهم في بيت جوزها
- يا ستي ربنا كبير ومش هينساهم ، بس أهم حاجة انتي ، عشان  
القطر ميفوتكيش

عادت "فرحة" لابتسامتها البائسة مرة أخرى وقالت :

- القطر يا ماما مش بيعدي ع المحطة بتاعتنا ، وبعدين انتي شايقة العرسان واقفين طوابير قدام الباب ، دي وصية المرحوم بابا ، وأنا لازم أنفذها لآخر دقيقة من عمري  
نهضت "فرحة" قائلة :

- الحمد لله تسلم إيدك يا ست الكل  
- تسلم إيدي على إيه انتي كلتي حاجة ، ده أكل يا ناس يقوم بني آدم ،  
كَمَلِي أكلك يا بتي  
- الحمد لله يا ماما شبعت ، أنا يدوب هروح أنام أنا عشان عندي  
جامعة الصبح بدري

وانصرفت "فرحة" بعدما قبّلت والدتها على جبينها ودخلت حجرتها وبدّلت ملابسها وألقت بجسدها المنهك على السرير طمعاً في استجذاب النوم الذي تعلم أنه لن يأتي بسهولة ، كان الجو حاراً ولكنها غطت رأسها بنصف المخدة ولكن بلا فائدة ، كانت لا تستطيع أن تفتح عينيها من فرط الإرهاق والتعب ولكنها لا تستطيع أن تنام ، نهضت وتوضأت وصلت ركعتين ثم قرأت في مصحفها قليلاً ، وبلا فائدة أيضاً .

كان شبح "فادي" يطاردها أينما ذهبت ، كانت لا تعرف ما بها؟ ، ولا تعرف أيضاً ما يريده منها ؟ لم تر منه ما يجعلها تخافه هكذا ولكن قلبها قلقاً منه . بالكاد وبعد معاناة سقطت "فرحة" في النوم كالمغشي عليها ولم تدرِ بنفسها إلا ووالدتها تيقظها وتقول :

- اصحي يا "فرحة" اتأخرتي ع الجامعة  
استيقظت "فرحة" بسرعة ونظرت في ساعة هاتفها فوجدتها السابعة والنصف فقالت بذعر :

- يا لهوي ..... أنا عندي محاضرة الساعة تمنية

ونهضت على الفور ودخلت الحمام في عجلة وارتدت ثيابها وانطلقت إلى جامعتها ، كانت تُحد في السير حتى تلحق محاضرتها المهمة ولكن الساعة قد شارفت على الثامنة والمحاضرة ستبدأ الآن والدكتور عنيد لا يُدْخِل أحدٌ بعد دخوله إلى المدرج ، كانت تبحث أسفة عن سيارة أجرة تستقلها وتدعو الله في قرارة نفسها أن يتأخر الدكتور قليلاً حتى تستطيع الدخول ، وانتظرت كثيراً ولكن لم تمر أمامها أي سيارة ، وفجأة إذا بسيارة تقف أمامها وتُحدث ضجيجاً كبيراً لأنه سائقها قد ضغط مكبس الفرامل بشدة ، وإذا بالسيارة تقف بعدها بأمّاتار ثم تلاحظ السيارة ترجع للخلف حتى تقف أمامها وفجأة تجد زجاج السيارة يهبط للأسفل ويظهر قائدها .

كانت الصاعقة أن من في السيارة هو "فادي" لا تدري أي مصادفة أم ترتيب من القدر ، أم ترتيب من "فادي" ، تعمّدت ألا تنظر إليه فقال برفق :

- انتي أكيد رايحة الجامعة ؟؟؟ تعالي أوصلك في طريقي

لم ترد وكأنها لم تسمع أصلاً صوته ، فقال لها :

- يا بنتي مفياش حاجة وبعدين لو وقفتي هنا للصبح مفيش عربيات هتعدني من هنا

- متشكرة مش عايزة

- انتي خايفة مني ليه ، هو أنا هاكلك

- وأخاف منك انت ليه ، بس أنا مش بركب عربيات مع حد معرفهوش

- بس انتي تعرفيني

- بس انت غريب

- ما غريب إلا الشيطان ، يا بنتي متخافيش ، طب لو بتعرفني تسوقي

خدي العربية وروحي بها انتي ، عشان شكك مستعجلة

- قولتك شكراً

- يا بنتي الدكتور "عبد المجيد" مش بيرضى يدخّل حد بعده ، وبعدين المحاضرة دي بيقولوا مهمة ، هيحدد فيها الملغي من المنهج نظرت إليه بدهشة ، كيف عرف كل تلك المعلومات عنها ، وهو في كلية أصلاً غير كليتها ، ما كل هذا الاهتمام بها ولما ؟  
 ظلت تنظر إليه باستغراب حتى قال لها :
- لو فضلتى تبصيلي كده كتير المحاضرة هتروح عليكى ولم تستطع الصبر أكثر من ذلك عن تلك الأسئلة التي تدور بخلدك فقالت متسائلة :
- انت عرفت كل الكلام ده منين ؟  
 أراد أن يطرق على الحديد وهو ساخن ، أراد أن يشعل النار في البنزين فقال لها :
- أنا أعرف عنك حاجات كتير أوي ، أوي ، أوي بطبيعة أي فتاة ، تحب أن ترى من يهتم بها ويغازلها فابتسمت وحاولت أن تُخفي ابتسامتها ولكنها فشلت فلاحظ ذلك فقال لها مازحاً :
- اللهم صلي ع النبي  
 ثم أخفت إبتسامها وتحولت ملامح وجهها إلى الجدية فقال لها :
- هو انت حرّموا عليكى الإبتسامه  
 تحوّلت ملامح وجهها إلى العبث وقالت :
- انت عايز مني إيه  
 ارتمست ملامح الإرتياح على وجهه وقال :
- تعالي اركبي وأنا أقولك أنا عايز منك إيه  
 نظرت حولها وكأنها تفكر في الأمر فقال لها :
- والله يا بنتي ما تخافي ، ابقى سيبي باب العربية مفتوح إذا كنتي خايفة مني

لم تجد "فرحة" مفراً من الرضوخ أمام رغبته الملحة ففتحت الباب الخلفي لتركب فقال لها مازحاً :

- مينفعش ، كده هبقى السواق بتاعك أنا

أغلقت الباب بقلّة حيلة ودارت حول السيارة وفتحت بابها الأمامي وركبت أدار "فادي" محرك السيارة وسار بها ببطء قائلاً :

- العربية بتزغرت من الفرحة النهارده ، عشان ركبتها أجمل بنت في الدنيا

احمرّ وجه "فرحة" خجلاً ونظرت بعينيها إلى يديها اللتان بدأتا ترتعش من هول الموقف فقالت باستحياء :

- ممكن تمشي بسرعة شوييا عشان ألحق المحاضرة

- حاضر بس بشرط

نظرت إليه في دهشة فقال :

- إنك توعديني نقعد نتكلم بعد المحاضرة

أومأت برأسها موافقة ولم تنطق .

انطلق "فادي" بسيارته بسرعة ووصل إلى المحاضرة بالفعل قبل أن يأتي الدكتور ، وودع "فرحة" على باب المدرج بعدما أن أخذ منها رقم هاتفها حتى يستطيع أن يكلمها بعد المحاضرة

نزلت "فرحة" من السيارة واتجهت نحو المدرج بسرعة وهي تلوح له بيدها مودعة ، ثم انطلق هو بسيارته في وسط زهول من فتيان الجامعة قبل فتياتها

من هذه التي تركب مع "فادي عزيز" !!! كان هذا السؤال على لسان كل من في الجامعة ، "فادي عزيز" الذي تتمنى أي فتاة في الجامعة أن ينظر لها ، يوصل هذه الفتاة إلى باب المدرج .

"يا لها من محظوظة" كانت هذه الجملة تتردد كثيرا بين فتيات الجامعة، وبالطبع كن يقصدن بها "فرحة".

محظوظة لأنها ظفرت بأجمل شاب في الجامعة بأغنى شاب في الجامعة .  
في يوم واحد كان كل من في الجامعة يتحدث عن "فادي عزيز" وتلك الفتاة المجهولة التي أوصلها بسيارته إلى باب المدرج خارقاً كل قوانين الجامعة حيث أنه من الممنوع أن تدخل السيارات الخاصة إلى المدرجات .  
ليس من الجديد على "فادي عزيز" أن يخرق قوانين أي شيء ولكن أن يخرقها بسبب فتاة كان هذا هو الجديد .

أنهت "فرحة" محاضرتها المملة كما قالت لنفسها أكثر من مرة أثناء المحاضرة ، وما أن انتهت المحاضرة بالدقيقة حتى وجدت هاتفها يرن فوجدت رقماً غريباً فضغطت على زر الاستجابة وقالت بصوت مبحوح :

- مين

جائها الرد سريعاً :

- بتاع الملامين

سكتت مندهشة من الرد فلحقها بسرعة قائلاً :

- لحقتي تنسي صوتي

قالت بخجل :

- انت عرفت ازاي إني خلصت محاضرة

شعر هو بخجلها فقال :

- ما هو لازم الي يجب حد يعرف أدق تفاصيل حياته ، بيهتم بيه ،

هاااا يا ستي هنقعد فيين بقى

لم تدرِ ماذا تقول ، فلم يدع لها الفرصة في أن تفكر ، من أول الصباح وهو يلاحقها ، ويفعل ما يحلو لها ، وهي لا تستطيع المقاومة ، كانت كالأعمى الذي

يمشي خلف من يقوده ولا يدري أين يذهب به ، كان "فادي" جريئاً جداً في كلماته في نظراته ، في كل شيء .

انتزعها من شرودها قائلاً :

- كل ده بتفكري ، طب أنا هقولك في كافتريا جنب الجامعة هنروح نقعد فيها نص ساعة ، نص ساعة بس مش هنتأخر

بعد تفكير عميق قالت :

- أوك ماشي

وأغلقت الهاتف وتنهدت تنهيدة طويلة ، لا تعرف عما تتم ، عن الفرحة أم الحزن ، عن السعادة أم عدم الارتياح ، ولكنها قررت في وقتها أن تجلس معه ، تعرف ماذا يريد منها ؟ ، كانت تقول أنها على ثقة في نفسها لدرجة لا تدعها تخشى عواقب هذه المقابلة .

اتجهت ناحية الطريق فأوقفتها صديقتها الثارتين وقالت "سها" :

- على فين يا ماما ، انتي جاية ف إيه وماشية ف إيه

قالت "فرحة" معتذرة :

- معلش عشان مستعجلة شويا لازم أمشي

قالت "أسماء" بدهشة :

- تمشي ، تمشي ازاي ، احنا مقعدناش معاكي

- بكرة بكرة ، هقعد معاكم كثير ، بس لازم أمشي دلوقتي حالاً

وانصرفت "فرحة" حتى قبل أن ترى رد فعل كلماتها على صديقتها اللتان وفتتا مندهشتان من الموقف فقالت "سها" :

- والله أخلق شعري لو ما كانت البت دي وراها حاجة

رفعت "أسماء" كتفيها إلى منتصفها رأسها وزمّت شفيتها ولم تنطق بشيء فأردفت "سها" :

- تعالي نروح نقعد على الكافتريا شويا

على الجانب الآخر في ذلك الكافيه الذي خلا تقريباً من رواده في تلك الساعة من الصباح إلا من بعض الجالسين ، جلس "فادي" ومعه "فرحة" متقابلين وأمامهما كوبين من العصير .

كانت "فرحة" طيلة الوقت تنظر لأسفل من فرط خجلها ، كانت بين الحين والحين تتلفت حلوها ، تشعر أن كل من يدخل أو يخرج ينظر عليها ، كانت تؤنب نفسها على تلك الجلسة ولكن كانت مضطرة لأن تضع حداً لكل ما يحدث .

لاحظ "فادي" حالتها المضطربة فقال :

- إيه هنقعد كده كتير

كانت لا تعرف ما تقوله فقط تعد الثواني حتى ينتهي هذا اللقاء فقالت بعد تلعثم :

- تعرف إن دي أول مرة أعمل حاجة زي دي

بنفاز صبر حاول "فادي" أن يكظمه قال :

- ليه محسساني إننا بنعمل حاجة غلط ، فيه إيه لما نقعد مع بعض شويًا

- لا فيها كتير ، أنا غيرك انت ، أنا لا تربيتي ولا ديني يسمحولي أقعد مع واحد غريب معرفهوش

- ما غريب إلا الشيطان يا "فوقا"

نهضت "فرحة" بغیظ وقالت :

- اسمي "فرحة" لو سمحت

- خلاص يا ستي اسمك "فرحة" ، بس اقعدى نكمل كلامنا

جلست "فرحة" بتأفف وبدأ هو في سرد كلامه التي لم تقنع بشيء منه فقط ، كان كل كلامه يدور على أنه يريد منها أن تصادقه وتجعله يتقرب منه ، حتى ضاقت ذراعاً بذلك الحوار فقالت :

- بقالك نص ساعة عمال تتكلم في كلام أنا مش مقتنعة بيه ، بص يا ابن الناس ، أنا واحدة غلبانة على قد حالي ، مش حيلتي حاجة غير شرفي وغير سمعتي ، أنا مليش في نظام الصحوية ، أصلاً أنا مش مقتنعة إن فيه صداقة بين الولد والبنت ، وفّر على نفسك أي تعب عشاني ، انت تقدر تصاحب ألف غيري مجاتش عليا ، أنا بشكرك على كل حاجة عملتها عشاني ، بس أرجوك سيبيني في حالي أنا حياتي اتلخبطت من يوم ما قابلتك ، وكفاية إن الناس شافوني وأنا بنزل من عربيتك النهارده ، أكيد مش هخلص من كلام الناس ، أظن كده انت فهمت قصدي ، بعد إذلك أنا همشي

انصرفت "فرحة" ولم تدع له فرصة للرد فضرب المنضدة بيده من شدة الغيظ وأخرج سيجارة وأشعلها ونفث دخانها بشدة وانصرف من المكان وهو يتوعد لـ "فرحة" ، أخرج هاتفه بسرعة واتصل برقم معين ووضع الهاتف على أذنه وهو يقول :

- انتي فين ... عايز أقابلك ضروري ... بسرعة .... اوك

كانت المتصل بها هي "مايسة" صديقة "فرحة" في المطعم ، أراد أن يخبرها أن خطتها فشلت فهي من كانت أخبرته بتلك المعلومات عن "فرحة" وهي من وضعت له تلك الخطة حتى يجلس معها بعدما أعطى لها مالا كثيراً نظير مساعدتها له .

"مايسة" وافقت بدون تفكير في مساعدة "فادي" ، ليس غريباً على شخصية كشخصية "مايسة" بطبيعتها المادية أن توافق على شيء مثل ذلك ، كانت دائماً تنصح "فرحة" أن تتنازل وتحن على الزبائن بابتسامة ولا بأس بقليل من الخلاعة حتى ترضى عنها الزبائن وتعطي لها مزيداً من "البقشيش".

كانت هذه هي نقطة الخلاف بينها وبين "فرحة" التي كانت دائماً تخبرها أن هذا التصرف لا يليق بها كفتاة مسلمة ، فما كان من "مايسة" إلا أن تتلملم وتتمصص وتقول :

- خليكي في مبادئك اللي ملهاش لازمة دي ، إيه يعني شويا تنازل يعني ، ضحكة كده ، غمزة كده ،
- كانت "فرحة" دائماً تقول لها :
- انتي ازاي عايشة كده ؟!
- تفتكري أنا مبسوفة باللي أنا بعمله ده ، وأنا هعمل إيه ، على الأقل أحسن من اللي بتفرط في كل حاجة وبالفلوس برضه
- كانت الحوارات دائماً بينهما تنتهي بلا فائدة ، فكلأ منهن متمسكة برأيها ومبادئها .

وصلت "مايسة" للمكان الذي ستقابل فيه "فادي" فقالت له :

- احكي لي اللي حصل بالضبط
- سرد لها "فادي" كل ما حدث فقالت :
- طول عمرها البت دي وش فقر ، بس انت غلطان برضه ، هو فيه حد يقولها وش كده ، يابني دي واحدة عاملة فيها رابعة العدوية
- مين رابعة العدوية ؟
- ايش عرفني أنا ، بس مكانش ينفع تجيبهاها كده ، دي غاوية حب وكده ، يعني تفهمها إنك بتحبها ، عايز تتجوزها كده ، لكن تقولها عايز أصحابك كان لازم تعمل كده
- انت هتفضلي ترغي كده كثير ، انجزي قولي أعمل إيه
- سيبنني بس أحكي معاها وأنا هقولك تعمل إيه ، بس طبعاً ليا حلاوتي
- انت إيه مبتشبعيش ، حاضر ، حاضر بس اخلي

\*\*\*\*\*



١٥

خدعة  
من صديقة

كانت "فرحة" منهمكة في عملها حين أتها "مايسة" قائلة :

- مقولتليش أخبار "فادي" معاكي إيه

نظرت إليها باستغراب وقالت :

- ممكن تغيري السيرة الزفت دي وإلا مش هكلمك تاني أبداً

- حاضر ، حاضر ، بس اهدي ، أنا مش عارفة انتي خايفة ليه ،

الموضوع ميخوفش للدرجة دي ، ليه كل ما أجيب سيرته وشك يتقلب

ألوان

- أنا !!!!

- أيوه انتي ، انتي مش بتشوفي نفسك لما بتتكلمي عنه ، طب هو

حصلت حاجة بينكم

صممت "فرحة" ونظرت للأسفل لا تجد ما تقوله فأردفت "مايسة" :

- احكي لي بس وصدقيني أنا خبرة في الموضوع ده وهريك

قصت "فرحة" ما حدث بينها وبين "فادي" بأدق التفاصيل .

كانت "مايسة" تستمع إلى ما تقوله بتركيز شديد فقالت لها :

- والله شكله بيحبك صح يا بنتي ، مش عارفة انتي منشفة دماغك ليه  
ابتسمت "فرحة" ابتسامة ساخرة قائلة :

- حتى ولو كان بيحبني ، ده واحد مقضي حياته بالطول والعرض  
وملهوش عزيز ، كل الناس بتقول عليه إنه بتاع بنات ، تفتكري أنا  
أحب واحد كل يوم مع واحدة ، سيك من ده كله ، أنا فين وهو فين ،  
أنا غلبانة على قد حالي ، أمي بياعة في دكان وبجري على اخواتي  
الصغيرين ، تفتكري لو عرف ده كله هيفضل بيحبني

- مش بيقولوا مراية الحب عمية

- حب إيه بس يا بنتي ، ده عايز يتصاحب ، اللي زي ده ميعرفش يحب

- طب ما تصاحبيه أهو تطلعيلك من وراه بأي مصلحة

- مصلحة إيه ، انتي مفيش في دماغك غير كده

وبينما هما يتحدثان رنَّ هاتف "مايسة" فحوّلته إلى صامت وأكملت حديثها :

- يا بنتي اللي زي ده أحلى مصالح تتعمل من وراه

رن هاتفها مرة أخرى ، فحوّلته إلى وضع صامت مرة أخرى فلاحظت  
"فرحة" ذلك فقالت لها :

- ما تردي يا بنتي يمكن حاجة مهمة

تعلمت "مايسة" ثم قالت :

- لا لا ، عادي مفيش حاجة ، دي واحدة صاحبتني رطاطة لو فتحت

هترغي نص ساعة وأنا مش فايقالها

- طب أنا هقوم هشوف الصالة عشان قعدتنا هنا ملهاش لازمة

تحركت "فرحة" بسرعة فرنَّ الهاتف مرة ثانية ففتحت بسرعة بعدما نظرت  
يمينها ويسارها فجائها صوت "فادي" غاضباً :

- انتي يا زفتة انتي مش بتفتحي بسرعة ليه

ضحكت بصوت عالي وقالت :

- إيه وحشتك ولا إيه
- وحش لما يلهفك ، انتي سكرانة ولا إيه ، عملتي إيه في الموضوع اللي قولتلك عليه
- خلاص بقى مدام وحش يلهفني ، شوفك غيري يساعدك ويقولك ع الفكرة اللي لقيتها

هدأ "فادي" من روعته عندما سمع هذا الكلام وقال بهدوء :

- بلاش لعب بأعصابي أكثر من كده وانطقي أحسنك
- إيه يابني انت طلقة رصاص اهدا بس ، لما أقبلك هقولك ، أنا قدامي نص ساعة وأخلص شغل
- ماشي

أغلقت الخط وقالت لنفسها :

- أنا عليا حته دماغ والله خسارة مش لاقية اللي يقدرها
- دخلت "فرحة" مرة أخرى فوجدتها تحدث نفسها فقالت :
- انتي بتكلمي نفسك ولا إيه
- لا أبداً يا قمر انتي
- وقبّلتها في خدها وانصرفت قبل حتى أن تدع لها فرصة للدهشة فمسحت "فرحة" مكان قبّلتها فو وسط شلالات من الدهشة التي أغرقتها فقالت :
- يا بنت المجنونة

\*\*\*\*\*



١٦

هل أحبها  
بصدق؟

كان "علاء" يجلس مندهشاً أمام "فادي" في الكافتريا وقال له :

- مش تفهمني احنا هنا بنعمل إيه ، وإيه لازمة الكلام اللي انت حفظتهوني ده
- اهدا بس وهفهمك كل حاجة ، أهم حاجة لما أشاورك تبدأ بالكلام اللي اتفقنا عليه
- ظهرت "مايسة" من بعيد فغمز لها "فادي" بعينه فانصرفت وبعد لحظات كانت "فرحة" قادمة فوخز "علاء" في قدمه حتى يبدأ الحوار فقال "علاء" :
- إيه يسطا مش يلاه عشان متأخرش
- أنا مش هروح معاكم
- ليه فيه حاجة معاك ، خلاص بلاش النهارده
- لا النهارده ولا في أي يوم تاني ، أنا بطلت الحاجات دي خلاص ، ومن النهارده مش عايزك تكلمني في حاجة زي دي وإلا مش هعرفك تاني

- ليه بس كده يسطا ، ده أنا محضرك حتة سهرة في الجون النهارده  
وقف "فادي" غاضباً :

- بلا سهرة بلا نييلة ، أنا قرفت من الحاجات دي ، قرفت ، قرفت

- فيه إيه يا برنس انت اتغيرت ليه كده

- آه اتغيرت يا "علاء" ، اتغيرت ومش عايز أعرفكم تاني انت ولا الشلة

الزبالة بتاعتكم دي

- كده انت بتخسرنا يا صاحبي

- أحسن برضه ، انتوا خسارتكوا مكسب

وقف "علاء" وقال :

- كده انت جيبت آخرها يا معلم ، بس لما تحب ترجع انت عارف مكانا

فين ، ومن غير سلام

انصرف "علاء" من توه فجلس "فادي" وهو يتأفف فاصطنع أنه للتو قد رأى

"فرحة" فقال لها :

- هاتيلي كباية لمون يا أنسة "فرحة" عكّر دمه ربنا ياخده

أومأت "فرحة" موافقة في زهول وفرحة وبسرعة كان كوب الليمون يستقر

أمام "فادي" وهو يرشف منه أول رشفة فقالت "فرحة" :

- هدي نفسك يا أستاذ "فادي" النوع ده من الصحاب صدقني

ميتزعلش عليه

اصطنع "فادي" الدهشة" ثم قال :

- انتي متابعة الحوار بقى

شعرت بالحرج ثم تمالكت وقالت :

- وأنا ماشية كده سمعت طرايطيش كلام ، بس مفهمتش أوي الموضوع

الي بتتكلّموا فيه

وضع "فادي" رأسه بين يديه وقال :

- أنا نفسي أتغير يا "فرحة" أنا زهقت من حياتي ومن العيشة الي أنا عايشها دي وانتي السبب شعرت "فرحة" بسعادة كبيرة من كلماته تلك ، شعرت أن العائق الذي كان يعوق بينها وبين "فادي" أوشك على أن يزول .  
كان الذي تخاف منه فيه هو علاقاته تلك المتعددة ، وها هو الآن يتخلص منها بالتدريج ، شعرت بقلبها يخفق كثيراً ، دقائقه تزيد وتعلو حتى أن الذي يمر بجوارها يسمعها  
قال لها بعدما رفع رأسه :

- قولتي إيه ؟  
- في إيه يا أستاذ "فادي"  
- هتساعديني أتغير  
- الي عايز يتغير هيتغير بس بنفسه من غير ما حد يساعده ، لازم التغير يبقى طالع من جواه هو ، وانت تقدر لو عايز  
- طبعاً عايز ، بس عايزك جمبي ، أنا من أول ما شفتك شفت فيكي العوض عن كل حاجة فانتني ، قولت لازم أكمل حياتي معاكي يا "فرحة" أنا .... أنا....

صمت قليلاً ثم قال :

- بحبك

سمعت هذه الكلمة وانصرفت من فورها دون أن تنطق ببنت شفه .  
أنهت "فرحة" ساعات عملها لا تدري ماذا حل بها ، حقاً ما حدث هذا ؟  
قال لها أنه يحبها ، هل هو يحبها بصدق أم أنها مشاعر مؤقتة ستأخذ وقتها وتنتهي ؟ كانت لا تدري هل تفرح أم تحزن ؟ ، تفرح لأنه نطق وقال أنه يحبها بصراحة أم تحزن لأنها حتماً ستواجه العديد من المشاكل جراء هذا الحب .

كانت تسأل نفسها كثيراً أهى تحبه فعلاً ، هل هو ذلك الرجل الذي يستحق أن يملك قلبها ، كانت قبل ذلك تتعلل بأن له علاقات سيئة مع الكثير من الفتيات كما يقال عنه ، والآن هو يقطع وينهي كل علاقاته كما سمعته يتكلم مع صديقه .

كانت "فرحة" تشعر بسعادة لكن سعادة ينقصها شيئاً لا تعرف ما هو ولكنها سعيدة فقط .

ذهبت إلى منزلها ولأول مرة لم تجد والدتها ، فاستحسننت ذلك ، فوقفت أمام مرآتها ونزعت عنها حجابها فتدلت شعيراتها الحريرية على كتفها فأمسكت بطرفها بدلال وظلت تنظر في المرآة كثيراً لأول مرة في حياتها .

جلست أمام المرآة تفكر فيما حدث ، فسمعت صوت بداخلها يقول لها :

- معناه إيه اللي حصل النهارده ده

ردت بصوت عالي وكأنها تكلم صورتها في المرآة :

- إيه اللي حصل يعني ، واحد غني قابل واحدة حلوة بس فقيرة فحب

يعطف عليها شويآ ويتسلى بيها

أتاها صوتاً مرة أخرى من داخلها قائلاً :

- يعطف عليكى ازاي ، هو اللي بيعطف على واحدة يقولها إنه بيحبها ،

مش يمكن بيحبك بجد

ردت على نفسها قائلة :

- ويمكن يكون بيتسلى بيها ، ممكن تكون حاجة تكسر الملل اللي هو

فيه ده ، وأول ما يزهق منها هيكرها زي ما كسر غيرها كتير ، ازاي

من كلمة واحدة عايزة تغيري رأيك فيه ، انتي شكك اتجننتي ، اللي

زي ده ميعرفش حاجة اسمها حب

ردت صورتها في المرآة قائلة :

- انتي مش سمعتي كلامه مع صاحبه

وقفت من أمام المرأة وكأنها تهرب من صورتها ومن صوت ضميرها وألقت  
بجسدها على السرير وقالت :

- لا .... لا .... لا ...

هزت رأسها بشدة وكأنها تطرد تلك الأفكار من رأسها وقالت بصوت عالي :

- لا يا "فرحة" لا ده وقته ولا دي ظروفه ، أنا من أول ما اتوفى المرحوم

بابا وأنا خدت عهد على نفسي إني هعيش عشان اخواتي ، ومش

هسمح لحاجة زي دي ترجعني عن الوعد اللي اديته للمرحوم بابا ،

وزي المثل ما بيقول الباب اللي يجيلك منه الريح سده واستريح ، أنا

مش هسلم قلبي لشوية أوهام


سكتت قليلاً وكأنها تفكر في كلمة أوهام ثم قالت مؤكدة لنفسها :

- آه أوهام ... أوهام نص كمان

أغمضت عينها واستسلمت أخيراً للنوم الذي طال غيابه هذه الليلة حتى كادت

أن تأيس من قدومه

\*\*\*\*\*



مش  
ليك

كانت "علا" تجلس على طرف البار ورشفت آخر رشفة في كأسها وقالت  
للنادل :

- واحد تاني يا كبير

أذعن النادل للأمر بسرعة وصب لها كأساً آخر وقدمه لها ، ولكن "تامر"  
أمسك يدها قائلاً :

- كفاية كده يا "علا" انتي ثققتي أوي النهارده في الشرب انتي مش  
متعودة على كده

أبعدت يده بعنف وقالت :

- انت مالك انت بيا ، أنا عايزة أشرب ، أشرب ، أشرب كتييير لحد ما  
أنسى ، أنسى كل حاجة ، أنسى اسمي ، أنسى نفسي ، أنسى ...

ثم أدركت في آخر لحظة أنها على وشك أن تبوح له بالسِر الذي تظن أنه يخفى عليه فأكمل هو قائلاً :

- تنسي "فادي" ، مش كده ، كملي يا "علا" قولي كل اللي جواكي ، مش هتلاقى حد يحس بالنار اللي فيكي إلا اللي اتكوي بيها قبل كده  
تصنعت "علا" عدم الفهم وقالت وهي ترشف رشفة أخرى من كأسها :  
- تقصد إيه

ضحك "تامر" بسخرية ونزع منها الكأس بالعنف وقال لها :

- فوقى بقى ، فوقى واعرفي مين اللي بيحبك ومين اللي بتهمه مصلحتك ،  
الي انتي بتحبيه ده مش ليكي ، ولا عمره هيكون ليكي ، أنا ....  
وقفت "علا" مقاطعة :


- انت إيه .... بتقول إنك بتحبني ، وعاييزني أحبك كمان ، طب على إيه ؟  
شايف إيه الميزة اللي فيك عنه ، على فكرة انت شبيهه بالضبط ، في كل حاجة ، كل الفرق ما بينه وبينك انه أغنى منك ، انت لو غني زيه كان زمانك زيه ، كان زمانك بتعمل أكثر من اللي بيعمله  
رد باستغراب :

- أنا ... أنا يا "علا"  
- أيوه انت ، تنكر إنك بتروح معاه نفس المكان المشبوه إياه ، وكل يوم مع واحدة شكل من البنات الزبالة اللي بتعرفوها دي  
أخفض "تامر" رأسه خجلاً فأكملت :

- ساكت ليه .... طبعاً مش عارف تقول إيه  
- لو يرضيكي أبطل أروح معنديش مانع ، لو عاييزاني أقطع علاقتي بيهم كلهم معنديش مانع ، بس انتي قولي آه ، أنا ممكن أعمل أي حاجة عشان خاطرک

- اسكت يا "تامر" اسكت ، عشان خاطري اسكت ، لو أنا غالية عندك  
زي ما بتقول اسكت  
تنهد "تامر" ثم قال :
- حاضري يا "علا" بس كفاية شرب عشان خاطري  
ألقت "علا" الكأس من يدها ونهضت وهي تترنح ثم قالت :
- أنا هروح  
نهض "تامر" بسرعة ليساندها قائلاً :
- يا ريت ، يكون أحسن برضه ، أنا هروحك ، يalah بينا  
"علا" الفتاة الوحيدة لأبيها ووالدتها توفت منذ كانت تخط في عامها الحادي  
عشر  
كان أبيها لا يراها إلا كل حين وحين فقط بالصدفة حتى أنه كاد أن ينسى  
شكلها ، هو من نوعية البشر المحبين للنقود للنفوذ للسلطة ، كان شريكاً لـ  
"عزيز الدمرداش" في كل شيء .

\*\*\*\*



التقل  
صناعة

في سيارته الفارهة كان "فادي" يجلس أمام عجلة القيادة وبجواره "علاء" الذي يدخل سيجارة وبعدها انتهى منها فتح زجاج السيارة وألقى بعقب السيارة وأغلق الزجاج مرة أخرى فقال "فادي" :

- بس يا سيدي ، وخلص واحدة واحدة البت دي هتبقى بتاعتنا ، وأبقى كسبت الرهان

ضحك "علاء" ثم قال :

- بس انت طلعت غشيم يا معلم ، حد كده خبط لزق يقول لواحدة بحبك ، وهي أصلاً مكانتش طايقاه ، المهم كان رد فعلها إيه ؟؟؟؟

- سابتني ومشيت من غير ما ترد حتى

ضحك "علاء" بطريقة جعلت الدماء تغلي في وجه "فادي" ثم قال :

- طبعاً ، كان لازم تسيبك وتمشي ، مستني إيه من واحدة مكنتش بتطيقك وفجأة كده وبقدرة قادر عملت نفسك الملاك الطاهر قدامها وبعدين تقولها إنك بتحبتها
- بس أنا حسيت إن الكلمة فرحتها بس مكانتش عايزة تبين قدامي
- ياد بلاش غشم ، انت زي ما يكون لسه بتتعلم من جديد ، إيه يا عم "فادي" احنا بنتعلم منك الحاجات دي مالك مش عارف تفكر ليه
- يا عم ، أنا مفيش فيا دماغ أفكر ، عندك كلمة حلوة قولها معندكش نطقنا بسكاتك

عاد "علاء" لضحكاته المستفزة ثم قال :

- خلاص يسطا ، نعلمك وناكل من جيبنا ، بص يا معلم انت تغيب عليها يومين ثلاثة أربعة كده ، متخليهاش تعرفلك طريق جرة ، ولا تلمح ليك خيال حتى ، مش بيقولوا برضه التقل صنعة
- نظر إليه "فادي" بدهشة مستفسراً عن معني تلك الكلمات فأكمل "علاء" حتى ينتزعه من حيرته :
- بص يا معلم انت لما ترميلها كلمة زي دي وخصوصاً بعد رد الفعل اللي انت حكيتهولي ده وبعدين متشوفكش تاني ، هتجنن وهي اللي هدور عليك

هز "فادي" رأسه متفهماً ويبدو أنه قد اقتنع بما قاله "علاء" فقال :

- تسلم دماغك يا يا واد يا "علاء"
- تنحج "علاء" فخراً ممسكاً بياقة قميصه ثم قال :
- تبقى ليا الحلوة يسطا
- أدار "فادي" محرك سيارته وتحرك ببطء وهو يقول :
- وماله ، يحصل اللي ف بالي وليك اللي انت عايزه ، امال فين الواو "تامر" ، بطل يسهر معنا ليه

- معرفش ماله ، بقاله فترة بعيد كده وكل ما أكلمه يقولي مش فاضي ،  
حاسس إنه بيتهرّب مني ، سيك منه  
ضغط "فادي" على مكبس الفرامل فجأة حين وقفت أمامه سيارة فانهاال  
عليها بوابل من السباب ولكن حين أطلت منها فتاة هداً قليلاً .  
فتحت الفتاة الباب وأسرعت ترى ما حدث في سيارتها والسيارة التي صدمتها  
وذهبت إليه معذرة :
- أنا آسفة والله ، بس أنا كنت بتكلم ف التلفزيون و..  
قاطعها "فادي" بنظرة رومانسية وغمزة :
- القمر ده ميعتذرش  
قالت بنفس نبرة الاعتذار :
- بس أنا حاسة إنني خبطت عربيتك  
نظر إليها مندهشة :
- حاسة !!! ع العموم فداكي ألف عربية ، محصلش حاجة  
أخرج كارت من جيبيه وأعطاه إياه قائلاً :
- ده الكارت بتاعي ، ياربيت نبقي صحاب  
ابتسمت الفتاة قائلة بعدما عضت على شفتها السفلى :
- يا ريببيت

\*\*\*\*\*



١٩

بدأت  
تلين

كانت "فرحة" تراقب الصلاة من آن لآخر تبحث عن ضالتها ، ولكنه لليوم الثالث على التوالي لم يظهر له أثر ، لاحظت "مايسة" تلك الحالة التي اعترت "فرحة" منذ يومين ولكنها لم تتحدث معها في ذلك ولكن في ذلك اليوم قررت أن تحدثها قائلة :

- مش جاي النهارده

سمعت "فرحة" تلك الكلمات وكأنها الصاعقة فتسائلت :

- ليه

ثم اكتشف أنها وقعت في الفخ الذي نصبته لها "مايسة" فأدركت الخطأ قائلة :

- ميبين ده ؟

ضحكت "مايسة" بخبث وغنّت :

- مهما حاولت تداري عليا ، عنيك دايمًا دايمًا فاضحاك  
وعادت إلى ضحكاتهما المستفزة فضربتها "فرحة" في كتفها قائلة :
- والنعمة انتي رخمة أوي ، امشي بقا شوفي وراكي إيه  
انصرف "مايسة" بعد غمزة من عينينها فأوقفها "فرحة" قائلة بتردد :
- عرفتني ازاي إنه مش جاي  
تسألتي "مايسة" بخبثها المعهود :
- هو مين ده ؟؟؟
- يوووووووه ، انتي أرخم واحدة شفقتها ف حياتي ، أنا بقصد  
الشب اللي كان دايمًا يجي يقعد هنا ويسأل عليا
- أه قصدك "فيدو" الجميل  
اندهشت "فرحة" من الاسم الذي أطلقتته "مايسة" على "فادي" وكأنها تعرفه  
منذ فترة فتسألتي :
- انتي تعرفيه قبل كده  
تلعثمت "مايسة" ثم قالت :
- لا لا ... أنا لا أعرفه ولا شففته هو قاللي اسمه لما كان هنا ، بس إيه  
انتي هتاخدينني في دوكة ولا إيه ، انتي شكك وقعتي  
ردت "فرحة" بسرعة وكأنها تبعد عنها شبهة كبيرة :
- لا لا ، متفهميش غلط  
نظرت إليها "مايسة" بنصف عين وقالت :
- طب عيني ف عينك كده ، بدمتك مش مستنياه
- لا .... أه أنا فعلا مستنياه ، أصلي كنت عايزاه في موضوع كده
- أه موضوع .... اخص عليكي هتخبي عليا بس شكك انتي وقعتي  
احمّرت وجنتي "فرحة" ثم قالت :

- وقعت إيه ، مفيش حاجة أصلاً عشان أخبيها  
ابتسمت "مايسة" وقالت :

- امال قعدتي ترغي معاه أول امبارح ف إيه
- ده انتي متابعاني بقى
- ولا متابعة ولا حاجة ، أنا بس فضولية شويا ومحيش حاجة تعدي  
عليا كده
- والله ... والله مفيش حاجة بيني وبينه ، هو أنا عشان اتكلمت معاه  
شويا يبقى حبيته ، مش دي نصيحتك ليا
- تمصصت "مايسة" بشفتيها وغنت بطريقة مستفزة :
- حبيته ومقولتش ياماً

انصرف "مايسة" ف ضربتها "فرحة" في كتفها بشدة وقالت :

- والله انتي رجمة أوي ، وأنا غلطانة عشان اتكلمت معاكي من الأول
- ضربت "فرحة" الأرض بقدمها غيظاً ، ثم انصرفت تتابع عملها حتى انتهى  
يومها ببطء السحلفاة ، ثم عادت إلى منزلها لا تدري ماذا حل بها ؟  
لماذا كانت تنتظره ؟ لماذا ضايقها غيابه ؟ أليست هي من كانت تتمنى ذلك ؟  
كانت تريد أن تفسر غيابه ، وخصوصاً بعد الكلمة التي قالها لها ، لماذا إذاً  
قالها طالما ينوي الغياب والبعد ، لماذا تركها وترك لها جيلاً من الأوهام لا  
تستطيع حمله ، كانت قبله تعيش في حالها تكفي غيرها شرها .
- وصلت لمنزلها لا تعلم كم من الوقت مرَّ عليها ، حمدت الله عندما وجدت  
والدتها قد خلدت إلى النوم فدخلت حجرتها وجلست أمام المرآة كعادتها التي  
تعودت عليها أخيراً فوجدت صورتها في المرآة تحدثها :

- طب هو مجاش ليه تاني ، يكونش ندم على الكلام اللي قالوا ، طب هو  
ليه قالي كده ، ليه رمانى في وسط بحر موجه عالي قوي وأنا مش  
بعرف أعوم ، وأنا إيه اللي خلاني اتعلقت بيه وفين الكلام اللي كنت

معاهدة نفسي بيه ، مش كنت قولت إنني هشيل الموضوع ده من دماغي لحد ما أخرج وألاقي شغل عشان أصرف على إخواني ، أنا لازم أنسى الموضوع ده وأشيله من دماغي فعلاً ، ومفكرش فيه تاني وكفاية اليومين الي عشتهم وأنا مش عارفه إيه الي فيا نهضت من أمام المرآه وألقت بجسدها على السرير ونظرت في سقف حجرتها تعد الشروخ التي فيه كعادتها كل مرة ثم قالت بهمس :

- وأنسى ليه .. هو أنا مش زي أي بنت نفسها تحب وتتحب ، ولا هي جات عندي أنا وبركت  
خبطت بكلتا يديها على السرير وقالت :

- اوقف ، وبعدين يا ربي في الحيرة دي ، خايفة أتعلق بيه ويكون فعلاً بيلعب بيا ، ساعتها هتصدم صدمة كبيرة  
سكتت قليلاً تحاول أن تقنع نفسها بعكس ذلك وقالت :

- أو يمكن يكون بيحبني بجد وهيبقى انسان تاني بجد ، وفعلاً عايز يتغير على أيدي  
غيرت من وضعية نومها ووضعت كلتا يديها أسفل رأسها واتجهت إلى اليمين  
ثم قالت :

- هو أنا بحبه فعلاً؟! اشمعنا هو ، ولا يمكن عشان ده أول واحد يقولي بحبك . ... وأخريتها ابييييه يا "فرحة" أخرتها إيه الحالة الي انتي فيها دي

وهنا فتح باب الحجرة وأطلت الأم برأسها من الباب قائلة :

- "فرحة" انتي جيتي امتا يا بنتي ، ومصحتنيش ليه أعملك أكل تظاهرت "فرحة" بالنعاس وتصنعت التثاؤب وقالت :

- لا يا ماما ، أنا تعبانة وهنام على طول

أطفأت الأم إضاءة الغرفة وهي تردد :

- نوم العوافي يا بتي  
 وذهبت وتركتها مع خيالاتها وحيرتها ، تركتها تترجى النوم أن يأتي حتى  
 ينتزعها من كل هذا التفكير .  
 بعد مرور أربعة أيام ، وفي نفس الميعاد كانت "فرحة" تدخل المطعم لتتسلم  
 عملها  
 ارتدت زي المحل الرسمي وكذلك المريلة وأمسكت بالدفتر وذهبت إلى أحد  
 زبائن المطعم لتسأله عن مطلبه فقالت له :  
 - أوامر حضرتك يا فندم  
 إلتفت الشاب باسماً فتسمّرت في مكانها عندما وجدته "فادي" ، احمّرت  
 وجنتاها وتمنت لو أن الأرض تنشق وتبتلعها .  
 ابتعلت ريقها بصعوبة وقالت :  
 - "فادي"  
 علت على وجهه الدهشة وهو يقول :  
 - شفتي عفريت ولا إيه  
 الحقيقة لو أنها رأّت عفريتاً كان أهون عليها مما هي فيه الآن ، حاولت أن  
 تتمالك وتجمع شتات تفكيرها وقالت :  
 - لا أبداً ، بس استغربت أصلك ليك كام يوم مجيتش  
 ابتسم وقال بثقة :  
 - وحشتك ... صح ؟؟؟ ، طب رقمي معاكي مش كنتي تتصلي تتطمني  
 عليا  
 نظرت إليه باستفهام شديد ، تعجبت في قرارة نفسها من جرأته الشديدة ، لم  
 تتوقع هذه الضربة المفاجأة لقلبها الذي لن يحتمل أكثر من ذلك فقالت :  
 - تشرب إيه ؟؟؟  
 ضحك "فادي" ثم قال :

- إليه ده ، بقولك وحشتيني مينفعش الرد بتاعك ده  
ردت مستفهمة :

- أرد أقول إليه

- قولي وانت أكثر ، وانت كمان أي حاجة

استجمعت قواها الخائرة وقالت بشجاعة :

- لو سمحت يا أستاذ "فادي" ده مكان شغل مينفعش نتكلم في حاجة  
زي كده

قدّمت له قائمة طلبات المطعم وهمّت بالانصراف فقال بسرعة :

- خلاص نتقابل بره

ظهرت على وجهها علامات الرفض قائلة :

- لا طبعاً ، مش هينفع ، أنا مش بخرج مع حد غريب

- يووووه هنعیده تاني ، يا ستي ما غريب إلا الشيطان ، وبعدين  
فيها إيه ، احنا هنقعد في مكان عام

- برضه مش هينفع ، أنا أسفة يا أستاذ "فادي"

- ومش هينفع ليبييه ، وبعدين أنا عايز أتكلم معاكي شوي ، هنتكلم  
فين ، هنا بتقوليلي مكان شغل ، طب نطلع بره مش راضية طب  
نتكلم فين

- لو عايز تتكلم ، تعالي البيت واتكلم قدام ماما

نظر إليها باستغراب :

- وماما إيه دخلها بالموضوع

- أنا مبعملش حاجة من وري ماما ، وبعدين اللي عايز حد المفروض  
إنه يدخل البيت من بابيه ، بعد إذّك

انصرفت "فرحة" قبل أن تدع له فرصة للرد ، عَضَّ على شفّتيه غيظاً وقال :

- ماشي ، مسيرك يا ملوخية هتيجي تحت المخرطة ، بس الصبر

أخرج هاتفه وطلب رقم وبعد ثواني قال :

- انت فين يا "علاء" ، طب أنا جايلك دلوقتي حالاً

ثم انصرف دون أن يشعر بأن هناك من يراقبه ، كانت "فرحة" تراقبه من بعيد بأسى وحزن .

لم تعلم "فرحة" كم من الوقت مر عليها وهي شاردة حتى شعرت بيد تنهرها من الخلف ، كانت "مايسة" التي قالت :

- مالك يا بت فيكي إيه

انتبهت بعد فترة وكأنها لم تسمع ما قالته "مايسة" فأعادت الأخيرة ما قالته وهي تهزها في كتفها فقالت "فرحة" :

- مفيش ، متشغليش بالك

تقدمت "مايسة" خطوتين حتى أصبحت "فرحة" خلفها وقالت دون أن تنظر إليها :

- بتحببيه ؟

لم تكن "فرحة" تتوقع أبداً مثل هذا السؤال من زميلتها

لم تدري ماذا تقول ؟

لم تدري أصلاً ما جواب هذا السؤال ؟

هل هي حقاً تحبه ؟ وإن كانت تحبه ، لماذا تعامله بهذا الجفاء ؟

لاحظت "مايسة" شرودها فدارت إليها وأمسكت بكتفيها فقالت :

- تبقي بتحببيه

أزالت "فرحة" يديها برفق ونظرت إلى الجهة الأخرى هروباً من نظرات

"مايسة" ثم قالت :

- هو مين ده ؟

دارت "مايسة" حتى وقفت في مواجهتها قائلة :

- بتضحكي عليا ولا على نفسك ، انتي غرقانة لشوشتك

نظرت "فرحة" للأسفل حتى لا تنظر في عينيها وقالت :

- هو أنا باين عليا كده أوي

ضحكت "مايسة" ضحكاتهما المستفزة مرة أخرى وقالت :

- إلا باين عليكي ، ده انتي كل حته في وشك بتقول بحبه ، كل تعبيرة  
من تعابير وشك بتسأل عليه ، لما بيجي بتبقي كإنك طائيرة من ع  
الأرض ، ولما غاب كان باين عليكي اللهفة ، يبقى حب ولا مش حب ،  
ده انتي بتعشقيه مش بتحبيه

جلست "فرحة" على أقرب كرسي في طريقها عندما عجزت قدماها على حملها  
فقد شعرت أن جميع أوراقها مكشوفة أمام صديقتها ، وقالت بعد أن  
استجمعت قواها :

- هو مش حب بمعنى حب يعني

تنهدت "مايسة" بخبث :

- أمال بمعنى إيه يا برنسيصة

- إعجاب

بدهشة قالت "مايسة" :

- إعجاب !!!

- أه إعجاب ، ودمالك متروحش أبعد من كده ، منكرش إن "فادي"  
شاب وسيم وغني ، بس أنا وانتي عارفين عيوبه اللي تخلي أي واحدة  
زبي تخاف حتى من إنها تقرب ليه ، أنا لسه أصلاً مقررتش أنا  
نتعامل معاه إزاي

أرادت "مايسة" أن تطرق على الحديد وهو ساخن وتكمل خطتها التي  
وضعتها لـ "فادي" فقالت :

- طب وماله ، لما تجازفي ، مش يمكن تكسبي في الآخر ، مش يمكن  
الدنيا ناوية تضحكك عشان كده خلت واحد زي ده يحبك ويجري

وراعي ، مش يمكن ربنا قرر يريحك ، انتي عارفة معناها إيه انك تتجوزي واحد زي "فادي"

نظرت "فرحة" إليها تحثها على مواصلة حديثها الذي تجد له حلاوة في نفسها فأكملت "مايسة" :

- طاقة قدر وبتحوم حواليكى وعايضة تتفتحك ، وانتى خايفة منها مش فاهمة ليه ، يا بنتى الموضوع يستاهل تجازفي عشانه ، قَرَّبِي منه ، إديله فرصة يثبت حسن نيته ، انتي عارفة إن محدش يقدر ياخذ مننا حاجة غصب عننا ، ساعة الجد بنبقى أقوى منهم ، نقدر نوقف أي حد عند حده

- أنا مش فاهمة حاجة ، تقصدي إيه

- يا بنتى اسمعي مني ، أنا شفت في الدنيا كتير واتلظمت كتير ، يا ريت تجيني نص الفرصة اللي قدامك دي ، متضيعهاش عشان متندميش باقي العمر كله عليها

- مش يمكن لما أجرب أتعب أكثر

- مش هتتعبي أكثر من التعب اللي انتي فيه ، بصي لنفسك وظروفك ، بصي انتي محتاجة قد إيه تتنقلي لمستوى أحسن من اللي انتي فيه ده  
- يعني أعمل إيه يعني ???

- شوفيه عايز إيه ، اتكلمي معاه متصديهوش زي ما حصل النهارده كده

علت دهشة "فرحة" فهي لم تقص ما حدث بينها وبين "فادي" اليوم على مسامح "مايسة" فقالت متسائلة :

- وانتى عرفتي ازاي الي حصل بينا النهارده

تصبَّبَ جبين "مايسة" عرقاً ولكنها استطاعت أن تجد ما تقوله فقالت :

- شفتكم وانتوا بتتكلموا وبعد كده لقيته خارج مدايق فقولت أكيد انتي بهبك زعلتية تاني
- أنا لا زعلته ولا نيئت ، كل الحكاية قاللي إنه عايز يتكلم معايا على انفراد ، قولتله تعالى البيت واتكلم قدام ماما ضحكت "مايسة" بطريقة هسترية وقالت :
- الله يخرب بيتك يا بقرة ، في حد يعمل كده ، ومقولتلهوش ليه يجيب معاه دبلتين بالمره ، يا ماما الطرق القديمة دي بطلت من زمان ، لازم تقعدوا مع بعض الأول يعرفك تعرفيه ، مش يمكن متعجبهوش أو مش يعجبك
- لا لا لا أنا معملش كده أبداً
- يوووووووووه ، انتي حرة ، قرفتيني معاكي ثم تركتها "مايسة" وانصرفت غاضبة .
- جلست "فرحة" على كرسي أمامها تفكر في كلمات زميلتها وتُدوِرُها في عقلها علها تصل لحل يريح جميع الأطراف ولكنها لم تصل بعد إلى الحل .
- أنهت يومها وفي طريقها للعودة وجدت ثلاثة من الشباب ملامحهم غريبة ويبدو أنهم سكارى ، اقترب أحدهم منها قائلاً :
- إيه يا موزة ، إيه نظامك
- حاولت أن تتجاهله ولكن ثلاثتهم وقف أمامها فردت برعب :
- نظام إيه ؟
- رد أحدهم بسخرية :
- نظام اتصالات
- ضحك الجميع ثم فجأة تحولت ملامحهم للجدية ، أخرج أحدهم مطوأة وأشهرها في وجهها قائلاً :
- من الآخر كده ، هتيجي معانا ولا نبعثك مشوار

ردت باستفهام :

- مشوار فين؟؟

- للآخرة يا حلوة

وعاد الجميع إلى ضحكاتهم المستفزة .

كانت لا تدري ماذا تفعل ؟ هل تصرخ ؟ وإذا صرخت من سيجيبها في مثل هذا الوقت المتأخر من الليل والشارع يخلو تماماً من المارة .

تصبَّبَ جبينها عرقاً وأخذت ترتعش ، فاقترب منها أحدهم وأمسكها من يدها فنزعت يدها بشدة وحاولت أن تجري بسرعة ولكنهم كانوا أكثر وأسرع فحاوطوها من جميع الجهات وأغلقوا جميع منافذ الهرب ، لم تستطع أن تمنع دموعها وقالت :

- حرام عليكم ، خدوا كل اللي معايا وسيبوني ف حالي ، أنا بجري على

اخواتي ملهمش غيري

قال أحدهم بسخرية :

- وانتي حيلتك حاجة يا موزة

رد الآخر عليه بنظرة شهوانية حقيرة لم تفهم "فرحة" معناها :

- لا حيلتها كثير ... كثير أوي ولا إيه يا مكنة

ردت برعب وسذاجة :

- إيه ؟

ظهرت علامات الغضب على الآخر قائلاً :

- انتي هتقضيها إيه الليل كله ، اللي قرب يخلص ، يلا بينا انت وهو

وسحبها من يدها وهي تسحب نفسها بضعف وتقول :

- لا ... أبوس إيدك لا ... سيبيني عشان خاطر ربنا ، وحياة ولادك

سيبني

وفجأة وقفت سيارة كانت تجري بسرعة ، كانت صوت احتكاك عجلاتها على الأرض من أثر الضغط على مكبس الفرامل كفيلاً أن يلفت أنظار الجميع وفجأة أطلت رأس "فادي" من باب السيارة بسرعة وهو يحمل مسدساً وضرب طلقة في الهواء فجرى الثلاثة رعباً ، فاقترب من "فرحة" التي سقطت على الارض وهي ما زالت تنتفض فحملها بين يديه وأدخلها السيارة وأخرج زجاجة عطر من درج سيارته ورش قليلاً على يده وقربه من أنفها فبدأت تستعيد وعيها شيئاً فشيئاً ، وعندما استفاقت وجدت نفسها في سيارة غريبة ، لم تأخذ الكثير من الوقت حتى تتذكر أنها سيارة "فادي" الذي سمعت صوته يقول :

- "فرحة" انتي كويسة ، ردي عليا طيب

استجمعت قواها ونطقت أخيراً :

- أنا تمام ، مين دول وكان عايزين مني إيه

- شوية عيال فاني شكلهم كانوا متقلين في الشرب بس متقلقيش أنا وريتهم شغلهم

نظرت إليه بامتنان وقالت :

- ميرسي جداً يا أستاذ "فادي" أنا مش عارفة من غيرك كنت عملت إيه ، جميلك ده فوق دماغي

- طب مش لازم تردني الجميل ولا إيه

نظرت إليه غير متفهمة ما يقصده من تلك الكلمة فقال لها :

- مالك يا بنتي فيه إيه ، هو أنا هاكك ، أنا كل اللي بطلبه منك نتعرف أكثر على بعض ، صدقيني مفيش في نيتي حاجة وحشة ليكي ، وبعدين يا ستي لو حسيتي إن في نيتي حاجة وحشة متخلنيش أشوف وشك تاني

ابتسمت ابتسامة رقيقة ثم قالت :

- ممكن أسأل سؤال بسيط في الأول

قال بفرح :

- ميت سؤال ، ask وخلصيني

ضحكت من طريقتة وقالت :

- اشمعنا أنا ، انت قدامك كتير ، كتير أوي ، أغنى مني بكتير وأحلى مني

، ظروفهم أحسن مني ، اشمعنا أنا

تنهد تنهيدة تدل على عدم الارتياح ثم قال :

- هتصدقيني يعني ؟

أومأت برأسها بالموافقة فقال :

- معرفش

نظرت إليه بدهشة ثم قالت :

- ازاي يعني ؟

اتكأ بظره على كرسي القيادة وهو يمسك عجلة القيادة بيده ونظر أمامه وقال

دون أن ينظر إليها ثم قال :

- فيه حاجات كتير بتحصل في حياتنا منعرفش سببها إيه ، أنا نفسي

سألت السؤال ده لنفسى أكثر من مرة ، بس ملقتش إجابة ليه ،

صدقيني أنا من أول مرة شفتك وأنا متلخبط ، معرفش حصل إيه

معايا

ثم نظر إليها وقال :

- حبيتك ، ده السبب الوحيد اللي كنت بقوله لنفسى

سكت وسكتت هي الأخرى ، لا تدري ماذا تقول له ؟ هل تخبره أيضاً أنها

أحبته ولكنها خائفة وإن قالت له خائفة وسألها مما تخاف بما ستجيبه؟

دامت لحظات الصمت أكثر من خمس دقائق قطعها هو قائلاً :

- ساكتة ليه ؟

- أقول إيه
- قولي أي حاجة ، قولي انك مصدقاني
- مصدقك بس ....
- بس إيه ???
- خايفة !
- من إيه ???
- معرفش

**ضرب عجلة القيادة بيده غضباً فقالت :**

- مالك ؟
- مبقتش عارف أعمل إيه عشان ترضي عليا ، تصدقي أنا عمري ما كنت بتخيل إنني في يوم من الأيام هبقى كده ، أنا اللي كنت بشاور بس على أجمل واحدة كانت تطير من الفرحة بس عشان شاورتلها ، تيجي انتي وتعملي فيا كل ده ، انتي سحرتيلي ولا إيه ، اوعي تكوني عاملالي عمل أحسن نموي يقف

**ضحكت بصوت عالي لطريقته في الكلام فقال :**

- الصلاة ع النبي ، طب ما انتي بتعرفي تضحكي أهو ، امال مركبالنا الوش الخشب على طول ليه
- غصب عني والله ، لازم تعذرني ، أنا عيشت حياة صعبة أوي ، أنا واحدة كان أبوها كل حاجة في حياتها ، فجأة بابا مات ، فجأة بقيت في سني الصغير ده مسئولة عن أم واخوات ، تفتكر واحدة عاشت عيشتي دي ، تعرف يعني إيه حب ، تعرف أصلاً أزاوي تحب ، سامحني أنا متلخبطة مش عارفة مالي
- افهم من كده إنك لتالت مرة بترفضي طلبي
- لا ....

ثم سكتت لا تدري ماذا تقول ؟ فقال بعدما أدار محرك سيارته :



- أنا هروحك البيت
- لا .... أنا هروح لوحدي ، وبعدين مينفعش حد يشوفك معايا في الوقت المتأخر ده
- وفتحت باب السيارة ولكن أوقفها قائلاً :
- بس أنا خايف الولاد دول يتعرضوك تاني
- تنهدت بقلة حيلة فقال لها :
- بصي أنا هوصلك لمكان قريب من حارتكم
- أومأت بالموافقة ، فانطلق بها ، طيلة الطريق كان لا يُسمع إلا صوت محرك السيارة ، ولكن كان بداخل "فرحة" بركان ناثر على وشك الانفجار .
- كان "فادي" ما بين الحين والحين يلقي نظرة لائمة على "فرحة" التي أَلقت برأسها على كرسي السيارة وأغمضت عينيها حتى تمنع بركانها الناثر من الخروج ، حتى لا تفضحها عيناها .
- نظرت إليه فإلتفت إليها ، ابتسمت له فابتسم لها ، قالت ولكن دون أن يسمع منها كلمة واحدة :

- بحبك .. من أول لحظة شفتك فيها وأنا بحبك ، دخلت قلبي وقفلت عليك ، كل يوم بتزيد حبة جوايا ، بس أنا خايفة ، خايفة منك أحسن أكون مجرد لعبة في حياتك وهتهزق منها وترميها وتكسرهما زي ما عملت مع غيرها قبل كده
- ثم استفاقت من شرودها وقالت :
- بس كفاية هنا يا "فادي"
- ضغط على مكبس الفرامل قائلاً :

- تعرفني إني دي أول مرة تنادينني باسمي من غير أستاذ
- ابتسمت "فرحة" مرة أخرى ونزلت من السيارة وأشارت له بيدها فقال لها :

- هشوفك تاني  
أومات بالموافقة وانصرفت .

\*\*\*\*



- دخل "عزيز" حجرة نومه كعادته بعد منتصف الليل بعد سهرة طويلة مع أحد شركاؤه فاستقبلته "نسرین" قائلة :
- كل ده بره ، اتأخرت ليه كده
  - قال لها بإرهاق بدا على نبرات صوته :
  - أصل بعد العشا قعدنا نتكلم أنا و"جلال فاضل" في كذا موضوع كده ، منهم موضوع يخص "فادي" ، هو فين صحيح ???
  - ذمّت "نسرین" شفيتها وقالت :
  - "فادي" ! هو بيدخل البيت قبل ٣ الفجر ، وكل ما أسأله يقولي بذاكر مع أصحابي ، وأنا مش بالعة حكاية المذاكرة دي

- ربنا يوفقه ، خلاص هانت فاضل سنة ، عايزه يتخرج عشان يجي يشتغل معايا في الشركة ، أنا كبرت وتعبت ومحتاجه معايا عشان يريحني

**جلست بجواره على السرير :**

- ده كل الي قدرت عليه ، بدل ما تسأله إنت بتسهر فين ولا بتعمل إيه ، وبعدين أنا مش مصدقة حته بيذاكر مع صحابه دي

**استند بظهره على السرير وقال :**

- ومش مصدقة ليه ، مهو من سنين وهو بيذاكر معايم واحنا عارفينهم

- أنا خايفة على الواد ، مش يمكن يكونوا بيشربوا حاجة كده ولا كده

**نظر إليها بدهشة ثم قال :**

- كده ولا كده زي إيه

- مخدرات مثلاً ، خمرة

**ضحك "عزيز" وقال :**

- لو خمرة مش مشكلة ما أنا طول عمري بشرب خمرة ، وأنا مفكرش إنهم بيشربوا مخدرات كان بان عليه ، وبعدين أنا مش عايز أزئق عليه عشان ما يتعقدش

- أنا مقولتش تزئق عليه ، أنا بقول تعرف مين صحابه دولم ، ويبسهروا فين ، ويبعملوا إيه حتى من غير ما تقوله

**قال "عزيز" بنفاد صبر وإرهاق شديد :**

- عايزاني أراقبه يعني ، إيه جو الأفلام القديمة اللي انتي عايشة فيه ده ، مينفعش أعمل كده ، الواد لو عرف حاجة زي دي هيزعل

**ضربت كفاً بكف وقالت :**

- والله هتضيع الواد باستهتارك ده

- تقي من بقل يا شيخة ضياع إيه ، وبعدين خلاص دي آخر سنة في الجامعة وبعدين هينشغل معايا ، و في الشغل هينسى الحاجات دي
  - ربنا يستر ، مقولتليش موضوع إيه اللي كنت بتتكلم فيه مع "جلال" بخصوص "فادي"
  - شفتي نستيني الموضوع المهم ، أنا بفكر أخطبه البت "علا" بت "جلال" ، البت كويسة وزميلته في الجامعة ، وبعدين هو يعرفها ، وعلى طول مع بعض ، وكمان الجوازة دي هتقوي العلاقات بيني وبين "جلال" في الشغل
  - والله فكرة حلوة أوي ، مفيش حاجة هتلمه غير الجواز ، كانت تايهة عني فين الفكرة دي ، بس استنى ، هنجوز الواد وهو لسه بيدرس
  - وماله يعني ، امال هنستنى لما يتخرج ويكوّن نفسه مثلاً
  - طب هتكلمه امتا في الموضوع ده
  - أول ما أشوفه هكلمه
- ضحكت "نسرين" بعفوية وقالت :**
- يبقى السنة اللي جاية يعيد علينا وعليك الايام بخير
  - مسح "عزيز" على شعره ثم قال بإرهاق :
  - يا "نسرين" أنا تعبان وعايز أنام ، لما تشوفيه انتي ابقني كلميه ، حرام عليكي أنا عايز أنام
  - ومدد جسده على الفراش وأغمض عينيه فقالت بعدما تمصصت :
  - أهو ده اللي انت فالج فيه
  - ابتسم "عزيز" وأدار وجهه الناحية الأخرى بعدما فهم ما ترنو إليه "نسرين" وقال :
  - نامي يا "نسرين" نامي يا ماما ، نامي ربنا يهديكي
  - تأففت "نسرين" وتمددت بجواره

\*\*\*\*\*

اضطر "فادي" أسفاً لمقابلة "مايسة" التي أزعجته باتصالاتها المتكررة تطلب منه في كل مرة مقابله ولكن كان يتهرب منها ، بعدما قضى معه مصالحتها فليس له الآن حاجة عندها .

كانت "مايسة" تقريباً تتصل به كل يوم حتى ضاق ذرعاً بها فأراد أن يقابلها لكي يضع حداً لتلك الإزعاجات التي تسببها له حضرت قبل ميعادهما بنصف ساعة وجلست تنتظره وأتى هو متأخراً بنصف ساعة ، وضع مفاتيح سيارته وهاتفه على المنضدة وقال قبل أن يجلس:

- نعم يا "مايسة" عايزة إيه ، إيه الموضوع المهم اللي مينفعش يتأجل ده

نظرت إليه بطرف عينيها وقالت :

- طب اقعد حتى خد نفسك من السكة ، مش كفاية بقالي ساعة ملطوعة هنا ومستنيك

جلس بنفاز صبر قائلاً :

- أديني اتنيلت قعدت أهو

- فيه إيه مالك ، متغير ليه معايا

نظر إليها بدهشة قائلاً :

- متغير ليه؟! هو أنا لا سمح الله وعدتك بحاجة وخليت بيكي وأنا مش واخد بالي

- مكانش ده أسلوبك معايا يا "فيدو"

- "فيدو" ... آه .... بص يا كتكوتة ، أنا كنت عايزك في مصلحة وانتي قضيتها على أكمل وجه ، وعملي اللي عليكي وزيادة ، وأفكر أنا

برضه وفيت بوعدى وعملت اللي قولتلك عليه والفلوس اللي اتفقنا عليها خدتي أضعافها ولا إيه ، أنا كده عدّاني العيب ولا إيه ؟

**وقف "فادي" مستعداً للانصراف فقالت "مايسة" مهددة :**

- الكلام لسه مخلصش يا ... أستاذ "فادي"
- كلام إيه اللي مخلصش ، انتي شاربة حاجة
- ممكن تقعد وتسمع كلامي للآخر

**جلس "فادي" بنفان صبر وقال :**

- اللهم طولك يا روح ، ارغي
- اهدا بس عشان الكلام اللي هقوله محتاج روقان بال وأعصاب هادية
- ممكن تخشي في الموضوع على طول
- انت خلقك ضيق ليه كده النهارده
- يادي النيلة عليا
- خلاص خلاص ... متتعصبش ... بصراحة كده أنا مستخسراك في البت "فرحة" دي وعايضة ينوبني م الحب جانب

**ضحك "فادي" بقهقهة ثم قال :**

- مش فاهم ، تقصدي إيه
- أنا ساعدتك في إنك توصل ليها ، مينفعش أطلع من المولد بلا حمص
- عاد "فادي" لضحكاته مرة أخرى وقال :**

- كل الحمص اللي خدتيه ده مش مكفيكي ، انتي إيه مش بتشبعي


**ابتسمت "مايسة" بمياعة ثم قالت :**

- أصل الحمص بتاعك حلو ، ميتشبعش منه
- يعني من الآخر كده عايضة فلوس تاني صح ؟
- كلك نظر يا سيد الناس

**ضحك "فادي" ولكن هذه المرة بصوت عالي ثم قال :**

- انسي يا بيضة مفيش فلوس تاني ، انتي خدتي أكثر من اللي اتفقنا عليه
- البحر يحب الزيادة يا ..... بيه
- انسي ، انتي خدتي أكثر من وقتك على فكرة أنا مش فاضيلك
- ثم وقف وانصرف دون أن يسمع منها أي شيء ولكنها وقفت وقالت بصوت يسمعه :
- أنا ممكن أهدك كل خطتك بكلمة مني على فكرة
- نظر إليها باشمزاز وانصرف فقالت له أيضاً :
- مش بهزر ولا بقول كلام وخلص ، انت لسه متعرفنيش
- ضاق ذرعاً بطريقتها المستفزة فعاد إليها مبتسماً ثم قال :
- أعلى ما ف خيلك اركبيه ، يا ... قطة ، بس خلي بالك اللي يلعب في الدح ميقولش أح
- ثم ألقى إليها قبلة في الهواء وابتسم مرة أخرى وانصرف .
- نظرت إليه بحنق ثم قالت :
- ماشي يا "فادي" يا أنا يا الست "فرحة" بتاعتك

\*\*\*\*\*



أيام عسل ..  
لم تدوم

استيقظت "فرحة" من نومها بصعوبة ، كانت تشعر بأن كل منطقة في جسدها تؤلمها لا تدري لماذا ؟

كانت تقاوم حواجبها حتى تفتحها ، وبالكاد استطاعت ذلك ثم شعرت بباب الحجرة يُفتح ونورها يُضاء ، أغمضت عينها باشمئزاز حين عاكسها نور المصباح لم يأخذ عقلها الكثير من الوقت حتى تستنتج أن والدتها هي من فتح الباب وأشعل المصباح قالت بعدما فردت يديها في تمطع :

- صباح الخير يا ماما

قالت الأم بعدما جلست بجوارها :

- صباح الخير مين ، قولي مساء الخير ، احنا بعد الضهر يا حبيبتي

انتبهت "فرحة" لكلمة والدتها الأخيرة بفرع وقالت :

- ليه يا ماما سيبتيني نايمة ده كله

- أنا لقبتيك تعبانة ، لما جيت أصحكيي قولت أسيبك تريحي شويا ،  
انتى يا كبد أمك من الجامعة للشغل ، حرام يعني لو ريحتى يوم  
ألقت "فرحة" بظهرها على السرير في إرهاق وقالت :
- يا ماما كان عندي محاضرة مهمة الصبح ، وضاعت عليا ، يلاه مش  
مشكلة ، المهم انتى عاملة إيه يا ست الكل ، والله وحشاني القعدة  
معاكي
- والله وانتى أكثر يا نور عيني
- أهي فرصة نقعد مع بعض شويا قبل ما أروح الشغل ، أحسن حاجة  
إنك برضه مفتحتيش الدكان النهارده ، عشان تريحي انتى كمان  
ابتسمت الأم وقالت :
- ومين قاللك الدكان متفتحش  
نظرت إلى والدتها في دهشة فأكملت والدتها كلامها :
- اخواتك الاتنين النهارده كانوا غايبين من المدرسة بيقولوا خلصوا  
المناهج ، وقالوا هيقعدوا في الدكان شويا عبال ما أنا أحضرك لقمة  
كويسة ترمي بيها عضمك  
نهضت "فرحة" مفزوعة ثم قالت :
- يا ماما اخواتي لسه صغيرين ، واحدة في ثانوية عامة وواحدة في تالته  
اعدادي يعني شهادة ، أنا هقوم أروحلهم ، لازم يرجعوا البيت عشان  
يذاكروا  
أمسكت الأم يديها وقالت :
- يا حبيبتي هما خدوا الكتب معاهم وهيذاكروا هناك ، متشغليش بالك  
انتى ، أنا هقوم أجهلك الأكل  
قبّلت الأم ابنتها وكذلك فعلت "فرحة" وانصرفت الأم لتعد الطعام .

نهضت "فرحة" واتجهت إلى دورة المياه وبينما هي بالداخل رن هاتفها المحمول فعلا صوت والدتها قائلاً :

- تيلفونك بيرن يا "فرحة"

- حاضر يا ماما طالعة أهو

انتهت الرنة وما لبست أن اعقبته رنة أخرى فدخلت الأم الحجرة وأحضرت الهاتف وانتظرتها حتى تخرج ، خرجت "فرحة" مسرعة من الحمام وأمسكت هاتفها ونظرت فيه فابتسمت .

كان رقم "فادي" هو المتصل فهي تعرفه جيداً ، حوّلته إلى الوضع الصامت فتسائلت الأم بتلقائية :

- مين بيرن يا بنتي ، ما تردي أحسن تكون حاجة مهمة

ردت بسرعة :

- لا دي ... دي واحدة صاحبتي ، أكيد بتسأل أنا مرحتش ليه الجامعة النهارده

ودخلت الحجرة وأغلقتها خلفها ، نظرت الأم إليها في دهشة ودخلت مطبخها تكمل ما دخلت لفعله .

أما "فرحة" دخلت حجرتها لتُجيب على هذا المتصل الزئان ، وقبل أن تتحدث بشيء جاؤها الصوت عالياً :

- فينك يا بنتي ، برن عليك من بدري

قالت بصوت هامس :

- معلش كنت في الحمام

سألها بدهشة :

- انتي موطية صوتك ليه ، في حد معاكي

قالت بنفوس نبرة الهمس :

- أه ، أصلي في البيت وماما موجودة

- طب أنا عايز أشوفك

وفجأة فتحت والدتها الباب قائلة :

- الأكل جاهز يا "فرحة"

تدراكت "فرحة" الأمر وقالت :

- خلاص يا حبيبتي هقابلك بالليل في الشغل

قال لها بهمس :

- أينعم حبيبتي مؤنث ، بس أنا راضي

ابتسمت وقالت له :

- امشي يلاه ... بالاي

أغلقت الهاتف وتنهدت بارتياح وقد تذكرت وجود والدتها فتنحنت بجذل

فقال لها والدتها :

- مين يا بنتي اللي بتكلمك دي

- دي واحدة صاحبتي ، فين بقى الأكل

وخرجت من الحجرة قبل أن تصطادها والدتها بسؤال آخر قد لا تستطيع

الإجابة عليه

\*\*\*\*\*

كانت أيام "عسل" عاشتها "فرحة" مع "فادي" ، تلاشت كل الخلافات

بينهما ، أصبحت تقريباً يتقابلان يومياً بالإضافة إلى المكالمات الطويلة التي

تدوم لساعات متتالية في طريقها للذهاب أو العودة من عملها .

كانت "فرحة" سعيدة بذلك أيما سعادة ، شعرت بقلبها يدق بشدة ، غرقت في

هيامها ، كان "فادي" في كل يوم يفاجأها ويمتلك جزءاً أكبر في قلبها ، شعرت

بأن أيامها أخيراً قد عقدت النية على أن تسعدها بعد طول شقاؤها ، كانت

كثيراً تضرب يدها أو تعض يدها مخافةً أن تكون في حلم جميل ، تريد أن


تستيقظ من ذلك الحلم .

كان كل من حولها يلاحظ على وجهها التغيير ، فالحب يكسو الوجه بالفرحة والسعادة ، كزرعة صغيرة كانت تعاني من قلة المياه حتى جفت وأوشكت على الموت ، لكن عندما نسقيها تعود إليها نضارتها ، وتدب فيها الحياة مرة أخرى .

كانت "مايسة" صديقتها في المطعم أكثر من لاحظ ذلك عليها ، أكثر من كان يراقبهما في جميع لقاءاتهما بحنق وغيظ فاقا جميع الحدود ، كانت تحسدها على ما هي فيه ، كانت تسأل نفسها ما الذي في "فرحة" أكثر منها حتى يفضلها "فادي" عليها ؟ تريد أن تنتقم منها بأي شكل أو صورة ، كانت تفكر في الطريقة التي تنتقم منها ومنه ذلك الذي ضحك عليها وألقى إليها بالفتات من النقود حتى نال منها ما يريد ثم ألقاها كما تُلقى الكلاب .

سكتت "مايسة" لم تطارد "فادي" ثانية حتى ظنَّ أنها سلَّمت بالأمر الواقع وابتلعت لسانها ولكنها كانت تراقب وتخطط وتفكر ماذا ستفعل ؟ علمت الكثير والكثير ، عرفت "علا" التي تحب "فادي" وهو لا يحبها فقط يعتبرها أخته ، علمت من هي شلته المفضلة وأين يذهبون ؟ وأين يسهرون ؟ ، كانت تخطط لشيء هي نفسها لا تعلم ماهيته ، ولكن أكملت خطتها .

\*\*\*\*\*



## الصدمة

جلس "تامر" وبصحبته "علاء" و"علا" و"هنا" كعادتهم في كل ليلة فتسائل "تامر" بحيرة :

- الواد "فادي" بقاله فترة متغير وحاله مش عاجبني

على ذكر اسم "فادي" انتبهت "علا" وكأنها ضربت بسكين تاملة في مشاعرها فقالت :

- براحته هو حر

وعلى غير عادتها شاركتهم "هنا" في الحوار قائلة :

- تلاقيه مشغول مع حبيبة القلب الجديدة

سكين أخرى تلتقتها "علا" من صديقة عمرها فردت كلمتها قائلة :

- حبيبة القلب .... مين دي ؟

ردت "هنا" بخبث :

- واحدة كده ، رايح جاي معاها بقاله بقاله فترة ، بس واحدة من بتوع الحواري ، معرفش عاجبه فيها إيه ؟ أنا مكنتش عايزة أقولك عشان متدايقيش
- رد "تامر" وهو ينظر إلى "علا" :
- آه والله ، إيه حكاية البنت دي اللي ظهرت في حياته فجأة يكونش بيحبها
- قالت "هنا" بعد ابتسامه ساخرة :
- بيحبها !!!... لا أكيد لا ، تلاقيها نمرة جديدة هياخد وقته معاها ويرميها زي غيرها
- لاحظت "علا" أن "علاء" يتابع الحديث في صمت فسألته :
- مالك ساكت ليه
- أخرج "علاء" علبة سجائر وأشعل واحدة وبعد أن نفخ دخانها قال :
- أقول إيه ؟
- تابعت "علا" استجوابها :
- تعرف مين هي البنت اللي ماشي معاها "فادي" ؟
- أوماً "علاء" بالرفض ولكن "علا" لم تصدقه فتابعت :
- معقولة دي ، انت متعرفش
- سحب "علاء" آخر نفس من سيجارته وألقاها في الأرض ودهسها بقدمه ثم قال :
- أنا مبعرفش حاجة ، لما تشوفوه ابقوا إسالوه هو ، هي ليلة نكد من أولها
- همَّ "علاء" بالانصراف فأوقفه "تامر" قائلاً :
- اهدا بس يا كتكتوت ، احنا بس خايفين عليه ، عايزين نعرف هو بس ناوي على إيه

- هو أنا ولي أمره ، أنا مالي أنا هو يعمل إيه ، وبعدين لما تشوفوه ابقوا  
إسألوه
- اهدا بس واقعد ، رن عليه كده شوفه فين
- أخرج "علاء" هاتفه وطلب رقم "فادي" وجاءه الرد سريعاً فرد قائلاً :
- خلاص احنا جوه ، تعالي بسرعة
- أغلق الهاتف في وسط تساؤلات من الجميع فقال :
- هو داخل علينا دلوقتي ، ابقوا اسألوه لما يجي
- وما هي إلا ثواني حتى ظهر شبح "فادي" من بعيد وهو يلوح لهم فاقترب  
منهم مُتحملاً :
- هاي
- رد الجميع التحية ما عدا "علاء" التي غادرت المكان بسرعة بعد أن ألقت نظرة  
غريبة على "فادي" - لم يفهم معناها طبعاً - فتسائل :
- مالها دي ؟
- لم يصله رد من أحدٍ منهم فكَّرَ السؤال :
- فيه إيه ، مالكم .... ساكتين ليه كده ، ومالها دي ضاربة بوز ليه كده
- قالت "هنا" :
- أصلها عرفت عن موضوع البنات اللي انت ماشي معاها اليومين دول
- طب وهي مالها ومال الموضوع ده
- وقف "تامر" واقترَب منه قائلاً :
- متستعبطش يا "فادي" انت عارف إنها بتحبك
- هو أنا وعدتها بحاجة وخليت بيها لا سمح الله ، ولا كنت عشمتها
- بحاجة ، احنا متفقين من الأول إننا صحاب وبس ، مليش دعوة إذا  
كانت هي حست بحاجة غير كده
- تدخلت "هنا" قائلة :

- طب سيبنا من "علا" دلوقتي ، مين البت الي بتمشي معاها دي  
ظهرت علامات الغضب على وجهه وقال :

- انتوا عرفتوا منين البنت دي

ضحكت "هنا" بصوت عالي وقالت :

- عرفنا منين !! انت نايم على ودانك يا عم ، ده مفيش حد في الجامعة

إلا وعارف حكايتك انت والمحروسة إياها ، انت تصوم تصوم وتفطر

على دي ، سيرتك على كل لسان ، الناس كلها بتقول إن البنت دي لفتك

كده ، ووقعتك في حبها ، بقى تسيب "علا" بنت الحسب والنسب

ومعاك بقالها فترة ومستحملك من زمان وتروح لواحدة زي دي ،

صحيح رجالة عنيكم فارغة

وغادرت "هنا" المكان قائلة :

- سلام يا بتاع "فرحة"

ضحك "فادي" فاقترّب منه "علاء" قائلاً :

- الموضوع كده خد أكبر من حقه ، كفاية البنت دي الي جابتلنا الكلام ،

انت حبيتها بجد ولا إيه

تدخل "تامر" في الحوار قائلاً :

- ما تفهموني يا جدعان فيه إيه ، من امنا واحنا بنخبي على بعض

قال "فادي" :

- متشغّلش بالك يا "تامر" ده موضوع تافه كده

وقف "تامر" قائلاً :

- خلاص أسيبكم عشان تكملوا حكايتكم مع بعض مدام مش عايزين

تحكولي

أمسك "علاء" به من يده وأجلسه قائلاً :

- يا عم اقعده ، بلاش شغل العيال الصغيرين ده ، احنا مش عايزين نقولك عشان الموضوع تافه بالنسباك ، وهتعملنا فيه صاحب القيم والمبادئ ، وانت عارف احنا مفيناش دماغ لكلامك ده

قال "تامر":

- طب وهي إيه حكايتها البنت دي

رد "علاء" قائلاً :

- اقعده بس وانت تفهم كل حاجة

ثم اتجه بالحديث إلى "فادي" قائلاً :

- بص يا "فيدو" ، البنت دي خدت أكثر من حقها كفاياها بقى كده ، ولو على البنات أنا هجيبك بنت النهارده ملهاش حل

وقف "فادي" غاضباً :

- لا .... أنا مينفعش أبقى عايز حاجة وماخدهاش ، وع العموم فاضل ع الحلو تكة ، البنت جاية معايا أوي ، وبقت معايا زي السكينة في الحلوة

قال "تامر" متسائلاً :

- مين البنت دي وإيه حكايتها ، وهي مهمة أوي كده

تجاهل "فادي" كلامه وقال :

- أنا عايزك يا واد "علاء" تفكرلي في حاجة كده أخليها تيجي الشقة بيها ، البت استوت على الآخر ، وأنا بصراحة جيبت آخري من الموضوع ده وزهقت

قال "علاء" بخبث بعد ضحكة مستفزة :

- إيه خايف تحبها بجد ولا إيه
- يا عم اتنيل أحب إيه وبتاع إيه ، دي واحدة كل همها حب ورومانسية وكلام فاضي من ده ، وأنا مجاريها بس لحد ما أعمل اللي في دماغى

رن هاتف "فادي" فأجاب بسرعة :

- حبيبة قلبي اللي واحشاني ..... أيوه بقى ... ما انتي بتعرفي تقولي  
كلام حلو امال كان مالك ... لا أنا في مشوار كده وهروح ... حاضر  
هكلمك لما أروح ... باي يا بيبي

أغلق "فادي" الهاتف في وسط نظرات الدهشة منهما فقال "علاء" :

- "فيدو" بنفسه بيقول بيبي ، انت كده تتحسد ، طب ما دام الحكاية  
فيها بيبي ، طب ما كده يبقى الطرح استوى وآن الأوان نقطفه  
- اهدى بس الموضوع ده عايز تكتيك من نوع تاني ، بس الموضوع  
يستوي في دماغي وهقولك هنعمل إيه  
- بقيت تخطط لوحديك يا صاحبي وده عيب

- لا والله .... يا واد ده أنا الأستاذ ... بس أنا كنت سايبكم تاكلوا عيش  
كان "تامر" يتابع حديثهما في صمت وتركيز عله يفهم شيئاً ولكن دون  
جدوى ، كان يشعر بأن الأمر خطير وأن صديقيه لا ينويان الخير وأن هناك  
ضحية لا يعلم من هي؟ أو أين مكانها؟ أو ما ينويان فعله فيها ، كان جالساً  
أمامهما يفكر ماذا يفعل؟ أو كيف سيصل إليها ، شعر بمسئولية تجاه هذه  
الفتاة لا يعلم لماذا؟ ولكنه قرر أن يحاول أن ينقذها منهما ربما يستطيع !  
وقف بغتة وقال :

- أنا همشي يا جماعة أنا زهقت

رد "علاء" :

- مش هتروح معنا الشقة  
- لا مش رايح ، مليش نفس  
وانطلق "تامر" تاركاً المكان وخلفه العديد من التساؤلات التي لا إجابة لها ،  
أخرج هاتفه وطلب رقم ما وتكلم :

- أيوه يا "علا" انتي فين ، عايز أقابلك ضروري .... لا مينفعش يتأجل  
لبكرة .... اتصرفي يا "علا" قولي أي حاجة قولي رايحة لصاحبك ...  
ماشي هستناكي في الكافية اللي قعدنا فيه المرة اللي فاتت ... أوك ...  
باي

ركب سيارته بسرعة وانطلق حيث المكان الذي اتفق عليه في مكالمته ، وصل  
المكان وجلس فيه وما هي إلا ربع ساعة حتى لحقت به "علا" وجلست أمامه  
وعلامات الدهشة تكسو وجهها ثم قالت :

- أديني جيت أهو يا سيدي ، مالك فيك إيه  
اعتدل في جلسته واستجمع كلماته ثم قال :

- أنا مش مرتاح لي بيحصل ده  
- إيه هو اللي بيحصل بالضبط  
- البنبت اللي بيتكلموا عليها دي ، انتي تعرفيها  
- لأ ... وأنا مالي بالموضوع ده من أساسه  
نظر إليها نظرة عدم تصديق فقالت مؤكدة :

- آه وأنا مالي .... هو حر يعمل اللي هو عايزه  
- هو حر لما يكون الموضوع يخصه ، لكن الموضوع يخص واحدة  
مظلومة ، أينعم احنا منعرفهاش ولا عمرنا شفناها بس لازم  
نساعدها ، "فادي" مش ناوي على نية كويسة للبت دي ، يا "علا" أنا  
الي صعبان عليا البنبت اللي بيتكلموا عليها دي ، شكلها غلبانة  
ومتستاهلش

ضحكت "علا" قائلة :

- مين اللي بيتكلم ده ، غريبة اوي ، انت مش معاهم في كل حاجة كانوا  
بيعملوها ، انت فاكر إني معرفش حاجة عن البلاوي اللي بتعملوها

- مع بعض ولا ناسي إني عارفة موضوع الشقة اللي بتروحوها دي ،  
 اللي كل يوم بتجيبوا فيها واحدة شمال زيكم
- قولتلك قبل كده ميت مرة أنا بطلت أروح الشقة دي ، ومش هروحها تاني ، أنا زهقت من كل اللي كنا فيه ، أنا اتغيرت يا "علا" والله اتغيرت ، عشان خاطرک انتي
  - قول كده بقى ، قولي انت جاييني على ملا وشي عشان تكلمني عن نفسك

نهضت "علا" تنوي الانصراف فأوقفها قائلاً :

- أبدأ والله أنا جايك بخصوص "فادي"
  - وأنا مالي ومال سي "فادي" بتاعك ده
- كانت النادلة قد اقتربت تسألها عما يطلبون ، ولكن النادلة عندما سمعت اسم "فادي" تسمرت في مكانها - لقد كانت "فرحة" - وقفت لا تدري ماذا تقول ؟ فلاحظ "تامر" وجودها فقال لها :
- نعم ؟؟ فيه حاجة ، انتي واقفة ليه كده
- استجمعت قواها ثم قالت :

- أنا أسفة يا فندم ، بس أنا كنت جاية أشوف طلباتكم إيه لقيتكم بتزعقوا فمعرفتش أتكم
  - هاتي اتنين لمون بسرعة
  - تحت أمرك يا فندم
- انصرفت "فرحة" بسرعة ، كانت تود أن تترك أذنيها معهما تسمعهما ماذا يقولان ؟ أحقاً ما سمعته أذنيها ، إنهما يتحدثان عن "فادي" هل ينويان له الشر ؟ وهل "فادي" الذي يقصدون هو "فادي" حبيبها أم شخص غيره ؟ كانت المسكينة لا تعلم أن الشر هو ما ينتويه "فادي" لها .

بسرعة البرق أحضرت الليمون وسارت بخطا بطيئة عليها تسمع شيئاً من حوراهاما اقتربت ثم اقتربت قليلاً واستطاعت فسمعت "تامر" يقول :

- يا "علا" أنا والله كلمتك عشان حسيت إنك زيي مش ممكن هتقبلي إن فيه حد مظلوم ممكن يتأذي من غير ذنب
- وأنا مالي أنا يا "تامر" ، أنا مليش دعوة ، أرجوك أنا فيا الي مكفيني ، ومش ناقصة وجع دماغ ، إيه المطلوب مني
- أنا عايزك تساعديني نوصل للبننت اللي بيعرفها "فادي" دي ونحذرها منه ، "فادي" دماغه فيها حاجة مش كويسة للبننت دي ، وأنا حاسس ان البننت غلبانة ومش حمل هزار "فادي" ولا استهتاره ، النهارده بعد ما مشيتوا كان بيقول لـ "علاء" إنه بيجاريها بس لحد ما ياخذ الي هو عايزه

انتبه الاثنان على صوت صينية ترتطم بالأرض ، لم تتمالك "فرحة" نفسها عندما سمعت ما يقال ، مَنْ يريد بها السوء ؟ ، كيف تصدق ذلك ، و"فادي" كل يوم كان يثبت لها أنه تغير للأفضل ، ليس هذا الشخص الذي يتحدثون عنه ، ولكنهم أصدقائه هم أدرى به منها ، والأكيد أن ما يقولونه هو الأصدق ، ولكن لماذا يفعل معها كل ذلك ؟ على الرغم من كل ما شعرت به في الأيام السابقة كان في داخلها شعور مخيف منه ، كانت دائماً تحدث نفسها أن الذي هي فيه ما هي إلا أحلام لكنها لم تكن تتوقع أنها ستنتهي بكوابيس .

تركت الموقف برمته وذهبت إلى حجرتها وقدهاها لا تحملها ، لم تستطع أن تمنع دموعها هذه المرة من النزول بحرارة ، كانت لا تعرف لماذا تبكي؟ هي لم تعرف الموضوع الذي كانوا يتحدثون عنه ، كانت تحاول أن تقنع نفسها أن الموضوع لا يخصها ، ربما مع فتاة أخرى غيرها ، ربما شخص آخر ، لكن لا ... هي سمعت بأذنيها الكلام ، من غيرها تصاحب "فادي" ؟ من غيرها تسير معه في الجامعة ؟ من غيرها تهاتفه طيلة اليوم حتى تخلد إلى سريرها ، حتى

تغط في نومها ؟ من غيرها التي سمحت لقلبها أن يحلم حلماً ليس من حقه ؟ من غيرها التي كانت تحلم بأن تحيا حياةً غير حياتها وظروفاً غير ظروفها ؟ من غيرها التي تخلت عن وصية والدها وسلّمت قلبها ليد شخص معروف باستهتاره وجبروته ؟ من غيرها التي سمحت له أن يقتحم حياتها ويُدنس طهارتها ؟ .

دخلت عليها "مايسة" لتفهم منها ما حدث ، فمسحت دموعها بسرعة وبمجرد أن رأتها ، ثم أَلقت بنفسها في حضنها وأخذت تبكي بطريقة هستيرية ، ربتت "مايسة" على كتفها بحب ، لا تدري ماذا تفعل ؟ ولكنها شعرت بأن "فرحة" بحاجة لمن يربت على كتفها ، بحاجة لحضن ينتشلها مما هي فيه ، كانت لا تعلم ما هي فيه ، ولكنها أنوثتها أخبرتها أنها بحاجة إليها ليس كزميلتها بل كأماً ، قالت لها :

- متخافيش يا "فرحة" أنا جمبك ومش هسيبك ، متخافيش يا حبيبتي ... متخافيش

ردت "فرحة" بكلمات لم تتبينها "مايسة" من شدة بكائها وشهقاتها المتوالية :

- أنا عايزة بابا ، عايزة بابا ... انت فين يا بابا ... فييين  
حضنتها "مايسة" مرة أخرى ، لأول مرة تشعر بحب أخوي نحوها ، شعرت أنها مسئولة منها ثم قالت لها بحب :

- اهدي يا ماما ، اهدي بس ، واحكيالي اللي حصل وأنا هساعدك وديني  
وما أعبد اللي ما جيببتك حقك لأخلق شعري  
زادت شهقات "فرحة" مرة أخرى وقالت :

- طلع خاين يا "مايسة" بيلعب بيا ، كان بيتسلى بعد ما طلعتني سابع  
سما ، نزل بيا سابع أرض ، هو أنا ليه بيحصل فيا كل ده ، اشمعنا  
أنا اخترني من بين كل البنات

ربتت "مايسة" على كتفها بقلة حيلة وقالت :

- تعالي لما ناخذ إذن من المدير وأروحك ، اقعدى هنا أنا هروح للمدير  
أستأذن منه وأرجعك بسرعة

انطلقت "مايسة" بعدما أجلستها على أقرب مقعد ، وذهبت إلى المدير وأقنعتة  
أن ما حدث سببه نوبة صداع ودوخة أصابت "فرحة" وهي في عملها أدت إلى  
سقوط ما تحمله ، أذن لهما المدير بالخروج .

أوصلتها "مايسة" منزلها وطرقت باب المنزل ففتحت لهما الوالدة وعندما  
رأت منظر ابنتها وفلذة كبدها صرخت بعلو صوتها ولكن "مايسة" طمأنتها  
وقصت لها نفس القصة التي قصتها على مديرها وابتلعنها الأم كما ابتلعها  
المدير سابقاً .

أدخلتها الحجرة وأرقدتها على سريرها ، وغطتها وطمأنت والدتها مرة أخرى  
واستأذنت في الخروج لأن الوقت قد تأخر ، شكرتها الأم على صنيعها وودعتها  
على باب الشقة ، وعادت إلى حجرة "فرحة" بقلب يملؤه الحزن والخضة ،  
وعندما وصلت إليها وجدتها تنظر إلى سقف الحجرة دون أن يتحرك لها  
ساكن فجلست بجوارها ومررت يدها بين خصلات شعرها وبعد ثواني من  
الصمت قالت :

- إيه اللي صابك با بنتي ، عين وصابتك ، خلاص انت مش هتروحي  
الشغل ده تاني ، من النهارده كفاية عليكي جامعتك ، وإذا كان على  
مصاريف البيت واخواتك أنا هتصرف

نظرت إليها "فرحة" ولم تتكلم وعمّ الصمت مرة أخرى ، ولم يقطعه إلا رنين  
هاتفها ، نظرت إلى الشاشة فوجدت المتصل "فادي" ارتعشت يدها لم تدري  
ماذا تفعل ؟ هل تجيبه وتواجهها بكل ما سمعته ؟ ولكن ماذا سيكون رده ؟  
هل سيكذب كل ما قيل ؟ هل تتركه يرن ولا ترد عليه ؟ كان الحل الأخير هو  
الأقرب لعقلها ، من اليوم قررت أن تقطع كل علاقاتها به ، حتى ولو كان

مظلوماً ، يكفي كل ما حدث ، هي تعرف من البداية أن هذا الحب ليس متكافئاً من جميع الجهات ، لا هي أهلاً له ولا هو أهلاً لها ، هو صاحب الحسب والنسب - ابن الأغنياء - الذي عاش حياته مرفهاً ، كيف له أن يتزوج من بنت البائعة ، من اليتيمة الفقيرة التي لا تملك من حطام الدنيا هي ووالدتها وأخوتها إلا قوت يومها ، وإن كان هو يريد لها ويحبها وفعلاً يريد أن يتزوجها هل أهله سيوافقونه على ذلك ؟ هل سيسمحون له أن يخيب رجاء الأسرة ، كانت النهاية محتومة ، كما في معظم الأفلام والمسلسلات ، لم تكن أن تتوقع يوماً أن تكون هي بطلة قصة من تلك القصص المشهورة والمكررة في الأفلام والمسلسلات ، ولكن النهاية لن تكون في صالحها في أي حال من الأحوال ، لن تكون سعيدة بالمرة ، الجرح الآن بسيط في أوله ، سيندمل بسرعة ، ما هي إلا أيام وستنسى ما حدث برمته ، أيام ولن سيكون لـ "فادي" وجوداً في حياتها حتى إن كانت تحبه ، لكن العقل يقول لا بد أن يموت هذا الحب ، والأجدر في القول أن هذا الحب كان لا ينبغي أن يوجد من الأساس ، ولكنها غلطة وستصلح قريباً .

علا صوت رنين الهاتف مرة أخرى فنظرت إلى الهاتف فوجدته هو مرة أخرى ، ضغطت على زر الإغلاق وأغلقت الهاتف وألقت به جانبا . كانت الأم تراقبها وتراقب تلك الأفكار التي تدور في رأسها ولكنها لا تفهم منها شيئاً ، فقط كانت تشعر أن ابنتها الغالية وأول فرحة قلبها في خطر ، خطر يدق على قلبها بشدة ، لم تعرف كيف تتصرف ولا ماذا تفعل أو ماذا تقول لها ؟ لا تعرف كيف تواسيها ؟ أو بالأحرى كيف تواسيها على أي شيء لا تعلم ماهيته ؟

تنهدت "فرحة" تنهيدة تحمل كل ما في الدنيا من ألم وحزن ، ليس سهلاً على أي فتاة أن تُجرح على يد أول من دق له قلبها ، ليس سهلاً عليها أن تنسى حباً انتشلها من دوامة أحزانها ، أن تنسى وقتاً مرَّ عليها جعلها تشعر بأن

حياتها ما زال فيها الكثير ، كيف من بين يوم وليلة ينقلب الحال ، ويكون الشخص الذي فتحت له قلبها وامتلته والذي كان أحب إليها من نفسها الآن أكثر شخص تكرهه ، لماذا قرر أن يلعب بها تلك اللعبة التي كسرت قلبها ، قلبها الذي لم يعرف الحب إلا عندما رأته عيناها ، قلبها الذي سمح له أن يدخله ويعبث به كيف يشاء ، ولكنها لا بد أن تكون أقوى من ذلك ، لا بد أن تنهض وتواجه حياتها وتطرد منها كل من يعرقلها ، لن تسامح نفسها على أنها تخلت عن وصية أبيها ، من الآن لن تفكر إلا في أخوتها التي أصبحت عائلهم الوحيد بعد وفاة والدها .

غطت في نوم عميق وكأنها تهرب من ذلك الواقع المر الأليم ، لم تشعر وهي تفتح عينها أن اليوم الثاني قد أوشك على الرحيل ، نظرت إلى ساعة الحائط فوجدتها الخامسة والنصف مساءً ، ظننت للوهلة الأولى أنها الخامسة والنصف صباحاً ولكن الفجعة عندما أخبرتها والدتها أن المغرب أوشك على الأذان ، نهضت مفزوعة من سريرها فأقعدتها والدتها قائلة :

- اقعدي يا بتي أنا مرضتتش أصحيكي ، قولت أسيبك تريحي شويا ، يعني هو الشغل هيطير ، وبعدين لو تسمعي كلامي متروحيش الشغل ده تاني ، انتي ضعفانة وعايزة اهتمام تنهدت "فرحة" وقالت :

- يا ماما بتقولي إيه بس ، طب واخواتي دول أعمل فيهم إيه ، انتي نسيتي وصية المرحوم بابا  
- لا منستش يا بتي منستش ، بس أنا مش عاجبني حالك بقالك فترة كده ، وحاسة إنك متغيرة ، وكل ده وانتي مش بتحكيلى حاجة ، وده غلط ، لو مكنيتش هتحكيلى أنا هتحكي لمن ؟ ، وبعدين أنا المفروض إنني أزعل منك عشان انتي بتخبي عليا  
نظرت إليها "فرحة" بدهشة فأكملت الأم :

- متستغربيش ، مش الست أم كلثوم قالت ، اللي يحب بيان ف عنيه ،  
وانتي بان عليكي وعرفت من أول يوم ، بس قولت أسيبك تجريبي  
عشان كنت واثقة فيكي وكنت واثقة إنك مش هتعملي حاجة غلط ،  
يعز عليا يا بتي أول مرة قلبك يحب يتكسر بالشكل ده  
كانت الأم تتكلم و"فرحة" لا تفعل شيئاً سوى أنها تندهش ، كيف عرفت  
والدتها بكل القصة بهذه الطريقة ؟ كيف كانت تشعر بها بهذا الطريقة  
الغريبة ؟ كيف شعرت بها ولماذا لم تتحدث معها في ذلك ؟ لاحظت الأم  
شرودها فقالت لها :

- بصي يا بتي ، مش صح إننا نجرب كل حاجة حاجة ، بيقولوا في  
الأمثال مين خاف سلم ، مش صح إننا ندخل بسدرنا في موضوع مش  
عارفين آخرته إيه ... مش كل واحد قالنا كلمة حلوة يبقى معجب بينا  
ونفتحه قلبنا  
قالت "فرحة" :

- يا ماما الموضوع كله ...  
قاطعته الام قائلة :

- مش عايزة أعرف الموضوع إيه ، كل اللي بطلبه منك ، إنك تاخدي  
بالك من نفسك ، ومتفتحتيش ده ....  
وأشارت بيدها على قلبها وقالت :

- متفتحيش ده غير لبي يستاهله ، وبالحلال ، الحب اللي بنشوفه في  
الأفلام والمسلسلات ده ، نتفرج عليه ماشي ، نعجب بيه ماشي ، لكن  
نعيشه لا ، أبوكي لو كان عايش وعرف اللي حصل ده كان هيزعل  
منك أوي .

دون أن تدري وجدت "فرحة" عينيها تجودا بدموع غزيرة مسحتها الأم بحب  
فقالت "فرحة" :

- حقك عليا يا ست الكل  
احتضنتها والدتها بشدة وقالت :

- أنا هقوم أحضرك الأكل

انصرفت الأم تاركة خلفها بركان نائر داخل الحجرة .

تذكرت هاتفها المغلق فبحثت عنه ووجدته أخيراً ثم فتحته لتجد وابلأ من الرسائل النصية والمكالمات الفائتة التي لم ترد عليها ، كان من بينها هذه المكالمات مكالمات منه ، تنهدت بحزن وقبل أن تنتهي من تنهيدتها وجدته يرن مجدداً ، فانتظرت حتى انتهت الرنة ووضعت رقمه في قائمة المحظورين حتى لا يزعجها مرة أخرى ، وبعد قليل جاءتها مكالمة أخرى من صديققتها "مايسة" فأجابت بسرعة :

- أيوه يا "مايسة"

- عاملة إيه دلوقتي

- أنا لسه صاحية معرفش ازاي

- ألف سلامة عليكي ، المهم ، البيه جه من شويا وسأل عليكي ، قولتله  
إنك مش جاية النهارده

انخل قلب "فرحة" عند سماعها تلك الكلمات فقالت لها :

- لو سأل عليا تاني قوليله مش موجودة ، قوليله كمان مش عايزة  
تشوفك أو تعرفك تاني

- مينفعش كده لازم تقابليه وتقوليله كده بنفسك ، وأنا هقعد معاكي  
أفهمك تقولي إيه بالظبط

- ماشي يا حبيبتي ، أنا مش عارفة أقولك إيه ، ربنا يخليكي ليا

- متقوليش كده يا عبيطة ، انتي زي أحتي ولازم أخاف عليكي ،  
هسيبك أنا عشان المدير بينده عليا

- ماشي يا قمر ، أشوفك على خير

نهضت "فرحة" من سريرها وتناولت بعض لقيمات فقط لترضي والدتها ولتُنهي نقاش حتماً هي ستخسره هذه المرة ، وجلست في حجرتها وفتحت أحد كتبها ولكنها فشلت ، فشلت في أن تذاكر ، فشلت في أن تنسى ، هي ليست جهاز بأزرار حتى تستطيع في يوم وليلة أن تتغير وتنسى ما حدث ، بدون أن تدري وجدت دموعها تنزل بغزارة ، قلبها يصرخ غير مصداقاً ما حدث ولكن عقلها يسترجع كلمات صديقيه عنها ، وأنه لا ينوي لها الخير ، قلبها يصرخ بأنه يحبه ، يريده ، يحتاجه ، هو شريانه الخامس الذي سيموت من دونه ، سيعيش بلا حياة ، لمن ينبض بعد ذلك إلا لم يكن لـ "فادي" أول بختها ، وأول من تحرك له وشعر به .

المدة التي عرّفته فيها كانت صغيرة ولكن استطاع بأفعاله أن يمتلك قلبها وحياتها وكل ما فيها ، استطاع أن يحتل قلبها وكأنه اشتراه بعقد ملكية ، ورفض أن يخرج من أملاكه التي امتلكها بوضع اليد . كانت تعلم أن نسيانه سيكون صعباً ولكنها مصرة أن تنساه حتى وإن كان ما سمعته في المطعم مجرد أوهام أو كلام ليس له أي أساس من الصحة ، ولكن ربما يكون صحيحاً ولو بنسبة واحد بالمائة فالأنسب الآن لها هو إنهاء هذا الحوار .

اتخذت القرار ولا رجعة فيه ، ستنسى "فادي" وكأنه لم يوجد من الأساس ، نعم ستنساه وتنسى تلك الأيام ، الأيام التي شعرت فيها بأنوثتها شعرت فيها بأنها من البشر ، ومن حقها أن تفرح ، ومن حق قلبها أن يدق ، ومن حقه أن يقول أنه يحب ، تلك الأيام التي كانت تعرف بأنها لن تدوم طويلاً ولكن لم تكن تعرف أنه ستنتهي بهذه السرعة وأنها ستنتهي بجرح ستحملة طيلة حياتها ، ولكنه سيندمل يوماً ما ، و لن يكون له أثر ، هكذا كانت تقول لنفسها .

تعمّدت أن تغيب فترة عن العمل بحجة أنها متعبة وتحتاج لقليل من الراحة ، كانت تتصل بـ "مايسة" لتخبرها آخر الأخبار ، فأخبرتها أنه يأتي يومياً يسأل عليها وأنها لم تقول له شيئاً غير أنها متعبة ولن تأتي هذه الأيام .

مكثت "فرحة" في منزلها أربعة أيام ، وبعدها قررت أنها ستذهب وتكمل حياتها ، ولكن كان أقصى ما تخافه المواجهة ، إذا واجهته ماذا ستقول له ؟ هل تواجهه بما سمعته أم ستخبره أن قصتهما انتهت وبدون أن تبدي أي أسباب ، استحسننت الرأي الأخير فهي في غنى عن حوارات ستدخلها إن واجهته ، فالحل الأمثل (قطمه أحسن من نحته ) كما يقولون في الأمثال .

في اليوم الخامس ذهبت إلى الجامعة وحمدت الله أن اليوم قد مرّ بسلام ولكن في آخره قابلتها صديقتها "أسماء" و"سها" وأخبرها أن "فادي" قد سألهما عليها وطلب منها عنوانها ولكنهما لم يعرفاه فحمدت الله أنهما لم يدلاه عليها وودعتهما إلى لقاء.

ذهبت إلى منزلها تضرب الأخماس في الأسداس خائفة ، فهو لن يتركها في حالها ولا ينوي ذلك ، إصراره وسؤاله عليها المتكرر ، كل ذلك يشوش على تفكيرها ، كانت تسأل عقلها لماذا لم يمل "فادي" من السؤال عليها ، لو كان يتسلى كما سمعت لكان أولى به أن يمل ، أن يفقد الأمل بها ، ولكن الموضوع قد انتهى بالنسبة لها ، حتى ولو أنه حقاً يريد لها أو يحبها ، ولكن الأصول تقول أن يدخل المنزل من بابه ، لو حقاً يريد لها يتقدم لخطبتها رسمياً وانتهى .

حان وقت ذهابها المطعم كانت تشعر بأنها ستقابله هناك ، ولكنها تشجعت وعزمت على تنفيذ ما انتوته ، دخلت المطعم متلفتة ، قابلتها "مايسة" بعبارات الترحيب والحمد لله على السلامة وأيضا زميلاتها ومديرتها واستبدلت ملابسها وبدأت في عملها وما هي إلا وقت يسير حتى وجدته يدخل من باب

المطعم ، تعمدت أن تتجاهله ودخلت غرفة المطبخ ، وجلس هو على أحد الأماكن القريبة من المطبخ .

دخلت "فرحة" المطبخ وهي تتصبب عرقاً فسألتها "مايسة"

- مالك يا بت في إيه ، تعبتي تاني ولا إيه

قالت وهي ترتعش :

- بره يا "مايسة" ، "فادي" بره

- طب وفيها إيه ، خليكي انتي أنا هطلعله

وخرجت "مايسة" لتوها لتقابل "فادي" تحدثت معه بصفة رسمية وقالت :

- أوامر يا فندم

نظر إليها بطرف عينه ثم قال :

- ابعتيلى "فرحة"

- أوامر يا فندم ، أنا و"فرحة" واحد ، هي مش فاضية دلوقتي ، أقدر

أخدم حضرتك ف إيه

احمّر وجهه وهو يقول :

- بقولك ابعتيلى "فرحة" بسرعة

انخلعت "مايسة" لطريقته فقالت :

- حاضر ، حاضر

كانت "فرحة" تراقب الموضوع من بعيد ، لتعرف ما سيجري وعندما عادت

إليها "مايسة" سألتها باهتمام :

- قاللك إيه

- عايز يتكلم معاكي

انفض قلبها بشدة ثم قالت :

- ماشي هتكلم معاه ، ويا أنا يا هو

همّت بالانصراف فأوقفها "مايسة" قائلة :

- اهدي ، كل حاجة بالعقل ، بلاش تهور  
أومأت "فرحة" ثم قالت :

- متقلقيش

ذهبت إليه في خطأ متثاقلة ، ووقفت أمامه ، وسألته بهدوء :

- أوامر يا فندم

نظر إليها مندهشاً ثم قال :

- مالك يا "فرحة" إيه اللي حصل لده كله

تجاهلت كلاماته وقربت إليه (المنيو) وقالت :

- حضرتك مقولتش برضه عايز إيه

نظر إليها باستعطاف مصطنع ثم قال :

- عايزك انتي يا فرحة ، احنا كنا كويسن مع بعض ، إيه اللي جد

أوقفت دمعة نزلت بيدها وقالت :

- اللي عايزني يبقى بالحلال ، ورسمي وقدام الناس كلها

ظهرت على وجهه علامات الغضب وقال :

- لا بقى انتي اتجننتي ، فيه إيه ؟

- أرجوك يا أستاذ "فادي" ده مكان شغل ممكن متعليش صوتك

- انتي بتعملي ليه كده

لم ترد "فرحة" فقد كانت لا تدري ماذا تقول ؟ ولكنها تشجعت وقالت :

- أنا قولت كل اللي عندي ، أرجوك يا أستاذ "فادي" كفاية لحد هنا ،

مفيش حل تاني ، أنا لا سمح الله مش بجبرك على حاجة ، بس لو زي

ما بتقول عايزني فعلا يبقى زي ما قولت ، وأرجوك معنديش كلام

تاني أقوله ، أرجوك سييني في حالي

أخذت (المنيو) من أمامه وقالت :

- واضح يا فندم إن الي طلبته مش عندنا ، أنصحك تشوفك مكان تاني هتلاقيه فيه كل الي انت عايزه وتركته بعدما أشعلت النار في صدره ، ليس حباً بل غلاً ، شعر بأنّ تعبهُ الأيام السابقة ذهب هباءً ، بعدما كان قاب قوسين أو أكثر من تنفيذ خطته .
- ترك المطعم وهو يغلي ، اتصل بـ "علاء" أن يلحق به بسرعة فنفذ الأمر وما هي إلا بضع دقائق حتى وصل إليه "علاء" متسائلاً :
- إيه يا يسطا ، جايبني على ملا وشي كده
- قال "فادي" وهو يقرض أظافره :
- بنت الكلب ضحكت عليا
- ضحك "علاء" بشدة ثم لاحظ غضب صديقه فقال :
- ازاي ، احكي لي إيه الي حصل
- فهمتني إنها بتحبني ، وبعدها ما فكرت إني وقعت في حبها ودبت في دباذبيها ، قال إيه بتقولي لو عايزني يبقى بالحلال ، جيت أَلعب عليها لعبت عليا بنت الأبالسة
- لم يستطع "علاء" هذه المرة يكتم ضحكته ، ثم قال :
- وناوي تعمل إيه يا شبح
- مدام مش راضية تيجي بكيفها يبقى تيجي غصب عنها
- اعتدل "علاء" في جلسته لخطورة ما سمعه فقال :
- لا اهدى يا معلم ، وواحدة واحدة كده فهمني ناوي على إيه
- تنهد "فادي" ثم قال :
- هخطفها
- ضحك "علاء" مرة أخرى قائلاً :
- لا حلوة ... حلوة النكتة دي
- أنا بتكلم بجد ، أنا هخطفها وأخذ منها الي أنا عايزه

- اهدى يا صاحبي ، احنا من امنا بنعمل حاجة زي كده ، وبعدين كده  
هتوسع مننا ، وممكن يبقى فيها سين وجيم
- انت ناسي أنا ابن مين ، متقلقش ، ثم أنا هرتبها ترتيب ميخرش الميه  
، أهم حاجة انت معايا
- معاك طبعا يسطا انت عارف ، بس كل حاجة بتمناها  
نظر إليه باستغراب فأكمل "علاء" مصححاً :
- لا متفهمش غلط ، أنا عايز أدوق ولا انت هتاكل حتة الجاتوه دي  
لوحدك
- ضحك "فادي" بهيسترية من طريقة كلامه ثم قال :
- وماله تدوق يا صاحبي ، وأي حد نفسه يدوق ندوقه ، "تامر" لو  
فاضي وعايز يدوق يجي ، عم "أبو أشرف" البواب لو عايز يجيب  
"أشرف" ويشاركوا وماله ، "محسن" لو عايز يجي يجي
- لا يا عم "محسن" دايمًا بيجي متأخر
- ضحك الاثنان بطريقة هيسترية

\*\*\*\*\*



٢٣

## مؤامرة قذرة

شعرت "فرحة" ببعض الراحة خصوصاً بعد هذا الحوار التي دار بينها وبينه ، أنهت يومها بنصف عقل ، حمدت الله أن انتهى يومها وودعت "مايسة" وانصرفت عائدة إلى منزلها

في نفس الطريق وجدت سيارة تسير خلفها ببطء ، أسرع في خطاها ولكن السيارة سبقتها ووقفت أمامها وخرج منها شابان ونظرا إليها فقال أحدهما :

- إيه فاكرانا ولا نسييتينا

تذكرت أخيراً أنهما هما نفس الشابان اللذان اعترضا طريقها قبل ذلك وأنقذها منهما "فادي" لكن لم تكن تتوقع أن يظهر مرة أخرى ، لم تنطق بشيء فاقترب منها أحدهم قائلاً :

- طب هوريكي حاجة تفكرك بينا

فتح باب السيارة الخلفي فخرج منه "فادي" وهو يبتسم ، تنقلت ببصرها بينهما ، لم تكن تصدق ما تراه ، أيعقل هذا ؟ ، "فادي" على صلة بهاذين

الشابين ، وهو الذي استأجرهما في المرة الأولى لكي يعترضاً طريقها ، يا لسخرية القدر ، الآن تَكشَّفَت كل الحقائق ووضح كل شيء ، كل ما حدث لها خطة محكمة وضعها "فادي" ونفذها واستطاع أن يوقعها في شباكه ولكن الحديث الذي دار بين أصدقائه هو الذي كشف لها خطته الخبيثة قالت له :

- أنا دلوقتي فهمت كل حاجة

هز رأسه نافياً ثم قال :

- لألسه مش فاهمة

- طب ليه ؟؟؟ واشمعنا أنا ؟؟ أنا عملتلك إيه عشان تعمل فيا كده ؟

- عشان أنا عايز كده ، ولما أعوز حاجة مينفعش ما أخدهاش ، مينفعش ما تحصلش ، "فادي عزيز" لما يقول عايز مينفعش حاجة في الدنيا كلها تقف قصاده

- أنا مش مصدقة اللي بسمعه ، انت جنس ملتك إيه ، دخلت حياتي ولخبطتها ، كل ده عشان بتلعب لعبة حقيرة زيك ، انت أكيد مش بني آدم

- بس إيه رأيك فيها ، لعبة حلوة صح ؟؟

- لعبة قذرة من إنسان قذر جبان

ترك السيارة وهو يضحك بصوت عالي واقترب منها قائلاً :

- تعرفي إني في حياتي محدش شتمني غيرك ، بس أنا استحملت ، أصلهم بيقولوا لأجل الورد يتسقي العليق ولا إيه يا قمر

وضع يده على خدها فأبعدتها بسرعة وهي ترجع خطوتين للخلف ، وعلامات الرعب تكسو وجهها ثم قالت :

- انت عايز مني إيه

بحركة من فمه تدل على النفي وبابتسامة خبيثة قال لها :

- احص عليكي ، بيقولوا عليكي ذكوة ،شغلي دماغك شويا ، أنا عايزك انتي ، عايزك انتي وبس
- أخرج لسانه يلحق به شفثيه في شهوة بطريقة أخافتها فتمالكت وقالت :
- ابعد عني ، حرام عليك ، مش كفاية الي حصللي من تحت راسك ضحك مرة أخرى قائلاً :
- لأ... مش كفاية ... أنا بس الي أقول كفاية ، أنا لسه مشبعتش منك ، اللعبة لسه مخلصتش ، أنا الي شغلتها وأنا بس الي أقول امتا تخلص ، ولا إيه ... تعالي معايا وهديك الي انتي عايزاه من جنيه لألف ، خلي بالك أنا أحلى واحدة عندي مش بدفعلها غير ورقة بميتين ، بس انتي تستاهلي برضه ، عشان انتي تعبتيني شويا
- اقترب منها وحاول أن يمسك يدها فصرخت :
- أبعد عني وإلا هَصَوَّتْ وألم عليك الناس كلها
- هتيجي بالذوق ولا تيجي بالعافية ، خلينا حلوين كده ومتتعبناش عشان لسه ليلتنا طويلة
- وفجأة ظهر صوت من الخلف يقول :
- فيه إيه يا واد انت وهو ياد ... ليه الوقفة دي
- نظرت للخلف فوجدت شاباً يحمل مسدساً بيده ، لم تتبين ملامحه من شدة الظلام فهرعت إليه قائلة :
- إالحقني يا بيه ، عايزين يخطفوني
- أمسك بها الشاب وجعلها خلف ظهره واتجه إليهم قائلاً :
- مش عيب عليكم يا شباب الي انتوا بتعملوه ده
- اتجه إليه "فادي" مهدداً :
- ملكش دعوة انت يا بابا ، عشان منزعلكش
- تزعل مين يا ض ، ده أنا أدفنك هنا

شعرت "فرحة" ببعض الطمأنينة بوجود هذا الشاب ، على الرغم من صوته الذي بدا مألوفاً لها ولكن لم تتذكر أين سمعت ذلك الصوت الذي تكلم قائلاً :

- أي حد هيقرب منها هيبقى آخر يوم في عمره وأنا قولت أهو ، وقد أعذر من أنذر

- طب ما تسيبها وتاخذ عرقها

- أخذ عرقها ، انتوا ازاي تقولوا كده

- طب هقولك حاجة حلوة ، تعالي معانا وخذ نصيبك

- هتروحوا فين

- الشقة بتاعتنا ، شقة مجهزة من كله ، حشيش تلاقى ، خمرة تلاقى ، ستات هناخد المزة دي معانا

- انتوا ازاي بتتكلمو كده ، فين النخوة فين الرجولة ، فين الشقة دي يسطا

احتضنه "فادي" قائلاً :

- أيوه كده يا لول ، اتأخرت ليه كده يسطا

رد عليه بغمزة :

- عبال ما وضبت الشقة يا كبير

كانت تمثيلية أخرى من "علاء" و"فادي" على "فرحة" أخرجت لسانها عن النطق ، خلعت حذائها استعداداً للجري ولكن باغتها "فادي" بأن أمسكها من شعرها وأخرج من جيبه زجاجة صغيرة ورش بها على أنفها فغابت "فرحة" عن الوعي فحملها الأربعة وأدخلها السيارة وانطلقت بها إلى الشقة .

لم تعرف كم من الوقت مرَّ عليها حين فتحت عينها ؟ وما هي إلا ثواني حتى انتبه عقلها وبدأت عينها تدور في المكان حتى تستوعب أين هي ، نظرت يمينها ويسارها ، تذكرت ما حدث لها قبل أن تغيب عن الوعي ، نظرت إلى جسدها

فوجدت نفسها عارية تمام تحت غطاء خفيف فصرخت ألماً لا تعرف ماذا حدث لها ؟ وعلي صوت صريخها دخل " فادي " قائلاً :

- إيه ست البنات ، كل ده نوم ، احنا خللنا بره ، وبعدين الرجالة بره  
مَتَشَوِّقِينَ

جلس بجانبها فغطت نفسها بالملاءة وهي ترتعش رعباً وفزعاً ثم اقترب منها  
أكثر قائلاً :

- خايفة من إيه ، احنا لسه عملنا حاجة ، أنا بصراحة كنت حايش  
الرجالة عنك بالعافية ، بصراحة قولت أسيبك لما تصحي الأول عشان  
تشهدي معانا اللحظة التاريخية دي ، لحظة عبور خط البلوبيف ...  
بلوبيف إيه بس ، والله مش فاكر اسمه إيه ، بس فيه عبور هيحصل  
النهارده

كانت كل كلمة من كلماته تزيدها رعباً وفزعاً وانكماشاً في نفسها كانت تنظر  
إلى السماء ، تدعو ربها ولكن صوتها لا يجرؤ أن يخرج ، بدأت ترتعش أكثر  
وكأنها لامست سلك عاري من الكهرباء فاقترب منها أكثر ثم قال لها :

- اهدي بس يا كتكوتة ، أنا سمعت حد بيقول ، لو معرفتش تقاوم  
يبقى تستمتع ، وانتي كده كده هتتاكلي النهارده ، فاستمتعي  
أحسنك ، ها يا أمورة جاهزة نبدأ المباراة ، ولا محتاجة تسخني الأول  
، لو عايزة تسخني خدي وقتك احنا مش ناقصين يجيك شد عضل  
في نص الماتش ، واحنا محتاجينك احنا داخلين على كاس عالم ، ها  
جاهزة

لم ترد بأي شيء غير أن رعشتها زادت فأكمل :

- تمام ... السكوت علامة الرضا يبقى هنبداً

ثم وضع اثنان من أصابعه في فمه وأطلق صفارة ، أتى على أثرها باقي الشباب ودخلوا وهما يصفقون ويضحكون وتبدوا عليهما آثار السكر وهو يغنونون :

- ما تزوقيني يا ماما قوام يا ماما يا ماما ، ده عريسي هياخذني  
بالسلامة يا ماما

ثم توجه أحدهم إلى جهاز التسجيل ووضع أحد الاقراص المرنة فيه وعلا صوت المزيكا ثم بدأ الجميع يرقص عليها فقال "علاء" :

- إيه يا كتكوتة مش هتشاركينا الرقصة دي

رد عليه "فادي" بسخرية :

- حتى عشان تبقى رقصة الوداع

ضحك الجميع وعلا صوت المغني : (وبحب الناس الرايقة اللي بتضحك على طول ، أما العالم المدايقة أنا لأأ مليش في دول )

يقولون من حسن الصنيع ألا تُري الحيوان الذبيح السكين التي سنذبحه بها حتى لا نزعجه ، وهؤلاء الحيوانات كانوا يرقصون ويهللون فوق ذبيحتهم وضحيتهم ، كانوا يدورون حولها ويقربون منها ، منهم من يملسها بيده ثم يضع يده في فمه بشهوة ومنهم من يتمايل حتى يقبلها في يدها وكانت مع كل شخص يقرب منها تنتفض رعباً ، عقلها مُغَيَّب تماماً لا تدري أين هو ، لا كلام يوصف شعورها الآن ، هي بالضبط كالمحكوم عليه بالإعدام ، وقد أتوا له بشيخ حتى يلقنه الشهادة ، أي شهادة هذه سيقدر أن ينطقها من يعلم أنه مجرد دقائق وستخرج روحه ، كذلك كانت "فرحة" تنتظر حتفها ، كانت تتمنى أن تخرج روحها قبل أن ترى بنفسها أن جسدها العاري سيصير ملك لأربعة من الحيوانات البشرية .

انتهت الأغنية وانتهوا من رقصهم فجلسوا في دائرة حولها ، كانت شبه غائبة عن الوعي فقط تسمع أحدهم يقول :

- أنا عايز حطة من السدر  
وأخر يقول :

- لا أنا بحب الورك أوي

وتسمع قهقهات عالية شريرة ، فجأة وجدت نفسها وكأنها تُقَطَّع بسكين تالمة ، لم تشعر بشيء غير أن أحدهم يقبلها في كل أنحاء جسدها والآخر يمسك بها من قدمها والآخر يقبلها في فمها ، غابت عن الوعي ، غابت عن الإدراك ، ما فائدته الإدراك في تلك اللحظات ، ماذا تريد أن تدرك ، هل تريد أن تدرك أنها الآن تفقد عذريتها على يد هؤلاء الشباب ، تدرك أن حظها أوقعها في أيديهم ، أم تدرك أن الشخص الوحيد الذي امتلك قلبها هو أول من يفعل هذا ويستلذ وهو يتقاسم جسدها مع غيره ، هل تدرك أنها ربما لن تخرج من هذا المكان أبداً ، وإن خرجت أين ستذهب ، هل ستذهب إلى والدتها ، وإن حدث ماذا ستقول لها ؟ ماذا ستقول لكل من يعرفها ، من سيصدقها ؟ من سيتعاطف معها ؟ كل هذه الأفكار تدور في رأسها ، كانت فكرة المقاومة مستبعدة تماماً ، تقاوم من وتقاوم كيف ؟

استسلمت تماماً لم يعد بها أي نفس لتقاوم ، تناوب الأربعة إغتصابها حتى قضوا وطهرهم منها ، وتركوها تلملم ما تبقى من أشلائها ، بحثت عن ثيابها وهي تقوم وتقع ، تتمالك وتتحامل ثم تقع حتى ارتدت ثيابها واتجهت نحو الباب وعندما رأوها ضحكوا جميعاً بانتصار ، وذهب إليها "فادي" قائلاً :

- صباحية مباركة يا عروسة

وأخرج من جيبه رزمة من النقود قائلاً :

- أنا قولتلك تعالي معايا وهديكي ألف جنيه ، بس احنا كنا أربعة عشان

كده دول أربع تلاف جنيه ، شوفتي عدل أكثر من كده

ووضع لها النقود فوق رأسها كأنه يرمي بها فوق رقاصة ، حاولت أن تبحث في مآقيها عن دمعة تذرفها فلم تجد ، اتجهت نحو الباب فأوقفها قائلاً :

- استني يا ماما

نظرت إليه باستعطاف تستجدي منه بعض الرحمة ، يكفي كل ما فعله .  
أخرج نفس الزجاجاة ورشها مرة أخرى وحملها إلى السيارة وكذلك الآخرين  
معه وتركوها في المكان الذي اختطفوها منه .

\*\*\*\*\*



٢٤

بلاغ  
رسمي

في منزل "فرحة" كانت الأم مع ابنتيها يجوبون الشقة ذهاباً وإياباً من الشباك إلى البلكونة ينتظرون قدوم الغائبة التي لم تعد أن تتأخر إلى مثل هذه الساعة المتأخرة من الليل ، هاتفها مغلق ، وصديقتها "مايسة" قد أخبرتهم أن "فرحة" غادرت العمل في ميعادها .

كل هذه الشواهد كفيلا أن تخبر الجميع أن هناك أمراً ما حدث ليس بالجميل ، كانت الأم تضرب الأخماس في الأسداس ، لا تدري ماذا تفعل ؟ هل تُبلغ الشرطة ؟ هل تنزل لتبحث عنها في الأقسام والمستشفيات ؟ لا تدري ماذا تفعل ؟ الدقائق تمر كالسنين وثلاثتهم في نارهم المتوهجة ، وبعد الساعة الرابعة فجراً ، سمعوا خبطاً بالباب أسرعو إليه ، وفتحوا الباب فوجدوا "فرحة" بالخارج وبمجرد أن رأوها سقطت مغشياً عليها .

صرخت الأم من فجيعتها وحملت الأختان أختها إلى حجرتها .

جلسوا على رأسها ، حاولوا إفاقتها بشتى الطرق ولكن فشلوا ، رشوا على وجهها الماء ، وضعوا على أنفها العطر ، حتى أنهم أتوا ببصلة وقربوها من أنفها ، كل الطرق بلا فائدة ، فلم يجدوا حلاً إلا أن يطلبوا سيارة الإسعاف وما هي إلا دقائق حتى وصلت الإسعاف وحمل رجالها "فرحة" على نقالة ، ونقلوها بسرعة إلى المستشفى ، وعلى صوت سيارة الإسعاف استيقظ "ربيع" جارههم وصديق والدهم المقرب وذهب معهم إلى المستشفى .

ظل الجميع أمام غرفة العمليات يتربعون خروج أي أحد من الداخل يطمئنهم عليها ، ولكن طال انتظارهم ، مرت الساعة والاثان والثلاثة ولكن بلا جدوى ، وبعد أن أفرغوا ما في جعبتهم من الصبر فُتح الباب أخيراً ، وخرج منها طبيب يبدو عليه الإنهاك فهرع إليه الجميع سائلين فقال قبل أن يسأل أحدهم :

- الحمد لله كان فيه نزيف وقدرنا نوقفه ، بس فيه سؤال مهم

نظر الجميع إلى بعضهم ولم يرد أحد فقال الطبيب :

- هي الحالة كانت ليلة دُخلتها امبارح

نظر الجميع إلى بعضهم مرة أخرى ، ولم يجيب أحد ففتَّهَم الطبيب الأمر قائلاً :

- آه كده فهمت ، الحالة اللي جوه يا جماعة تعرضت لحالة اغتصاب

حيوانية ، أدت إلى تهتك في المهبل والفرج ، وجدار الرحم ، أنا آسف

مضطر أبلغ الشرطة .

لم تكن الام تصدق ما سمعته ، كل ما فعلته هي أن وضعت يدها على رأسها

وجلست على الارض ، وهي تصرخ قائلة :

- كان مستخبيلنا فين ده يا ربي ، دي هي دي البنت اللي حيلتي ، اللهم

لا اعتراض ، اللهم لا اعتراض

اقترب "ربيع" منها قائلاً :



- أولاً الطريقة الوحشية اللي تم بيها الاعتداء على "فرحة" أدت إلى تهتك في جدار الرحم مما خلانا نضطر نشيله خالص ، يعني "فرحة" مش هينفع تخلف عيال بعد كده
- صرخت الأم :
- يا كبد أمك يا بتي
- تجاهل الطبيب حالة الأم وأكمل :
- الموضوع بلا شك هياثر نفسيا عليها ، من كل الجهات
- تسائل "ربيع" قائلاً :
- ازاي يا دكتور
- يعني ممكن نلاقيها فاقدة النطق مثلا ، مش عايز أسبق الأحداث ، بس الموضوع مش مطمئن بالمرّة وده ثانياً ، ثالثاً وده الأهم أنا هبلغ الشرطة عشان نجيب حقها بس لازم انتوا تقنعوها إنها تتكلم ، تقول مين الحيوان اللي عمل فيها كده ، أكيد هي تعرفه
- قالت الأم بحزن شديد :
- يا ولدي أبوس أيدك احنا مش حمل الفضيحة والعار
- العار والفضيحة بجد إننا نسكت على حيوان زي ده ، ومياخدش جزاؤه ، العار والفضيحة لما احنا صحاب الحق نسكت ونسيب الاشكال دي من غير عقاب ، صدقوني لو اتكلمتوا اللي عمل كده ممكن يتعدم ويبقى عبرة ومثل لكل واحد مفكر إن بنات الناس لعبة
- اللي تشوفوا صح يا ولدي اعمله
- وهو كذلك ، أنا هبلغ بالحالة بس يارب "فرحة" تفوق عشان تعرف تتكلم وتقول مين اللي عمل فيها كده ، أهم حاجة إنكم تقنعوها

انصرفت الأم و"ربيع" من عند الطبيب وعادوا إلى حيث تجلس الأختان أمام حجرة "فرحة" وعندما رأوا والدتهما هرعا إليها يسألونها عن حال أختهم فطمأنتهن كاذبة .

\*\*\*\*\*

مرَّ يومين و"فرحة" لا حراك ولا جديد ، نفسٌ يدخل وآخر يخرج باستخدام الأجهزة وقلب يدق بمساعدة الأجهزة ، ووالدتها لم تفارقها لحظة ولم يغمض لها جفن وهي تدعو وتصلي وتبتهل حتى يُنجي الله ابنتها وفلذة كبدها بكل ما عرفت من أدعية ومن آيات قرآنية ومن ابتهالات وكأن باب السماء قد كان مفتوحاً في وقتها فتحركت يد "فرحة" وفتحت عينها لتجد والدتها على سجادتها وهي ساجدة وصوتها المختلط بدموعها يعلو ويهز أركان الحجرة بالدعاء والابتهال ، قالت "فرحة" بصوت واهن خرج منها بالكاد :

- ماما

اعتدلت الأم من جلستها لا تدري أهو حقاً صوت ابنتها أم أنها تنهياً ذلك ولكن سرعان ما امتزجت دموعها بفرحتها عندما وجدت "فرحة" تنظر إليها باحتياج فهرعت الأم إلى ابنتها وانهالت عليها بوابل من القبلات حتى غسلت وجه ابنتها بدموعها ثم قالت لها :

- حمد الله على سلامتك يا بنتي

حاولت "فرحة" أن تفتح فمها لترد ولكنها تذكرت ما حدث لها فأشاحت وجهها خجلاً من والدتها ، لم تستطع أن تنظر في عينيها ، فهتمت الأم ما بها فقالت :

- مش ذنبك يا بنتي ، عارفة إنه مش ذنبك ، ده ذنبي أنا وغلطتي أنا

نظرت "فرحة" إلى والدتها وعينيها تنكر ما سمعته أذناها فأردفت الأم :

- أيوه غلطي لما وافقتك على إنك تشتغلي في وقت متأخر زي ده ، غلطي أنا لما وافقتك على إنك تهلكي نفسك في الجامعة والشغل

وخليتك تتعاملي من ناس زي دول ، الغلط عندي أنا ، سامحيني يا بنتي أنا اللي عملت فيكي كده بشكل مش مباشر ، يا ريتني كنت مت ولا تصيبك حاجة زي دي

كانت مع كل كلمة تنزل دمة من عين الاثنين تصدقها ، فيض من المشاعر ، خليط من مشاعر الحب والأسف والاعتذار والشوق والحنين ، قالت "فرحة" بعد أن قبّلت يد والدتها :

- متقوليش كده يا ست الكل ، ألف بعد الشر عليكي

ودخل بعدها الطبيب بعدما سمع صوت الانذار وأمسك بيدها ونظر في ساعته يحسب نبضها وهو يقول :

- ألف حمد لله ع السلامة يا آنسة "فرحة" ، أنا لو منك أعمل للحجة دي تمثال ، أنا عمري ما شفت حد بيحب حد أوي كده .

ردت الأم بامتنان :

- دي حنة من قلبي يا دكتور

تحرك الطبيب نحو بعض الأجهزة ليوقفها وهو يقول :

- أنا هكلم "سيف" باشا عشان يجي ياخذ منك كلمتين

ردت "فرحة" بصوت واهن :

- "سيف" باشا مين ؟

- ده الضابط الي ماسك القضية بتاعتك ، أنا بلغت بحالتك

انخلع قلب "فرحة" وقالت :

- بلغت بحالتي ، يعني إيه ؟

- يعني فيه محضر رسمي اتعمل بالحالة ، مكانش ينفع نسكت عن

حاجة زي دي ، وأنا اللي قولت إنك انتي متعلمة وهتتفهمني الموضوع

ده أكثر من الحجة ، إذا كانت الحجة وافقت

ثم اقترب الطبيب منها قائلاً :

- أنسة "فرحة" لو كل واحد ليه حق سكت عليه ، هنبقى عايشين في غابة ، البلد دي فيها قانون ولازم يمشي ع الكل ، لازم تقاومي لآخر نفس فيكي ، لازم الكلب الي عمل فيكي كده ياخذ جزائه  
لم تتمالك "فرحة" ولم تستطع أن تمنع دموعها ثم صرخت :

- أنه كلب فيهم يا دكتور ، عارف إحساس لما تبقى فريسة لأربع حيوانات متوحشة وكل واحد فيهم بينهش في حته منك ، إنك تبقى مش عارف تصرخ لأن محدش هيسمعك ، لما يكون الي قدامك مستمتع بصوت أنينك ووجعك  
تفهم الطبيب الأمر ثم قال :

- عشان كده لازم تمشي في الاجراءت القانونية ولازم ياخدوا جزاءهم بالقانون  
- تفكر القانون هيعرف يجيب حقي  
- طبعا وليه لأ ، القانون لازم ياخذ مجراه  
ابتسمت "فرحة" ابتسامة ساخرة ثم قالت :

- حضرتك عارف إن القانون مش هيجيب حاجة ، القانون مجراه فوق رقابنا احنا ، عمره ما هيقف جنبنا احنا ، هيقف جمبهم هما ، عشان هما الأقوى بقلوسهم ونفوذهم  
- أنا مش مصدق الي بسمعه منك ده ، ده كان زمان ، دلوقتي الوضع اتغير

- ولا اتغير ولا حاجة يا دكتور ، متهيا لك ، بلدنا دي طول عمرها هتفضل كده ومش هتتغير  
وقف الطبيب واستأذن بالانصراف قائلاً :

- ع العموم أنا بلّغت إنك فوقتي وهما في الطريق عشان يسمعوا أقوالك ، بس ابقني فكري في الكلام الي قولتلك عليه ، فكري عشان خاطر

أمك واخواتك ، فكري عشان خاطر كل واحدة معرضة إنها تبقى مكانك ، لو كل واحد ليه حق سكت عليه هندي للحيوانات دي فرصة إنها تفرد عضلاتها أكثر ، أرجوكي يا آنسة "فرحة" فكري تاني في الموضوع

ثم انصرف تاركاً لها أفكارها المشوّشة وحيرتها ، كانت لا تعلم ماذا تفعل؟ هل تخبر الضابط الذي سيسألها عن اسمه ؟ ، هل سيصدقونها؟ وإن صدقوها هل سيثبت الاتهام عليه ؟ ، أم أن والده سيخرجه منها بنفوذه وأمواله ، كان عقلها مشلولاً عن التفكير فانتشلتها والدتها من حالتها تلك قائلة :

- ناوية على إيه يا بنتي

- مش عارفة يا ماما ... مش عارفة

فُتِح باب الحجرة ودخلت أختيها مسرعتان واحتضنتها مرديين عبارات الحمد لله ع السلامة ، وأيضاً دخل "ربيع" جارهم قائلاً :

- ألف حمد لله ع السلامة يا "فرحة" يا بنتي الدنيا كانت مضلمة من غيرك

ردت "فرحة" بامتنان :

- الله يسلمك يا عم "ربيع" ماما حكييتي على اللي عملته معانا مش عارفة والله أشكرك ازاي

- تشكريني إيه يا بنتي بس ، أنا مهما عملت مش هَوِّفي نص جمایل المرحوم أبوكي ، أبوكي مكانش صاحبي بس ، كان أخويا وأكثر كمان ، وربنا يقدرني وأرد نص اللي عمله معايا

استأذن الحاج "ربيع" بالانصراف حتى يتابع مشاغله ، فأذن له الجميع شاكرين ممتنين .

ثم قالت الأم موجهة حديثها لابنتها الأصغر من "فرحة" :

- عملتي اللي قولتلك عليه يا بنتي

## ردت الفتاة :

- عملت يا ماما ، بس كل البضاعة اللي في المحل مش مكلمة ٥٠٠٠ جنيه ، يعني عايزين ١٥ ألف جنيه كمان

## ردت الأخت الثانية :

- أنا كنت محوشة ٥٠٠ جنيه في الحصاله بتاعتي

## قالت الأم بعد تنهيدة طويلة :

- يدبرها المولى إن شاء الله

كان من السهل على "فرحة" أن تفهم أنهم يتحدثون عن مصاريف علاجها ، شعرت بأنها أصبحت عبئاً ثقيلاً وهماً كبيراً على أنفسهم فلم تتحدث فقط ظلت تنظر إلى السقف .

بعد دقائق من الصمت لم يقطعه إلا بعض طرقات على الباب تلاها انفراج فيه ليطل منها الطبيب بابتسامة قائلاً :

- معلش يا أنسة يا "فرحة" ، حضرة الضابط جاي كمان شويأ عشان يستجوبك ، فكرتي في اللي قولتلك عليه

## لم ترد "فرحة" فقالت الأم :

- بقولك إيه يا ابني ، هي "فرحة" هتخرج امتا من هنا

## رد الطبيب :

- يومين تلاتة ، تستقر حالتها وتقدر تمشي بعدها على طول

## قالت الأم بعدما وقفت واقتربت من الطبيب :

- أنا عارفة يا دكتور إن مينفعش "فرحة" تخرج غير لما نسدد باقي مصاريف المستشفى

## قاطعها الطبيب :

- مصاريف إيه ؟ ... مش انتوا دفعتموا باقي المصاريف ، المستشفى بلغتني إن المصاريف كلها ادفعت

رد الجميع باستفهام :

- اتدفعت !!!

وقالت الأم :

- مين اللي دفع المصاريف  
وهنا دخل شاب من الباب قائلاً :

- أنا اللي دفعت المصاريف كلها

كان من السهل على "فرحة" أن تتذكر وجهه ، هو صاحب القنبلة التي فجرت حياتها وحولتها إلى جحيم وأوصلتها إلى ما هي فيه الآن ، هو ذلك الشاب الذي لا تعلم هل تشكره أم تعاقبه على فعلته ، ذلك الشاب الذي كان في المطعم يتحدث عنها وعن "فادي" وما ينويه تجاهها .  
إلتفت الجميع إليه فاقترب قائلاً :

- محدش فيكم يعرفني ومحدش شافني قبل كده ، غير الأنسة "فرحة" معرفش ذاكرتها هتسعفها إنها تفتكرني ولا لأ ، أنا عرفت اللي حصل وناوي أقف جنبها لحد ما تاخذ حقها من "فادي"

كان مجرد نطق اسمه ليس بالسهل على "فرحة"

علت الدهشة وجوه الجميع فلم يستطع أيأ منهم أن ينطق فأكمل الشاب:

- أنا اسمي "تامر" صاحب "فادي" الأنتيم ، بس أنا زهقت منه ومن شكله ، أنا بعترف إني غلطت كتير بس متوصلش لي عمله ده ، أنا معاكي يا "فرحة" للآخر لحد ما تاخدي حقك منه

أراد الطبيب أن يطرق على الحديد وهو ساخن فقال :

- الله ينور عليك يا أستاذ "تامر" أنا عمال أقنعهم بكده وهما مش راضيين ، عايزين يسكتوا على حقهم

اقترب "تامر" من "فرحة" قائلاً :

- لا مش صح أبداً ، لازم تقاومي لحد آخر نفس فيكي ، مش هقولك إن الموضوع سهل ، بس لازم تحاولي  
بُرْهَة من الصمت قطعتها "فرحة" قائلة :
- ممكن أسألك سؤال بسيط  
أوماً "تامر" فأردفت "فرحة" :
- انت إيه مصلحتك في كده ، وازاي بتقول إنك صاحبه وجاي تحرضني عليه ، وانت تعرفني منين عشان تدفعلي فلوس المستشفى  
تنهد "تامر" لا يدري ما يقوله ولكنه استجمع شتات تفكيره ثم قال :
- أنا مهما قولت أكيد مش هتصدقني ، أنا حد بسيط على قدي زيي زي "فادي" بس مش بالضبط ، اتربيت على إن كل طلباتي مجابة وعمري ما كان ناقصني حاجة ، أبويا من وأنا صغير في الامارات وبيبعتلنا الفلوس اللي نطلبها ، كان طبيعي واحد زيي طلع من غير أب ومع وجود أم مستهترّة كل هَمَّها الخروج والنوادي إنني ابقى كده ، اتعرفت على "فادي" لقيت كل حاجة معاه حلوة ، وأحلى حاجة فيه إنني لما أبويا بطل بيعتلنا فلوس لقيته هو بيعمل معايا كل حاجة ، هو اللي عوّضني عن الحرمان اللي شففته من أبويا ، كنا كل يوم نسهر ونشرب ونحشش ونجيب بنات أشكال وألوان ، بس أنا زهقت ، زهقت من حياتي ، قولت لازم أتغير ولما حاولت أتغير هما منعوني ، بس قاومت لحد الآخر وفعلا قطعت كل علاقتي بيهم ، ولو فاكرة يا "فرحة" كلامي مع "علا" أنني كنت بقول أنني عايز أنقذك منه ، والله والله ما كنت أعرف إنك انتي ومعرفتش غير بعدين بالصدفة  
تساءلت "فرحة" :
- مين "علا" دي ؟

ودت لو أنها لسانها لم ينطق هذا السؤال ، لم تكن تدري هذه غيرة أم حقد أم فضول ، رد "تامر" :

- واحدة من الشلة ... بتحب "فادي" بس هو مش بيحبها ، "فادي" عمره ما حب ولا عنده قلب عشان يحب بعد انتهاء تلك الكلمات سمع الجميع طرق الباب فقال الطبيب :  
- ادخل

دخل من الباب شاب طويل يرتدي ملابساً ميرية ويبدو من النسرة والنجمة التي على كتفه أنه مقدم ثم قال :

- السلام عليكم ، ازيك يا آنسة "فرحة" ، الدكتور "علي" بلغني إنك فوقتي وتقدرتي تجاوبيني على شوية أسئلة  
أومأت "فرحة" بالموافقة وبدأ المقدم في طرح بعض الأسئلة الروتينة كالإسم والسن ... إلخ ، وبعدها طلب من الجميع أن يخرجوا خارج الغرفة فنفذ الجميع ما عدا الأم التي أصرت على البقاء فأذن لها المقدم ثم توجه بالحديث إلى "فرحة" قائلاً :

- احكي لي بقى اللي حصل وياريت بالتفصيل الممل بدأت "فرحة" تسرد ما حدث من بداية أن إلتقى نظرها بنظره في أول مرة ، سردت له ما قال لها وما قالت له ، كم مرة تقابلا ؟ وأين تقابلا ؟ ، كانت تسرد الأحداث ومع كل فصل دمة تصدق كلامها وتثبته ، وكان المقدم يسجل كل كلمة من حديثها ، ويحثها على أن تحكي إلى أن سألها عن اسم الشخص الذي فعل كل ذلك فعندما نطقت اسمه قال لها مستغرباً :

- "فادي عزيز" ابن "عزيز بيه الدمرداش"  
- آه هو بعينه ، شايقة حماسك قل يا حضرة الضابط  
- لا لا ... كملي ... كملي

أنهى الضابط محضره وأغلقه ثم استأذن وانصرف

\*\*\*\*\*



٢٥

أمر ضبط  
وإحضار

كان "عزيز" يتناولى طعام الغذاء حين أخبرته الخادمة أن هناك ظابطاً بالباب يطلب مقابله ، ألقى ما في فمه من طعام وذهب إليه قائلاً :

- أوامر

بكل هدوء قال المقدم "حسن" :

- معايا أمر ضبط وإحضار للمتهم "فادي عزيز"

- انت أكيد غلطان في العنوان يا حضرت

- لا يا فندم العنوان صحيح والاسم صحيح ، "فادي" متهم في قضية

هتك عرض

نزل الحديث كالصاعقة على عقل "عزيز" لم يدر ما يقوله .

كان "فادي" يهبط الدرج حين رأى والده يتحدث مع الضابط فجرى إلى غرفته وحين لمح الضابط أمر العساكر أن يلحقوا به فقال الوالد محذراً :

- أنا مش هسكت على اللي بيحصل ده ، انت تجاوزت كل حدودك

- يا فندم حدود إيه ونيلة إيه ، أنا معايا أمر بضبط وإحضار من النياية وحضرتك تقدر تتطلع عليه
- أخذ "عزيز" الورقة ونظر فيها وهو غير مصدق ما يقرأه وانتبه على صوت "فادي" وهو يصرخ :
- سييوني ، أنا معلمتش حاجة ، إلحقني يا بابا ، يا باباااااا  
وجد العساكر تمسك به من يديه وهو يحاول أن يفلت منهم ولكن بلا جدوى ، انطلق إليه والده وبدأ يمسح على وجهه وشعره بحنان حتى يبعث الطمأنينة في قلبه قائلاً :
- روح معاهم يا "فادي" ومتقلقش هتصل بالمحامي وأجي وراك ، متقلقش ، انت مش واثق من بابا
- استسلم "فادي" للعساكر وهم يسحبانه وكأنه شخص محكوم عليه بالإعدام وفي طريقه لتنفيذ الحكم .
- خرج العساكر ومعهم "فادي" ، واتصل "عزيز" بأكثر من محامي وطلب منهم اللحاق به إلى قسم الشرطة
- هناك في قسم الشرطة حين واجه المقدم "فادي" بفعلته لم يقل شيئاً ولم يتحدث بشيء فقال له :
- بص يا "فادي" يا إما هتقول مين كان معاك يا إما هتشيل الليلة لوحك ، خد بالك يا بطل دي أقلها ٢٥ سنة وممكن إعدام
- عندما سمع كلمة إعدام انتفض "فادي" وقال :
- مش هتكلم غير لما يجي بابا
- وعلى صوته دخل عسكري بعدما طرق الباب قائلاً :
- فيه حد بره بيقول إنه المحامي بتاع المتهم وعاوز يدخل يا فندم
- أشار إليه المقدم بالموافقة فدخل رجل يبدو عليه علامات الثقة بالنفس وكان شعره متشحاً بالبياض دليلاً على سنواته التي تعدت حاجز الستين قائلاً :

- "رشدي زهران" حاضر مع المتهم

رد المقدم "حسن" باتسامه باهتة :

- غني عن التعريف يا أستاذ "رشدي" ، اتفضل

جلس المحامي أمامه وقال :

- أولاً أنا بطعن في إجراءات الضبط والإحضار ...

قاطععه حسن قائلاً :

- يا أستاذ "رشدي" الدخلة دي مش هتنتفع ، مفيش حاجة تمت غلط ،

بالإضافة لشهادة الشهود اللي منهم صاحبه ، الوصف الدقيق للشقة

الي متأجرة باسمه ، البواب اللي قال إن الشقة كل يوم بتيجي فيها

واحدة ، تقدر حضرتك تتطلع على المحضر بنفسك

أمسك المحامي بعض الوريقات التي قدمها المقدم له وقرأها بتأني وردّها مرة

ثانية إليه فقال المقدم موجهاً الحديث ل"فادي" :

- ها يا "فادي" هتقول مين الثلاثة اللي كانوا معاك ولا ناوي تبقى بطل

للنهاية وتشيل الليلة لوحدك

تبادل "فادي" النظر مع المحامي وواصل سكوته فقال المقدم للعسكري بعد

أن استدعاه من الخارج :

- خد المتهم على الحجز

وبالفعل أخذ "فادي" وألقي في الحجز وهو ينتفض ، قابل وجوهاً كان فقط

يسمع عنها ويراه في أفلام السينما ، المكان بالنسبة له قدر ، رائحة لا يطيقها

، وما هي إلا دقائق حتى استطاع والده ومحاميه بدفع رشوة لبعض الشّوش

في القسم لنقل "فادي" إلى زنزانه بمفرده وبالفعل بعدما غادر المقدم

"حسن" القسم ، تم إخراج "فادي" ليبيت في حجرة الضابط نفسه ، ولكنه

كان مرعوباً ، لا يدري ماذا حل به ؟ كان يلعن تلك اللحظة التي رأى فيها تلك

الفتاة العنيدة ، ولكنه كان يُطمئن نفسه بأن والده سيستطيع كعادته أن

يخرجه من ذلك المأذق ، كما أخرجه قبل ذلك من كل مأزق ولكن الأمر هذه المرة مختلف ، جلس على الكنبه محاولاً أن ينام ولكنه فشل .

\*\*\*\*\*

في مكتبه كان "عزيز" يجلس مع محاميه يدرسان الموقف فقال المحامي :

- للأسف يا "عزيز" بيه الموضوع مش سهل ، الأدلة كلها ضده ، وشهادة صاحبه عليه ، والشقة اللي فعلا متأجرة باسمه  
خبط "عزيز" المكتب بيده قائلاً :

- يعني إيه يا "رشدي" ، أكيد فيه حل ، "فادي" مش هيتحبس .. مش هيتحبس انت فاهم ، اتصرف يا "رشدي" اتصرف ، أنا ممكن أعمل أي حاجة ، أدفع أي مبلغ ، ممكن أهربه بره مصر  
- اهدا بس يا "عزيز" أكيد ليها حل ، أنا بس عايز اللي كانوا معاه  
يختفوا خالص مش عاوزهم يظهروا ، وعمايزك تفهم "فادي" إنه مينطقش بأي كلمة غير اللي قولته عليه

\*\*\*\*\*

انقضت الليلة الأولى على "فادي" وهو على الكنبه داخل حجرة المقدم بصعوبة ، لم يذق للنوم طعماً إلا بعض لحظات استطاع أن يقتطفها من بستان الليل الطويل ، وكانت نفسه كلما راح في النوم تذكره بالورطة التي هو فيها وتوقظه ، ليلعن حظه في هذه الدنيا ، حتى في المرة الوحيدة التي استطاع فيها أن يستغرق في النوم وجد الشاويش يوقظه لأن المقدم في طريقه إلى مكتبه ولا بد أن يترك المكان حالاً .

تم ترحيل "فادي" في عربة الترحيلات إلى النيابة وخلفه والده بسيارته وبصحبه المحامي  
مُثل "فادي" أمام وكيل النيابة وعندما سأله الاسئلة التقليدية قال له :

- أنا شايف المحضر متقفل وتمام ، حابب تضيف حاجة يا أستاذ "فادي"
- وقبل أن يلتفت "فادي" تكلم "رشدي" المحامي قائلاً :
- أنا بطلب من حضرتك إن موكلي يخرج بكفالة
- للأسف يا أستاذ "رشدي" مش هينفع
- ثم اتجه وكيل النيابة إلى كاتبه قائلاً :
- يحبس المتهم أربعة أيام على ذمة التحقيق ، على أن يراعى التجديد في الميعاد
- كانت صاعقة أخرى له أن يُحْبَس ويظل في هذا المكان الكئيب.
- في اليوم التالي حضرت "فرحة" إلى مقر النيابة لتتعرف على المتهم في طاבור العرض كإجراء روتيني ، كانت جالسة أمام المكتب حين دخل عسكري قائلاً :
- طابور العرض جاهز يا فندم
- صرف وكيل النيابة العسكري بإشارة من يده ، وتوجه إلى "فرحة" قائلاً :
- بصي يا أنسة "فرحة" دلوقتي هنوريكي بعض المتهمين المشتبه فيهم وكل ما عليكى إنك تشاوري على اللي قام بالاعتداء عليكى وتقوليلنا هو ده

ارتبكت "فرحة" قليلاً ثم أومأت برأسها موافقة ، وانطلقت بصحبة وكيل النيابة إلى حجرة مجاورة ، وجدت فيها ما يقارب من عشرة أشخاص ، أشكالهم مريبة ، معظمهم ذوو وجوه مشوهة ، ترك فيها الزمان علامة أو أكثر ، ثياباً مقطعة وبالية وقديمة ، ظلت تطيل النظر في وجه كل واحد علّها تجد مبتغاهما ، ولكن بلا فائدة حتى وصلت إلى آخر العرض حيث وجدته وهو منكس رأسه أَرْضاً ، يدعو ويبتهل ألا تتعرف عليه ، ولكن كيف لا تتعرف عليه وهو صاحب الوجه الذي كانت تعشقه ، الوجه الذي قص الشريط عن قلبها ، وافتتحه ووضعه على طريق الحب ، الوجه الذي كان يعدها أن يستمر

معها للأبد ، كان يحلف لها أنه يحبها وأنه لم يحب أحداً غيرها ، هو نفس الوجه الذي أنهى حياتها بسبب شهوة ومتعة لم تزد عن خمس دقائق ، خمس دقائق سلبت منها أعز ما تملك ، عندما رأته تذكرت كل شيء ، مرّاً أمامها شريط الذكريات بحلوه ومُرّه ، فصرخت صرخة حملت فيها كل معاني الألم والعذاب والمعاناة وضربته بكفها على وجهه ، فثار وغضب ولكنها كانت أقوى هذه المرة ، خربشته في وجهه حتى ترك كل أصبع من أصابعها علامة من الدماء في وجهه

خَلَّصه العسكري من يدها بالكاد وأجلسها على كرسي ، وأنفاسها تلاحق بعضها كأنها في سباق ، قدّم لها المقدم كوباً من المياه فشربت منه شفتان ، ووضعت أمامها وبعدما صرف المشتبه فيهم قال لها :

- متقلقيش ، حقك هيرجعك تالت وملتت  
تنهدت بارتياح وهي ما زالت تننفض بشدة .

\*\*\*\*\*

في مكتبه كان "عزيز" يدخل السجارة الأخيرة في علبة الخامسة وأمامه "رشدي" المحامي محاولاً تهدئته قائلاً :

- حرام عليك يا "عزيز" كل دي سجائر ، اهدى وكفاية  
نفخ "عزيز" دخان السجارة بغيظ ثم قال :

- الواد اللي حيلتي هيضيع يا "رشدي" ومش عارف أعمل حاجة ، أنا "عزيز" بيه بكل نفوذي وسلطتي وعلاقتي مش عارف أعمله حاجة  
- أنا فكرت في حاجة كده ، بس مش عارف هتوافق عليها ولا لأ  
- قول يا "رشدي" وخلصني  
- أنا شايف إن مفيش حل غير التصالح الودي ، يعني تروح للبننت دي وترميلها قرشين وتتنازل عن القضية  
- تفتكر ممكن يوافقوا

- أهي محاولة ، ممكن تنجح وممكن تفشل ، في كل الحالات لازم نجرب  
مش هنخسر حاجة ،
- تحرك الاثنين إلى منزل "فرحة" في حارتهم البسيطة ، لأول مرة في حياته تطأ  
قدميه مثل هذا المكان ، لم يفكر في كل هذا غير أن هذا المشوار لصالح ابنه  
الوحيد .
- دلف إلى مدخل العمارة وصعد الدرج بصعوبة ورن جرس الباب وانتظر قليلاً  
حتى فتحت الباب سيدة عجوز في وسط تساؤلاً معتاداً متوقعاً ، عرفها بنفسه  
وطلب منها أن يجلس بعض الدقائق مع "فرحة" ، أدخلته الأم وأجلسته في  
حجرة الصالون وانطلقت لتخبر "فرحة" بضيوفها .
- جلس "عزيز" ومحاميه في مكان لم يكن يتوقع في يوم من الأيام أن يجلسا فيه  
، كذبة قديمة أكل عليها الزمان وشرب حتى خرج حشوها خارجها ليعلن عن  
تمرده ويطالب بإنهاء خدمته ، جدران ملئية بالآيات القرآنية التي لا شك أنه  
يقرأها لأول مرة ، بافتراض أنه عرف طريقة قراءتها أساساً .
- لم تدعهم "فرحة" ينتظرون كثيراً ، دخلت وعلى وجهها ابتسامة انتصار فقد  
توقعت السبب الذي قدم من أجله فقالت :
- مش تقول يا بيه إنك جاي ، كنت فرشنا الأرض رملة ولا حاجة ، والله  
لو نعرف كنا جيبنا فرقة حسب الله
- لم يطمئن "عزيز" لطريقة كلامها فقال لها بعد تنهيدة طويلة :
- بصي يا بنتي ، أنا عارف إن كل كلامي ملوش فايده ، بس أنا جيت لما  
سمعت عنك إنك بنت عاقلة وبتعرفي توزني الأمور كويس
- طلباتك يا "عزيز" بيه
- نظر عزيز إلى محاميه وأكمل :

- احنا جاين نخلص الموضوع ودي ، أحسن من المحاكم والجرس والفضايح ، وأنا مستعد للتعويض اللي تطلبه من جنيته لحد مليون
- جلست "فرحة" مقابلة له وهي تلعب في ذقنها بيدها لتُوحى لهم أنها تفكر في الأمر مما بعث بعض الراحة والطمأنينة في صدورهم ثم قالت بعد تفكير لم يدم طويلاً :
- لو انت مكاني يا "عزيز" بيه تطلب كام تهلت أساريه وقال :
- شيك على بياض لو عايزة
- والله فرصة ، أنا لازم أستغلها كويس ، بس أنا هحكلك حدوتة صغيرة أوي عشان لما أقولك المبلغ متستكتهوش
- يا ستي مش هستكتروا ، المبلغ اللي هتطلبه موافق عليه
- اسمع بس ، ولو سمحت متقاطعنيش
- اتفضلي
- كان فيه زمان أسرة صغيرة بسيطة أوي مكونة خمس أفراد ، ثلاث بنات وأبوهم وأمهم ، كانوا كل حاجة في حياة بعض ، أسرة من خمس أركان كل ركن فيهم ليه دوره المهم في حياة التانين ، في يوم من الأيام ربنا أراد إن ركن فيهم يقع ، أجله بقى مش هنعترض ، بس الركن ده رمى الحمل على بنته الكبيرة ، قالها يا بنتي أنا سايب ورايا راجل ، عايزك تبقى سند لآخواتك تبقى أخوهم وأبوهم ، عايزك تبقى مكاني ، وبالفعل نفذت وصية أبوها ، عاشت بعد موته زي الجبل عمره ما يهزه ريح ، لحد ما جه الشاطر "حسن" قالها إنه عايزها وبيحبها ، مصدقتهوش ، فضل يحلف بكل الأيمان ويثبتهها بكل الطرق إنه من أول ما شافها ومش شايف غيرها ، صدقته ومشيت وراه بالرغم من

تحذير كل الناس ليها ، بالرغم من تحذير عقلها ليها ، لكن لأول مرة قلبها يهزم عقلها ، وقالت فيها إيه لو نجرب يمكن الحظ والسعد يكون مكتوبلها في حبه ، لحد ما عرفت واتأكدت إنه بيتسلى بيها ، كانت فكراه بني آدم آخره إنه يتسلى ، بعدت عنه وقررت تطوي الصفحة دي ، لكن هو منسيش ومرضيش باللي حصل ، قرر ياخذ حقه بالعافية ، جاب ثلاثة صيغ من صحابه وخطفوها في مكان غريب و..... (بكاء) تفتكر يا "عزيز" بيه البنت دي عشان ترجع تعيش حياتها بعد اللي حكيتهلوك يلزمها قد إيه

- يا بنتي مانا قولتك همدف اللي هتقولي عليه
  - الموضوع مش فلوس يا بيه ، مش فلوس
  - امال موضوع إيه ، إيه اللي يريحك وأنا هعمله
  - متأكد يا بيه
  - طبعاً طبعاً ، أنا جاي النهارده عشان كده
  - تمام ، اللي يريحني يا "عزيز" بيه إنه يتشقق يتحبس ، ياخذ جزاؤه وأشفي غليلي منه
- ظهرت علامات الغضب على وجه "عزبز" وأراد أن يرد ولكن المحامي أوقفه قائلاً :**

- يا بنتي انتي مش هتستفادي حاجة بحبسه ولا بشنقه ، لكن لو سمعتي الكلام وخدتي الفلوس من "عزيز" بيه ، هتستفادي كثير ، تشتروا بيت غير الخرابة اللي ساكنين فيها دي ، تعيشي حياة مرتاحة انتي واخواتك ، فكري بعقلك يا بنتي واختاري الصالح لكل الأطراف
- تفتكر لو بنتك مكاني يا بيه ، هترضي تاخذ الفلوس ، ويا ترى هتنسيها اللي حصل ، عارف يعني إيه تبقى بنت لوحدها عريانة وسط أربع حيوانات وكل واحد فيهم ماسك حتة في جسمها ، عارف

يعني إيه لما تيجي تصرخ تلاقى صوتها مش قادر يطلع ، عارف  
يعني إيه تتمنى الموت ، لأنه هيكون أرحم من اللي هي فيه ، عارف  
يعني إيه بنت يحصل فيها كده من أكثر حد حبته ومن أول حد  
فتحتله قلبها في حياتها

تنهد "عزيز" قائلاً :

- يا بنتي أنا عارف كل اللي بتقوليه ده ومقدره ، ولو كان عندي بنت  
وحصل فيها كده مكنتش هسكت ، بس أنا بتكلم عن أمر واقع حصل  
، اللي حصل ده "فادي" مش غلطان فيه ، الغلطان فيه أنا ، أنا دلعته  
زيادة عن اللزوم ، خليته يحس إن كل شيء مُباح ، معرفتوش يعني  
إيه عيب وغلط ، أرجوكي يا بنتي ، اديني فرصة أربيه من الأول ،  
أفهمه الدنيا ماشية ازاي ، "فادي" ابني الحيلة اللي استنيتته ياما  
يجيلي ، أنا معنديش حاجة أعلى منه ، وممكن أدفع نص ما أملك  
عشان ميمسهوش حاجة وحشة ، أرجوكي يا بنتي قدري موقفي  
ولوعتي عليه

- وأنا مين قدّر موقفي ، مين قدّر لوعة أمي عليا وأنا راجعة في وش  
الفجر ومغمى عليا ، مين قدّر لوعة أمي وأخواتي وأنا مرمية في  
المستشفى بين الحياة والموت ، مين قدّر دموعهم وهما حاسين إن  
عمود البيت على وشك أنه يقع فوق دماغهم ، متتعيش نفسك يا بيه ،  
مفيش فائدة ، مفيش حاجة هتريحني غير لما أشوفه محبوس ومذلول  
وأحرق قلبك عليه زي ما حرق قلبي على شبابي اللي ضيَّعه ، زي ما  
حرق قلب ماما على بنتها

وقف "عزيز" قائلاً :

- يعني ده آخر كلام عندك

- للأسف يا بيه معندناش شاي ، كنا عملناك واجب الضيافة ، ولا صحيح أكيد حضرتك مش بتشرب المشروبات بتاعتنا دي كان الشرار يتطاير من عين "عزيز" حتى كاد أن يحرقها وترك المنزل بسرعة وهو يغلي .

"فرحة" شعرت بقوتها ، شعرت بالإنصار حين ترجاها في أن تتنازل عن القضية ورفضت ، ذهبت إلى البلكونة لترى "عزيز" وصاحبه يركبان سيارتهما ويتحركان في غيظ بدا من طريقة حركة السيارة . كانت تعلم أن "عزيز" الذي بداخل السيارة يتوعد بالانتقام إن حدث شيء لابنه ولكنه لا يهم ، المهم أن تنتقم من ذلك الذي دمّر حياتها وقلبها رأساً على عقب .

مرت أيام التحقيقات بصعوبة على "فادي" كان يعامل معاملة جيدة نوعاً ما ، لم يكن يُحبس مع المسجونين ، كان طعامه مختلف عن كل أمثاله ، طعام حرص والده أن يحضره له يومياً ، وكان العساكر يدخلونه له بعدما يأكلون منه ما تناله أيديهم ، وهو كان يكتفي ببعض لقيمات يقمن صلبه ، لم يكن للطعام طعماً ولا للحياة طعماً ، كان يشعر أنه في كابوس وينتظر نهايته بفارغ الصبر ، كابوس طال كثيراً ولكن نهايته ستأتي ، لظالماً أنقذه والده من مواقف مثل هذه ، كان يطمئن نفسه بأن والده حتماً سيتصرف في الأمر ، وكما قال له المحامي - المسألة تحتاج لبعض الوقت - ولكن هذا الوقت المطلوب طال أكثر مما كان يتوقع ، طيلة حياته لم يوضع في موقف مثل هذا ، لم يتغرب عن بيته وأهله ، لم يبيت ليلة واحدة بعيداً عن والده ، لم ينتابه شعوراً بالخوف والقلق مثل ما هو فيه الآن .

مرت الأيام ببطء سلحفاة مشلولة ، ولا جديد غير أن النيابة قد جددت حبسه خمسة عشر يوماً آخر على ذمة التحقيقات ، مجرد أن يأتي له الخاطر أنه سيظل في هذا المكان لمدة خمسة عشر يوماً آخر كفيلاً بأن يقذف الرعب في

قلبه على الرغم من أنه لا يبيت مع المساجين ولا يأكل من أكلهم ، لأول مرة يشعر بنعمة الحرية التي كان يعيش فيها ، أن يخرج كما يحلو له ويسهر كما يحلو له .

عندما أخبره العسكري أن هناك زيارة له ، تحرك من فوره ليرى الذي يزوره ، كان يتوقع أنه والده أو أضعف الإيمان أنه المحامي ، لابد أن يكون هناك جديد ، أسرع خلف العسكري الذي يقوده ويربط بينهما سوار حديدي حتى دخل المكتب وفك عنه أساوره وفوجئ عندما دخل المكتب أن هناك آنسة في انتظاره ، كانت هذه الأنسة هي "علا" التي قالت لتوها عندما دخل المكتب :

- ازيك يا "فادي" عامل إيه

أحس بخيبة الأمل عندما رآها ، ليس لرؤية شخصها ولكن لآماله التي كان يبنيها في أن من يزوره قد يكون معه الخلاص فقال بيأس :

- ازيك يا "علا" ، أنا تمام .... لا أنا مش تمام ... مش تمام

قالت مؤنبة :

- شوفت آخرة العط إيه يا "فادي" ياما قولتلك

أحس بشيء يشبه الشماتة في حديثها فقال لها :

- وحياتة أبوكي أنا مش ناقص ، لو ده اللي جاية عشانه ، يبقى خدي بعضك وامشي

نهضت "علا" مسرعة وهي تقول :

- اخص عليك يا "فادي" ، أنا برضه أعمل كده ، انت متعرفش انت إيه بالنسبة ليا

واحتضنته ، ولأول مرة يشعر بقلبها الذي كان ينبض بشدة ، ما أكثر المرات التي اعترفت فيها "علا" بحبها له ولكن لم يكن يشعر بها كما يشعر بها الآن ، أحس بصدق مشاعرها وحبها الشديد ، أبعدا عنه فقالت له :

- ان شاء الله يا "فادي" هتخرج من هنا بالسلامة ، أزمة وتهتدي

## قال بيأس :

- تفتكري يا "علا"
- ومفتكرش ليه
- شوفتي "تامر" الكلب يعمل فيا إيه ، اللي كان عامل نفسه صاحبي وخايف عليا يعترف ويشهد عليا ، آه لو أشوفه ، بس أخرج من هنا وأنا أوريه النجوم في عز الضهر
- خلاص يا "فادي" اللي حصل حصل ، وهو أكيد ليه ظروفه ، انسى اللي حصل كله ، لما تخرج من هنا ابدأ حياة جديدة ، وارمي الماضي بكل اللي كان فيه ، الحياة فيها حاجات أحلى بكثير من اللي كنت بتعمله انت وصحابك
- ضاق ذرعاً بنصائحها التي دائماً يضيق بها فقال لها :
- جرى إيه يا "علا" أنا مش ناقصك ، هو انتي مبتزهقيش من الكلام في الموضوع ده
- أنا خايفة على مصلحتك
- عارف انك خايفة على زفت مصلحتي ، لو خايفة على مصلحتي بجد خرجيني من هنا ، غير كده يبقى مسمعش صوتك تاني
- جلست لتوها لا تدري ماذا تقول ؟ كانت تظن أن ظروفه وما حدث له قد غيرّه قليلاً ولكن يبدو أنه ازداد عناداً وأنه إن خرج من ذلك المكان سيصبح ألعن مما كان عليه فقالت بيأس :
- يا خسارة يا "فادي" ، كنت فاكرة ان اللي حصل ده غَيْرِك ، وخلاك إنسان تاني ، بس واضح إن اللي فيك فيك مهما حصل ، مش هتتغير طول عمرك
- نظر إليها بطرف عينه ولم ينطق ، فحملت حقيبتها التي كانت وضعتها على الكرسي وانصرفت غاضبة وهي تلعن اللحظة التي فكرت فيها أن تزوره .

أما عنه فجلس على الكرسي حتى جاءه العسكري وأخذه من حيث جاء به .

\*\*\*\*\*

كان المحامي يجلس مع "عزيز" في مكتبه وبين أيديهم بعض الأوراق فقال  
"عزيز" :

- متأكد يا "رشدي" إن الموضوع ده هيجيب نتيجة
  - طبعاً بس أهم حاجة ، كل اللي قولنا عليه يتنفذ ، فين الواد الي قولت عليه إنه جاي
  - في السكة ، أنا لسه مكم باباه حالاً ، وقاللي إنه في السكة ، بس أنا لحد دلوقتي مش قادر أفهم اللي ناوي عليه بالضبط
  - فيه إيه يا "عزيز" انت بتتكلم مع تلميذ ولا إيه ، أنا كنت بس برتب الموضوع في دماغى عشان ألعبها صح ، بس ده هيكلفنا كثير ، أنا بقولك عشان تبقى عامل حسابك
  - الي انت عايزه يا "رشدي" ده ابني الوحيد ، هدفك الي انت عايزه ابترسم "رشدي" وهو يضع خنصره في فمه قائلاً :
  - طول عمرك صاحب كرم يا "عزيز"
  - وانت طول عمرك مش بتشبع خالص يا "رشدي"
- ضحك الاثنان ثم قال "رشدي" :
- طب ما فيش حاجة نحلي بيها بقنا دلوقتي ولا إيه
  - متستعجلش يا راجل ، وربنا لو الواد طلع منها ، أخلي بقك يزغرت من كتر الحلاوة

\*\*\*\*\*



٢٦

## خلف القضبان

تم تحديد ميعاد لأول جلسة لمناقشة قضيته في القضاء وبالفعل حضر الجميع الجلسة وبدأ القاضي الجلسة بديباجته المعتادة وأذن لوكيل النيابة بالكلام فانطلق من توه وكيل النيابة يقرأ ما كان يسهر طول الليل يُعدُّ لقوله :

- سيادة القاضي ، حضرات المستشارين ، نحن الآن أمام قضية انتشرت في الأونة الأخيرة كثيراً وكثيراً ، مرتكبي مثل هذه الجرائم ليس لديهم أي ضمائر يقظة ، إن هذا المجرم المائل أمام حضراتكم ظن أنه سينجو بفعلته بنفوذه وسلطة والده ، قد قام وبصحبة ثلاثة من شياطين الإنس بخطف المدعية وهتك عرضها غير مبالين بأي اعتبارات دينية أو أخلاقية ، ومع شهادة الشهود وتعرف المجني عليها على المتهم في طابور العرض ، أطالب بتوقيع أقصى العقوبة على المتهم وذلك ليكون ردعاً لكل من تسول له نفسه أن يرتكب مثل هذه الجريمة ، إن صدري قد اكتفى بهذا الحد وإنني أسمع الآن صوت

العدل يجريه الله على لسان حضراتكم ليحكم على المتهم بأشد العقوبات الممكنة حتى يكون عبرة لمن يعتبر ، شكراً سيادة القاضي  
جلس وكيل النيابة بعدما قال ما أثلج صدره ، ثم نظر القاضي إلى الأوراق التي  
أمامه ثم قال :

- بعد الإطلاع على محضر التحقيقات ، محامي المدعية يحب يقول أي  
حاجة  
وقف محامي كانت وكتته "فرحة" قائلاً :

- لا ... شكراً يا سيادة القاضي

أوماً القاضي وقال :

- محامي الدفاع تحب تضيف حاجة  
وقف " رشدي " في ثقة بعد نظره لـ "عزيز" يفهم معناها كلاهما ، تحرك  
خطوتين إلى الأمام تجاه منصة القضاة وقال :

- بعد إذن حضرة القاضي ، الرجاء من هيئة المحكمة الموقرة أن تفسح  
لي صدرها لإلقاء مرافعتي

أشار له القاضي بالموافقة :

- شكراً سيادة القاضي ، نحن الآن أمام جريمة بشعة بكل المقاييس  
ولكن أركانها ليست كاملة ، بكل الأسى والحزن أقدر شعور المجني  
عليها ، من منا يرضى بمثل هذه الجرائم البشعة ، من منا يرضيه أنا  
ابنته أو أخته يحدث لها ما حدث ، من منا سينام قرير العين وفي  
مجتمعنا ذئاب بشرية تستحل أعراض الناس وتتهتك عرضهم ،  
ولكني ألتصق مع النيابة في كل دليل قدمته ضد موكلي  
تحرك المحامي ناحية وكيل النيابة خطوتين موجهاً كلامه له :

- أتفق مع سيادتكم أن الذي فعل هذه الفعلة الشنيعة في هذه الفتاة  
البريئة الطاهرة لا بد أن ينال أشد العقاب ، لا بد أن يُعدم

كانت هذه الكلمة بمثابة صاعقة على مسامع "فادي" الذي كان يجلس مترقباً في قفص الاتهام ، شعر أنه هو المقصود من هذه الكلمة ، وضع يده على رقبته حين أكمل المحامي :

- ولكن يا سيادة القاضي العقاب لابد أن يكون لمن يستحقه ، منذ أكثر من ثلاثة أسابيع جاء المقدم علي "حسن حسين" ، إلى منزل موكلي ومعه أمر الضبط والإحضار لموكلي وتمت أحداث القضية بكل شفافية ، ولا أنكر أن الشرطة قد عانت الكثير في جمع كل الأدلة على موكلي ولكني اليوم جنّت أقدم الدليل الواضح والبين على برائته ، فهل تسمح ليها هيئة المحكمة الموقرة باستجواب المجني عليها  
أذن له القاضي بعدما طلب من "فرحة" أن تنهض وتقف أمام المحامي فنفذت بسرعة فاقترب منها المحامي قائلاً :

- ازيك يا أستاذة "فرحة" قلبي عندك والله ، ليه بلغتي ، أو بمعنى أصح مخفتيش من الفضيحة ، أو حتى من كلام الناس  
خبط القاضي على المنصة قائلاً للمحامي :

- وجه أسئلتك لو كانت مفيدة بس يا أستاذ  
رفع المحامي يده معتذراً ثم قال موجهاً حديثه لـ "فرحة" :  
- تعرفي "فادي" من امتا يا أستاذة "فرحة"  
ردت بتردد :

- ثلاث شهور تقريباً  
- عظيم جداً ، ثلاث شهور ، إيه طبيعة العلاقة اللي كانت بينك وبينه  
نظرت "فرحة" بذهول لم تتوقع مثل هذا السؤال ، لم تدر ماذا تقول ؟ هل تخبره أنها كانت حبيبتها وهل ذلك مفيداً في مثل هذا الموقف ولكنها تشجعت وقالت :

- قابلته في الجامعة وفضلنا أصدقاء لمدة قليلة

ضجت القاعة بالهمهمة فأسكتها القاضي بخبطة من مطرقة على المنصة  
قائلاً للمحامي :

- ممكن توضح يا أستاذ الغرض من مثل هذه الأسئلة

قال المحامي :

- حالاً يا سيادة القاضي ستعرف ما أقصد ، ها هي المجني عليها  
تعترف أن بينها وبين موكلي علاقة ، أطلقت عليها اسم صداقة ، وأنا  
أشك في هذه الكلمة ، فالعلاقة بين المجني عليها وموكلي تعدت هذه  
الكلمة بكثير ، كانت علاقة حب وغرام متبادل بين الطرفين

قاطعته "فرحة" بحدة :

- أه كان حبيبي ، حرام اللي زيي تحب وتتحب  
- لا طبعاً يا بنتي ، الحب دي حاجة حلوة طبعاً ، ده أحلى حاجة في  
حياتنا هي الحب ، هو فيه حاجة بتودينا في داهية غير الحب  
ضحك من في القاعة على طريقة المحامي في حديثه ثم قال حتى لا يغضب  
القاضي مرة أخرى :

- كملي يا "فرحة" وإيه اللي حصل بعد كده  
- قولتله لو بتحبني صح ، يبقى تتجوزني ، وإلا مش هقابلك ولا  
هكلمك تاني  
- وقاللك إيه بقى ساعتها  
- مقالش ، طبعاً عشان نيته وحشة ، حب ينتقم مني فعمل اللي عمله  
- قصدك اعتدى عليكي هو وتلاتة من صحابه  
كأنه وضع حفنة من الملح على جرحها فأخفضت رأسها في غضب ولم ترد  
فتوجه المحامي إلى القاضي قائلاً :

- أنا اكتفيت يا سيادة القاضي بهذا القدر من الأسئلة

صرف القاضي "فرحة" فجلست في مكانها .

المحامي أخرج ورقة من حقيبته وتوجه إلى المنصة قائلاً :

- أرجو من عدالة المحكمة أن تفسح لي صدرها حتى أبين لهم حقيقة الأمر الذي غاب عن الكثير

بإشارة من يده أن له القاضي فأكمل المحامي :

- رأيتم يا سادة الاعتراف الكامل من الأنسة "فرحة" بالعلاقة الغرامية التي كانت تجمعها بموكلي ، النيابة قد استندت في أدلتها أن المجني عليها قد وصفت الشقة محل الحادث وصفاً دقيقاً ، نحن لا ننكر أن المجني عليها قد ذهبت إلى الشقة وأكثر من مرة ولكن ليس غصباً عنها ، إنما بكامل إرادتها ، لا ننكر أن موكلي قد قام بممارسة علاقة جنسية كاملة مع المجني عليها

عندما قال ذلك ضجت القاعة بالهمهمة وكذلك "فادي" لم يدري ما يقصده المحامي فأكمل المحامي :

- هل هناك سيدي الرئيس قانون يحرم على الزوج أن يمارس علاقة جنسية مع زوجته

تقدم المحامي خطوتين وقدم إلى القاضي الورقة التي يحملها بيده ، فحملها القاضي ونظر فيها بينما شرح المحامي ما تحويه الورقة قائلاً :

- بين أيدي حضراتكم عقد جواز عُرفي بتوقيع المجني عليها وعليها شهادة اثنان من الشهود وهم معنا هنا في القاعة وعلى استعداد أن يشهدوا بذلك

بعدها نظر القاضي إلى ورقة الزواج استدعى الشهود وبعدها أقسما أن يقولوا الحق أقروا بصحة العقد فاستدعى القاضي "فرحة" وسألها عن توقيعها فقالت :

- أيوه أنا امضتي كده بس مش أنا اللي ماضية ، الورقة دي مزورة

وهنا وقف محامي "فرحة" وقال :

- أنا أظن في هذا العقد بالتزوير

فقال القاضي :

- تُعرض الوثيقة على خبير الخطوط للتأكد من صحة توقيع المجني عليها وتُوجَل القضية إلى جلسة الحادي عشر من الشهر القادم ... رفعت الجلسة .

انتهت الجلسة والكل غير مصدق بالمفاجأة التي فجَّرها " رشدي " المحامي ، كانت " فرحة " غير مصدقة ما تسمعه انطلقت من فورها لوالدتها تحتضنها وتقول لها :

- محصلش يا ماما محصلش ، الورقة دي مزورة

- مصدقاكي يا بنتي ، مصدقاكي ، حسبي الله ونعم الوكيل ، حسبي الله ونعم الوكيل

رفعت " فرحة " بصرها إلى القفص لتراه ، كان ينظر إليها بنظرة تشبه الشماتة نظرة تحمل معنى الإنتصار في المعركة الحتمية ، ما أسوأ ذلك الشعور حين تظن أنك انتصرت ، ثم تكتشف أن عدوك بطرق خبيثة ودنيئة قد قلب الطاولة عليك وانتصر .

\*\*\*\*\*



٢٧

مات  
الفرحة

ذهبت "فرحة" إلى منزلها في وسط دعوات من والدتها في محاولات فاشلة لطمانتها ، كانت تعلم أنهم سيثبتون صحة توقعها بالكذب والتزوير ، سيدفعون الكثير حتى لا يحبس ابنهم المدلل .

دخلت حجرتها وطلبت من والدتها ألا توقظها فهي بحاجة أن تنام قليلاً ، حاولت الأم أن تقنعها أن تتناول طعاماً ولكنها رفضت بشدة ودخلت حجرتها وأغلقت الباب بالمفتاح واستسلمت لدموعها كالعادة

ألقت بجسدها على سريرها وهي تسترجع شريط ذكرياتها ، ثم نهضت وفتحت درجها وأخرجت ألبوم من الصور معظم صورها مع والدها ، أخرجت أحدث الصور وضمتها إلى صدرها وقالت محدثة والدها :

- شوفت يا بابا إيه الي حصلي من بعدك ، لو كنت موجود مكانش حاجة حصلت من ده كله ، ليه سيبتني يا بابا ، مقدرتش على الحمل الي انت سيبتهولي ، نَحَّيت قدام أول مطب قابلني ، أنا بعترف يا بابا إني غلطت ، غلطت لما فكرت إني من حقي أحب وأتحب ، وغلطت

أكثر لما سلمت قلبي لحيوان معندهوش قلب ، يا ريتك موجود عشان  
تقولي أعمل إيه ، أول مرة أبقى مش عارفة أعمل إيه ، فينك عشان  
تقولي أنا صح ولا غلط ، أنا صح عشان طالبت بحقي ولا غلط عشان  
فضحت نفسي ، هيبقى موقفى إيه لو فعلاً قدر يثبت إنى مراته وإن  
الورقة اللي معاه دي صحيحة ، هيبقى منظرى إيه قدام الناس مش  
بعيد يتهمونى إنى بت شمال ، كل اللي حازز في نفسي سمعتك يا بابا  
الي مكانش حد يقدر يقول عليها كلمة ، دلوقتي كلاب السكك هتقول  
وتعيد ، هيقولوا بت عم "جلال" المحترم الي عمره ما فوّت فرض  
اتجوزت عرفى وجابتله العار بعد مات ، سامحنى يا بابا ، سامحنى  
والله غصب عنى .

وبعدما طلبت النوم بالكاد حتى حنّ قلبه أخيراً وجاءها منقطعاً مليئاً  
بالكواييس ، واحداً تلو الآخر ، ولكنها نامت حاملةً بغدٍ بيد الله ، طالبة وراجية  
أن يكون في صالحها .

جاء ميعاد الجلسة الثانية وحضر تقريباً نفس الأشخاص الذين حضروا في  
الجلسة السابقة ولكن المشاعر مختلفة ، مشاعر بالأمل يشوبه القلق من ناحية  
"فادي" ومشاعر باليأس التي اعترت وجه "فرحة" حين دخل القاضي ووقف  
الجميع احتراماً له وبعدما أشار للجميع بالجلوس ونادى الحاجب على القضية  
وما هي لحظات حتى فضّ القاضي الظرف الذي فيه رد خبير الخطوط ثم قال

:

- بعد الإطلاع على رأي خبير الخطوط تأكد لدينا صحة العقد المبرم بين  
المتهم والمجنى عليه مما ينفي ثبوت أي جنائية عليه وأما بالنسبة  
لتقرير الطبيب الشرعي الذي يفيد أن المجنى عليها قد تعرضت لحالة  
اغتصاب ، فعلى أدلة البحث الجنائي إعادة النظر في التحقيقات بشكل  
كامل ، والبحث عن الجاني الحقيقي وقد قررت المحكمة الآتي :

أولاً إلقاء القبض على المجني عليها بتهمة البلاغ الكاذب والإضرار بسمعة المواطنين الشرفاء ،

ثانياً : براءة المتهم "فادي عزيز" من تهمة الإعتداء على المجني عليها وتكليف المجني عليها جميع أتعاب الحمامة رفعت الجلسة

ألقي القاضي بتلك الرصاصات المتتالية على مسامع الحضور وانصرف من توه وتحرك بعض العساكر وأمسكوا بـ "فرحة" تنفيذاً لأوامر القاضي .

لم تدرِ فرحة ماذا تفعل ؟ هل تصرخ ؟ لمن تصرخ ؟ من سيسمعها حين تصرخ ؟ ما الذي حدث ؟ من يصدق ما حدث ؟ هي يُقبض عليها وهو يخرج براءة ! كيف ذلك وأي عدلٍ هذا ؟ وبعد ذلك لم ترَ غير أن كل ما حولها بدأ يتكور في دوامات وكأن كل شيء بدأ ينتسخ في نسختين وقاعة المحكمة تدور بها وقدميها لا تحملانها ، تعطلت جميع حواسها غير سمعها فقط استطاعت أن تسمع بعد الأشياء المتفرقة ، مثلاً صرخات من والدتها ، همهمات من بعض الناس بعضها في صالحها والكثير ضدها من أمثلة ( كهن بنات ، إن كيدهن عظيم ) .

تم نقلها إلى المستشفى مرة أخرى فاقدة الوعي ، ما بين دعوات من والدتها بسلامتها وما بين استرجاع وحوقة الحج "ربيع" على ما حدث .  
ما هي إلا سويكات قليلة وخرج الطبيب يقول للجميع :

- شدوا حيلكم يا جماعة ، البقاء لله

وانطلق الطبيب مسرعاً لا يريد أن يعيش مثل هذا الموقف الذي طالما تكرر معه وطالما كرههُ .

انطلقت الوالدة من فورها إلى ابنتها واحتضنتها بشدة وهي تصرخ وتولول عليها قائلة :


- قومي يا "فرحة" حقك عليا يا بتي ، أنا اللي غلطانة مكانش لازم من الأول ، قومي ، قومي يا "فرحة" حقك عليا يا بتي .... يا بتي ، يارب ،

لا يارب لا يارب لا يارب ، أنا مليش غيرها ، هي بتي وأمي وأختي  
وجوزي وأخويا ، يارب سيبهالي ، خدني أنا وسيبها هيا ، اخواتها  
عايزنها يارب ، يارب ، بتي بتي بتي ....

كانت في كل كلمة تخبطها على وجهها علها تفوق ، عقلها لم يتقبل أبداً فكرة  
أن "فرحة" قد غادرت هذا العالم الظالم بكل ما فيه الذي انقلبت فيه الموازين  
، المجني عليه يُزج به في السجن والظالم يُحكم له بالبراءة .  
تمت إجراءات الدفن في وسط صراخات متتالية من والدة "فرحة" واخوتها  
وبعض جيرانها المقربين ، ولكن الفئة الأكثر كانت تصدق ما قيل وما يقال عن  
"فرحة" صدق الجميع ما قيل في المحاكمة ، الجميع اتهمها بأنها كانت تسير  
على حل شعرها وأنها دائماً كانت تعود في منتصف الليل ، الجميع ردد  
الإشاعات بل وأضاف إليها ما يحلو له ، أصبح أهل الحارة ليس لهم حديثاً أو  
شغلاً غير "فرحة" البنت التي أودت بسمعة والدها وتاريخه المشرف وسيرته  
العطرة التراب ، "فرحة" التي تزوجت بدون علم أهلها ، واتهمت زوجها  
بالباطل أنه اغتصبها بعدما رفض أن يعلن زواجهما ، "فرحة" التي إشتَمَّتْ  
نفسها بعد وفاة والدها الطيب ، وفعلت كل ما يحلو لها ، "فرحة" التي لم  
تُبالي بتقاليد ولا بعبادات ولا بتعاليم دينها وانطلقت تسهر كل يوم في الملاهي  
الليلية ، "فرحة" التي لعبت على ابن الرجل الغني حتى أوقعته في حبها  
وتزوجته طمعاً في مال أبيه ، "فرحة" التي (كانت في جرة وطلعت لسره )  
وكانت السيدات بعدما تنتهي من (اللث والعجن ) في سيرتها لا تقولن إلا جملة  
واحدة (يالاه ربنا يرحمها ويتولاها برحمته ويسامحها ) .

ما الذي جنته "فرحة" طيلة حياتها حتى تنتهي حياتها بهذه الطريقة ، حتى  
تظل سيرتها على كل لسان بهذه الطريقة البشعة ، "فرحة" التي كان كل من  
يعرفها يحلف بأخلاقها وجمالها ، ما الذي حدث ؟ ما الذي تغير؟ كيف صدق  
العامة ما قيل بهذه السهولة

\*\*\*\*\*



حفل  
زفاف

دخل "فادي" حجرته لأول مرة منذ شهر ، وألقى بجسده فوق سريره وهو يشعر بلمسه الدافئ الحريري ، يحاول أن يجعل كل ذرة من جسده تلمس هذا الفراش ، يتقلب يمينا ويساراً على فراشه ، وهو يتأوه اشتياقاً له ، كان يشترق لمنزله لحجرته لحياته كلها .  
دخلت والداته قائلة :

- نورت بيتك يا حبيبي

اعتدل وهو يسند ظهره على خلفية السرير قائلاً :

- وحشتيني يا ماما ، أنا مش متخيل إن الكابوس ده خلص خلاص ،

أنا مكنتش مصدق إنني هطلع من المكان القدر الي كنت فيه

سكتت الأم قليلاً ثم قال :

- عملت ليه كده يا "فادي"

أغمض عينيه قائلاً :

- أنا معملتش حاجة يا ماما

ابتسمت الأم قائلة :

- هو أنا الظابط هتضحك عليا ، أنا عارفة كل حاجة ، أنا بس عايزة أقولك كلمتين ....

قاطعها "فادي" :

- عارفهم يا ماما ، وحياتك يا ماما أنا مش فايق لأي كلام ، أنا عايز أقوم أخذ دش وألحق أشوف الدنيا من تاني وحشوني أصحابي وحشتني الحرية

ثم قام من فوره ودخل حمامه ، فضربت الأم كفاً على كف وانطلقت من فورها إلى "عزيز" زوجها فوجدته جالساً في مكتبه بارتياح فقالت له :

- كنت عايزاك في موضوع مهم أوي

تأفف "عزيز" ثم اعتدل في جلسته وقال :

- خير يا "نسرين" ، فيه إيه تاني

- "فادي"

انتفض "عزيز" قائلاً :

- ماله "فادي"

- مالهوش ، بس شكله ناوي يرجع تاني للسهر ، مفيش فايدة

- ليه بتقولي كده

- لسه بكلمه ، قفل الكلام معايا وقاللي عاوز ياخذ دش عشان يلحق

يخرج لصحابه

تأفف "عزيز" قائلاً :

- لسه ما حرمتش يا "فادي" وبعدين فيك يا بني ، ليه مُصِر تحط

راسي في الأرض ، المرة دي جات سليمة محدش عارف المرة اللي جاية

هيحصل إيه

- اتصرف يا "عزيز" أنا مش عايزة أخسر ابني الوحيد
- خلاص أنا عرفت هعمل إيه ، هاخده معايا الشركة وهحطه تحت عنيا ، هشغله في الشركة والشغل ومش هخلي عنده وقت يفكر في أي حاجة من الحاجات اللي كان بيعملها دي
- وتجوزه ، أهم حاجة يتجوز ويتلم ، لما تكونله ست هيقعد جنبها ومفيش غير "علا" بت صاحبك ده ، وعلى فكرة البت عينها منه وبتحبه
- يا سلام ، عرفت ازاي يا أم العريف
- كانت كل يوم بتسألني عليه وراحت زارته مرة في السجن ، ده اللي خلاني أتأكد إنها بتموت فيها ، واللي زي كده هتحطه في عينها وحبها ليه هيبقى أكبر من شهواته ونزواته
- كانت الكلمات الأخيرتان بمثابة الرصاصة التي استقبلها "عزيز" فكرهما بحزن بالغ وقال :
- شهواته ونزواته ، أنا اللي غلظت من الأول ، مش قادر ألومه على حاجة ملوش ذنب فيها ، أنا اللي دلعته زيادة عن اللزوم ، علمته إن كله مباح وكله عادي ، فهمته إنه مفيش زيه في الدنيا وإن كل الناس عبيد عنده ، كل اللي عمله الواد أنا المسئول الأول والأخير عنه مش هوا تنهدت الأم بعدما اتكأت بظهرها على الكرسي قائلة :
- هيفيد بإيه الكلام دلوقتي يا "عزيز" ياما قولتلك شد ع الواد شد ع الواد ، قعدت تقولي سيبه يعيش شبابه ، أهو كان هيضيع شبابه أهو
- ضرب "عزيز" مكتبه بيده ثم قال :
- خلاص ، أنا اللي فيا مكفيني ، كفاية أنا هتصرف

ثم انطلق لتوه خارج مكتبه ليرى "فادي" مرتدياً ملابسه مستعداً للخروج فقال له مستفهماً :

- رايح فين؟؟

تردد "فادي" قليلاً قبل أن يقول :

- خارج أسهر مع أصحابي شويآ

- طب تعالى المكتب عايزك في موضوع مهم

تحرك "عزيز" إلى مكتبه بينما ظل "فادي" واقفاً يبحث عن طريقه ليهرب كعادته منه ولكن والده إلتفت إليه قائلاً :

- تعالى ... ومتفكرش إنك هتهرب كالعادة

اضطر "فادي" أسفاً أن يذهب حيث ذهب والده ودخلا المكتب وجلسا الاثنان بالتقابل على الكرسيان اللذان يقبعان أمام المكتب وبعد لحظات من الصمت قال "عزيز"

- أكيد انت متوقع طبعاً أنا عايزك ف إيه

صمت "فادي" لا يدري ما يقول ؟ فأكمل والده :

- طبعاً انت عارف المشكلة اللي حطيت نفسك فيها وعارف أنا عملت إيه عشان أخرجك منها ، عارف إن المشكلة ديا لو مكانتش اتحلت كانت ممكن توصلك لحبل المشنقة ، تقدر تقولي ساعتها كنت هتعمل إيه

أراد "فادي" أن يتكلم فأشار إليه والده بالسكوت قائلاً :

- سيبنني أكمل كلامي الأول ، منكرش إنك مش لوحدهك اللي غلطان في الموضوع ده ، أنا محمل نفسي الغلط معاك عشان كده أنا قررت أصلح الغلط ده ، من بكرة الصبح هتنزل معايا الشركة وهتستلم شغلك ومكتبك اللي مجهز هولاك من يوم ما اتولدت ، مكتب نائب مدير الشركة

## وقف "فادي" مفزوعاً ثم قال :

- إيه ....
- إيه مستغرب ليه ، ولا عايز تفضل طول حياتك تقضيها صرمحة طول عمرك
- لا يا بابا بس ...
- مفيش بس ، أنا لأول مرة هفرض عليك حاجة انت مش عايزها ، لأول مرة هجبرك على حاجة ومش هتبقى آخر مرة ، أنا ضيعت عمري كله ببنيك مستقبلك ، بعمك الفلوس اللي ممكن تعيشك باقي عمرك في نعيم انت وولادك وولادك ، مستقبلك اللي جيت انت وبنزوة معفنة كنت هتدمره وتدمر حياتك ، "فادي" يا ابني انت ابني ووريثي الوحيد ، انت متخيل كل الفلوس والشركات والأراضي دي كلها بتاعتك ، عشان كده لازم كل تصرفاتك تبقى محسوبة ومدروسة ، مينفعش تحط نفسك في موقف زي اللي حطيت نفسك فيه ده ، يا بني أنا أيامي خلاص قربت وانت اللي هتكمل بعدي
- بعد الشر علي حضرتك يا بابا
- فاهمني يا بني ؟
- فاهم يا بابا فاهم
- برافوا عليك يا حبيبي ، بص بقى المفاجأة الثانية
- نظر إليه ولم ينطق فأكمل "عزيز" :
- يوم الجمعة اللي جاية هتيجي معايا ، نزور عمك "جلال فاضل" انت عارفه طبعاً
- أيوه أعرفه ، بس اشمعنا
- هنخطبك بنته ، عنده بنت حلوة كده ، ما انت تعرفها شفتكم أكثر من مرة مع بعض ، اسمها ...

- "علا"

- أيوه ما انت عارفها أهو ، إيه رأيك ؟؟؟

- يا بابا "علا" دي صاحبتني وعمري ما تخليت إنها تكون مراتي وعمري ..

**قاطعته والده قائلاً :**

- وعمرك ما هتلاقي واحدة زيها ، مال وجمال وكمان بتحبك ، وغير كده أبوها شريكي في معظم شغلي وتجارتني ، يعني الموضوع مفيهوش تفكير ، على فكرة الكلام ده مفيهوش مناقشة ، من النهارده انت تقول حاضر ونعم وبس

**رد "فادي" بانكسار :**

- حاضر يا بابا ... حاضر

\*\*\*\*\*

بدون ما يشعر وجد "فادي" نفسه يجلس في كوشة بجوار "علا" التي رفضت في البداية هذه الزيجة لأنها علمت أن "فادي" مُجَبَّرٌ عليها وأنه لا يريدنا ، نعم هي تحبه ولكن كرامتها أهم من قلبها ، كيف ستعيش مع شخص لا يريدنا ؟ لا يراها إلا صديقة يلهو معها بعض السويغات ، صديقة تعلم كل شيء عن نزواته ، صديقة أرادت أن تعترف له بحبها فأخرجها أكثر من مرة ، وجدت نفسها هي الأخرى أمام ضغوط من والدها ووالدتها تقبل هذه الزيجة خضوعاً لمصلحة الأسرة ومصلحة عمل والدها .

جلس الاثنان بجوار بعضهما في الكوشة وعلى وجوههم ابتسامة ساخرة ، "علا" كانت في الموقف الذي تمنته طيلة حياته وبجوارها أول من دق له قلبها ، ولكن كلما تتذكر أنه مجبرٌ على ذلك تدوس على قلبها وتندب حظها . هي الآن في المشهد الذي طالما تمنته وحلمت به ، ولكن لا تشعر بالفرحة التي كانت تتخيلها قبل ذلك .

انتهت مراسم الفرحة المعتادة بعدما انصرف المدعوون شاكرين لـ "عزيز" هذه الحفلة العامرة بكل شيء ما عدا شيئاً واحداً وهي أن العروسان كل منهما يشعر بأنه يضع قدمه في سجن لا مفر منه .

دخل الاثنان حجرتهما يقدمان قدماً ويؤخران الأخرى ، دخل "فادي" حمامه وبدل ملابسه وجلس على سريره وأمسك هاتفه وبدأ يقلب فيه بطريقه عشوائية ، وفتح (الفيش بوك) وأخذ يدرش مع بعض أصدقائه فتارة يضحك وتارة يتغير وجهه للغضب ، و"علا" ما زالت بفستانها على طرف السرير لم تتحرك ولم تتكلم ، فقط كانت تحاول أن تقنع نفسها بما هي فيه حتى لاحظ هو ذلك فقال لها :

- مش هتغيري هدومك ولا إيه

ردت بتردد :

- هقوم أهو

ثم نهضت ودخلت الحمام ، ولم تستطع أن تمنع دموعها فطالما تخيلت ليلة زفافها ، تخيلت عريسها وهو يخلع عنها فستانها ، يحملها على يديه ، يقبلها في جبينها ، كل ذلك تخيلته ولكن لم يحدث منه شيئاً ، عريسها بعدما بدل ثيابه ، فتح هاتفه وعاش حياته اليومية مع أصدقائه وكأن شيئاً لم يكن وكأن الليلة لم تكن ليلة زفافها .

خرجت من الحمام وجلست بجواره على السرير وفتحت مجلة وأخذت تقلب في أوراقها ولا شك أنها لم تقرأ شيئاً ولم تلاحظ شيئاً منها فقط كانت تبحث في جعبتها عن كلمة تقولها له ، على الرغم من كل الكلمات التي كانت تنوي أن تقولها لعريسها في ليلة زفافها ، وبعد عناء وجدت أخيراً طرف البداية فقالت :

- بالذمة مش دي حاجة تتضحك

نظر إليها بطرف عينيه ولم يرد فأكملت بعد ابتسامة ساخرة وذمة بشفتيها :

- المفروض إن احنا اتنين ليلة دخلتهم النهارده وقاعدين كده كأننا متجوزين من عشر سنين وزهقنا من بعض ، مش غريبة إنني اللي بقالي كتير بتمنى إنه يحصل وأول ما يحصل مبقاش فرحانه بيه أشعل سيجارة بعدما وضع هاتفه جانبا ثم قال :

- انت بتلغي وتدوري على إيه ، بصي يا بت الناس أنا اتجوزتك عشان أبوكي وأبويا بس ، عشان هما ضغطوا عليا زي ما أنا عارف إنهم أجبروكي على كده برضه ولا إيه أغمضت عينيها وأخذت نفساً عميقاً كأنها تنوي أن تغطس في بحر عميق ثم قالت :

- هو أمر واقع واتفرض علينا ، ليه منحاولش نستفيد منه ، انت عارف من زمان إنني بحبك وإنني عايزاك ، بس أنا مش حابة إنك تبقى ليا بالشكل ده ، مغصوب عليا

- بس الحقيقة أنا مغصوب عليك ، ومتحلميش كتيير ف إنني هتغير عشان متتعبيش معايا كتكوتة

ثم أدار وجهه الناحية الأخرى وافتعل أنه راح في النوم ، وهي لم تمنع دموعها أن تنزل حتى بللت وجنتيها

\*\*\*\*\*

## (الله يستر على ولايانا)

كل منا عند موقف معين يظن أن حياته ستقف وأنه لن يستطيع أن يستمر في هذه الحياة لمدة يوم آخر ، خصوصاً عند فقد عزيز أو غالي ، وتمر الأيام ونكتشف أننا لازلنا نعيش وأن هذا العزيز والغالي أضحى ماضي وذكرى نتذكرها أحياناً وننساها الكثير من الأحيان ، نخرط في مشاغل الدنيا وننغمس فيها مؤمنين بمبدأ (الحي أبقى من الميت ) أو بمبدأ (البكا مش هيفيد ) وغيرها من الأقاويل التي تربيّنا عليها .

مرت أيام وأسابيع على رحيل "فرحة" وبدأ الكل ينساها ، خفّ العامة من الحديث عنها و عما حدث لها ، كعادتها البشر وخصوصاً في مجتمعنا هذا ، عندما يحدث أمرٌ جلال تجد الجميع يتحدث في هذا الموضوع ، عندما تقام مباراة مهمة لكرة القدم ، تجد الجميع وكأنهم أمهر المحللون الرياضيون وكأنهم ولدوا في ملعب لكرة القدم ، عندما يحدث أمر سياسي هام تجد الجميع محلاً سياسياً وتجد الجميع لديهم آرائهم والتي يظنون أنها الأسلم والأصلح وأنا ما دونها تُرَاهات .

كذلك كانت قصة "فرحة" بعدما تناقلتها ألسنة الجميع ، بدأ الكل يمل منها ويغيرون المواضيع عندما تأتي سيرتها تارة بقول (الله يعافينا ) وتارة بقول (الله يستر على ولايانا ) ومن ذلك القبيل كثيراً ، الكل تناسى القصة ، تناسى "فرحة" نفسها وكأنها لم تعش بينهم يوماً ، وكأن معظمهم لم يلقبها ب"ست الحزن والجمال" ، ألم يتمنى معظمهم ابنة مثلها قبل ذلك ؟ ، ولكن هو ذلك طبع البشر ينسون كل الجميل بعد أول موقف سيء يروونه منك .

حاولت والدة "فرحة" أن تفتح دكان البقالة مرة أخرى ولكن كسدت سوقه لأنه تمّ فتح سوپر ماركت كبير بجواره ، فكان الكل يشتري منه ، فلم يتبقى

لهم إلى بعض الجنيهاً التي يتقاضونها كـ "معاش" من الحكومة ، بعض  
الجنيهاً التي لا تكفي حتى متطلبات المنزل الأساسية .

\*\*\*\*\*



# ٢٩

## عادت ريمة لعادتها القديمة

استسلم "فادي" لتفكير والده وبدأ يذهب معه الشركة كل يوم وينصرف معه في نهاية اليوم ، ساعات مملة رتيبة يقضيها في الشركة لا يفعل شيئاً غير أنه يأكل ويشرب ويشاهد تلفاز قد أحضره إلى مكتبه كنوع من أنواع الترفيه ، هاتفه لا فائدة منه في مثل هذا الوقت خصوصاً أن معظم أصدقائه في هذا الوقت نائمون بعد سهرة كان على وشك أن يُحرم منها ولكنه استطاع أن ينظم وقته ويرتب حياته ، يسهر ليله مع أصدقائه وفي الصباح يذهب إلى شركة والده يقوم بالأعمال التافهة التي كلّفه بها وباقي وقته في النوم ثم يذهب إلى المنزل ويكمل نومه إلى أول الليل ثم يكرر ذلك يومياً في رتابة وملل ولكن هذا يرضي جميع الأطراف ما عدا طرفاً واحد وهو "علا" زوجته التي كانت في تعيش في سجن بدون سجان ، اسمها حرم "فادي عزيز" زوجها الذي لا تراه إلا بعض دقائق فقط حين يرجع من الشركة مع والده لتناول طعام الغداء سوياً وهذا هو الوقت الذي تتجمع فيه الأسرة كاملة وبعدها ينطلق "عزيز" لمتابعة باقي عمله وتنطلق زوجته إلى نواديها وأصدقائها و"فادي" يذهب إلى نومه كعادته وهي لا تدري ماذا تفعل ؟ لا شيء يملأ

فراغها ، كانت تطلب منه أن يصطحبها معه في سهراته كما كان يحدث قبل زواجهما فكان يرفض ، وفي يوم قررت أن تذهب معه وتُصِرُّ على رأيها ، فعندما استيقظ وجدها تلبس ثيابها ومستعدة للخروج فاقترب منها قائلاً :

- رايحة فين في وقت زي ده

اقتربت منه بدلع لم يعتاده منها :

- رايحة معاك ، عندك مانع ؟؟؟؟

نظر إليها بطرف عينه قائلاً :

- امشي يا ماما اقلعي هدومك وعدي ليلتك على خير

ثم دخل الحمام وأخذ حماماً سريعاً وارتدى ملابسه وهم بالخروج فأوقفته قائلة :

- أنا قوتل هخرج معاك ، ورجلي على رجلك ، أنا زهقت من القعدة

لوحدي هنا ، مش لاقية حاجة أعملها ، انت يا إما بره يا إما في الشركة

يا إما نايم ، وأنكل "عزيز" طول اليوم بره ، وتنط برضه طول اليوم

بره ، وأنا قاعدة لوحدي أعمل إيه يعني

قال بسخرية :

- اعملي شاي واشربيه

هم بالانصراف مرة أخرى فأوقفته قائلة :

- يا "فادي" أنا مش قادرة أستحمل أكثر من كده ، وبعدين فيها إيه لما

أخرج وأسهر معاك ، ما أنا طول عمري بسهر معاك

- لا يا ست هانم ، الموضوع يفرق دلوقتي ، انتي مرات "فادي عزيز"

وبتشيله اسمه ، يعني مينفعش عملي غير الي بقولك عليه وبس ،

وأنا قوتل كلامي ومش عايز مناقشة ، ولا انتي بتحبي ترغي كثير

- وأنا قوتل رجلي على رجلك يعني رجلي على رجلك ومش هرجع في

كلامي ، أنا عايز أعرف انت خايف أسهر معاك ليه

ضحك "فادي" بشدة ثم قال :

- خايف ... أنا أخاف منك انتي ... انتي اتجننتي ولا إيه
  - آه اتجننت يا "فادي" ، انت مدام مش عاوز تاخذني بيق رجعت تاني للشقة إياها وسهراتك المشبوهة ، عادت ريما لعادتها القديمة
  - آه رجعت يا "علا" تحبي تيجي معايا عشان تساعدي البنبت اللي جايينها عشان متحسش بالوحدة
- نظرت إليه ولم تستطع أن تمنع دموعها من النزول فقالت :
- هتفضل طول عمرك قذر وبتلم على القذارة اللي زيك
- أسكتها بصفعة على خدها جعلت حلقها الذي ترتديه يسقط أرضاً من فرط قوة الصفعة وغادر المكان دون أن يبالي بما فعل .

ذهبت "علا" إلى سريريها ومخدها التي احتضنتها بشدة وهي تبكي بطريقة هستيرية ، لا تصدق ما بها والحال التي وصلت إليه ، كيف يعاملها بهذه الطريقة ؟ ولماذا ترضى هي بهذه العيشة ، فهضت من فورها وجمعت ما طالته أيديها من ثياب ووضعته في حقيبتها وانطلقت إلى منزل أبيها ، حيث كانت ملكة البيت وسيدته الأولى ، انطلقت بسيارتها ووصلت منزل أبيها وفي وسط تساؤلات من والدتها والداها بكلمة واحدة : (إيه اللي حصل ) لم ترد وصعدت إلى حجرتها وأغلقت بابها عليها ، وانخرطت في البكاء فضّلت أن تبكي في حجرتها وعلى سريرها الذي شهد لحظات ميلاد ذلك الحب الذي كان سبباً في ذلها وإهانتها وكسرة نفسها ، الحب الذي تمنته كثيراً وجرحها بلا مبالاة وعنده وفجوره ، ظنت أنها ستستطيع أن تغيره وتجعله كما تريد ولكنها نسيت أن بعض الظن إثم .

تمادى "فادي" فيما كان يفعله ، ورگنّها هي في آخر زاوية من زوايا حياته ، زاوية لا يراها فيها بعيداً عن ناظريه ، كانت لا تعلم أهو يقصد ذلك أم أنه فعل ذلك بدون قصد ، هل تعمّد أن يذلها لأنها كانت سبباً في فشل خطته ،

الخطة التي خطها لإيقاع "فرحة" في شبابه ، كل ما تعلمه أنه ستطلب من والدها أن يطلقها منه !!! نعم ستطلب ذلك بالرغم من أنها لا تريده ولكن لا فائدة من وجودها مع شخص لا يراها إلا في آخر زاوية من زوايا حياته ، شخص يراها فقط المرأة التي تحمل اسمه ، شخص لا يكلف نفسه حتى الإبتسامة حين يقابلها .

مرّت الليلة الأولى عليها بسلام بعدما فضّل والديها أن يتركها حتى تهدأ ، وبالفعل في صبيحة اليوم التالي استيقظت "علا" بنشاط وقد أعدت فطاراً بسيطاً وجلست تأكله ، حتى أن أحد الخادمت عرضت عليها أن تُجَهِّزَ لها الطعام فأبت إلا أن تعدّه بنفسها .

جلست والدتها بجوارها في حالة من الدهشة وفي رأسها كثيراً من التساؤلات فقالت لها :

- نورتي بيتك يا بنتي ، بس ...

قاطعتها "علا" بنظرة خبيثة ثم قالت :

- بس إيه اللي خلاني أسيب بيت جوزي في وقت زي ده ، مش هو ده اللي عايزة تقوليه يا ماما

ألقت من يدها لقمة كانت تنوي أن تضعها في فمها و نهضت من على المائدة وتحركت ناحية كنبه وخلفها والدتها فقالت لها :

- يا بنتي ، احكي لي طيب ، إيه اللي حصل

- كالعادة يا ماما هتطلعيني غلطانة ، وهتقوليلي حافظي على بيتك وجوزك ، وكل الرجالة كده ، فأنا بقولك وَفَّرِي على نفسك كلام انتي قولتيه ميت مرة عشان المرة دي غير كل مرة ، أنا زهقت وتعبت وقرفت

تنهدت الأم دلالة عن عدم الارتياح وقالت بغضب :

- هو احنا مش هنخلص من الموال ده ، عارفة أبوكي كان مستحلفك لولا إني حوشته عنك ، بيقول إنك مش ناوية تجيبها لبر وعلى سيرة والدها وجداه يقف أمامهما قائلاً :
  - خير يا "علا" ، مش كنا اتكلمنا قبل كده يا بنتي وفهمتك كل حاجة ، هنعيده تاني
  - يا بابا مش قادرة أكمل ، بيعاملني وحش ، وحش إيه ... ده مش بيعاملني أصلاً ، كأني كرسي أو كنبه محطوطة للديكور في البيت ، كل ما أبص ف عنيه أحس إنه مغصوب عليا ، والي زاد وغطا البيه بيعترفي إنه بيعرف ستات تانية عليا ، وقالهالي بعضمة لسانه إنه لسه بيروح الشقة اللي كان بيروحها قبل الجواز
- قال الاب غاضباً :

- انتي حمارة مبتفهميش ، قولتك استحملي شويا ، عايزة تدمري كل حاجة ، انتي تقومي ترجعي بيت جوزك وتعذريه كمان
- لم تدر ماذا تقول له ؟ هل هذا حقاً والدها ؟ والدها يرضى بكل سهولة إهانة كرامتها بهذه الطريقة ، يبيعتها ثمناً لمصالح شخصية ، لا يبالي بإحساسها أو مشاعرها ، لم تجد في عالمها من يقف بجوارها ويساندها ويشعر بها .
- بالفعل رضخت لرأي والدها ورجعت منكسرة خاطر حيث سجنها ومحل تعاستها وعندما رجعت وجدت "فادي" في انتظارها فلم يتحدث ولم يسأل لما تركت المنزل فقط نظر إليها نظرة انتصار وابتسامة ساخرة ، فانطلقت من فورها إلى حجرتها .
- هذه المرة لم تبك ولم تندب حظها فقط جلست أمام المرآة تتأمل وجهها الشاحب ، فوجئت بما وجدت ، لقد وجدت وجه تاني غير وجهها ، وجه سيدة في الخمسين وليس فتاة في مقتبل عمرها ، فتاة قد كان كل من يراها يحلف

بجمالها ، فتاة كان عُشاقها يرتمون تحت قدميها ، كان العشرات يتمنون منها نظرة أو حتى كلمة ، ظلت ترثي حالها وما وصلت إليه .  
نهضت من أمام المرآة وجلست على سريرها وأمسكت هاتفها علَّها تجد ما يسليها ، فتحت حسابها على " الفيس بوك " وقد كانت أغلقته من فترة وبدأت تقلب في منشوراته بملل ، ولكن وجدت في ذلك الصبر والسلوان عما هي فيه .

\*\*\*\*\*



تعمّقت "علا" في عالم "الفييس بوك" فهو عالم جميل ، يجذب إليه الضالّين الذي لا يجدون من يصادقهم في الحقيقة فيجدوا فيه مبتغاهم ، بدأت تشترك في أكثر من مجموعة ، معظمها تحت عناوين مزيفة غرضها جذب الضائعين من أمثلة "كلام في الحب" أو "مشاعر حائرة" ومعظم هذه المجموعات على "الفييس بوك" يديرها شباب وغرضهم الأساسي التعرف على الفتيات من أجل إقامة علاقات إلكترونية مشبوهة نادراً ما تسفر عن علاقة جادة تنتهي بزواج.

وجدت "علا" مبتغاهما ، كانت تشعر بالسعادة عندما تكلم شاباً حتى يقع في حبها ويغرق في بحر هيامها حتى إذا وصل حبها في قلبه آخره كانت بدون أسباب تحذفه من حسابها بخاصية "بلوك" حتى تشفي غليلها ، من من ؟ لا تدري ، لما تفعل ذلك أيضاً لا تدري ، ربما لمجرد التسلية وإضاعة الوقت .

أخيراً وجدت "علا" ما يؤنس وحدتها "الفييس بوك" وجدت فيه ضالّتها باسمها المستعار "وردة البستان" ، كانت مشهورة بين شباب "الفييس بوك" بأنها سفّاحة الرجال لأن كل من يقرب منها حتماً نهايته ليست سعيدة .  
كان "فادي" يشك في أن في الأمر شيئاً ما خصوصاً أنها غيّرت معاملتها معه ، أقصد لم تعد تناقشه كما في السابق ، لم تعد تؤنّبه على سهراته وتأخره وكان ذلك بالنسبة له مريحاً إلى حد ما .

لم يناقشها في شيء وذلك ما أشعله نارها أكثر وأكثر ، لهذه الدرجة لا تفرق معه لهذه الدرجة من اللامبالاة بها وبمشاعرها ، أي رجل هذا الذي لا يغير على زوجته ، يراها مشغولة بهاتفها ليلاً ونهاراً ولا يسألها مع من تتحدث ، وكأن جينات الغيرة هو لا يمتلكها ولا يعرف عنها شيئاً .

في واحدة من تلك الليالي بعد مناقشات طويلة مع أحد أصدقائها على "الفييس بوك" استطاع أن يقنعها بأن تخرج لتقابلة في أحد الملاهي الليلية ووافقت على مضض وأقنعت نفسها بأنها ستخرج وتعود قبل أن يعود "فادي" ، وبالفعل خرجت مع ذلك الشاب ورقصت وشربت وفرحت وعادت ونامت وكأن شيئاً لم يكن ، وجاء "فادي" فتصنّعت النوم ومرت الليلة بسلام .

شجّعها ذلك على تكرار تلك الفعل اليوم التالي والتالي والتالي حتى أصبحت تقريبا تخرج كل يوم وعندما تمل من أحدهم كانت بسهولة تجد غيره حتى كوّنت شبكة من العلاقات الشبابية ، كل يوم كانت تجلس في حيرة ، يا ترى مع من ستخرج هذه الليلة ، من عليه الدور في أن تخرج معه ، كانت كلما اختلت بنفسها يؤنّبها ضميرها على تصرفاتها تلك ، ولكن كان تُسكته ببعض الحجج التي تختلقها لنفسها لتبرر تصرفاتها ، قدرها أن الشخص الوحيد الذي أحبته يفعل بها كذلك ، كان لابد أن تفعل هي كذلك والبادي أظلم .

بضعة أسابيع وهي على هذا الحال ، لا جديد ولكن تلك الليلية حدث ما كانت تخشاه أو تنتظره ربما ، رآها "فادي" ترقص مع أحدهم في أحد الملاهي

ويضحكان سوياً ، ويتميلان وهو يضع كلتا يديه في وسطها ، فجأة وجد الدماء تغلي في رأسه ، لا يعلم أهي غيرة أم ماذا ؟ ، ولكن طباعه الشرقية تُحَتَّم عليه عند رؤية موقف مثل هذا أن يتصرف ، انطلق إليها كطلقة الرصاص التي خرجت من بندقية قناص محترف تعرف بالضبط هدفها ولن تخطئه .

عندما رأته قادمٌ إليها لم تدرِ ماذا تفعل ؟ فقط وضعت تلك يديها على وجهها وكأنها تواجه شبحاً لا محالة ملتهمها .

بقبضة من يده ضرب الرجل الذي كان يرقص معها ثم اقترب منها وبعد ثواني من النظرات رأت فيها عينه وكأنهما تحولتا إلى جمرتين من جهنم ، أمسك بذراعها وضغط عليه حتى أوشكت أظافره أن تقتحم جلدتها وتنفذ منها وتسلم على بعضها .

شعرت بقسوة قبضته لها فصرخت فضربها بكفه ثم سحبها خلفه إلى السيارة وألقى بها داخلها وانطلق بسرعة البرق إلى المنزل ، وعندما دلفا البوابة الخارجية أوقف السيارة ، فنزلت مسرعة وجرت إلى غرفتها ، فأغلق باب السيارة بعنف وانطلق خلفها كمن يُجهز نفسه لمعركة عنيفة مع الأعداء . وصلت هي قبله إلى حجرتها وأغلقت الباب خلفها بالمفتاح وجاء هو خلفها مسرعاً حاول أن يفتح الباب فوجده مغلقاً فقال بصوت بدا منه الشر :

- افتحي

لم يأتيه رداً من الداخل فكَّر كلمته مرتين أو ثلاثة ، وبعدها سمع صوت تكات المفتاح تدور داخل الباب ففتح الباب فوجدها تجري حتى وصلت إلى آخر ركن في الغرفة وتبدو عليها علامات الخوف وظل ينظر إليها بقسوة وتنظر إليه بخوف ، وكل منهما يبحث عما يقوله فقال هو بهدوء لا يعرف من أين أتى به ؟ :

- ممكن أعرف الي حصل ده معناه إيه ومن امتا ؟

طريقته في الكلام طمأنتها قليلاً فقالت بتردد :

- أنا زهقت من القعدة ، وانت مش بترضى تخرجني معاك ، أعمل إيه  
يعني  
وجد نفسه يسألها قائلاً :

- مين الزفت اللي كنت بترقصي معاه ده ، وازاي يحط إيداه على وسطك  
كده  
لم تستطع أن تمنع ابتسامته وجدت طريقها إلى شففتيها ، فقد شعرت بالفرحة  
حين شعرت في نبرة كلماته ببعض الغيرة عليها ، اقتربت منه واحتضنته وقالت  
بحب :

- انت بتغير عليا  
انتابته بعض القشعريرة حين لامست يديها خده وشففتيه وقال كمن يصحح  
خطأ :

- لا مش مسألة غيرة ، بس منظري إيه قدام الناس لما يشوفوا مراتي أنا  
"فادي عزيز" بترقص مع واحد غريب ، انتي نسيتي انتي مرات مين  
ولا هتستعبطي  
تلاشت ابتسامتها بعد كلماته تلك ، فتأففت بغیظ وتركته وهمت بالانصراف  
من أمامه فأمسك بذراعها قائلاً :

- أنا مش بكلمك سايباني ورايحة فين  
وقفت أمامه في نفاذ صبر وتعلم أنه ينوي أن يُملي عليها بعض التعليمات التي  
لا شك أنها تعرف ماهيتها فقال لها :

- لو عرفت إن اللي حصل ده اتكرر تاني هيبقى آخر يوم في عمرك ،  
انتي فاهمة ولا لأ

تركته بعدما أبعدت يده عن ذراعها بالقوة وألقت بظهرها على السرير وعندما  
رأها كذلك جلس بجوارها ، ما بين سخط على ليلته التي ضاعت بسببها وما

بين بعض نظرات الإعجاب التي تفحص بها جسدها كله ، كانت هذه مرة من المرات القليلة التي يحن عليها فيها ويعطيها بعض حقوقها كإمرأة متزوجة ولكن لم تكن تشعر لها بحلاوة لأنها بدون احساس بدون مشاعر فقط كما تفعل الحيوانات .

أنجز "فادي" مهمته بنجاح وأخرج سيجارة وأشعلها وأخذ ينفث دخانها غير مبالياً بكتلة المشاعر الملقاة بجانبه ، كان يفكر بطريقة حيوانية فقط يحتاجها كبديل كما حدث في هذه الليلة ، عندما لا يجد مبتغاه في الخارج يبحث عنه في داخل المنزل على عكس كل البشر .

قررت بعدها "علا" ألا تخرج من البيت لتلك السهرات مرة أخرى ولكن علاقاتها الإلكترونية ما زالت مستمرة بل زادت وتطورت أكثر مما كانت عليه .

لا تنسى تلك الليلة التي كانت تجلس على سريرها تقلب في صفحات الفيس بوك شعرت بملل ، تركت الهاتف على السرير ونهضت تبحث عن شيئاً تأكله فانتبهت على صوت رسالة على برنامج "الواتس أب" .

وجدت يدها تلقائياً تفتح الهاتف وتفتح البرنامج لترى رسالة من رقم مجهول نصها :

- " ازيك ، أنا شفت كثير بس مشفتش جمال زي كده وصعبان عليا الجمال ده ما يلاقيش اللي يقدره "

لم تدري هوية الشخص ، فكان الحل هو البحث عن هويته في تطبيقات الأندرويد التي تكشف عن هوية المتصل فلم تصل لشيء ، كاد الجنون أن يقتلها ، من ذلك الجريء الذي يعرف رقم هاتفها ويرسل لها مثل تلك الرسالة الجريئة والتي تدل على أن صاحبها يعرف عنها الكثير جداً ، كان من الممكن أن تضع الرقم في القائمة المحظورة ولكن حالة الفراغ التي تعيشها جعلتها

تقرر أن تخوض تلك الغامرة ، وجدت نفسها تفتح الشات بينها وبين هذا الرقم وتكتب :

- " انت مين ؟!!!"

لم تنتظر قليلاً حتى جاءها الرد سريعاً :

- " أنا حد جايلك وفتح ليكي أبواب السعادة "

ابتسمت ثم كتبت :

- " انت مين ؟؟؟ وعايذ مني إيه ؟!! "

انتظرت حتى ظهرت العلامتين الزرقاوين دليل على أن الطرف الآخر قد قرأ الرسالة ولكنه لم يرد ولم يظهر أعلى الشاشة أنه يكتب ، وكأنه أراد أن يلعب على أوتار الصبر لديها فكتبت له :

- " لو مقولتش انت مين ، واتكلمت بصراحة أنا هعمك بلوك "

قرأ رسالتها فزادت ضربات قلبها حين رأت أنه يكتب الآن وبعد قليل لم تصلها إلا رسالة تحتوي على بعض الإيموشنات الضاحكة فكتبت له :

- " انت مستفز "

رد بسرعة :

- " وانتي قمر ، ومفيش زيك "

كأي فتاة في سنها أعجبتها جداً الكلمة فابتسمت ولم تدري ماذا تكتب له ؟ ، فنهضت ووقفت أمام المرآه وكأنها تتأكد من الكلمة ، تتأكد من أنها ما زالت جميلة فاتنة ، وقفت أمام المرآه وأخذت تنظر لتفاصيل جسدها بإغراء كادت أن تنساه ، لقد حققت الرسالة ما ينشده صاحبها وما يقصده ، أرادها أن ترى أنها ما زالت صغيرة في ريعان شبابها .

ذهبت مرة أخرى إلى سريرها وأمسكت بهاتفها وفتحت الواتس أب فوجدته ما زال متصلاً فاندعشت لم لم يبعث شيئاً آخر ، وجدت نفسها تسبه وتلعنه لا تدري لماذا ؟ جلست تفكر ماذا تفعل ؟ وجدت نفسها تكتب " انت مين ؟ "

وقبل أن تضغط على زر إرسال مسحت ما كتبته ، وجدت نفسها تكتب "عايز مني إيه " وقبل أن تضغط أيضاً إرسال مسحت ما كتبه فوجدت تحت اسمه كلمة " يكتب ...." فعلمت أنه يكتب لها شيئاً فانتظرت وانتظرت وهو ما زال " يكتب ..... " ترى ماذا يكتب ؟ شعرت بالملل بعد الدقيقة الأولى والثانية والثالثة وهو ما زال يكتب وأخيراً وجدت رسالة نصها :

- " محتارة طبعاً تكتبيلي إيه ، كتبتني أكثر من جملة ومسحتها .....  
صح "

وجدت نفسها تكتب :

- " لا مش صح ... انت عايز مني إيه "

- " يبقى أنا صح ..... المهم أنا عايزك تديني فرصة أعرفك على نفسي  
أكثر وصدقيني مش هتندمي "

لم تدرِ ماذا تكتب له؟ ، هل تخبره أنها موافقة ، أم ترفض تلك الصداقة المريبة المجهولة ولكنه لم يدعها تفكر كثيراً ، وصلتها منه رسالة أخرى نصها :

- " اسمي أدهم ، صحابي القرييين مني جداً بيقولولي يا أدهومة وانتي  
كمان شكلك قريب هتقوليلي كده "

ابتسمت ابتسامة غريبة وكتبت له :

- " يا سلام .... "

" انت مغرور أوي على فكرة "

رد بسرعة :

- " لا .. دي ثقة بالنفس "

" ممكن أكمل كلامي "

صمتت قليلاً قبل أن تكتب :

- " أوك .... كمل "

كتب لها بسرعة :

- " كنت متأكد "

" أنا متابع الصفحة بتاعتك على الفيس جدا وعاجبني المحتوى  
بتاعها جداً بس فيه ملحوظة صغيرة

بتلقائية كتبت :

- " إيه ؟ "

- " بالرغم من إنها معظمها بوستات رومانسية بس انتي محرومة جداً  
منها ، بالرغم من بوستات الضحك والهزار الكثيرة الي بتنزليها إلى  
إنك انتي من جواكي حزينة حزينة أوي !! .... طبعا هتسأليني عرفت  
مزين ؟

لم ترد غير برسالة مضمونها :

- " ..... "

فهم هو ما تقصده بهذه النقاط فبعث لها :

- " إحساسي قالي ، وأنا إحساسي مبيخشب أبداً "

وبعدها ظهر لها أنه غير متصل الآن، فانتظرت وانتظرت حتى غلبها النوم  
فنامت ، لم تدرِ كم من الوقت مرَّ عليها وهي نائمة ولكنها عندما استيقظت  
وجدت نفسها تفتح هاتفها لترى هل بعث رسالة أخرى أم لا ؟ ولكن خاب  
ظنها فإسمه كان آخر ظهور له على البرنامج (خاصية من خواص الواتس أب  
) عند آخر رسالة بعثها لها .

زاد حُنفها عليه وغيظها منه ، فَكَّرت أن تتصل به ولكن عزة نفسها منعتها  
عن ذلك .

مر يوم أو يومين ولا جديد ، كانت كل دقيقة تفتح هاتفها ربما يكون قد بعث  
بشيء آخر ولكن لا جديد ، لم يفتح هاتفه مرة أخرى ، ولم يبعث بأي رسالة  
أخرى ، كانت تستغرب نفسها وتتساءل ، كيف استطاع هذا الشاب أن يستولي

على معظم تفكيرها ؟ بمجرد أن بعث لها برسالة أو برسالتين غامضتين فعل بها كل هذا .

في اليوم الثالث وهي تقلب في صفحات الفيس بوك وجدت طلب إضافة من حساب اسمه غريب " نسيب دراكولا " ، فتحت تلك الصفحة لترى محتواها فلاحظت شيئاً غريباً ، معظم بوستات الصفحة تتحدث عن أنه " روميو القرن الحادي والعشرون " وأنه ساحر معظم نساء العالم ، كل منشوراته تتحدث عن ثقته بنفسه ولكن ما جذبها أكثر هو المنشور الأخير على الصفحة ، كان نصه " ذلك الحب الحقيقي الصادق الصافي الطاهر الذي يلامس الروح ويتغلغل فيها بلطف ورقة أو فجأة بدون مقدمات وإستاذان .. إنه فعلاً .. الحب المستحيل الذي أصبح ليس له وجود إلا في كتابات وخيال الشعراء وأحلام المراهقات أما الواقع فإنه إنقرض ... ومنذ قرون "

كانت "علا" تكره أصلاً الحديث باللغة العربية ولا تفهمه ولكن وجدت نفسها تقرأ المنشور وتعيد قرائته أكثر من مرة ، شعرت بأنه موجه إليها وزاد من حيرته أول تعليق على المنشور لأحد أصدقاء صاحب المنشور يقول له " حب جديد ولا إليه يا أدهومة " وكان رد صاحب الصفحة " ملكش دعوة " فهمت "علا" أن صاحب الصفحة هو ذلك الشخص الذي يحدثها على الواتس فلم تتردد لحظة في قبول الإضافة وبعدها بثواني وجدت رسالة نصها :

- " شكراً على الإضافة "

- " العفو على إيه "

- " وحشتيني على فكرة "

لم تصدق ما قرأته ، كيف له أن يقول لها ذلك لم تدرِ ماذا تقول له؟ فسكتت فوجدت رسالة على الواتس من نفس الشخص نصها :

- " طب خيلنا هنا أحسن "

- " انتا عايز مني إيه "

- "انت مش انتا ، انت مفيهاش ألف يا متعلمين يا بتوع المدارس"  
 ابتسمت فوجدت رسالة أخرى نصها :

- "بتضحكي صح ، أنا عارف إني دمي خفيف"

- "غلس على فكرة ، ومضحكتش "

- "طب عيني في عينك كده "

- "هنعملها ازاي دي يا فالح "

أرسل لها بعض الرموز التعبيرية التي تحتوي شكل العين فأرسلت إليه بمثلها  
 وبعدها بعض الرموز الضاحكة فأرسل :

- "أيوه يا شيخة اضحكي بلاش كناية "

- "تشكر يا ذوق ، قصدك إني أنا كئيبة يعني "

كان الرد الطبيعي هو أن يعتذر عن تلك الكلمة ولكنها بعث لها قائلاً :

- "هو لحد المرة الي فاتت كنتي كئيبة جداً بس النهارده بدأنا نفك أهو  
 ، ودي حاجة حلوة "

- "يا سلام ، بس بوستاتك حلوة على فكرة "

- "بصراحة ... مفيش أحلى منك "

أعجبته الكلمة ، فسكتت فسألها :

- "مالك ؟ ساكتة ليه ؟"

- "مش ملاحظ إنك أوفّر حبة "

ظهر أمامها أنه قد قرأ الرسالة ولكنه لم يرد بعثت له "؟؟؟؟" قرأها ولم يرد  
 وبعد قليل وجدت هاتفها يرن ، كان هو بعد تردد أجابت قائلة :

- ألو

- صوتك حلو برضه

احمّرت وجنتاها وسكتت فقال :

- فيه إيه تاني ؟

- كسفتني
- الصلاة ع النبي
- عايز إيه ، وياريت من غير لف ودوران ، انت فجأة اقتحمت حياتي وأنا مش فاهمة حاجة
- والله ولا أنا فاهم ، بس عارفة لما حد يشوف حد ويدخل قلبه من أول مرة ، يحس إن دي اللي ياما بيدور عليها
- كانت مع كل كلمة تشعر بقلبها يدق بشدة ، تعلق ضرباته ، فقالت له :  
أنا ؟؟؟!!!

سكت قليلاً وبعدها قال بإلقاء شعري جعلها تطير بدون جناحين :

- قاذني الشوقُ إليك .. يا أملي الجميل .. أعلم أن عشقي إليك كفجرٍ يعشقُ شمسَ الأصيلِ حُبَّ مستحيلٍ .. وقلبٌ عليلٌ ... وما عدتُ أرضى بغيرك اليومَ بديلٍ .. فأنتِ من إمتلاكِ شغافِ القلبِ .. وأنتِ للروحِ عديلٌ .. حبٌّ مستحيلٌ .

للمرة الثانية تجد حلاوة في كلمات باللغة العربية الفصحى وتفهمها وتحبها وهي التي كانت لا تطيقها ، سكتت لا تدري ماذا تقول ؟ فقالت :

- وبعدييين ؟
- وبعدين إيه ؟
- ممكن تبطل كلامك ده ؟
- حاضر

كان بداخلها شعور متناقض تجاه هذا الشخص ، كان من الممكن أن تسايره حتى يقع في شباكها وتتركه كما فعلت مع غيره ولكن هذه المرة يبدو أنها هي التي وقعت في شباكه ، لا تدري هل من حق قلبها أن يدق مرة أخرى لشخص ما ، وما آخر ذلك الشعور الغريب ، وما أساسه أصلاً ، شخص كلمها منذ يومين

أخبرها أنه معجبٌ بها ، لماذا تتلف لكلماته بهذه الطريقة ؟ أسئلة كثيرة ليس لها إجابات محددة .

أغلقت الخط معه بعد نصف ساعة من الحديث ، تحدثا في كل شيء ، فوجئت من أنه يعرف أنها متزوجة ، فوجئت بأنه يعرف من زوجها وسلطة والده وجبروته ومع ذلك مُصر أنه يُكِّم معها ، فوجئت من أنه يراقبها من فترة وأنه لا يعجبه ما تفعله لتهرب من واقعها المرير .

بعد بضعة أيام أصبح "أدهم" أقرب إليها من نفسها يتحدثان تقريبا معظم اليوم ، يخبرها بأدق تفاصيل يومه ، وهي أيضاً تشاركه جميع تنفساتها جميع شهقاتها وزفراتها ، تقضي معه معظم يومها إما على الهاتف يتحدثان أو على أحد تطبيقات التواصل الاجتماعي .

في مرة من المرات وجدت هاتفها يرن وكان هو فأجابت :

- ألو
- بحبك
- كده مرة واحدة
- امال على مرتين ، وبعدين إيه البواخة دي ، في حد لما يتقاله بحبك يرد بكده
- امال يرد ازاي
- يقول وأنا كمان ، أنا أكثر ، الرد بتاع الناس الطبيعي
- بس احنا وضعنا مش طبيعي

تأفف "أدهم" ثم قال :

- رجعنا للكلام اللي مفيش منه أي فائدة ، يا "علا" أنا بحبك ومش هقدر أعيش مع غيرك ، ورافض كل حياتي لو انتي مش فيها
- بس أنا مش ليك يا "أدهم" مش ليك ، ولازم تعرف كده كويس ولازم تتعامل معايا على الأساس ده

- كده انتي بتموتني حبنا
- الحب ده لازم يموت ، مكانش أصلاً مفروض إنه يتولد ، مكانش مفروض يبقى موجود ، لأنه محكوم عليه بالموت من يوم ما اتولد بس أنا عبيطة ، كان لازم أأخذ بالي من ظروفي قبل ما أسمح لقلبي يتدبس في حاجة زي دي ، لازم نفوق يا "أدهم"
- نفوق من إيه ، أنا عايزك وممكن أحارب الناس كلها عشان خاطر كده مش كلام وبس ، أنا مستعد أعمل أي حاجة عشان خاطر كده
- كانت دائماً تذكره بظروفها السيئة ، بزوجها الذي لن تستطيع أن تنفصل عنها ولكنه في كل مرة يخبرها بأنه راضٍ عن كل ظروفها وأنه سيقف بجوارها حتى تتحرر منه .

\*\*\*\*\*

- حاولت أن تتحدث مع "فادي" بلين وتطلب منه أن يطلقها ولكنه لم يقبل أكثر من مرة وكان دائماً يقول لها :
- اوعي تفتكري إني دايب في غرام سيادتك ومقعدك جمبي عشان أتملأ في جمالك ، قولتلك من الأول أنا اتجوزتك عشان أرضي بابا بس
- وأنا زهقت مش قادرة أكمل ، طلقني أبوس ايدك ، اعتقني لوجه الله ضحك "فادي" ضحكة عالية ثم أوما برأسه بالرفض قائلاً :
- لأ ..
- وعاود ضحكاته الساخرة وتركها وانصرف ، تاركاً لها جبلاً من الهموم يُثقل ظهرها ، كانت تشعر بأنه يتفنن في جرح مشاعرها ، تظن أن يفكر قبل يا يحدثها وينتقي الكلمات الجارحة التي تذبح و تقتل .
- أرادت أن تنتقم منه ، ولكن ماذا تفعل ؟ وجدت يدها تمسك بالهاتف وتطلب رقمه فأجاب وكأنه ينتظر فقالت له :
- انت قاعد على الزرار ولا إيه ، إيه السرعة دي ؟

قال لها بسرعة :

- هتصدقيني لو قولتك إني حسيت إنك هتكلميني ، فمسكت التيلفون  
واستنيت ، وبعدين مخابش ظني وأديكي اتكلمتي ، ربنا ما يحرمني  
من صوتك أبداً يارب  
بدون تفكير قالت له :

- ربنا يخليك ليا

لم يصدق ما سمعته أذنيه ، هل حقاً أخيراً بادلته بعض المشاعر ، أخيراً  
شعرت به وبما يدور بداخله ، قال لها :

- إيه ده ... قولي تاني كده ، أنا مش مصدق وداني

- ليه يعني ، بلاش أوفرة قولتك

- والله ما أوفرة بس أنا بجد جوايا كتير ، كتيير أوي

- ربنا يخليك ليا

- تاني ، لا كده كتير ، كتيير أوي

ضحك الاثنان ضحكاً كثيراً ، لأول مرة منذ فترة لم تضحك "علا" بمثل هذه  
الطريقة ، كانت تشعر بأن "أدهم" هو هدية الله التي أرسلها لها في الوقت  
الذي كانت أمس الحاجة له ، شعرت بقلبها يخفق من جديد ، ينادي باسمه ،  
استطاع أن يحتل قلبها وعقلها ، استطاع أن يسيطر على جميع حواسها  
ومشاعرها ، سلّمت زمام قلبها له ، جعلته يعلو ويطير بها إلى أعلى ما كانت  
تتصور ، كانت في كل كلمة يقولها تشعر بأن قلبها يرفرف ، تشعر بأنها تود  
لو أن تحتضنه بذراعيها وتبكي على صدره ، تشكي له النار التي تحرق قلبها  
كل يوم ، تريده أن يقف بجانبها لتتخلص من ذلك الكابوس الذي تعيش فيه .  
استيقظت في ذلك اليوم على رسالة منه نصها :

- "وحشتيني أوي ، بصي بقى أنا عايز أشوفك ومش هتقولي بعدين زي كل مرة هستناك النهارده الساعة ٥ في كافتريا (.....) عارفها طبعاً ... خلص الكلام ... بحبك أوي على فكرة "

قرأت الرسالة فوجدت نفسها تقفز من أرجاء الحجرة من شدة الفرحة ، لا تعلم هل لأنها ستراه ، أو لأنه قال لها أنه يحبها ، أو للموضوع بـرّمته ، أمسكت هاتفها وبدأت تكتب :

- "موووافقة ... ب ح ب ك "

انتظرت أن يرد ولكنه قرأ رسالتها ولم يرد انتظرت وانتظرت وانتظرت حتى وصلت الرسالة ولكنها هذه المرة كانت رسالة صوتية ، ضغطت عليها فجاء صوته يغني أغنية قديمة لعمر دياب :

- "بعترف قدام عنيك "

من النهارده أنا كلي ليك

سيبني أحبك يا حبيبي

وأنسى روعي بين ايديك

يا حبيب قلب الوحيد

هات ايديك نبعد بعيد

كل ما عيونك تاخذني

يتولد احساس جديد

هو ده اللي حلمت بيه

ضحكته نظرة عنيه

يا حبيبي وانت جمبني

تفتكر أنا هعمل إيه "

انتهت الرسالة الصوتية وأخذت معها قلبها وعقلها إلى رسالة أخرى ، فهي ميزة أخرى تعرفها في "أدهم" صوته الملائكي الذي يخطف القلب ، كل يوم

كانت ترى فيه شيئاً جديداً مختلفاً عن كل من قابلته في حياتها ، كل يوم يزيد في قلبها أكثر وأكثر ، كانت عندما تحادثه أو يحادثها تنسى نفسها ، تنسى حالتها السيئة ، تشعر وكأنها بنت في السابعة عشر وقد أحبها من اختاره قلبها وهي اليوم ستخرج معه لأول مرة ، ستخرج معه من دون علم أهلها . كانت الساعة الحادية عشر صباحاً ، حين نظرت في ساعتها ، نهضت ودخلت حمامها وأخذت دشاً بارداً حتى تَفَق ، ثم خرجت واتصلت بالكوافير الذي كادت أن تنسى طريقه وحجزت لنفسها ، وبالفعل ارتدت ملابسها وحين همَّت بالخروج وجدته أمامها يسألها :

- متشيكة ولابسة كده ورايحة على فين

انخلع قلبها عند رؤيته ولكن تماكنت وقالت :

- رايحة الكوافير ، بقالي كثير معملتش شعري ، أهو فرصة أغير جو

وأشوف صحابي

بدا عليه أنه غير مصدق لما قالته ولكن قال :

- ماشي

وأوسع لها الطريق حتى تخرج .

\*\*\*\*\*



## لقاء في الخفاء

خرجت "علا" من بوابة المنزل وهي تشعر أنها سجين قد خرج من سجنه بعدما انتهت مدته ، انطلقت تعدو في الفراغ وكأنها طيراً قد ملّ منه صاحبه وفتح له قفصه ، ذهبت إلى الكوافير وتزينت وكأنها عروس ستزف إلى زوجها بعد قليل ، خرجت منه قبل الميعاد بنصف ساعة ووصلت إلى المكان في الميعاد بالضبط فوجدته فارغاً تماماً من زبائنه فاستحسنت ذلك دخلت من الباب فوجدت نادلاً يقدم لها شيئاً أشبه بكتاب وانصرف بسرعة ، فتحته فوجدت فيه كلمة "اتجه إلى اليسار " "اتبع السهم" وجدت على الأرض سجادة وعليها سهم فاتجهت كما هو مشار حتى وجدت باباً زجاجياً مغلق ولكن زجاج معتم لا يظهر ما خلفه ، فتحته فوجدت حجرة مظلمة إلا من ضوء شمعة وبمجرد أن خطت بقدمها في الحجرة سمعت صوت موسيقى هادئة وإضاءة في جانب الحجرة على عازفي يحملون "الكمان" ويعزفون لحن أغنية قلبي

ومفتاحه لفريد الأطرش وضاءة في الجانب الآخر للحجرة ليظهر "أدهم" وهو  
يغني :

- قلبي ومفتاحه دول ملك ايديك

ومساه وصباحه يسألني عليك

قلبي ومفتاحه ومفتاحه دول ملك ايديك

واقترب منها وأمسك يديها وجذبها إليه ورقصا سوياً وهو ما زال يغني على  
لحن الكمان بعدما دخل عازف الناي ليُضفي على اللحن جمالا وروعة :

- كان حبك شمعي في يوم عيدي

وظفاه الدمع وتنهيدي

من يوم ما ايديك .... لمست ايدي

وكانك قلت .... يا نار قيدي

ومادام مشغول يا حبيبي

مش كنت تقول يا حبيبي

ده القلب جراحه.... من رمش عنيك

ومساه وصباحه .... بيسالني عليك

قلبي ومفتاحه مفتاحه دول ملك ايديك

أغمضت عينيها ، خوفاً من أن تنتهي تلك اللحظات الجميلة وألقت برأسها على  
صدره لتشعر بدفء قلبه وحرارته وحنانه .

ابتعد عنها قليلاً وهو ما زال ممسكاً بكلتا يديها ورفع رأسها حتى ينظر  
لعينها فقال لها :

- أوعدك من النهارده ، هعيش ليكي ، ليكي انتي وبس ، وهقضي

الباقى من حياتي عشان أسعدك وأنسيكي كل حاجة وحشة شفيتها

من قبلي

بدون ما تدري وجدت دمعتين قد اتخذتا طريقهما على خدها فمسحهما بيده  
قائلاً :

- دمك ده غالي عليا أوي ، صدقيني مش هقدر أستحمل أشوفهم ،  
العينين دي ما تخلقتش عشان تبكي  
ثم أشار بيده إلى العازفين ليكملوا عزفهم وواصل هو غناؤه :

- يالي ما يصعبش عليك غالي

وفي بحر هوك الموج عالي

والكلمة الحلوة اللي في بالي

تحرم لو غيرك قالهالي

قلبي الحيران يا حبيبي

وعينيا كمان يا حبيبي

هجروني وراحوا ..... هايمين حواليك

ومساه وصباحه ..... بيسألني عليك

قلبي ومفتاحه مفتاحه دول ملك إيديك

ثم جلسا على منضدة كانت في وسط الحجرة مقابلةً ، كان يقرأ في عينيها  
مشاعرها المختلفة ، يقرأ خوفها وحبها وتردها فسألها :

- ساكتة ليه

- فرحانة ، قلقانة ، خايقة ، مشاعر كتير جوايا متلخبطة ، مش عارفة

أفهمها .... مش قادرة أفهمها

- فرحانة ... ده طبيعي ، قلقانة وخايقة ليه ومن إيه

فركت أصابعها في بعضها تردداً ثم قالت :

- خايقة أعلق نفسي بحاجة مش عارفة ممكن تحصل ولا لأ ، عارف

على قد ما حبيتك على قد الخوف اللي جوايا من ناحيتك

- خايقة مني !؟

- خايفة عليك ، خايفة متقدرش تكمل ، خايفة منقدرش نكمل مع بعض ، حينا مهدد بالموت في أي لحظة ، خايفة تسيبني وأنا مش حمل فراق تاني ، مش هقدر ، أنا كنت عايشة شبه ميتة وانت اللي رجعتني للدنيا تاني ، انت اللي خليتني أصدق إن الدنيا لسه باقيلي فيها حاجات حلوة كتير من حقي إنني أعيشها وأشوفها ، انت اللي مليت عليا حياتي كلها ، من يوم ما عرفتك والدنيا احلوت ف عنيا بس ...

**ثم خبأت وجهها في كفيها فقال لها مستنكراً :**

- بس إيه ؟ ... أنا وانتي يا "علا" شفنا بعض بعد ما كان كل واحد فينا في ناحية ، كل واحد فينا لقي اللي محتاجه في التاني ، ربنا بيخلينا نقابل ...

**قاطعته قائلة :**

- نقابل الناس الصح في الوقت الغلط ، ليه أنا وانت منتقابلش من زمان  
- مش يمكن دي حكمة ربنا ، عشان تعبتي كتير ، فربنا حب يكافئك ويعوضك عن كل اللي شفتيه ... بقولك إيه هو أنا عامل الجو الرومانسي ده ومكلف نفسي التكاليف دي كلها وجايبلك بيتهوفن بزمارته دي عشان تنكدي علينا

**ابتسمت برغم دموعها التي أغرقت وجنتها فقال لها :**

- يخربيتك ، حتى وانت بتعيطي قمر ، أنا أول مرة أشوف حد حلو في كل حالاته كده ، ربنا يخليكي ليا وميحرمني منك أبداً

**مسحت دموعها ثم قالت معتذرة :**

- أنا آسفة والله ما كان قصدي أنكد عليك ، ربنا يخليك ليا ، اللي انت عامله ده كتير كتير عليا أوي

- مفيش حاجة تكثر عليكى ، أنا لو أطول كنت جيبت نجمة من السما  
وحطيتها في إيدك

وبدأ يغني بعدما أمسك كلتا يديها بيده :

- كنت عايش طول سنيني

بحلم إنك في يوم تجيني

من زمان مش م النهارده

قلبي شافك قبل عيني

تسوى ايه كلمة حبيبي

لو مكنتش أقولها ليك

كنت بحرم نفسي منها

لحد ما عنيا تلاقك

ورفع يديها إلى شفثيه وقبّلها في حب .

لا تدري "علا" كم من الوقت مرّ عليها وهي معه ، كان تود لو أن تستطيع  
إيقاف عقارب الساعة وكل ساعات العالم عند تلك اللحظة ولكن الوقت مر  
وهي لا بد أن تعود إلى منزلها .

في طريقها للعودة أيقظت نفسها من غفلتها ، لأنها تعلم أنها ستواجه حرباً  
كبيرة مع زوجها وكانت تستعد ذلك ، دخلت حجرتها وبالفعل وجدته ينتظرها  
وبكل هدوء دخلت بدّلت ثيابها ولاحظت أن بداخله استفسارات كثيرة لا يعلم  
بأيهما يبدأ .

انتظرها حتى بدّلت ثيابها وجلست على السرير فقال لها بهدوء :

- الكوافير بياخذ ساعة أو ساعتين ... ثلاثة بالكثير ، لكن ست ساعات ،

كنتي فين ؟

نظرت إليه باستغراب وقالت :

- يهكم كنت فين ؟؟؟

- متغيريش الموضوع ... كنتي فين ؟
- مع إني المفروض مقولش ، بس هقولك ، قابلت واحدة صاحبتني في الكوافير وخرجنا قعدنا مع بعض شوي ، ولا ده ممنوع كمان نظر إليها بطرف عينه وأشعل سيجارته وخرج .
- ارتاحت "علا" كثيراً لكذبتها ، وأقنعت نفسها أنه اقتنع بها وصدقها .

\*\*\*\*\*

- تكررت لقاءات "أدهم" ب "علا" في أكثر من مكان حتى ذلك اليوم الذي كانت تجلس فيه معه وتعلو صوتات ضحكاتهم حتى رأت ما جعل ضحكتها تقف في حنجرتها ، رآته ينظر إليها من بعيد معاتباً ، فسألها "أدهم" :  
- مالك يا "علا" فيه إيه ؟  
نهضت "علا" قائلة :

- يلاه بينا نمشي من هنا وانصرفت حتى قبل أن تُبدي له سبباً ، فأخرج مبلغاً من المال ووضعها على المنضدة وانطلق خلفها .

كان ذلك الشخص يتابعهما بعينه ، ويقتله الشك عن ماهية الشخص الذي يجلس مع عشقه الأول ونبض فؤاده ، كان يود أن يجرها خلفه ويسألها من الذي تخرج معه ، كان هذا الشخص هو "تامر" أول من اعترف لها بحبه وصدته ، يا له من شخص غريب ، بعد كل ما حدث ما زال يحبها ويغار عليها ، بعدما صدته أكثر من مرة ، بعدما تزوجت صديقه ، بعد كل ما رآه منها ، بعد كل تلك الأحداث ما زال يتابعها ، ما زال بداخله الكثير من الكلام الذي يود أن يُقال .

وجد نفسه ليلاً يرسل لها برسالة غريبة على الواتس أب نصها :



- "هكذب عليك لو قولتلك كويسة ، أنا متدمرة مبقتش قادر أستحمل "
- " لحد اماتا هتفضلي كده ، بس أرجع وأقول انتي اللي اخترتي من الأول "
- " بليز يا "تامر" أنا مش ناقصة تبكيت ، لو هنكمل كلامنا بالأسلوب ده ، يبقى بلاش نتكلم أحسن "
- " لا لا لا ، خلاص I'm sorry "
- " لا متأسفش ، تعرف الفترة اللي فاتت دي ، كنت محتاجة أوي أكلمك بس مكنتش عارفة أقولك إيه ، كت خايفة من رد فعلك ، كنت خايفة ميكونش اللي جواك زي ما هو ، كنت مفتقدك كصاحب ، كأخ ، كأبي حاجة ، المهم إنك تبقى موجود في حياتي وخلاص "
- " وأنا وعدتك قبل كده إنني مش هسيبك وفعلا مش هسيبك ، بس أنا عايز أعرف مين الواد ده "
- " تاني ... تاني يا "تامر" ، مش قولنا بلاش كلام في الموضوع "
- " بس أنا من حقي أعرف عنك كل حاجة ، القعدة بتاعتكم مكانتش قعدة كده وخلاص "
- " يوووووووووووه ، ده واحد اتعرفت عليه من الفيس بوك "
- " هو انتي أي حد تعرفيه عادي كده تخرجي معاه ، وتصاحبيه ، يا بنتي فوقي لنفسك "
- " "تامر" بليز ممكن نقفل دلوقتي عشان أنا مصدعة ومش حمل أي مناهدة "
- " حاضر ، اللي تشوفيه يا "علا" باي دلوقتي "
- ثم تركت هاتفها فأعلن عن قدوم رسالة أخرى فتحتها فكانت من "أدهم" مضمونها كلمة واحدة :
- " طمنيني عليكي "

لم ترد عليها ، فوجدت رقمه یرن ، فرفضت المكالمة وأغلقت الهاتف وألقت بظهرها على السرير

أرادات أن تنام ، ولكن هيهات لقلب أن ينام وهو محاط بكل هذا القلق ، وجدت نفسها محصورة بين ثلاثة رجال اثنان يعشقونها عشقاً ولكن المسافة بينها وبينهما بعيدة جداً ، والثالث يربطها به عقد قران لأجل مفتوح ولا تظهر لآخره بداية .

كانت مشاعرها تائهة مُلخبطة مشوهة ، لم تدر حقيقة مشاعرها تجاه كل واحد منهم ، لم تعرف من تحب ومن تكره ، ومن يستحق حبها ومن لا يستحقه .

بينما هي غارقة في موجة من التفكير إذ بباب الحجرة يفتح ويدخل منه "فادي" على غير موعده فتصنعت النوم ، وبعدما غير ثيابه قال لها :

- انتي نايمة

لم تجبه بالرغم من أنها سمعته ، فجلس بجوارها وهزها بيده قائلاً :

- انتي .... قومي عايزك

بتأفف مصطنع نهضت وقالت :

- خير اللهم اجعله خير ، جاي بدري عن ميعادك النهارده ، تتحسد

يعني ، إيه السهرة باظت برضه !!!

نظر إليها بغیظ ولم يرد فهتمت بالنوم مرة أخرى فقال لها :

- أنا مش بقولك قومي ، انتي إيه مبتسمعيش

نهضت مرة أخرى قائلة :

- هو ده نظام جديد يعني ، لازم أخذ الإذن كمان قبل ما أناام

- اتخمني

وقال أيضاً أكثر من كلمة أخرى لم تسمعها ولم تكن تريد أن تسمعها فهي تعلم أن تلك الكلمات ليس في صالحها مطلقاً .

أخرج هاتفه وطلب صديقه المفضل "علاء" فأجابه الأخير بسرعة :

- إيه يا شبخ ، سوري والله الليلة باظت النهارده بس والله هعوضالك بكرة

- أنا نازل دلوقتي هعدي عليك انزلي .... أيوه دلوقتي ... إلبس هدومك عبال ما أجيك

وقام من فوره وغادر المكان ، وهي كذلك نهضت لأن النوم قد أعلن عليها العصيان ولم يأتها كما رغبت ، لم تجد أمامها إلا هاتفها فتحتة لتجد رسالتين على برنامج الواتس أب أولها كانت من "تامر" حيث كتب فيها :

- " أنا عارف إنك مش هتعرفني تنامي النهارده ، أنا سهران وهستناكي تكلميني ، فيه كلام كتير نفسي أقوله ليكي ، بلييز كلميني "

والثاني من "أدهم" الذي اكتفى بكلمتين هما :

- "ربنا يطمني عليك"

تجاهلت الثانية وكتبت للأولى :

- " أنا معاك أهو "

كان كمن ينتظر آذان المغرب بعد يوم شاق من الصيام كتب بسرعة:

- " دايمًا معايا يارب "

شعرت بفرحته وكأن كلماته وحروفها ترقص فرحاً وطرباً فقالت له :

- "لسه زي ما انت يا "تامر" ... أنا لوحدي على فكرة ممكن تكلمني صوت "

كأنها أعطته ما يحلم به ، فلم تنتظر ثواني حتى وجدت رقمه على الشاشة يتصل بها فأجابت بسرعة :

- يااااه ، إيه السرعة دي يا بني

- يا بنتي التليفون بيزغرت من الفرحة فما بالك بصاحب التليفون ، مش مصدق يا "علاء" إني رجعت أكلمك تاني وأسمع صوتك

فكرت قليلاً قبل أن تسأله :

- لسه بتحيني يا "تامر"

بدون أن يفكر قال لها :

- ولا عمرك خرجتي من قلبي يا "علا" معرفتش أعرف حد غيرك ،

أصلاً قلبي رافض يكون فيه أو جواه حد غيرك وكأنك البنت الوحيدة

اللي عايشة على وش الأرض

ضحكت ضحكة عالية سمعها هو وأطرب لها ثم قال :

- يااااه ، وحشتني الضحكة دي ، مين كان يصدق يا ناس ، بعد كل

اللي فات أرجع أكلّمك

- عارف .... أنا كنت محتاجة حد أتكلم معاه ، حد أحسه مني بيّفهمني

وأفهمه ، يخاف عليا وأخاف عليه ، عشان كده في موضوع مهم كنت

عايز أقولك عليه ، بس بلييز تسمعني للآخر .

وافق طبعاً ، فقصت عليه كل شيء من بداية زواجها وحتى اليوم الذي رآها

فيه ، لم يدر ماذا يقول لها ؟ هل يؤنبها ؟ ولكنه رأى أنها ضحية أخرى من

ضحايا "فادي" ومن الأفضل أن يقف بجوارها في مثل هذه الظروف ، كان

يعلم أنها بحاجة إليه تحت أي مسمى ، ظهر ذلك من كلامها وجد نفسه يقول

لها :

- بحبك يا "علا"

ابتسمت ولأول مرة ، تشعر بكلماته تغازل شرايين قلبها قالت له :

- المرة دي مش هكسّفك ، ومش هقولك زي كل مرة ، أنا ..... بحبك ،

لأول مرة أندم على كل حاجة عملتها معاك ، أنا آسفة ، ممكن أطلب

منك طلب

- طبعاً طبعاً ، مليون طلب

- ربنا يخليك ... أنا عايزاك جمبي ، متسبنيش ، دلوقتي أكثر وقت محتجالك تبقى جمبي فيه
- أوعدك بس بشرط
- إيه
- تسمعي كلامي ، في كل اللي أقولك عليه
- موافقة ... أنا من إيدك دي لإيدك دي
- أول حاجة تقطعي علاقتك بالواد اللي اسمه "أدهم" ومتعرفيهوش
- تاني
- بعد تفكير قالت :
- موافقة يا "تامر" موافقة
- أغلقت المكالمة ولأول مرة تشعر بالسعادة ، بعثت رسالة لـ "أدهم" نصها :
- "عايزة أشوفك بكرة ضروري"
- وأغلقت الهاتف وجلست تُعد ما تقوله غدأ له ، وبالفعل تقابلا في نفس المكان
- وجلسا مقابلةً فكان أول من بدأ الحديث قائلاً :
- قلقتيني عليكي امبارح يا بنتي مالك
- لم ترد فلاحظ تعابير وجهها الغير مُطمئنة فسألها :
- مالك يا حبيبتي انتي تعبانة
- استجمعت قواها وقالت :
- "أدهم" احنا محتاجين نبعد عن بعض شويا
- سكينه قد تلقاها في صدره من أقرب الناس إليه فسألها :
- إيه اللي بتقوليه ده ، انتي عارفة انتي إيه بالنسبة ليا ، أنا ممكن أموت نفسي لو بعدت عنك ، وإيه اللي حصل لده كله
- ينفع مقولش أسباب
- لا طبعاً مينفعش ، انتي لو بتمشي حد شغال عندك هتقوليله السبب

- "أدهم" لو سمحت ...
- لو سمحتي انتي أنا عايز أفهم ، انتي ازاي كده
- هو ايه اللي كده ، أنا بطلب منك طلب ولو أنا غالبية عندك لازم تنفذه
- طلب إيه انتي ، كإنك بتقوليلي مَوَّت نفسك من غير ما تعرف السبب ، بقولك ، انتي فيه حد ف حياتك ؟
- مش هرد
- وأنا مش محتاج ردي ، أنا فهمت خلاص ، أنا مش عايز أعرف أسبابك ، أنا آسف إني ضيعت وقتك ، أنا مش عايز أشوف وشك تاني همّ بالانصراف فأوقفته قائلة :
- أنا آسفة ... بس
- أشار إليها بالسكوت وانصرف .

فرح "تامر" جداً لهذه الخطوة التي فعلتها "علا" وحيّأها عليها ، وبدأت حكاية طالما تمنأها "تامر" ، تحقق حلمه الذي كان يحلم به ، أصبحت "علا" خاتماً في خنصره ، تحت تصرفه ، يكلمها متى شاء ، يخرج معها متى شاء ، قد عاشا قصةً من قصص الحب الأصيلة التي لا نسمع عنها إلا في الأفلام ونقرأ عنها في الكتب ، قد نسيت معه كل شيء ، نسيت أن زوجها صديقاً لحبيبها ، نسيت أن حبيبها قد كان سيصبح سبباً في حبس زوجها وأن بينهما تاراً بائناً ، وهي بهذه العلاقة تُزيد هذا التار ، ولكنها نظرت لهذا الموضوع بأنانية ، وجدت أن سعادتها أهم ، فقررت أن تستمر في هذه العلاقة التي لا تعلم لها آخر .

وجدت نفسها كل يوم تقترب منه أكثر حتى تطور الأمر إلى أن دعتة إلى منزلها وأدخلته من الباب الخلفي وجلسا معظم وقت الصباح سوياً ، اقتربا من بعضهما أكثر ، تارة بقبلة وتارة بحضن ، إلى أن تطور الأمر إلى علاقة كاملة

كتلك التي تحدث بين أي زوجين ، كان الإثنان سعيدان بذلك ووجدوا فيه المتعة الكبيرة فقرروا أن يكررو الأمر أكثر من مرة .  
تلاشت فكرة الشعور بالذنب التي كانت تعترئها عند ممارسة تلك العلاقة ، لم تعد تشعر بأي تأنيب من ضميرها ، كانت تعلل ذلك بأن زوجها كل يوم يفعل لك مع مختلف السيدات المومسات اللاواتي يعرفهن ، أما هي فهي أفضل منه ، هي تفعل ذلك مع رجل واحد ، رجل كانت ترى أنه أفضل منه أيضاً لأنه لا يفعل ذلك إلا معها فقط .

\*\*\*\*\*



٣٢

راحة لم يشعر  
بها من قبل

كان "فادي" يجلس مع "علاء" مكانهما المعتاد حين أخبره الأخير هاتفياً أنه يريد في شيء هام وقد تقابل الإثنين في ميعداهما بالمضبوط وجلسا وبعدهما طلبا شيئاً يشربانه قال "فادي" :

- مالك ياد فيه إيه ؟

ارتشف "علاء" شربة من كأسه ثم قال :

- مش عارف أبداً منين ، بس أنا شفت حاجة احتمال تدايقك ، مش

عارف أقولك عليها ولا لأ

- قول واخلص

- الواد "تامر"

- متجبلش سيرته تاني ، من أول ما شهد عليا في القسم وأنا نفسي

أشوفه ، عارف لو شفته أنا ممكن أقتله ، بس ماله الزفت ده

- أبداً شفته امبارح ماشي .... بصراحة شفته ماشي مع "علاء" مراتك

وكانوا بيضحكوا وكانهم اتنين مخطوبين

تطائر الشرار من عينيه ثم قال :

- انت متأكد
- اتأكدت طبعاً ، ولولا اني اتأكدت مكننتش قولتك ، بس بص مش عايذك تتهور ، عايزين نفكر بهدووووه
- نهض "فادي" غاضباً فأوقفه "علاء" :
- لا يا ريس ، الموضوع ده ميتاخدش كده ، اوعى تروح تواجهها أكيد هتنكر وهتاخد بالها بعد كده يعني مش هتعرف تثبت عليها حاجة
- وهنتبت ازاي يا برنس العلوم ودكتور المفهومية
- سيبنني أراقبهومك ، وإن شاء الله هوصل لحل
- استحسن "فادي" الفكرة ، وذهب إلى منزله ودخل حجرته قبل ميعاده فوجدها تتكلم في الهاتف وعندما رأته ارتبكت وتصنعت أنها تتحدث مع إحدى صديقاتها وأنهت المكالمة بسرعة .
- طلب منها أن تُجَهِّز له الحمام ، كان الطلب غريباً نوعاً ما ، فهو لم يطلب منها ذلك من قبل فتركت هاتفها مُطِيعَةً بطريقة مثيرة للشك ، فأمسك هاتفها فوجده مغلقاً بكلمة مرور مما جعله يفقد أعصابه ولكن تمالك عندما شعر بها قادمة عليه .
- شعر بالريبة عندما وجدته يمسك هاتفها فارتبكت ، أرادت أن تسأله ولكن استحسن السكوت ، وتنفست الصعداء عندما وجدته طبيعي ونهض ودخل حمامه وخرج منه بشكل طبيعي جداً ونام بجوارها وتصنع النوم فأمسكت هي بهاتفها وأكملت حديثها مع "تامر" .
- استيقظ "فادي" في الصباح مبكراً ، وذهب إلى عمله دون أن يحدثها ولا كلمة واحدة ، مما أثار الشك في قلبها ولكن ما بيدها شيء .
- بعدما خرج زوجها جاءتها مكالمة من "تامر" فأجابت بسرعة :
- أيوه

- "فادي" خرج

- آه

- طب أنا نص ساعة بالكثير وأكون عندك

- لا ..... بلاش النهارده ، أصلي تعبانة شوي

- طب ما عشان انتي تعبانة لازم أكون جمبك أنا جايلك

أنهى المكالمة قبل حتى أن ترد ، وجلست هي في حيرة وقلبها مقبوض لا تدري لذلك سبباً .

وصل هو مكتبه وطلب قهوته كالعادة وجلس يتفحص بعض الوريقات أمامه في رتابة وملل ، وأمسك ريموت التلفاز وأخذ يقلب في قنواته يبحث عن أي شيء يسليه ويجعل وقته يمر بسرعة .

رن هاتفه ، كان المتصل "علاء" فأجاب بسرعة :

- أيوه يا بسطا فينك

- أنا مستني قدام بيته هو ، مستنيه يخرج

- أوك ، بلغني كل تحركاته وأول ما يقابلها قولي

- تمام بسطا

أنهى المكالمة بسرعة وهو يقول في غيظ :

- بنت الجذمة تخوني أنا ، ماشي ... وحياء بابا ما هعديها على خير

بحث مرة أخرى عن ريموت التلفاز فلم يجده ، ولم يتذكر أين وضعه فاضطر أسفاً أن يشاهد ما تعرضه القناة أمامه ، فكانت قناة دينية ، كان يجلس أمامه رجل يبدو عليه الوقار ذو لحية كبيرة بيضاء ووجه أبيض ناصع وبدأ كلامه الذي لا يعلم "فادي" لما تابعه ، وجد الرجل يقول :

- اعلم يا عبد الله أنك كما تدين تدان ، وإن الزنا يُخَلِّص الله ذنبه في الدنيا قبل الآخرة ، قال تعالى " ( وَلَا تَقْرَبُوا الزَّانَا إِنَّهُ كَانَ فَاحِشَةً

وَسَاءَ سَبِيلًا ) شوف ربنا سبحانه وتعالى قال إيه ، قال ولا تقربوا

الزنا مقالش ولا تزنوا ، اوعى تفتكر إن ربنا سايبك أو مش شايفك ، لا شايفك ومديك المهلة يمكن تتوب ، وكما قيل في الامثال دقة بدقة ولو زدت لزاد السقا ولهذا المثل قصة جميلة واعتدل الشيخ في جلسته و"فادي" يتابع كلماته بطريقة غريبة فأكمل الشيخ :

- يحكى أن رجلاً تاجراً أرسل أبنه للتجارة في بلد آخر ، وذات يوم وابنه في السفر ، نظر التاجر من شرفة المنزل إلى باب بيته ، فوجد السقا الذي يجلب الماء يُقَبِّل ابنته، فسكت التاجر حتى عاد الولد من السفر .. فسأل الأب : ماذا فعلت في تجارتك ؟ فقال الولد : بعث واشترت و فعلت و فعلت..

فقال الأب : ليس عن هذا أسألك ،هل فعلت شيئاً آخر ؟ فأنكر الولد بداية الأمر ، فلما ألح عليه الأب ، قال الولد : لم أفعل شيئاً يا والدي سوى أنني قَبَّلْتُ امرأة أعجبتني في السوق!! فعندها قال الأب : "دقة بدقة ولو زدت لزاد السقا ".أي لو أنك قبلت المرأة أكثر من قبلة لزاد السقا قي تقبيله لبنت التاجر!!! وهذه القصة تصديق لبيتين قالهما الإمام الشافعي رحمه الله:

عفوا تعفُ نساؤكم بالمحرمِ

وتجنبوا ما لا يليقُ بمسلم

إن الزنى دينٌ فإنْ أقرضتُهُ

كان الوفاء من أهل بيتك فاعلم

وأشار الشيخ بإصبعه فشعر "فادي" أن هذه الإشارة له ثم قال الشيخ :

- إنا الزنا قرض يعني دين ، لو عملته لازم حد من أهل بيتك اللي هيرده عنك ممكن تكون أمك ممكن تكون أختك بنتك ، يعني انت تدفع فلوس وتزني وف بيتك الزنا من غير فلوس

وكان الشيخ يقصد "فادي" ويوجه له الحوار ويشير إليه بيده حتى ضاق ذرعاً بذلك ، فغضب وأمسك بمطفأة السجائر التي أمامه وضرب بها التلفاز علّه يسكت وبالفعل أسكته وانطفأت الشاشة ، وفجأة وجد هاتفه يرن كان المتصل "علاء" أجابه بسرعة فقال علاء :

- بقولك إيه يسطا ، أعصابك حديد
- قول واخلص أنا مش ناقصك
- بصراحة لما نزل الواد "تامر" ركب عربيته ومشى فأنا مشيت وراه

قاطعته بغضب :

- ما تخلص يا روح أمك ، انت هتحكيلي قصة حياتك
- حاضر .. حاضر .... المهم لقيته راح بيتكم ، وعلا فتحتله من الباب اللي ورا

أنهى المكالمة دون كلمة توديع وتذكر كلمات الشيخ فانطلق إلى المنزل بسرعة البرق ، الطريق الذي يستغرق نصف ساعة بالسيارة قطعه في عشرة دقائق ، حمل المسدس الذي كان في سيارته ، دخل المنزل مسرعاً وصعد إلى الطابق العلوي وفتح الباب بقوة فوجد ما جعل دماؤه تغلي في عروقه ، رأى ما جعله بركاناً خاملاً يثور بداخله ، رأى زوجته مع صديقه في وضعية الزوج وزوجته ، لم يتمالك أعصابه وجد نفسه يضغط بيديه على زناد المسدس ويقتل الاثنان بطلقتين لم تكونا لتخطئاً هدفهما ، واتصل بوالده الذي حضر مسرعاً ليرى تلك المصيبة التي بها ابنه الوحيد ، اتصل بالمحامي الذي حضر قبله بخمس دقائق وطمان الجميع قائلاً :

- متقلقوش يا جماعة ، دي اسمها جريمة شرف وإن شاء الله "فادي" مش هياخد فيها ولو دقيقة ، متقلقوش

كان "فادي" يجلس في جانب الحجرة واضعاً رأسه بين يديه ، لم ينطق بكلمة واحدة بعدما اتصل بوالده .

اتصل "عزيز" بالشرطة التي حضرت بسرعة لمعاينة الموقف ، وتم إحضار الطب الشرعي حيث نقل الجثتين إلى المشرحة بعدما اعترف "فادي" بأنه من قتلهم حيث كان يدافع عن عرضه.

أخذت الشرطة "فادي" مُكَبَّلَ اليدين بعدما طمأنه المحامي أن المسألة مسألة وقت ليس إلا عندما تنتهي الاجراءات يومين أو ثلاثة في أضعف الايمان .  
تمت الاجراءات بسرعة هذه المرة ، لسهولتها وخرج "فادي" من النيابة ولكن لم يذهب لبيته ظل يسير في الشوارع لا يعلم وجهته ، ظل يسير ويسير ويسير سيراً على قدمه ، وأغلق هاتفه بل وألقاه لا يدري أين ؟ اقترب منتصف الليل وهو على حاله قد نال منه التعب مبلغه ، لم يجد إلا منصة أمام مسجد فجلس عليها وجد فيها راحة لم يشعر بها من قبل فألقى بجسده عليها ونام .

\*\*\*\*\*



بداية  
جديدة

لم يدرك من الوقت مرّ عليه وهو نائماً على تلك الوضعية ، ولكنه استيقظ على صوت وكأنه أول مرة يسمعه في حياته صوت عذب يقول " الله أكبر الله أكبر " كان أذان الفجر ، وأنى له قبل ذلك أن يسمع أذان الفجر ، وحتى إن سمعه من كان سيقول له أن ذلك اسمه أذان وينادي للناس للصلاة وجد الصوت ينادي بنفس الصوت العذب " أشهد ألا إله إلا الله ، وأشهد أن محمداً رسول الله " نظر إلى الأعلى وأذنيه ترقص طرباً لسماع تلك الكلمات الجميلة ، أنهى الصوت مهمته و"فادي" مغمض العينين ، فوجد كفاً تهزه برفق ويقول صاحبها :

- مش هتدخل تصلي يا ابني

أوماً "فادي" بالموافقة ونهض بعدما وضع يده في يد الشيخ الذي حدثه ليسنده ودخل معه المسجد ، ولأول مرة في حياته تطأ قدمه مسجداً ، شعر بإحساس غريب ، راحة لأول مرة يشعر بها ، أمان لم يشعر به في منزله وتحت حراسة والده ، وجد نفسه يشاهد الشيخ وهو يتوضأ وقطرات المياه

تنزل من بين يديه ، عندما أنهى الشيخ وضوءه نظر إليه فوجده على حاله  
فسأله :

- إيه ... مش هتتوضأ ؟

نظر "فادي" أسفل قدميه خجلاً ثم قال :

- مش بعرف أتوضأ

ابتسم له الشيخ وأخذه من يده وأجلسه وعلمه كيف يتوضأ وبعدما توضأ  
جلسا سوياً ينتظران إقامة الصلاة

وأقيمت الصلاة واصطف المصلون ولأول مرة في حياته يقف "فادي" بجوار  
أحد بمثل هذه الوضعية ، حافي القدمين ، ذليلاً منكسراً ، لا فرق بينه وبين من  
جواره ، قد يكون الشخص الذي بجواره عاملاً أو موظفاً بسيطاً ممن كان  
يتأفف "فادي" من مجرد الحديث معهم ، هو الآن بينهم مثله مثلهم ، سيفعل  
ما يفعلون ، سيرفع يديه للسماء ويناجي ربه كما يفعلون ، ربه الذي طيلة  
حياته لم يذكر اسمه ، لم يكن يدرى ماذا سيقول ؟ أو ماذا سيقراً في هذه  
الصلاة ؟ ، كان مسلماً ، فقط مكتوباً في بطاقته مسلماً ، يتذكر بعض الرتوش  
عن دينه منها أن هناك فرضاً اسمه الصلاة ، ولكن لا يدرى ما هي الصلاة ، أو  
كيف تؤدى ؟

لحظات وسمع الشيخ يُكَبِّرُ والكل يفعل مثله ويرفعون أيديهم إلى آذانهم  
قائلين "الله أكبر" فعل مثلما فعلوا ، بعدهما سمع الإمام يقرأ الفاتحة بصوت  
عذب وجد لذلك الصوت حلاوة لم يجدها منذ زمن ، وجد صوت القرآن يسري  
في دمه وقلبه قبل أن يدخل أذنه ، شعور غريب جميل لم يشعر به من قبل ،  
شعوره بأنه يمثل الآن بين يدي الله ، يحدثه ويكلمه ، كان يتدبر في كل كلمة  
من كلمات سورة الفاتحة التي يتذكر أنه كان يحفظها عندما كان صغيراً ،  
أنهى الإمام الفاتحة فردد الجميع "أمين" بشكل طبيعي كما تعودوا ما عدا  
واحداً ردها وكأن حروفها تخرج من أعماق قلبه .

بدأ الإمام يقرأ بعدها ( أَلَمْ يَأْنِ لِلَّذِينَ آمَنُوا أَنْ تَخْشَعَ قُلُوبُهُمْ لِذِكْرِ اللَّهِ وَمَا نَزَلَ مِنَ الْحَقِّ وَلَا يَكُونُوا كَالَّذِينَ أُوتُوا الْكِتَابَ مِنْ قَبْلُ فَطَالَ عَلَيْهِمُ الْأَمَدُ فَقَسَتْ قُلُوبُهُمْ ۖ وَكَثِيرٌ مِّنْهُمْ فَاسِقُونَ ) مع كل كلمة كان "فادي" يبكي بكاءً شديداً وكان هذه الآيات قد جاءت كالملاح على جرح غائر حديث ، أنهى الإمام ركعته وركع ثم اعتدل ثم سجد والكل يفعل كما يفعل ثم اعتدل من السجود ماعدا "فادي" الذي سجد ولم يعتدل ، وجد راحته في السجود ، سجد الإمام مرة أخرى وقام والكل خلفه إلا "فادي" قرأ الفاتحة وما تيسر بعدها وركع ثم اعتدل ثم سجد ثم اعتدل ثم سجد ثم جلس وقرأ التحيات وسلم ، ولكن "فادي" ما زال ساجداً ، إلتف المصلون من حوله يحسبونه قد فارق الحياة وعندما أجلسونه وجدوا تحته بركة من الدموع قد سحَّها ندماً على كل ما فاتته ، أشار إليهم الإمام بالإنصراف وجلس هو بجانبه ، فنفذ الجميع الأمر بلا نقاش ، اقترب منه الشيخ قائلاً :

- هَوْنٌ على نفسك يا ابني ، كل مشكلة وليها حل ، ومدام جيت هنا يبقى انت جيت المكان الصح
- نظر إليه بأسى وانخرط في البكاء فاقترب منه الشيخ وربت على كتفه وقال له :
- ابكي يا بني ابكي ، الدموع بتطهر البني آدم ، كل دمعة بتنزل بصدق من قلبك قبل ما تنزل من عينك ، ربنا بيغفر بيها ذنب
- أنا لأ ... أنا مستحيل ربنا يغفر لي ، أنا اللي النار متخلقتش إلا ليا
- متقولش كده يا بني ، ربنا بيقول في كتابه العزيز بعد بسم الله الرحمن الرحيم (قُلْ يَا عِبَادِيَ الَّذِينَ أَسْرَفُوا عَلَىٰ أَنفُسِهِمْ لَا تَقْنَطُوا مِن رَّحْمَةِ اللَّهِ إِنَّ اللَّهَ يَغْفِرُ الذُّنُوبَ جَمِيعًا إِنَّهُ هُوَ الْعَزِيزُ الرَّحِيمُ وَأَيُّبُوا إِلَىٰ رَبِّكُمْ وَأَسْلِمُوا لَهُ) صدق الله العظيم ، مهما كان ذنبك عظيم ، رحمة ربنا أعظم منه

يا ابني ، وباب التوبة مفتوح لكل الناس ، كلنا بنغلط يا ابني ، مفيش بينا نبي أو معصوم ، الأهم نعترف بلغطنا ونتوب لربنا .  
 مع كل كلمة كان "فادي" يبكي أكثر ويتأثر أكثر فقال له الشيخ :

- الشمس قربت تطلع يا ابني ، قوم روح البيت ريح شويها وأنا مستنيك على صلاة الضهر عشان نحكي ، نحكي كثير أوي
- لا ... لا يا شيخ ، أنا مش عاوز أروح أبوس إيدك مش عاوز أروح حاول "فادي" تقبيل يد الشيخ الذي سحب يده بسرعة قائلاً :

- استغفر الله يا ولدي ، طب عندي حل حلو ، أوضتي اللي هناك دي ، إيه رأيك تريح فيها شويها ، والله نضيفه وعم إبراهيم بينضفها كل يوم

أوماً "فادي" بالموافقة ، فأخذ الشيخ بيده ، حتى نهض ودخل الحجرة ، حجرة مُرتبة إلى حد ما ، تحتوي كنبه خشبية عليها مرتبة أسفنجية ، في وضعه العادي لا يمكن لـ "فادي" أن ينام على مثلها ولكنه وافق دون أن يُبدي أي اعتراض .

جلس على الكنبه وأسند ظهره للحائط ، فاقترب الشيخ منه حاملاً مصحفاً ثم قال :

- لما تلاقي نفسك مدايق اقرأ في ده ، وكل ما هتقرأ هتحس براحة ، بس بشرط ، اقرأ بتدبر ، فكر في كل كلمة ، كل أمر اعتبره ليك ، كل نهى اعتبره ليك ، كل وعد اعتبره ليك .

خرج الشيخ من الحجرة وترك "فادي" مع مصحفه ، فتحه على صفحة منتصف المصحف فقرأ بعدما قال بسم الله الرحمن الرحيم (وَاصْبِرْ نَفْسَكَ مَعَ الَّذِينَ يَدْعُونَ رَبَّهُمْ بِالْغَدَاةِ وَالْعَشِيِّ يُرِيدُونَ وَجْهَهُ ۗ وَلَا تَعْدُ عَيْنَاكَ عَنْهُمْ تُرِيدُ زِينَةَ الْحَيَاةِ الدُّنْيَا ۗ وَلَا تُطِعْ مَنْ أَغْفَلْنَا قَلْبَهُ عَنْ ذِكْرِنَا وَاتَّبَعَ هَوَاهُ وَكَانَ أَمْرُهُ فُرُطًا \* وَقُلِ الْحَقُّ مِنْ رَبِّكُمْ ۗ فَمَنْ شَاءَ فَلْيُؤْمِنْ وَمَنْ شَاءَ فَلْيُكْفُرْ ۗ إِنَّا أَعْتَدْنَا لِلظَّالِمِينَ نَارًا

أَحَاطَ بِهِمْ سُرَادِقُهَا ۖ وَإِنْ يَسْتَغِيثُوا يُغَاثُوا بِمَاءٍ كَالْمُهْلِ يَشْوِي الْوُجُوهَ ۚ بِئْسَ الشَّرَابُ وَسَاءَتْ مُرْتَفَقًا \* إِنَّ الَّذِينَ آمَنُوا وَعَمِلُوا الصَّالِحَاتِ إِنَّا لَا نُضِيعُ أَجْرَ مَنْ أَحْسَنَ عَمَلًا \* أُولَئِكَ لَهُمْ جَنَّاتٌ عَدْنٌ تَجْرِي مِنْ تَحْتِهِمُ الْأَنْهَارُ يُحَلَّوْنَ فِيهَا مِنْ أَسَاوِرَ مِنْ ذَهَبٍ وَيَلْبَسُونَ ثِيَابًا خُضْرًا مِنْ سُنْدُسٍ وَإِسْتَبْرَقٍ مُتَّكِنِينَ فِيهَا عَلَى الْأَرَائِكِ ۚ نِعَمَ الثَّوَابِ وَحَسُنَتْ مُرْتَفَقًا

ظل يقرأ ويقرأ كظمان كان تائها ووجد للتو بئر ماء عذب بل بئر عسل مُصَفَّى ، فظل يرشف ويرشف ، كان مع كل آية يزداد حبا لأن يكمل ويقرأ أكثر ، بدأ يقرأ من البداية ، قرأ الفاتحة وبدأ في البقرة فأنهاها ، وجد نفسه يريد أن يكمل ، بدأ في آل عمران ثم النساء وكذلك المائة لم يمل ، كان يجد في التلاوة حلاوة ، كان مع كل آية يشعر بأنه يرتقي ويعلو إلى السماء درجة ، وكأنه يصعد سلماً .

مرَّ الوقت بسرعة ، لم يدري إلا وباب الحجرة يطرق من الخارج ، ويدخل الشيخ فوجده ما زال ممسكاً بالمصحف فاندesh لذلك وقال :

- بسم الله ما شاء الله ، شكك منمتش
  - معرفش مسكت المصحف وقعدت اقرأ فيه محستش بالوقت
  - طب إيه ، مش هتقوم تتوضأ عشان صلاة الظهر ، عشان هنتعدى
- سوا النهارده

نهض الاثنان ، ثم توضأ "فادي" وصليا الظهر مع جماعة المسلمين ثم جلسا يتحدثان .

طلب الشيخ منه أن يَقْصَّ عليه حكايته كاملة ، ففعل ذلك ، قص عليه كل شيء من يوم مولده مروراً بتربيته ، وحتى قصة "فرحة" قَصَّها عليها وما فعله بها وبعد أنهى قصته قال :

- أنا عارف إني وحش وحش أوي ، وحضرتك لو طردتني من الجامع

مش هزعل ، أنا نحس ، ومستحشش أعيش في مكان طاهر زي ده

## ابتسم الشيخ وقال :

- هو انت فاكِر الجامع ده بيتي يا ابني ، ده بيت ربنا لا أنا ولا أي حد يقدر يطردك منه ، إذا كان ربنا نفسه فرحان بيبك أنا هزعل منك

## رد باستغراب :

- ربنا فرحان بيا أنا ... بعد كل اللي حكيتهملك ده

- سيدنا محمد بيقول ، ما تصلي عليه يا جدع

## سكت "فادي" لا يدري ما يقول فأكمل الشيخ :

- قول اللهم صلي على سيدنا محمد

## ردد "فادي" ما قاله الشيخ ثم أكمل الشيخ :

- سيدنا محمد بيقول : اللهُ أَشَدُّ فرحًا بتوبة عبده حين يتوب إليه من أحدكم كان على راحته بأرض فلاة، فانفلتت منه وعليها طعامه وشرابه، فأيس منها، فأتى شجرة فاضطجَع في ظلّها قد أيس من راحلته، فبينما هو كذلك إذا هو بها قائمة عنده، فأخذ بخطامها، ثم قال من شدة الفرح: اللهم أنت عبدي وأنا ربك، أخطأ من شدة الفرح هشرحك معناه إيه ، تخيل كده لو انت في صحرا وراكب دابة وعليها الأكل والشرب وكل حاجة وفجأة ضاعت منك مش لاقيتها ، فروح شفت ضل شجرة وقعدت جمبها واستلسمت للموت وفجأة لقيت الدابة بتاعتك قدامك ، فرحتك هتبقى قد إيه ساعتها ؟

- كبيرة طبعا ، أنا ممكن أموت من الفرح

- أهو ربنا بيفرح بالعبد التائب أكثر من فرحة العبد ده ، إيه رأيك في رحمة ربنا

- رحمة ربنا واسعة بس ، مش على حد زيي ، أنا زنيت وقتلت وشربت

- الخمر ولعبت القمار ، أنا تقريبا مفيش حاجة وحشة معملتهاش ، أنا

عملت كتير يا شيخ ، كتير أوي

- طب إليه رأيك حكاية ثانية
- يا ريت يا شيخ ، أنا بحب كلامك جداً
- يحكى أن رجلاً قتل ٩٩ نفس ، عارف يعني إليه ٩٩ نفس يا "فادي" وبعدين قال أنه هيتوب ، فسأل عن أهد أهل الأرض ، فالناس دلته على راجل راهب ، مكدبش خير ، راحله وسأله قاله يا شيخ أنا قتلت ٩٩ نفس وعايز أتوب ، فراح الراهب بصله كده وقاله ٩٩ وعايز تتوب ، انت ملكش توبة ، فالراجل ممسكش أعصابه والي فيه داء مش بيطله راح قتله وكمل ١٠٠ نفس
- ضحك "فادي" وكذلك الشيخ وبعدها أكمل :**

- المهم بس الراجل كانت جواه حاجة بتقوله إن لسه باب التوبة مفتوح ، راح سأل على أعلم أهل الأرض ، دلوه على أعلم واحد في الأرض وراح حكاه كل اللي الحكاية وسأله ينفع أتوب ، فرد عليه العالم بكل هدوء وقاله ومين يقدر يقفل الباب اللي فتحه ربنا لعباده ، بس طلب منه إنه يغير المكان اللي كان عايش فيه ، لأن المكان اللي يقتل فيه ١٠٠ نفس ومحدث يعاقبه يبقى مكان سوء ومينفعش يعيش فيه ، وراح قاله على مكان يهاجرله ويعيش فيه ، الراجل راح بسرعة عشان يغير المكان اللي عايش فيه وهو في الطريق راح مات ، طبعا لما جات الملايكة تاخذ روحه ، ملايكة الرحمة وملايكة العذاب اتخانقوا عليه ، طبعا ملايكة العذاب بتقول إن قتل ١٠٠ نفس ومعملش خير في حياته لازم يروح النار ، وملايكة الرحمة بتقول بس ده تايب وفي نيته إنه يعيش كويس ومؤمن ، فربنا بعثلهم ملك عشان يفصل بينهم قالهم قيسوا المسافة بين البلدين ، لو لقتوه أقرب لأرض الصلاح تاخده ملايكة الرحمة ولو لقتوه أقرب لأرض الفساد تاخده ملايكة العذاب ، وبالفعل قاسوا المسافة بين البلدين لقوها أقرب لأرض

الصلاح بشبر ، فشوف رحمة ربنا اللي قرّبه لأرض الرحمة وبَعده عن أرض العذاب ، ربنا غفور رحيم ، أينعم هو شديد العقاب بس مع اللي بيعند ، لكن اللي بيرجعله مش هيلاقى أحن منه عليه

### ابتسم "فادي" وقال :

- تفتكر ربنا هيقبلني يا شيخ
- وليه ميقلبكش ، لو صادق في النية يبقى هيقبلك وهيساعدك وكل ما تقربله هيقربك أكثر سيدنا محمد .....
- عليه الصلاة والسلام
- عليه الصلاة والسلام قال (يقول الله عز وجل: من ذكرني في نفسه ذكرته في نفسي، ومن ذكرني في ملأ ذكرته في ملأ خير منه، ومن تقرب إلي شبراً تقربت منه ذراعاً، ومن تقرب مني ذراعاً تقربت منه باعاً، ومن أتاني يمشي أتيته هرولة ) ، متقلقش يا ابني ربنا عمره ما يرد عبده التائب ، بس أهم حاجة عشان ربنا يقبل توبتك ، لازم الناس الي انت ظلمتها تسامحك ، لأن الغلط في حق ربنا ربنا هيسامحك عليه ، أما الغلط في حق الناس ربنا مش هيسامحك عليه غير لما الناس نفسها تسامحك عليه
- يعني إيه ؟
- يعني لازم تروح للبت دي وتحاول ترجعلها حقها ، تحاول تراضيها وتخليها تسامحك
- بس ....
- دي مفيهاش بس يا ابني ، مدام قولت هتتوب وعازب ربنا يقبلك ، يبقى لازم ترجع الحقوق لصحابها
- أنا مقدرش أوريهم وشي تاني بعد اللي عملته فيهم ، اللي عملته فيهم مش شويًا

- طب بص فكر في الموضوع ، وأنا يا سيدي هروح معاك

\*\*\*\*\*



٣٤

أصبح  
ذكرى

في الجانب الآخر كان "عزيز" يجوب الأقسام والمستشفيات بحثاً عن "فادي" ثلاثة أيام بلياليها يبحث ويتصل ويدفع لهذه ولذاك بحثاً عنه .  
وفي اليوم الرابع وجدوا هاتفه مع شخص كان ينتوي بيّعه وعند استجوابه من قبل الشرطة قال أنه قد وجد هذا الهاتف ملقى في مكان ما ، انطلقت أجهزة البحث تبحث في المكان الذي وجد به الهاتف وبعد قليل من البحث وجده والده يخرج من باب المسجد بصحبة الشيخ فهرع إليه معاتباً :  
- "فادي" ابني ، كده برضه تقلقني عليك ، كنت فين رد "فادي" بوهن :

- أنا كويس يا بابا متقلقش  
- مقلقش ازاي بقالك ثلاث أيام بره البيت وعاييزني مقلقش ازاي يعني ، كنت فين الفترة الي فاتت دي يا ابني  
أشار "فادي" إلى المسجد بفخر ثم قال :

- كنت عنده يا بابا ، عند اللي عمرك حتى ما فكرت تعرفني اسمه ، عند اللي عمرك ما انت نفسك عرفته ، ربنا يا بابا
- لم يدِرْ "عزيز" ما يقوله ، فقط ربت على كتف ابنه وقال له :
- طب يلاه بينا يا ابني عشان نَرَوْحْ
- لا يا بابا بعد إذْلك أنا مش هَرَوْحْ معاك ، أنا هفضل هنا ، أنا اليومين اللي قعدتهم هنا حسيت قد إيه الدنيا فيها حاجات حلوة كتيرة ، بس مش حلوة بمنظورك انت اللي ياما علمتهولي ، اكتشفت يا بابا إن حلاوة الدنيا مش في الفلوس ولا العربيات ولا القصور ولا الشركات
- نظر "عزيز" إلى الشيخ ناهراً :
- انتوا عملتوا في الواد إيه ، عملتوله غسيل مخ
- رد عليه الشيخ بهدوء :
- احنا عملنا اللي كان مفروض يتعمل من زمان ، شيلنا الغشاوة من على عنيه ، وربناه حقيقة الدنيا الفانية
- زاد غضب "عزيز" وعلا صوته قائلاً :
- أنا مش هسكت ، أنا هوديكم في داهية ، أنا هَبَلِّغْ عنكم ، انتوا إرهابيين هتضيعوا الواد
- غضب "فادي" لهذه الاتهامات الموجهة لشيخه فقال غاضباً :
- بابا لو سمحت .....
- قاطعته الشيخ مهدئاً :
- بالراحة يا ابني ... وبالوالدين احساناً
- قال "عزيز" موجهاً الحديث لابنه :
- انت هتيجي معايا ، ودلوقتي حالاً
- آسف يا بابا ، مش هقدر أسيب المكان اللي اتولدت فيه من جديد
- ثم اقترب من والده وقبّل يد والده قائلاً :

- بليز يا بابا ، لو تهملك سعادتني سيبنني هنا أنا هنا كويس
- كويس .... كويس ازاي ... بالهدوم الي انت لابسها دي ، بدقنك الطويلة دي ، بقى انت "فادي" الي الشباب بتحلف بشياكته
- صدقني يا بابا ، "فادي" الي انت شايفه ده أحسن بكتير من "فادي" التافه الي انت عملته ، "فادي" الي مكانش همه في الدنيا غير انه يسهر ويشرب ، "فادي" الي عمره ما راعى حاجة حرمة
- كان "عزيز" ينوي أن يتحدث ولكن "فادي" أوقفه بإشارة من يده قائلاً :
- بليز يا بابا ، سيبنني مرة أختار حاجة في حياتي
- تأفف "عزيز" قائلاً :
- براحتك ... براحتك يا "فادي" بس بيتي مفتوحك في أي وقت لو حبيت ترجع
- حاضر يا بابا
- همّ بالانصراف ولكنه تذكر شيئاً فعاد لقلوه :
- وفيه شرط كمان ، أنا هبعثك كل يوم أكلك وشربك وهدومك ، وده شرط مفيهوش نقاش
- أوماً "فادي" بالموافقة فانصرف "عزيز" وظل "فادي" وبجواره الشيخ يربت على كتفه فقال له "فادي" :
- أنا نويت يا شيخ خلاص أروح للبننت ، وحضرتك هتيجي معايا
- وأنا معاك يا "فادي" حتى دلوقتي ، خير البر عاجله
- فرح "فادي" بذلك كثيراً ، وانطلق لتوه بصحبة الشيخ يبحثان عن منزل "فرحة" حتى وجدوه أخيراً طرقتا الباب ، فتحت الأم لهما ، لم يكن صعباً على الأم أن تتذكر من كان سبباً في وفاة أعز أبنائها
- تحدث الشيخ قائلاً :

- السلام عليكم يا حجة ، لو معندكش مانع احنا جاينين نشرب عندكم شوية شاي
- بدون أن تتحدث أفسحت لهم الطريق حتى جلسوا وجلست أمامهم تنتظر أن يبدأ أحدهم بالحديث فبدأ "فادي" :
- أنا مهما قولت أو اعتذرت عارف إنه قليل ، أنا لو نمت على الأرض وخليت "فرحة" تدوس على وشي بجذمتها مش كفاية ، أنا جاي أصلح اللي اتكسر ، وأعوضها عن كل اللي فات ، أنا خلاص اتغيرت بقيت حد تاني ، صدقيني وجاي النهارده في نيتي كل خير
- جاي وف نيتك كل خير ، ناوي تدفع كام المرة دي
- نظر الشيخ و"فادي" لبعضهما من فرط الدهشة فقالت الأم لتتقذهم منا :
- أصلها عادتكم مش هتشتروها ، أي حاجة تمنها فلوس عندكم ، المشاعر بفلوس ، الحب بفلوس ، الكره بفلوس ، حتى البني آدمين بفلوس ، شوف انت يا بيه يا ابن البهوات تَقَدَّر بنتي بكام
- يا تنط أنا تحت أمرك في أي حاجة ، بس أنا عايز أشوف "فرحة"
- سكين أخرى غرزها "فادي" في صدرها فقالت بعدما مسحت دموعها :
- مش هينفع تشوفها يا ولدي ، ومنتعشب نفسك مش كل اللي اتكسر ينفع يتصلح
- وهنا تدخل الشيخ قائلاً :
- يا حجة اللي قدامك ده واحد تاني غير "فادي" اللي انتوا تعرفوه ، ده حد تاني بادي بداية نضيصة ، بداية جديدة وعشان بدايته دي ربنا يقبلها منه لازم انتي و"فرحة" تسامحوه وهو ممكن يعوضها عن كل حاجة وحشة شافتها
- يا بيه إذا كان عليا أنا مسامحاك ، بس "فرحة" معرفش إذا كانت هتسامح ولا لا

## رد "فادي" متلهفاً :

- طب قعدينا معاها وأنا هقنعها
- مش هينفع يا ولدي
- مش هينفع ليه ، ٥ دقائق بس
- مش هينفع عشان "فرحة" مش موجودة ، "فرحة" سافرت لعالم تاني ، عالم مفيهوش ظلم ، مفيهوش فرق بين غني وفقير ، "فرحة" بعد ما القاضي حكمك بالبراءة قررت إنها مش هتعيش تاني في الدنيا دي ، "فرحة" ماتت يا بيه ، ماتت ، ماتت وانخرطت الأم في البكاء ومعها "فادي" الذي وجد نفسه يُقْبَلُ يدها ويترجأها أن تسامحه فقالت له بعدما انتهت :

- روح شوف حالك يا ابني ، وادعي ربنا ، ادعيه يقبلك ويرحم بنتي غادر "فادي" المنزل بحالة أسوأ بكثير مما كان عليه ، أغلقت أبواب الدنيا في وجهه ، الأمل الوحيد الذي تبقى له ذاب ، الخيط الذي كان سيربطه بربه انقطع .

وصلا إلى المسجد فانطلق "فادي" إلى الميضة وتوضأ وبدأ يصلي ، كان يبكي في صلاته كما لا يبكي من قبل ، جلس الشيخ بجواره يسمع مناجاته لربه ويبكي معه ، ويؤمن على دعاؤه بالرحمة لـ "فرحة" ودعاؤه بأن يتوسط له الله عندها حتى تسامحه .

استمر "فادي" في اعتكافه بالمسجد ، لمدة شهر ، حفظ فيه القرآن الكريم ، كان يصوم يوماً ويفطر يوماً ، بدأ في حفظ الأحاديث ، أطلق لحيته ، كان يقوم الليل كاملاً كل ليلة .

نصحه الشيخ بالسفر إلى مكة لأداء فريضة الحج حينما جاء موسمهم فلم يتأخر لحظة ورجع وقد عمر قلبه بنور الإيمان ، كان كل من يراه يهنيه على ما هو فيه ما عدا شخص واحد أو شخصين هما والداه الذان كانا ما بين الحين

والآخر يقابلانه ويحاولون إقناعه أن يعدل عن تلك التصرفات التي لا تليق بمثله من وجهة نظرهم طبعاً ، لكنَّ رده كان واحداً ولم يتغير .

في ذلك اليوم كان صائماً ، بعد صلاة العصر وجد الشيخ يجلس بجواره قائلاً :

- معايا ليك بشارة حلوة أوي

- قول يا شيخ

- رتل الشيخ بصوت عذب (وَعِبَادُ الرَّحْمَنِ الَّذِينَ يَمْشُونَ عَلَى الْأَرْضِ هَوْنًا وَإِذَا

خَاطَبَهُمُ الْجَاهِلُونَ قَالُوا سَلَامًا \* وَالَّذِينَ يَبِيتُونَ لِرَبِّهِمْ سُجَّدًا وَقِيَامًا \* الَّذِينَ

يَقُولُونَ رَبَّنَا اصْرِفْ عَنَّا عَذَابَ جَهَنَّمَ إِنَّ عَذَابَهَا كَانَ غَرَامًا \* إِنَّهَا سَاءَتْ

مُسْقَرًا وَمُقَامًا \* الَّذِينَ إِذَا أَنْفَقُوا لَمْ يُسْرِفُوا وَلَمْ يَقْتُرُوا وَكَانَ بَيْنَ ذَلِكَ قَوَامًا \*

وَالَّذِينَ لَا يَدْعُونَ مَعَ اللَّهِ إِلَهًا آخَرَ وَلَا يَقْتُلُونَ النَّفْسَ الَّتِي حَرَّمَ اللَّهُ إِلَّا بِالْحَقِّ وَلَا

يَزْنُونَ وَمَنْ يَفْعَلْ ذَلِكَ يَلْقَ أَثَامًا \* يُضَاعَفْ لَهُ الْعَذَابُ يَوْمَ الْقِيَامَةِ وَيَخْلُدْ فِيهِ

مُهَنَّا \* إِلَّا مَنْ تَابَ وَآمَنَ وَعَمِلَ عَمَلًا صَالِحًا فَأُولَئِكَ يُبَدِّلُ اللَّهُ سَيِّئَاتِهِمْ

حَسَنَاتٍ وَكَانَ اللَّهُ غَفُورًا رَحِيمًا )

عندما وصل الشيخ إلى هذه الآية وجد آثارها على وجه "فادي" وجده متأثراً

بها ثم قال له بعدما تنهد :

- والله يا شيخ أنا حافظ القرآن عن ظهر قلب ، حاسس إنني أول مرة

أسمع الآية دي ، ازاي مخدتش بالي منها ، أنا مش عارف أقولك إيه يا

شيخ ، أنا حاسس إن ربنا باعتك ليا من السما ، أنا مش عارف انت

بتعمل معايا كده ليه ، أنا لو ابنك مكنتش هتعمل معايا ربع اللي

عملته ده

ابتسم الشيخ وقال له :

- ومين قالك انك مش ابني ، يمكن ربنا باعتني ليك يا ولدي عشان  
أدلك على الطريق الصح ، أنا معملتش حاجة يا ولدي ، انت الي ربنا  
بيحبك ، ربنا عارف إن الذنب من ذنبك في كل الي كنت فيه ، ذنب  
أبوك الي فهّمك الدنيا غلط

**قاطع كلمات الشيخ ، كلمات غاضبة كانت لـ "عزيز" حيق قال :**

- كده صح ، وأنا أقول الواد متغير ليه معايا ، أنا قلبي حاسس إن كله  
من وراك انت يا بوز الأخص

**ابتسم الشيخ ولم يقل إلا :**

- ربنا يسامحك يا بيه  
- هيسامحني طبعاً ، انما انتوا مش هيسامحكماً أبداً لما تفرقوا بين الأب  
وولده ، لما تخلوه ميسمعش كلام غير كلامكم ، عاملين نفسكم  
مشايخ وبتوع ربنا

**هنا تدخل "فادي" قائلاً :**

- أرجوك كفاية يا بابا ، الشيخ ميستاهلش منك ولا كلمة من كل الي  
قولته ده ، هو معملش حاجة

- معملش حاجة بعد كله ، بص لنفسك وانت تعرف هو عمل إيه ، بقى  
انت "فادي" انت ، إيه الجلابية الي لابسها دي ، وإيه الدقن دي ؟ على  
آخر الزمن ابني أنا بقى درويش ، وشويا شويا هياخدك يلف بيك في  
الموالد ، بص هو قرار ومفيش رجعة فيه ، انت هتروح معايا دلوقتي  
حالاً

**رد "فادي" بغضب :**

- يووووه يا بابا هنتكلم تاني في الموضوع ده ، مش كنا اتفقنا  
- لا متفقناش إنك تضيع حياتك ومستقبلك

وهنا قطع الجميع صوت سريّة سيارة الشرطة وهي تعوي خارج المسجد وينزل منها بعد الضباط والعساكر ويدخلون المسجد بعدما خلعوا عنهم أحذيتهم ويتجهون نحو الشيخ ويمسكون به ، فَيَهِّمُ "فادي" للمدافعة عنه فيمسك به والده فتكلم والده بخبث :

- فيه حاجة يا حضرة الضابط

رد الضابط :

- لا مفيش ، بس إجراء روتيني ، محتاجين الشيخ في كام كلمة في القسم

رد "فادي" قائلاً :

- طب هو هيرجع تاني

- والله دي حاجة بإيده هو ، لو جه دوغري معانا واعترف ، هنسيبه ، إنما لو لاونع يبقى هو اللي جنى على نفسه

تحرك العساكر ومعهم الشيخ في وسط المزيد من التساؤلات التي تحتاج إلى أجوبة ولكن أجوبتها لا يُعرف لها طريق .

استغل الموقف "عزيز" وقال لابنه :

- شايف يا ولدي السكة اللي انت ماشي فيها دي آخرتها إيه ، تعالى يا ابني بيتك أولى بيك ، وبعدين ربنا مقالش كده ، مقالش إنك تسيب حالك ومالك ، وتترهبين في الجامع

نظر "فادي" للجهة الأخرى ، هرباً من أبيه واقتناعاً بحديثه فأكمل "عزيز" :

- يا ولدي ، عاوز تعبد ربنا اعبده ، مقولناش حاجة ، بس ربنا عرفوه بالعقل ، صلي زي ما انت عايز ، بس برضه اشتغل ، صوم زي ما انت عايز ، بس عيش حياتك

اقتنع "فادي" بكلام والده ، وذهب معه إلى المنزل لأول مرة منذ ثلاثة شهور ، استقبلته والدته بوابل من القبلات والأحضان .

تم تجهيز غرفة أخرى لـ "فادي" حتى لا يتذكر ما حدث في غرفته .  
ثم بدأ "فادي" ينزل عمله مع والده الذي حاول بكل الطرق أن يقنعه حتى يحلق ذقنه ولكنه رفض وظل متمسكاً بها لأنه سُنَّه عن الرسول صلى الله عليه وسلم ، كانت هيئته وتصرفاته تدل على ما تعلمه في الفترة السابقة ، كانت الموظفين تتسائل ولكن في صمت ، لم يكن أحد يجروء أن يفتح فمه بأي شيء ، حتى بعدما استبدل معظم الموظفين التي لهن تعامل مباشر معه بموظفين رجال من باب غض البصر .

كان يحافظ على صلواته في ميعادها ويحافظ على مراجعته للقرآن الكريم يومياً ، وكان ما بين حين وآخر يذهب للمسجد يسأل عن الشيخ ولكنه لا أثر له من بعد ما قبضت عليه الشرطة ، ولكنه سمع بعض طرايش الكلام من أنه محبوس في قضية سياسية ، ولكن كيف وقد قضى معه ثلاثة شهور لم يجده ولو مرة واحدة يتحدث في أمور سياسية .

مر شهر آخر عليه في منزل والده لم يتغير حاله كما كان يتوقع والده ، كان كل جمعة يصلي في المسجد ويسأل على الشيخ ولكن دون فائدة .  
كان "عزيز" يتحدث في حجرته مع زوجته التي قالت له :

- وبعدين في الواد ده يا "عزيز" ، أنا مش عاجبني حاله كده ، بدقنه دي ، أنا صحابي بقوا بيعاروني بيه
- طب أنا هعمل إيه يا "نسرين" أكثر من اللي عملته ، الراجل اللي كان لاحس دماغه حبستهوله وخفيته عن وشه
- أنا ابني هيضيع مني مليش دعوة اتصرف
- كانا يتحدثان بطمأنية ولم يكن في حسابانهم أن هناك من يسمع حديثهم ففتح الباب عليهم وفي عينيه تساؤلاً واحداً فقال والده :
- خير يا "فادي" يا حبيبي
- خير ... هو فيه خير بعد اللي سمعته ده

نظر "عزيز" إلى زوجته وكذلك فعلت هي فأكمل "فادي" :

- انت ازاي كده ، ازاي حد برئ زي ده تعملوا فيه كده ، طب هو إيه

ذنبه ، بقى دي مكافئته بعد اللي عمله معايا

نهض "عزيز" من على سريريه قائلاً :

- عمل إيه يعني ، ده دمر حياتك وحولك لآلة ... درويش

وأمسك به من ذراعه وجره نحو المرآه قائلاً :

- بص ... شوف نفسك في المرآة بقيت ازاي

نزع يده من يد والده بعنف وتحرك إلى غرفته وجمع ما طالته يده من ثياب

في حقيبة وغادر في وسط طلبات وتوسلات من والديه لأن يعود ولكن بلا فائدة

وصل إلى المسجد ودخله بسهولة لأن مفتاحه ما زال معه وتوضأ وصلّى في

محراب المسجد وظل يدعو الله ويطلب من المغفرة على ذنب لم تقترفه يده ،

ظل يدعو ويبتهل لله أن يُرجع له شيخه ومعلمه .

وأصبح مرة أخرى يبيت في المسجد لا يخرج منه وعندما أخبروه أن والده

يطلبه خارج المسجد رفض مقابلته أكثر من مرة ، جاءت إليه والدته وأيضاً

رفض مقابلتها .

تدهورت حالته الصحية ، ما بين صيامه وقيامه وحزنه على شيخه الذي لا

يعلم عنه أي شيء ، الذي ما زال يشعر بالذنب فيما حدث له ، أينعم لم يكن

له يد فيما حدث ولكن هو نفس الشخص الذي تحت مسمى حبه والحرص

عليه جعله شيطان يمشي بين البشر والآن نفس الشخص أيضاً تحت مسمى

حبه والحرص عليه حرمه من الشخص الوحيد الذي انتشله من ضياعه

ووضعه على الطريق الصحيح ، وليس حرماناً فقط إنما قد يكون الشيخ في

مأزق بسببه .

لأول مرة خرج من المسجد بعد ذلك وجد نفسه يذهب إلى منزله فقابله أبيه بالترحيب والسعة ولكن وجه "فادي" لم يكن يدل على أنه ينتوي خير فسأل والده بحدة :

- انت عملت إيه في الشيخ يا بابا
- انت !؟! بتقولي انت يا "فادي" ، لسه برضه في ضلالك مفوقتش
- ومش هفوق غير لما أعرف هو فين وأشوفه وأكلمه ويخرج من اللي هو فيه
- يعني لو خرج ورجع بيته وشفته هترجع تعيش معانا تاني هنا
- ساعتها هبقى أفكر
- لا إوعدني إنك لو شفته مش هترجع تعيش في الجامع تاني
- معنديش وعود غير لما أشوفه وأطمئن عليه
- تحرك والده قليلاً وأخرج هاتفه وأجرى مكالمة تعمّد إخفاء تفاصيلها عن "فادي" وبعدها أنهى مكالمته قال لـ "فادي" :
- تعالى معايا يا "فادي"
- ركب مع والده سيارته إلى مكان لم يسأل عنه ، كل ما كان يدور بخلده أنه أخيراً سيقابل شيخه ، دخلا على ضابط شرطة فرحب بهما وأمر العسكري أن يأخذ "فادي" إلى مبتغاه
- في زنزانة مفردة فتحها له العسكري وأغلقها بعدما دخل من بوابتها الضيقة فوجده مُلقى على حصيرة خشنة وتبدو عليه آثار التعب والمرض ، جرى عليه وأجلسه وهو يقبل يده قائلاً :
- حقك عليا يا شيخ ، حقك عليا ، أنا آسف ، أنا السبب
- نظر إليه الشيخ بفرحة ثم قال له :
- "فادي" كنت متأكد إنني هشوفك النهارده ، عشان هو قالي كده
- بدهشة سأل "فادي" :

- هو ميين؟!!
- حبيبك ، حبيبك يا "فادي" جالي امبارح وقالي أوصلك السلام ،  
فعرفت إنني هشوفك قريب ، فمدام شفتك ....  
ثم سعل الشيخ بطريقة غريبة وأكمل :
- يبقي خلاص ، أنا كنت خايف معرفش أوصلك رسالته ليك ، بس  
الحمد لله ، كده أنا هموت وأنا مرتاح
- ثم نطق الشهادتين وخرجت روحه الصافية ، فبكى "فادي" كما لم يبكي من  
قبل ثم نادى على الحارس الذي دخل مسرعاً ورأى "فادي" على تلك الحالة  
جرى ليحضر الضابط الذي حضر بسرعة للمعاينة ، وبعدها بلغ القيادات .  
طلب "فادي" منه أن يُخرج الشيخ ليدفنه بعدما يبلغ أهله وبالفعل تمت  
مراسم الدفن والعزاء ، وجد "فادي" أبيه يطلب منه الرجوع إلى البيت فابتسم  
ابتسامة صفراء ثم قال :
- انت السبب ، منك لله ، عمري ما هسامحك على اللي عملته فيا  
ظلّ "فادي" معتكفاً في المسجد ما بين شيخه الذي أصبح ذكرى ، وحزنه عليه  
لمدة شهرين آخرين .

\*\*\*\*\*



# ٣٥

نهاية  
سعيدة

ذات ليلة كانت ليلة جمعة ، كان "فادي" كعادته يسهر لقيام الليل وعند وقت السحر غفت عينيه ورأى في المنام نوراً أبيضاً هابطاً من السماء وعندما اقترب منه وجدته الشيخ "عبد الرحيم" ذهب إليه مسرعاً فحياه الشيخ :

- السلام عليك يا "فادي"
- وعليكم السلام
- أنا جيتك النهارده بعد ما ربنا خلص حسابي ، ودخلت الجنة وجايبك مفاجأة من هناك
- أشار الشيخ بيده إلى ناحية اليمين ليرى "فادي" شبح سيدة ترتدي ثياباً بيضاء جميلة ، كانت "فرحة" فاقترب منها "فادي" فرحاً فقالت له :
- ازيك يا "فادي" ، عم الشيخ "عبد الرحيم" حكالي على كل اللي انت عملته ، وطلب مني أسامحك ، وأنا مسامحك يا "فادي" ومستنياك النهارده عشان تفطر معنا
- ثم اختفى الاثنان واستيقظ "فادي" من نومه فرحاً لتلك الرؤية فقام وتوضأ وأكل شيئاً بنية الصيام وصلى الفجر وظل بعد الفجر يتلو شيئاً من القرآن ،

وجد نفسه يتلو (وَعِبَادُ الرَّحْمَنِ الَّذِينَ يَمْشُونَ عَلَى الْأَرْضِ هَوْنًا وَإِذَا خَاطَبَهُمُ الْجَاهِلُونَ قَالُوا سَلَامًا \* وَالَّذِينَ يَبِيتُونَ لِرَبِّهِمْ سُجَّدًا وَقِيَامًا \* الَّذِينَ يَقُولُونَ رَبَّنَا اصْرِفْ عَنَّا عَذَابَ جَهَنَّمَ إِنَّ عَذَابَهَا كَانَ غَرَامًا \* إِنَّهَا سَاءَتْ مُسْتَقَرًّا وَمُقَامًا \* الَّذِينَ إِذَا أَنْفَقُوا لَمْ يُسْرِفُوا وَلَمْ يَقْتُرُوا وَكَانَ بَيْنَ ذَلِكَ قَوَامًا \* وَالَّذِينَ لَا يَدْعُونَ مَعَ اللَّهِ إِلَهًا آخَرَ وَلَا يَقْتُلُونَ النَّفْسَ الَّتِي حَرَّمَ اللَّهُ إِلَّا بِالْحَقِّ وَلَا يَزْنُونَ وَمَنْ يَفْعَلْ ذَلِكَ يَلْقَ أَثَامًا \* يُضَاعَفْ لَهُ الْعَذَابُ يَوْمَ الْقِيَامَةِ وَيَخْلُدْ فِيهِ مُهَانًا \* إِلَّا مَنْ تَابَ وَآمَنَ وَعَمِلَ عَمَلًا صَالِحًا فَأُولَئِكَ يُبَدِّلُ اللَّهُ سَيِّئَاتِهِمْ حَسَنَاتٍ وَكَانَ اللَّهُ غَفُورًا رَحِيمًا )

وظل يردد تلك الآيات طيلة النهار ، في صلاته وسكونه حتى جاء المغرب وأذن المؤذن وأقيمت الصلاة ، وللصدفة كان إمام المسجد الجديد غائبا في ذلك اليوم فقدمه المؤذن حتى يؤم الناس .

تقدم "فادي" قائلاً :

- استوا واستقيموا وصلوا صلاة مودع

ثم رفع يديه وكبّر ثم قرأ الفاتحة وبعدها بدأ يقرأ الآيات السابقة حتى وصل إلى قوله تعالى (إِلَّا مَنْ تَابَ) فلم يستطيع أن يكمل ، فركع ثم اعتدل ثم سجد ثم اعتدل ثم سجد ثم قام فقرأ الفاتحة وبدأ يقرأ نفس الآيات إلى أن وصل أيضاً إلى نفس الكلمة (إِلَّا مَنْ تَابَ) ولم يتذكر ما بعدها أتمّ صلاته باكياً حتى سلم ، كان صوته مبجوحاً لدرجة أن من خلفه لم يسمعوا تكبيراته .  
بعدها انصرف المصلون اتكأ على أحد أعمدة المسجد ، جاءه خادم أبيه ومعه الطعام كعادته حدثه ولكن "فادي" لم يرد عليه ، فانطلق يُبلغ والده .  
ظل "فادي" شاهراً بصره للسماء وبيتسم ثم رفع سبابته الوسطى إلى السماء ونطق الشهادتين وفارقت روحه جسده ، الروح المحظوظة التي مارست أبشع أنواع السيئات ، كانت نهايتها هذه النهاية الطيبة .

جاء والده مسرعاً يحدثه ولكن لا فائدة من الحديث مع ميت لن يسمعك في أي حال من الأحوال .

نظر "عزيز" إلى السماء ولأول مرة يبكي بحرقه ثم وقف في منتصف المسجد وصرخ بأعلى صوته :

- انت بتعمل معايا كده ليه ، انت مش عادل ، ابني هعيش غضب عنك برضاك هعيش ، ابني مش هيموت انت فاهم ، مش هيموت ثم خرج من المسجد لا يدري أين يذهب ، ركب سيارته فاصطدم بسيارة أخرى وتم نقله إلى المستشفى وأصيب بشلل تام ، في النطق والحركة . ولم تكن تلك الصدمة بأكبر من صدمته في شركاؤه الذي استغلوا مرضه وسرقوا كل أمواله وأسهمه في الشركات التي كان يديرها ، حتى "نسرين" زوجته لم تعد تطيقه أو تتحملة على ذلك الوضع فألقت به في أحد دور رعاية كبار السن بمصاريف رمزية .

#### انتهت القصة

في عالمنا الكثير والكثير المشابه لشخصياتها ، بيننا الشخص الذي يؤمن أن المال هو كل شيء ، فكرت كثيراً قبل أن أجعل نهاية "فادي" سيئة جراء مع ارتكبه من معاصي وجرائم ولكن حين فكرت قليلاً في الأمر وجدت أن "فادي" كان ضحية من ضحايا أفكار والده لذلك جعلت نهاية والده هي الأسوأ ولكن تذكر (النهايات نادراً ما تكون سعيدة )

تمت بحمد الله

هاني أبو طالب